



DUKE
UNIVERSITY
LIBRARY

Treasure Room





ORATIONES

AESCHINIS ET DEMOSTHENIS INTER SE CONTRARIÆ à Dionysio Lambino Monstroliensis litterarum Græcarum in schola Parisiensi interprete, & doctore Regio in Latinum sermonem conuersæ.

Ad Michælem Hospitalem Gallie cancellarium, virum clarissimum.



Βασιλεὺς τ' ἀγαθῶν, κρατερῶν τ' ἀίχμητῆ.

LVTETIÆ CIO. I. O. LXV.

Apud viduã Guil. Morelij in Græcis typographj Regij.

ERRATA SIC CORRIGITO

- pag. 8. *habes in murorum refectioem,*
9. *coarguunt &*
14. *quæ in contionem*
26. *Sed cum primùm in Eubœam*
31. *ei oppignerauerunt*
51. *paucorum dominationi studen-*
59. *scriptum est, scribe vobis*
88. *quàmque iustam*
96. *plana fient.*
101. *habuit tum in Græcos*
131. *& speciosas nacti, principatum ad*
140. *difficilibus reip. temporibus*
144. *& tres expediendæ*
149. *& cogitare vni cum*
159. *incedo: quo*
ibid. *præbuisset, eo ipso*

82530

D. Lambinus MICHAELI HOSPI-
TALI GALLIAE CANCEL-
LARIO SAPIENTISSIMO,
DOCTISSIMO, ET ELOQUEN-
TISSIMO VIRO S. D.



Emoriae proditum est à bonis auctori-
bus, Michaël Hospitalis, priscos illos
Gallos, maiores nostros vltimos, Her-
culem optimè de hominum genere
meritum, quem Ogmium sua lingua ap-
pellabant, non dissimili, atque Græ-
cos, religione coluisse: sed longè dissimili tamen habitu
& figura conformatum pingere consueuisse. Eum enim
admodum senem, partim caluum, reliquo capillo cane-
scentem, rugosum, & torrida cute aridum pingebant,
adeò vt Iapeti cuiusdam, aut Saturni, non Herculis spe-
ciem præberet. Neque verò est quòd quisquam suspice-
tur, quemuis potius, quàm Herculem, hac pictura expref-
sum fuisse. Cultus enim atque ornatus planè erat Her-
culis: quando quidem & pelle leonis amictus erat, & dex-
tra clauam tenebat, & læua arcum gerebat, & ex hume-
ro pharetra pendeat. Quid multa? si imago solida esset,
sine ea sanguis & spiritus, & ratio inessent, Hercules ger-
manus erat. Habebat hæc pictura aliud admirabile, & pæ-
ne dicam, incredibile. Ingètem hominum multitudinem
auriculis religatam trahebat. Vincula porrò erant cate-
nulae tenues ex auro & electro affabrè factæ, monilibus
pulcherrimis similes. Homines autem illi tametsi catel-
lis ita infirmis & fragilibus traherentur: neque fugam
meditabantur tamen, cum facile effugere possent, si vel-
lent: neque aut toto corpore resistebant, aut pedibus
contrà nitebantur, in aliam partem, quàm quò ducebantur,
sefe resupinantes: sed contrà, libentes, læti, & alacres
ducem sequebantur, quasi ei, qui ducebat, si modò id ex
pictura intelligi possit, gratulantes, quasiq; eum lau-
dantes, atque hortantes, vt ducere, quò vellet, perseue-

raret: studio sequendi ita vincula laxantes, vt & ducem
 anteuertere velle, & si soluerentur, molestè latu-
 ri esse viderentur. Sed ne id quidem prætereundum est, quod
 in ea pictura absurdissimum erat. Nam cum pictor nihil,
 cui summam catenam annexerit, haberet, quoniã dex-
 tram claua, læuam arcus iam occupasset, extrema Her-
 culis lingua perforata, fecit illos ex ea trahi, Herculis fac-
 cie in eos obuersa, hilara, & subridente. Ac talis qui-
 dem pictura fuit. Significabat autem primùm vim ora-
 tionis esse maximam, ac tanto viribus corporis maiorẽ,
 quanto Hercules Mercurio robore corporis antecellit:
 deinde facundiam senilem solam eloquentiæ nomine
 dignam esse, solamque eloquentiæ vim obtinere: neque
 id immeritò. Ea enim demùm vera est eloquentia, quæ
 cum prudentia & sapientia coniuncta est. At prudentia
 & grauitas, propria senectutis est, quemadmodũ temeritas
 & leuitas florëtis ætatis: quod testatur his verbis etiã
 poëtarum princeps Homerus, ὀπλοτέρων φρένες ἤερέθονται,
iuuenum mens vana, leuisque. Itaque quantumuis licet nõ-
 nulli iuuenes interdũ flumine inaniũ verborũ admiratio-
 nẽ multitudinis excitent, assensũmq; atque approbatio-
 nem vulgi moueant, à prudentibus tamen existimatori-
 bus neque oratores iudicari debent, neque eloquentes,
 sed potius molesti rabulæ de foro, & inepti clamatores.
 Hoc vidit idem ille poëta, qui seni Nestori orationem
 melle dulciorem affingit, non illam iuuenibus vsitatam,
 hoc est prudentia vacuum, atque è labris nascentem, sed
 planè senilem, id est, prudentiæ, consiliũque plenam, &
 grauissimas ex alto mētis recessu sententias elicientem,
 atque explicantem. Quo nomine princeps ille Græciæ
 Agamemnon optat vt decem habeat non Aiacis, sed
 Nestoris simileis quod si cõtigerit, confidit se breui Tro-
 ia potiturũ. Idẽ Troianos oratores facit vocẽ λειριώσθη
 mittere: quasi quis dicat lilij instar candidam, & foridam:
 quid aliud significans, quàm orationem senilem non vnã

cum

cū corpore deflorescere, atq; exarescere, sed vnà cū prudentia, quā affert senectus, virescere ac florescere? Quid quòd idem eosdem cicadis simileis esse dicit? nōne quamuis obscurius, & φιλοσοφικώτερον, sine controuersia tamen innuit senum maximè propriam esse eloquētiam natura? Cicada enim eò quòd sit animal frigidum, tenue, macilentum, atque exsanguē natura, senectutem designat. itaque Tithonum poētæ fingunt diu viuendo in cicadam esse conuersum, significantes eum ætate longissimè processisse. longa enim ætas hominum corpora minuit atque extenuat. quod autem idem sit sonorum, vocale, musicum, & canorum, senes esse suapte natura facundos ac disertos declarat. Itaque fidicini cuidam interea dum fidibus caneret, chorda vna, quam fortè pulsauerat, rupta, aiunt cicadam, quasi citharædo illi subsidio venisset, sonum, quem chorda rupta non reddiderat, strepitu suo suppluisse. Sed redeo ad Herculē. Eum igitur Galli nostri, illos dico indigenas, &, vt Græco verbo dicam, αἰσχρονας, existimabant sapientissimum & eloquentissimum quendam virum fuisse: & vel omnia, quæ ab eo armis gesta & confecta esse fabulantur poētæ, sapientia, & oratione administrasse ac transegisse, vimque hominibus non claua, non iaculis, non viribus corporis, sed dicendi facultate, verbis, persuadendo intulisse: (erāt enim verba, celerrima illa, & acutissima tela scilicet, quæ in animos hominum ferorum penetrabāt, quæ animos agrestium configebant, ac fauciabant:) vel, si quando arma capere, atque expedire coactus sit, ea sic ratione, & consilio, & eloquentia temperasse ac rexisse, vt neque vnquam ab humanitate recesserit, & semper bellis suscepti secundum, atque optatum exitum habuerit. Et rectè. Quid enim minus credibile est, quàm, non dicam Iouis filium, sed eum virum, quem posteritas propter singularia, & plurima in genus hominum merita immortalitati consecrauit, atque ad cælum extulit, solis corporis

viribus vsū, monstris, & talibus pestibus orbem terrarum liberasse? tyrannos, & iniustos, & maleficos homines armis & ferro subegisse? Nam si nihil præter id, quod lacertis, & corporis robore gestum sit, diuinos honores, & immortalem gloriam mereatur, multo præstabāt Herculi gigantes illi *ἥρώεσσι*, & res longè maiores, atque admirabiliores conficere poterant. Sed non ita est. Illorum enim vim prudentiæ, atque eloquentiæ expertem, ira deorum, id est sapientium virorum prouidentia perculit atque afflixit: Herculis autem vireis ratione & consilio temperatas, & cum eloquentia coniunctas, dii immortales adiuerunt, eoque prouexerunt, vt & à feritate, atq; iniustitia orbem terrarum vindicaret, & immortalitatem sibi compararit. Ne multa, flexanima illa, omniumque rerum humanarum regina, eloquentia, præsertim senilis, primorum illorum hominum vitam soliuagam, iniustam, violentam, latrocinijs infestam, turbulentam, ac ferinam ad cultum ciuilem, iustum, legitimum, tutum, pacatum, tranquillum, atque humanum reuocauit, vrbeis condidit, iura descripsit, leges rogauit. Huius igitur tanti boni, ac propè diuini, Michaël Hospitalis, quòd te videbam in Gallia nostra principatum obtinere, Regique nostro Christianissimo Karolo nono, adolescenti optimo contigisse in consilio dando non modò Nestorem, sed Gallicum quendam Herculem, cuius sapientia diuina, eloquentiæque senili, & præterita reip. vulnera sanare, & præsentia incommoda leuare, & futura prouidere, ac propulsare possit, quòdque mecum sæpe recordabar quantum tibi bonarum litterarum, omniumque liberalium artium, & linguarum eruditarum doctores ac magistri, quos hæc schola Parisiensis innumerabileis habet, & maximè Regij, debeant: cùm vellem tibi meum erga te gratum animum declarare, neq; quicquam haberem te dignum, quod ad te mitterem: duas tamen inter se contrarias duorum totius Græciæ eloquentissimorum AEschinis & Demosthenis orationes

supe-

superioribus diebus à me, dum eas meis auditoribus explico, in latinum sermonem conuerfas, tibi donare, ac dicare constitui, non vt tu homo occupatissimus eas legeres, qui, siquid tibi vacui temporis daretur, Græcas potius, quàm Latinas, præsertim meas, legeres: sed primùm vt ex hoc qualicumque munere singularẽ meam referenda tibi gratiæ voluntatem perspiceres: deinde vt tuum vetustum erga scholam Parisiensem studium, atq; amorem omnibus notum, & testatum, non illum quidem è memoria tua depositum, aut obliuione obrutum, sed occupationum tuarum magnitudine, ac multitudine nonnunquam retardatum, atque interruptũ renouarem, ac refricarem: in qua aduenç quidam & peregrini homines, qui omneis vias pecuniæ conciliandę norunt, cùm oporteat peregrinum in aliena rep. nõ esse curiosum, nedum alienum appetere, & parteis aliènas sibi præripere, duobus speciosis, & plausibilibus nominibus vsarpatis, religionis, & doctrinæ, Rectore huius nobilissimæ scholæ, ipsq; qui gymnasijs præsunt, inuitis, ludum discendi nuper aperuerunt: iuuetutem incautam, discendi cupidam, litterarũque studio flagrantem blanditijs, & inanibus promissis à gymnasijs antiquis auocatam, atque auersam ad se pelliciunt: quasi verò aut doctores & magistri Lutetiæ desint, aut ij, qui sunt, non infinitis partibus sint arrogantissimis istis & vanissimis hominibus doctiores: aut Galli, qui omnium honestarum disciplinarũ, bonarũque artium gloria excellunt, nisi à peregrinis, & barbaris istis doceantur, indocti sint futuri: aut tutius sit Gallos, suos liberos tradere & committere docendos ignotis & alienigenis, quàm notis & in eodem solo natis: aut maiores nostri hæc tam multa, & sumtuosa litterarum gymnasia eo consilio ædificarint, vt vel essent murium domicilia, vel à peregrinis, ciuibus eiectis, occuparẽtur: aut superiores Galliæ reges non eo animo tot singularia iura, quę priuilegia vulgò appellamº, in scholã Parisiensem contulerint, vt ea à quàm maxima docentium ac di-

ſcientium multitudine celebrarentur, maximè que florent: aut clariffimi viri doctores Regij Adr. Turnebus, Io. Auratus, P. Ramus, Io. Mercerus: ceteri, quos enumerare longum ſit, fruſtrà à Rege docendi muneri præpoſiti ſint: multa præterea contra morem atque inſtituta maiorum magno non ſolum huius ſcholæ Pariſièſis, ſed etiam totius vr̄bis detrimento moliuntur, & committūt, dum neſcio quo diplomate (quod theologi noſtri improbarunt) freti, vltro ingredi geſtiunt in ædeis alienas, vt inquirant & explorēt quid quiſque de cæremonijs antiquis & religione ſentiat, dum ſe neque legibus vllis teneri, neque magiſtratibus vllis obtemperare debere, neq; à quoquam in ius vocari poſſe, & vt Græci dicunt, *ἀντιπροδίκους* & *ἀντιπρυθύρους* eſſe prædicant: quaſi verò aut alium habeamus in Gallia dominum, ſecundum deum, quàm Regem noſtrum, Karolum: aut princeps vll^o externus nouas leges nobis imponere, & nouæ ſectæ inuentores in vr̄bibus Galliæ, atque adedò in ceruicibus noſtris collocare ſuo iure poſſit: aut deſint nobis probata, & iam vſu recepta religioſorum virorum collegia, & ſodalitia, quæ quamuis magno oneri ſint populo, ſuſtinentur tamē à nobis, fouētur, atq; aluntur cùm proptervetuatē, tum propter pietatē, tum ob cognationē, & generis cōmunionem: aut quos habet Lutetia theologos, doctiſſimos, & clariffimos, ij neſciāt quæ ſit vera & recta de pietate ſentētia, quæque approbata Chriſtiani hominis inſtitutio. Sed hac de re nimis fortaffe multa, præſertim hoc loco. Te pro tuo in ſcholâ Pariſienſem, & in totam Galliam ſtudio, oro atq; obſecro, vt huic quoque cogitationi in tuis maximis curis aliquid impertias temporis, vt prouideas, ne hæc quondam celeberrima & florentiſſima ſchola, in qua amplificanda atque ornanda reges Galliæ ſuperiores tantopere elaborarunt, noſtra negligentia vaſtetur, & deſiſceſcat. Vale.

ARGVMENTVM ORATIONIS

ÆSCHINIS RHETORIS IN CTE-

siphontem, incerto auctore, D.

Lambino interprete.



*C*tesiphon scitum fecit, ut Demosthenes Demosthenis F. Paanicus corona aurea donaretur, cuiusque corona predicatio in theatro fieret ludis Liberi patris, tragœdis iam iam in scenam prodituris, & recitaturis: quia assidue res populo Atheniensi optimas atque utilissimas & diceret & ageret. Huius populi sciti nomine Ctesiphontem in iudicium adduxit Æschines, tanquam contra leges scripti. Affert autem summa capita. & causa firmamenta tria: vnum, quod Ctesiphon Demosthenem rationum referendarum iudicio obligatum corona donandum censuerit, cum lex veteret, magistratum rationibus referendis obligatum corona donari: atque hoc caput pertinet ad questionem, an sit. Secundum, quod coronam in theatro à præcone pronuntiandam censuerit, cum lex veteret, quenquam in theatro coronari: & hoc pertinet ad questionem qualitatis. Tertium & postremum, quod falsa decreto complexus sit. Non enim Demosthenem esse fortem, aut bonum virum, neque corona dignum. Referendum autem etiam hoc est ad crimen de decretis contra leges factis, quoniam lex quædam est, quæ vetat falsi in decretis perscribere. Pertinet porò hoc ad questionem quale sit. Obiectiones autem occupat tres. Ad primum quidem illud, duas: nempe dicturum Demosthenem, se non esse functum magistratu: & murorum reficiendorum munus, non esse magistratum, sed ministerium quoddam & curationem. quod si demus, esse magistratum: at quia de suo sumtum fecerit, & id, quod impenderit, expensum non tulerit, neque à ciuitate recuperarit, non esse se rationibus referendis obligatum. quod vtrunque ad questionem an sit, pertinet. et. His autem opponit caput coniecturale, quod tamen non probat: Demosthenem nihil de suo largitum esse, sed à senatu decem talenta attributa habuisse. hoc etiam pertinet ad questionem an sit. Contra secundum autem firmamentum Æschinis, cum Demosthenes legem aliam proferat iubentem, aut certè permittentem, coronam pro-

nuntiari in theatro, si populus auctor fuerit: *Aeschines* negat, hanc legem esse de coronis urbanis aut ciuilibus, sed de externis. hoc & ad quaestionem an sit, pertinet. Ad tertium caput multa singillatim affert *Demosthenes*. Suspiciatur autem *Aeschines*, aitque sibi nuntiatum esse, *Demosthenem*, defensionem in quattuor tempora tribuisse, singulasque actiones atque administrationes resp. in haec tempora partitum esse. Ac primum quidem tempus dicit esse belli primi tempus, quod bellum Athenienses cum *Philippo* de *Amphipoli* gerebant, à *Demosthene*, & *Philocrate* compositum ac sedatum: Secundum, tempus pacis usque ad illum diem, quo die *Demosthenes* pace diremta belli auctor fuit: Tertium, belli secundis, & cladis ad *Cheronéam* acceptae: Quartum, praesens tempus, quod versatur in ijs rebus, quae populo Atheniensi cum *Alexandro* intercedunt. In primo igitur illo tempore, ait eum pacis causam fuisse, quae turpis esset & ignominiosa. causam praeterea fuisse, quam obrem eam ciuitas in Graecorum communi consensu, consilioque non fecerit. In secundo, bellum aduersus *Philippum* conflaguisse. In tertio, belli sacri, & eorum, quae *Phocensibus* acciderunt, & cladis ad *Cheronéam* acceptae causam fuisse, adductis & impulsis Atheniensibus, ut bello aduersus *Philippum* suscepto, & societate belli cum *Thebanis* facta, coniunctis copijs praelio cum illo decertarent. In postremo tempore, quiescisse, tacuisse, ciuitati denique neque re, neque consilio profuisse, cum ei, si *Alexandrum* odio persequeretur, populumque amaret, de patria bene merendi summa facultas daretur, absente *Alexandro*, & in *Asia* legem gentium bellum gerente. Deinceps totam *Demosthenis* vitam insectatur & reprehendit: ipsius etiam *Ctesiphontis*, sed breuiter & paucis: in quibus postulat à iudicibus, ut ipse pro se dicat, neque *Demosthenem* patronum adhibeat. Summa igitur huius orationis haec est, praecipuaque, quibus est usus *Aeschines*, capita, haec sunt. Causam autem obtinuit *Demosthenes*. Reprehenditur porro à quibusdam *Aeschines*, quod in criminibus de decretis contra leges scriptis non haeserit, sed actiones, & res gestas *Demosthenis* vituperarit, & accusarit, cum ille remp. bene gesserit: hic tamen contra hac in re robur, & firmitermentum suae causae collocat, his verbis: Restat autem mihi pars accusationis, in qua multum studij, operaeque pono. haec autem pars, causa est, propter quam causam *Demosthe-*

nes se corona dignū esse dicit. Sed verendū est, ne hoc *AE-*
schines rectissimè atque vtilissimè fecerit. Quoniam enim hæc erat
 omnium de *Demosthene* existimatio atque opinio, eum lautissimè,
 amplissimè, & magnificentissimè *remp. administrasse*, non imme-
 ritò putauit frigidam, leuem, nulliusque ponderis omnem suam de
 decreto contra *leges scripto orationem futuram*, nisi hanc hominum
 opinionem in eorum animis insitam euelleret, & nouam in sereret,
 nempe *Demosthenem* ciuem esse maleuolo in *populum Athen.* ani-
 mo, turpiterque & perditè *remp. administrasse*. Iccirco in hoc ma-
 ximè elaborauit, & in hac accusationis parte plurimum immoratus
 est. Omnino reprehendere possit aliquis proœmium, vt tragicum &
 nimis elaboratum, & accuratum, & epilogi speciem præbens potius,
 quàm exorāij.

Orationis status est negotialis in scripto positus, quemadmodum
 & orationis pro *Ctesiphonte*. Capita autem & firmamenta cause
 habet eadem, quæ & illa, nempe legitimum: quod in *treis* *leges* diui-
 ditur: & iustum, quod in *tria* tempora tribuitur. Vide autē vt ad epi-
 logum accommodatè potius, quàm ad proœmium orsus sit, ab aduer-
 sariorum insectatione, & vituperatione, quemadmodū & *Demo-*
sthenes. Quidam dixerunt proœmium expers esse rationis, seu
 probationis: ideòque ne conclusionem quidem in eo esse quæren-
 dam. Sed errant. ibi enim est ratio: Nequid moderati, nequid
 vsitati in ciuitate fiat. Nam si propositionis causa, ratio est: iccir-
 co autem obsecrationes adhibentur, ne moderata, & vsitata in ciui-
 tate fiant, dicendum est hanc esse rationem. Habet autem & con-
 clusionem. Ego autē tum dijs immortalibus, tum legibus,
 ac vobis fretus, &c. vsque ad illa, plus apud vos, quàm le-
 ges, &c.

A L I V D A R G V M E N T V M
 E X M. T V L L O C I C E R O N E.

Cum esset *lex Athenis*, nequis *populi scitum* faceret, vt quiquam
 corona donaretur in magistratu prius quàm rationes retulisset: &
 altera *lex*, eos, qui à *populo* donarentur, in cōtione donari debere: quia
 in *senatu* *Demosthenes* curator *muris reficiendis* fuit, eosque refecit
 pecunia sua, de hoc igitur *Ctesiphon scitum* fecit, nullis ab illo ratio-

nibus relatis, vt corona aurea donaretur, eaque donatio fieret in theatro, populo conuocato: qui locus non est contionis legitima: atque ita predicaretur, eum donari virtutis ergo, beneuolentia que, quam is erga populum Atheniensem haberet. Hunc igitur Ctesiphontem in iudicium adduxit AEschines, quod contra leges scripsisset, vt & rationibus non relatis corona donaretur, & vt in theatro: & quod de virtute eius & beneuolentia falsa scripsisset, cum Demosthenes nec vir bonus esset, nec bene meritus de ciuitate. Causa ipsa abhorret illa quidem à formula consuetudinis nostrae, sed est magna. Habet enim & legum interpretationem satis acutam in utramque partem, & meritorum in reipub. contentionem sanè grauem. Itaque causa fuit AEschini, cum ipse à Demosthene esset capitis accusatus, quod legationem euentus esset: vt ulciscendi inimici causa nomine Ctesiphontis iudicium fieret de factis, famaue Demosthenis. Non enim tam multa dixit de rationibus non relatis, quam de eo, quod ciuis improbus, vt optimus, laudatus esset. Hanc multam AEschines à Ctesiphonte petijt quadriennio ante Philippi Macedonis mortem: (sed iudicium factum est aliquot annis post, Alexandro iam Asiam tenente: ad quod iudicium concursus dicitur è tota Graecia factus esse. Quid enim tam aut visendum, aut audiendum fuit, quam summorum oratorum in grauisima causa, accurata & inimicitijs incensa contentio? Quorum ego orationes si, vt spero, ita expressero, virtutibus utens illorum omnibus, id est, sententijs, & earum figuris, & rerum ordine, verba persequens eatenus, vt ea non abhorreant à more nostro: (qua si è Graecis omnia conuersa non erunt, tamè vt generis eiusdem sint, elaborabimur) erit regula, ad quam eorum dirigantur orationes, qui Atticè valent dicere. Sed de nobis satis. Aliquando enim AEschinem ipsum Latine dicentem audiamus.



ORATIO AESCHINIS RHETORIS
IN CTESIPHONTE M, A DIO
nyfio Lambino Latina facta.



Vantæ copiarum comparatæ sint, quantaque acies instructa, quanta denique contentione certi homines vos orerent, atque obsecrent, Athenienses, nequid usitati, nequid moderati in ciuitate fiat, videris. Ego autem tum dijs immortalibus, tum legibus ac vobis fretus, huic prodij, nullum studium, nullumque apparatus plus apud vos, quam leges & iura valere existimas. Vellem porro, Athenienses, & curia quingentum virum, & contiones ab ijs, qui his presunt, recte administrarentur: vellem praeterea, leges, quas Solon de oratorum modestia, pudoreque tulit, valerent: primum ut ei, qui aetate longissimè processisset, in contionem pudenter ac modestè prodeunti, sine strepitu, ac tumultu, pro eo rerum usu, quem sibi comparasset, optima ciuitati consilia dare liceret: deinde ut cuius ex reliquis ciuibus separatim pro sua cuiusque aetate, suoque loco singulis de rebus, quae propositae sint, sententiae dicendae potestas daretur. sic enim mihi videtur & ciuitas optimè regi posse, & accusationes rarissime futurae. Sed quandoquidem res antea sine controversia optimae, nunc conuulsae sunt, & certi homines nulla religione, nulloque poenae metu deteriti, decreta contra leges perscribunt, atque haec alij nescio qui confirmant, & rata faciunt, non qui iustissimis vijs ac rationibus principem in senatu locum sortitò ad-

pti sunt, sed qui coitione facta, dedita opera, & ex comparato in consilio sedent: ac si quis aliorum senatorum legitime sortitione facta in principem senatus locum peruenit, vestraque suffragia verè renuntiari, ei isti, qui reip. moderationem non iam omnium communem, sed proprie suam ducunt esse, delationem nominis minitantur, ac denuntiant, plebem in suam ditionem ac potestatem redigentes, & dominationem, principatum que sibi vendicantes: atque ea quidem iudicia, quæ ex legibus oriuntur, labefactat: in ijs verò, quæ ex decretis proficiuntur, iracundiæ suæ seruiunt atque obtemperant: silet autem vox illa præconis, omnium, quæ in vrbe sunt, & pulcherrima & modestissima, QVIS EX IIS, QUI ANNOS AMPLIUS QVINQUAGINTA NATI SUNT: QVIS RURSUS EX ALLIS ATHENIENSIBVS SVO QVIS QVE LOCO SENTENTIAM VULT DICERE? Oratorum denique petulantiam iam neque leges, neque ciuitatis moderatores, neque principes senatus, neque tribus, quæ principem locum obtinet, pars decima ciuitatis, continere potest: Quâdo igitur hæc ita se habent, eiusmodique sunt tempora ciuitatis, cuiusmodi vos esse ipsi intelligitis: vna gerendæ reip. via ac ratio reliqua est, siquid ego intelligo, vt decretorū contra leges factorum iudicia retineamus. quod si hæc quoque vos vel tolletis, vel eorum, qui tollere conantur, potestati permittetis: prædico vobis ac multo antè denūtio, vos certis hominib⁹ vniuersæ reip. statum imprudentis tradituros. Scitis enim, Athenienses, tria esse apud omneis homines reip. administrandæ genera: regnum, paucorum principatum, populi dominationem ac libertatem: Ac regnū quidem, paucorumque principatus, eorum, qui præsumunt arbitrato & modo gubernantur: ciuitates autem eæ, quæ populi ditione ac potestate reguntur, legibus latis obtemperant. Nemo igitur vestrum ignoret, immo verò sibi quisque persuasum habeat, quo die accusatio de decretis contra leges factis

factis in iudicium deducta sit, illo die eum, qui causam sit cogniturus, & iudicaturus, de sua ipsius libertate, dicendique potestate sententiam esse laturum. Idcirco lator legis in iudicium iureiurando primo loco hoc posuit:

SECUNDVM LEGES SENTENTIAM FERAM, illud exploratum habens, ciuitatis legibus conseruatis, saluam quoque esse populi dominationem: quæ quidem vos memoria tenentis oportet eos, qui decreta contra leges scribunt, acerbè & vehementer odisse, nullum denique horum criminum leue, immo verò & grauissimum & improbissimum esse existimare: postremò hoc ius neminem vobis hominem pati eripere, non imperatores patrocínio talium hominum suscipiendo, (qui dū se quibusdam oratoribus admistratos & adiutores præbent, remp. labefactant) non hospites orando atque obsecrãdo, (quos quidam producentes, rep. contra leges administrata, è iudicijs elabuntur.) Et vt vnumquemque vestrũ, quo in præsidio ab imperatore constitutus esset, ab eo præsidio discedere puderet, ita & vos pudeat ab eò loco discedere, quo in loco à legibus hodie collocati estis, popularis dominationis vindices atq; custodes. Simul illud facite vt perpetuò recordemini, ciuitate apud vos deposita, & rep. vobis credita, alios ciueis adesse, atque huic iudicio interesse, alios abesse, familiaribus & priuatis negotijs impeditos: quos vos, per deos immortales, reuerentes, & iuris iurandi, quo obstricti estis, legumque memores, si Ctesiphontem populi scitum fecisse & contrarium legibus, & falsum, & inutile ciuitati ostendemus: rescinditote Athenienses decreta legibus contraria, populi dominationem ciuitati cõstabilite: de ijs, qui reip. gerendæ rationem neque ad leges, neque ad ciuitatis, neque ad communem omnium vestrũ utilitatem referunt, pœnas sumite. Qua quidem mente si ea, quæ dicturus sum, audieritis, certo scio, vos æquam, religiosam, vobis ipsis, totique ciuitati vehementer vtilem sententiam esse luros. Ac de vniuersa quidem ac-

cusatione satis multa à me dicta esse puto: de legibus autem, quæ ad eos, qui rationum referendarum iudicio tenentur, pertinent, contra quas hoc scitum fecit Ctesiphon, paucis iam mihi esse dicendum videtur.

c v m maximis olim magistratibus nonnulli fungerentur, Athenienses, atque in vectigalibus administrandis quæstus turpissimos ac sordidissimos facerent, sibi porro ad eam rem tum è plebe, tum è senatu oratores socios adiungerent, rationum referendarum iudicia laudibus & præconijs anteuertebant, ita vt, quo tempore eos reddere rationes oporteret, accusatores, & multo quidem maximè iudices, quò se verterent, nescirent. Plerique enim eorum, qui referendarum rationum iudicio tenebantur, pecuniæ publicæ fures manifestò deprehèsi, iudicia tamen effugiebant. Neque id sanè mirum. iudices enim pudebat, opinor, eundem illum, de quo nuper ludis publicis prædicaretur, eū virtutis & iustitiæ causa aurea à populo corona donari, in eadē vrbe, eodē anno fortasse, non longo certe post interuallo, è iudicio furti causa repetundarum cōdemnatū discedere videri. ita in sentētia ferēda iudices nō crimen notare, sed suo, populique pudori consulere cogebantur. hoc cum animaduertisset legislator quidam, legem tulit, præclaram illam mehercule, & vehementer vtilem, quæ aperte vetat, ne, qui rationes nondum retulerunt, corona donentur. Et cum hæc tam prudenter à legislatore prouisa, & præoccupata sint, quorundam aucupia verborum tamen, legibus superiora ac potentiora reperta sunt: de quibus nisi quis vos admonebit, imprudentes fallemini. horū enim, qui referendarum rationum iudicio alligatos, coronandos censent, reperiuntur nonnulli modesti ac pudentes natura, (si quis eorum, qui decreta contra leges scribūt, modestus esse potest.) sed tamen existūt nonnulli, qui rei turpitudinem honesta oratione tegunt. Decretis enim quippiam huiusmodi ascribunt, eum se corona donandum censere, qui rationes referre debet, posteaquam

ratio-

rationes eorum, quæ in magistratu gesserit, retulerit. Atqui pari utrobique iniuria ciuitas afficitur. laudibus enim & coronis rationum referendarum obligationes, iudiciâque præuertuntur. Veruntamen qui decretum scribit, ijs, qui audiunt, ostendit, nõ negare se contra leges à se scriptum esse: nonnullo quidem certe se peccati pudore affici. Ctesiphon verò, Athenienses, & lege, quæ ad eos, qui rationes referre debent, pertinet, neglecta ac violata, & ea excusatione, quam ego vobis paullo antè exposui, prætermissa, decreuit vt Demosthenes priusquam rationum referendarum iudicio absolutus esset, etiam tum magistratum gerens, corona donaretur.

ALIAM porrò orationem, quæ aliquantum cum superiore pugnat, afferet: Siquis electus quippiam ex plebiscito gerat, id non magistratum, sed curationem atque administrationem quandam esse: magistratus autem esse dicet & eos, quos thesmothetæ in Thesei fano sortitione facta mandant, & eos, quos populus Atheniensis suffragio in comitijs creare solet, nempe cum imperatores, & magistratos equitum, & magistratus cum his coniunctos creat: reliqua autem omnia, negotia esse duntaxat, ex populi scito iniuncta. Ego verò istorum orationi legem vestram opponam, quam eo cõsilio tulistis, vt huiusmodi causas ac defensiones discuteretis ac præcideretis: in qua disertè lator legis, MAGISTRATVS (inquit) SVFFRAGIO CREATOS: vno nomine omneis cõplexus: & omneis, opinor, magistratus appellans, quos populus Atheniensis suffragijs & manu porrigenda creat. ET PVBLICIS (inquit) OPERIBVS PRÆFFECTOS: atqui curator est muris reficiendis Demosthenes, operi omnium maximo præfectus. ET QVISQVIS ALIQUID, QVOD CIVITATIS SIET, AMPLIVS TRIGINTA DIES ADMINISTRAT: ET QVICVNQVE IVRIS DICENDI, RERVMQVE IVDICANDARVM POTESTATEM HABET

A P O P V L O D A T A M. (præfecti autem operibus, omnes iuris dicendi potestatem adepti sunt.) Quid hos iubet facere? non ministrare, sed spectatos, atque in iudicio probatos magistratum gerere. (nam ne ij quidem, quibus sorte magistratus obuenit, nisi bene cogniti, & re probati magistratum gerunt.) iubet rationem dare, iubet apud scribam, eosque, qui rationum referendarum iudicio præsumt, quemadmodum & alios magistratus, rationes in tabulas inferre. Atque ut me vera dicere cognoscere possitis, ipsæ vobis leges recitabuntur. L E G E S. Quando igitur quos legislator magistratus appellat, isti negotia & procuraciones nominabunt, vestrum erit, legem commemorare, legem eorum impudentiæ opponere, subijcere eis denique, non probari vobis, neque audiri callidum verborum artificem, ac sophistam, sperantem se verbis leges euersurum. sed quanto quisque maiorem dicendi facultatem habeat, tanto vos in eum, si quod scitum contra leges fecerit, grauius iratos fore. Oportet enim, Athenienses, idem loqui legem, & oratorem. Vbi verò aliam vocem lex, aliam mittit orator, vobis conuenit æquitatem legis impudentia dicentis in sententia ferenda esse potiore. Sed pauca mihi antè dicenda sunt ad illud valde difficile, pænèque inexplicabile, quod dicturus est Demosthenes: Ego (inquit) muris reficiendis curator præfectus sum. fateor: sed ego idem minas centum largitus sum ciuitati, & opus mea opera curaque auctum atque amplificatum est. Cuius igitur rei rationem referre debeo? nisi forte aliqua beneuolentiæ ratio referenda est. Ad hanc igitur causam & defensionem, quam iustam, quamque vobis vtilem dissolutionem afferam, attēditē. In hac ciuitate tanta, & tam antiqua, nemo est eorum, qui ad remp. quomodocūque accesserit, referendarum rationum iudicio sit solutus. id quod vobis primum in ijs, quæ ab omnium opinione abhorrent, demonstrabo. Sacrificos & sacrificas iubet lex hoc iudicio teneri, & generatim omneis, & vnumquen-

que

que singillatim, qui duntaxat honorarium aliquod consequuntur, qui preces & vota pro vobis dijs immortalibus nuncupant. neque solùm priuatim, sed etiam cõmuniter genera, Eumolpidas, præcones, & reliquos omnibus. Rursus trierarchos rationes referre iubet, non qui publica tractarunt, neque qui è vestigalibus vestris multa subtrahunt, pauca in ærario reponunt, largiri se de suo dicunt, cùm vestra haud dubie vobis reddant: sed qui sine controuersia paterna bona in studio laudis & gloriæ, quam ex sua erga vos liberalitate expectant, consumunt, ac profundunt. Neque verò trierarchi soli, sed & maxima omnium, quæ in ciuitate sunt, consilia, iudiciorum auctoritatem ac sententiam subeunt. Primùm enim senatû Ariopagiticum, apud ratiocinatores rationes referre iubet, eumque, qui illic tristis ac seuerus, rerumque maximarum dominus est, sententijs vestris subijcit. Quid? ergo non donabitur corona senatus Ariopagiticus? nõ. neque enim hoc illis patrium aut vsitatum est. An non laudis studio ducuntur? ducuntur sanè. Verùm non est eis satis si quis apud eos non peccet: sed si quis peccet, eum supplicio afficiunt. At vestri oratores impunitate, licentiæque exsultant, luxûque diffluunt. Præterea curiam quingentùm virum iudicio rationum referendarum subiecit labor legis, atque ita huic hominum generi, qui nondum rationes retulerunt, diffidit, vt statim in principio legum disertè vetet, ne magistratus, qui hoc iudicio tenetur, peregrè profiscatur. Deus bone, dicet aliquis, propterea quòd magistratum gessi, mihi peregrè profiscisci non licebit? Non. ne scilicet cæpta antè pecunia ciuitatis, vel rebus & actionibus occupatis atque interceptis, in fugam te conijcias. Rursus eum, qui hoc iudicio non sit absolutus, vetat bona sua consecrare, vetat quicquam de suis bonis dijs dicatum in templis appendere, vetat adoptari, vetat facere testamentum, & alia pleraque: denique, vt vno verbo complectar, eorum, qui hoc iudicio tenentur, bona donec rationem retulerint, ciui-

tati pigneratur. Esto: sed reperitur aliquis, qui neq; quicquam pecuniæ publicæ caput, neque quicquam impendit: tantum ad aliquam reip. partem accessit. Etiam hûc rationes confectas ad ratiocinatores afferre iubet. Quo pacto, qui nihil accepit, nullum que sumtum fecit, rationem ciuitati referet? Lex ipsa subijcit ac declarat, quæ scribenda sint. iubet enim hoc ipsum in tabulas referre, nihil ab eo publici acceptum esse, nihil expensum. Eorû enim, quæ in ciuitate sunt, nihil est, quod sub iudiciû rationum referendarum non cadat, nihil quod anquisitione vacet, nihil denique, quod non seuerissime probandum, atque examinandum sit. Atque vt hæc ita esse intelligatis, leges ipsas audite. **LEGES.**

QVARE cum se Demosthenes insolentius iactabit, & magnopere confidere videbitur, dicetque se propter liberalitatem ac munificentiam suam, referendarum rationum iudicio non teneri, illud statim ei opponite: Ergo te, Demosthenes, sinere oportebat præconem rationibus præfectorum patrium illud & legitimum præconiû usurpare, **QVIS ACCVSARE VULT?** patere, quemlibet è ciuibus tecum disceptare, & contedere, te nihil de tuo largitum esse: sed de multis, quæ accepta habes, in murorum refectioem pauca impendisse, cum decem talenta hoc nomine tibi à ciuitate attributa acceperis: ne liberalitatis laudem præripe: ne tabellas iudicibus è manibus eripe: ne in administranda reip. leges antecede, sed sequere. hæc enim populi dominationem, statimque reip. tuentur & conseruant. Hæc igitur ad inanis ac futile istorum causas & defensionem hæctenus à nobis dicta sunt. Istum autem hoc decretum interposuisse tum cum Demosthenes re vera iudicio de rationibus referendis tenebatur, pecuniæ scilicet theatri præpositus: & cum muris reficiendis curator erat, neutriusque horum munerum rationem neque dederat neque retulerat, ego iam vos ex tabulis publicis docere conabor. Ac mihi recita quo prætore, quo mense, quo die,

die, qua in contione, pecuniæ theatriali populi suffragijs præpositus fuerit Demosthenes, vt intelligere possitis, Demostheni in medio eius magistratu à Ctesiphôte coronam esse decretam. Recita. RATIO DIERV M. Etiam si non progressus fuero longius, nihilque vobis aliud, quàm quod audiistis, demonstraro, iure optimo damnare Ctesiphontem potestis. non enim eum accusatio mea, sed publicæ tabulæ coargunt & condemnant. Erat igitur olim, Athenienses, ciuitati custos populi suffragijs constitutus, qui singulis tribuum imperijs vectigalia in tabulas publicas ad ærarium perscribebat: verum propter summam illam fidem, quam Eubulo habuistis, ij, qui pecuniæ theatriali præerant, ante Hegemonis legem, custodis munere fungebantur: coactores & quæstores erant: naualibus erant præfecti: armamentarijs ædificandis præerant: postremò viarum quoque muniendarum curam gerebant: tota denique propemodum ciuitas ab ijs administrabatur. Neque hæc ego eorum accusandorū aut reprehendendorum causa dico, sed quo vobis illud ostendam, latorem legis, si quis vnus vel infimi magistratus rationes referre debeat, nolle eū priusquam rationes reddiderit, atque in tabulas publicas intulerit, corona donari. At Ctesiphon Demostheni, qui omnibus vno tempore magistratus gerebat, coronam decernere non dubitauit. Muris igitur reficiendis fuisse tum curatorem Demosthenem, cum iste hoc populi scitū fecit, pecuniæ publicæ præfuisse, multarum constituendarum, vt & ceteros magistratus, ius habuisse, iurisque dicendi, & rerum iudicandarum potestatem præditum fuisse, harum ego rerum testis vobis ipsum Demosthenem & Ctesiphontem citabo. Charonda prætorē III. Kalend. Maias contione aduocata, populi scitum fecit Demosthenes, vt sexto & quinto Nonas Maias, tribuum cōcilium haberetur, atque eo scito præscripsit, vt ex vna quaque tribu certi homines deligerentur, qui operū publicorum, & murorum reficiendorum, & pecuniæ publi-

cæ tractandæ & cõdendæ curam haberent. Præclarè sanè, nimirum vt personas haberet ciuitas rationum referendarum iudicio obstrietas, à quibus esset sumtuum factorum rationem repetitura. Recita mihi decreta. **D E C R E T A.** Esto. verùm hac statim defensione vtitur, murorum reficiendorum curationem sibi neque forte obuennisse, neque populi suffragijs mandaram esse. Atque hac sanè de re Demosthenes & Ctesiphon orationem bene longam habituri sunt: lex autem breuis atque aperta est, celeritèrque istorum fallacias dissoluit, ac refellit. Sed pauca quædam vos priusquàm huc veniã, vt reliqua facilius intelligere possitis, docere volo. Tria sunt, Athenienses, magistratum genera: vnum, idque notissimum, quod sorte obuennit: alterum est eorum, qui populi suffragijs mandantur: quo genere continètur & ij, qui amplius triginta dies quippiam eorum, quæ ad ciuitatè pertinent, administrant, & ij, qui operibus publicis præpositi sunt: tertium verbis legis expressum est. **ET SI QVI ALII REBUS IUDICANDIS PRÆSVNT, HI QVOQVE SPECTATI ET PROBATI MAGISTRATVM GERVNTO.** Atquì demantur magistratus populi suffragijs creati, & ij, quibus sortitò munus aliquod obuennit, reliquum est, vt ij, quos tribus, tribuùmque trientes, & oppida Attica deligunt publicæ pecuniæ tractandæ gratiã, lecti sint magistratus. Quod fit tum, cùm tribubus quippiã fuerit imperatum, quemadmodum hoc tempore, vt vel fossas ducendas, vel triremeis ædificandas curent. Verà autem ea esse, quæ à me dicuntur, ex ipsis legibus cognoscetis. **LEGES.** Recordamini igitur legis verba paullo antè recitata, quibus præcipit laor legis, vt qui à tribubus editi & lecti sunt, spectati & probati in iudicio magistratum gerant. Atquì tribus Pandionis Demosthenem magistratum & curatorem muris reficiendis declarauit: qui administrationis nomine à ciuitate accepit in hunc sumtum decem circiter talenta. Iam verò lex altera vetat, ne is magistratus, qui rationum referendarum iudicio

cio tenetur, corona donetur: & iurastis vos secundū leges sententiam laturus: & orator præcisè decreuit, vt is, qui iudicio de rationibus referēdis tenetur, corona donaretur, his verbis non ascriptis. POSTEA QUAM RATIONES RETVLERIT, IVDICIOQVE DE RATIONIBVS REFERENDIS ABSOLVTVS FVERIT: ego denique crimen populi sciti contra leges facti legum, ac decretorum auctoritate, ipsorūque aduersariorum testimonio coarguo & conuincō. Potest quisquam aliquē contra leges decretum fecisse apertius demonstrare? At vobis illud quoque ostendam, cum prædicationem coronæ in decreto contra leges fieri iubere. Lex enim difertē iubet, si quem corona donet senatus, vt de eo in curia præco prædicet: si nō populus, vt in contione, nusquam autem alibi. ac mihi legem recita. LEX. Lex hæc, Athenienses, præclara & vehemēter utilis est. Legislator enim non putauit (opinor) oratorem apud exteros gloriari, & insolenter se iactare oportere: sed satis cum habere debere, si in vrbe à populo ornetur, nō etiam ex præconijs mercatum instituere, quæstūque facere. At que ita quidem lator legis: Ctesiphō verò quomodo? Recita decretum. DECRETVM. Auditis, Athenienses, iubere legislatorē, vt, qui corona donetur à populo, de eo apud populum in Pnyce loco contionis legitimæ, contione aduocata, prædicetur: nusquam autem alibi. At Ctesiphon in theatro non modò legibus spretis ac violatis, sed etiā loco immutato: non Atheniensibus ad contionem conuocatis, sed nouis tragœdis agentibus: non spectatē populo, sed in conspectu Græcorum, vt illi nobis sint conscij, qualem virum honore afficiamus. Iste igitur populi scito tam aperte contra leges factō cū Demosthene veluti in acie instructa collocatus, aduersus leges artis & fallacias intendet: quas ego vobis aperiam, ac prædicā, ne imprudentes in fraudem inducamini. Non enim poterunt isti negare, quin leges vetent, de eo, qui à populo corona donatur, extra contionem prædicari. Sed legem

Dionysiacam, qua se defendere possint, afferet, & parte quadam legis utentur, ad aureis vestras insidiosè sibi adiutum munientes: legem denique proferent nihil ad hoc iudicium pertinètem: dicentque duas esse leges de præconijs ciuitati latas, vnã, quam ego profero disertè ventantè, ne de eo, qui à populo corona donatur, extra conditionem prædicetur: alteram huic contrariam, quæ coronæ donationem ac prædicationem in theatro, populo ad tragædos spectandos coacto, fieri permittit, si modò populus sciuerit. Hanc se igitur legem secutù Ctesiphon suum illud decretum scripsisse dicet. Ego verò aduersus istorum arteis & captiones, leges vestras patronas proferam: quod quidem tota mea accusatione summo studio facio, assidueque obseruo. Nam si hoc verum est, si hæc consuetudo in reip. vestram inducta est, ut leges irritæ inter ratas scriptæ locū habeant, duæque de vna, eadèque re inter se pugnantes perscriptæ sint, quo nomine hanc reip. appellabimus, in qua leges eadè facere & non facere iubeant? Sed non ita est, & dii prohibeant ne vos vnquam in tantam legum cõfusionem ac perturbationem incidatis. Neque verò hæc sunt à latore legis, qui populi dominationem ac potestatem constituit, neglecta: quin thesmothesis hoc negotij disertè datum est, ut quotannis leges in publico recognoscant, & corrigant, accuratèque videant, & considerent, sitne lex aliqua alteri legi aduersa, sitne aliqua abrogata inter approbatas, ac ratas: postremò sitne plures vna singulis de rebus perscriptæ. quòd si quid huiusmodi reperiant, iubet eas in tabulis descriptas pro decem herouū statuis proponi, ciuitatisque moderatores quinquaginta conditionem habere, nominibus eorum adscriptis, qui eas leges tulerint: prætorem verò, præsidum magistrum suffragij potestatem populo dare, & leges alias tollere atque abrogare, alias intactas atque integras relinquere, ut lex vna sit ad vnãquamque rem actionemque pertinens, non plures. **Ac mihi leges recita. LEGES.** Si vera igitur essent,

essent, Athenienses, quæ ab his dicuntur, duarumque de præconijs leges essent latæ: cum eas & thesmothetæ deprehendissent, & ciuitatis moderatores ipsis latoribus legis reddidissent, arbitror illos alteram ex legibus necessario sublaturus fuisse, vel eam, quæ prædicari extra conitionem permitteret, vel eam, quæ vetaret. Nunc verò cum horum nihil factum sit, non modo in manifesto & impudenti mendacio deprehensi tenentur, sed ea confingere reperiuntur, quæ ne fieri quidem possunt. Sed unde hoc mendacium, quo vestram fidem ac religionem labefactare conantur, depromserint, ego vos docebo, si prius quam ob rem leges de præconijs theatralibus latæ sunt, vobis exposuero. Cum ludi tragici urbani fierent, alij re à populo non impetrata prædicandum curabant, se à tribulibus suis corona donari, alij à popularibus, alij post reliquos omnes voce præconis conducta, seruos suos manumittebant, Græcos huius manumissionis testibus adhibentes: immò verò, quod erat omnium inuidiosissimum, hospitij publici necessitudinem apud exteris ciuitates nacti perficiebant, ut de se præconis vox prædicaret, à populo, si forte ita caderet, Rhodio, vel Chio, vel alius cuiuspiam ciuitatis, ipsos virtutis ac fortitudinis ergò corona donari. Atque hæc non ita agebant quomodo ij, quibus à senatu vestro, aut à populo talis donatio fieri consuevit, re à vobis impetrata, cum decreto, ob multa denique in vos & magna merita, sed hoc iure vobis prærepto, decretoque vestro non adhibito, aut requisito. Hinc vsu veniebat, ut spectatores, & ludorum magistri, & actores interturbarentur: ij verò de quibus prædicabatur in teatro, maiore honore afficerentur, quam quos populus corona donabat. His enim locus erat certus constitutus, nempe contio, in qua hæc donationem fieri oportebat, nusquam alibi licebat: illi verò in omnium Græcorum conspectu, præconis voce laudabantur: & hi quidem cum decreto, re à vobis impetrata, illi sine decreto. Hæc cum legislator quidam animaduertisset, legem rogat ni-

hil cum lege de ijs, qui à populo corona donantur commune habentem: neque illa abrogata: (non enim contio, sed theatrum turbabatur) neque prioribus legibus aduersam, (non enim fas est.) sed legem de ijs, qui sine vestro decreto à tribulibus, & popularibus corona donantur: de ijs, qui seruos suos manumittunt: denique de coronis externis ac peregrinis. Itaque dilucidè vetat, ne quis in theatro seruum libertate donet, ne quis præconis voce prædicante à tribulibus aut popularibus, aut alio quoquam corona donetur: alio qui præconem infamia notari iubet. Cùm igitur lator legis definerit, vt de ijs, qui à senatu corona donantur, in curia: qui à populo, in contione prædicetur: qui autem à popularibus & tribulib⁹, vetuerit ne ludis tragicis de ijs prædicetur, vt ne quis vndique coronas & præconia colligens, & corrogās, falsam, minimèque debitam in remp. meritorū gloriā consequatur: vetuerit præterea in lege nèue à tribulibus, nèue à popularibus, nèue ab alio quoquam, absente senatu & populo, prædicetur: his igitur detractis atque exceptis, quid reliquum est præter coronas externas? Ac me vera dicere, argumēto firmissimo ex ipsis legibus deprompto peruincā. Ipsam enim aureā coronā, quæ in theatro, quæ in vrbe præconis voce pronuntiata fuerit, Minervæ sacram lex esse iubet, ei, cui donatio fit, ademptā. At qui quis vestrū audeat populum Atheniensem tantæ illiberalitatis condemnare? Nam non modò ciuitas, sed ne priuatus quidem quisquam tam angusti ac pusilli animi fuerit, vt, quam ipse coronam donarit, eam vno tēpore à præcone pronuntiarī iubeat, adimat, consecret. At ego arbitror, quòd externa corona est, idcirco consecrationē fieri, ne quis, dū alienā erga se beneuolentiā pluris, quàm patriam facit, animo deteriore euadat. Sed coronam illam, que in contione prædicata est, nemo consecrat, sed ei, cui donata est, possidere licet, vt non ipse solum, verum etiam eius posterī, hoc monumentum virtutis domi habentes, nunquam iniquo, neque maleuolo

in populū sint animo. Et verò propterea adscripsit lator legis, ne in theatro à præcone pronuntietur externa corona, nisi populus sciuerit, ut ea ciuitas, quæ aliquem ciuium nostrorum corona donare velit, legatione missa, id à populo petat. quid ita? ut is, de quo prædicatur, vobis, qui prædicandi potestatem permittatis, coronæ nomine maiorem gratiam habeat, quam ijs, qui coronā donēt. Atque ut hæc esse vera facilius intelligere possitis, leges ipsas audite. **LEGES.** Cū igitur vobis dicere incipient, oratione ad fallendum composita, scriptum esse in lege, corona donare licere, si populus auctor fuerit, facite vobis in mentem veniat subijcere, Maximè, si quidē te alia ciuitas corona donet. sin autem populus Atheniensis, locus tibi certus constitutus est, quo loco eam donationem fieri oporteat: extra contionem prædicari vetitū est. Ea enim verba, **NVSQVAM AVTEM ALIBI,** quid sibi velint, totum diem dicas licet: certè nunquam ostendes te legitimum decretum scripsisse. Restat nunc mihi accusationis altera pars, in qua mihi plurimum studij atque opæ necessariò ponendum est. Est autem ea pars, Ctesiphōtis causa ac defensio, quam affert, quam obrem Demosthenem corona dignum esse existimarit. Hæc enim sunt decreti verba, **ET PRÆCONEM ANVD GRÆCOS PRONVNTIARE IN THEATRO; DEMOSTHENEM A POPVLO ATHENIENSI CORONA DONARI VIRTVTIS AC FORTITVDINIS ERGO, ET,** (quod est omnium maximum) **QVOD ASSIDVE TVM DICIT, TVM AGIT RES POPVLO ATHENIENSI VEHEMENTER VTILEIS AC SALVTAREIS.** Cū igitur nobis simplex, tūm vobis ad cognoscendum, iudicandū que perfacilis reliqua oratio est. Me enim, qui accuso; scilicet, ostēdere oportet, laudes illas esse falsas nec Demostheni cōuenire: nunquā illum neque antea res valdè vtileis dicere cœpisse, neque nunc in rebus agendis reip.

vtilibus perseuerare. Hoc si ostendero, iure, opinor, hoc iudicio Ctesiphon damnabitur. Omnes enim leges ventant, nequis in decretis publicis falsum scribat. Eum autem, qui causam dicit, huius contrarium ostendere oportet. Vos nobis eritis eorum, quæ vtrinque dicentur, iudices. Atque ita quidem se res habet, ego ad vitam Demosthenis explicandam longiore oratione opus esse puto. Quid enim nunc ego commemorem illa, quæ ei in iudicio de vulnere acciderunt, quo die Demomeli patrueli Paranieo apud Ariopagum diem dixit, & de capite incisorum aut quid ea refricem, quæ in Cephisodoti imperio, & classe in Hellespontum profecta designauit? quo tempore Demosthenes, cum vnus esset è trierarchis, & imperatorem in naui circumageret, vnâ cum eo vesceretur, sacrificaret, libaret, quibus omnibus propterea quod ei paternus amicus erat, dignus habebatur: non dubitauit nomine eius delato, eoque in iudicium capitis adducto, lege maiestatis accusatorem sese eius profiteri. quid ea verò, quæ ei cû Midia intercesserunt? quid colaphos, quos in orchestra chori magister cum esset, accepit? & vt contumeliam acceptam, simulque populi sententiam contra Midiam in aede Liberi patris suffragijs populi latam triginta minis vendidit? Hæc igitur & alia his similia rectè mihi videor esse silentio præteriturus, nõ quod voaproderet, aut reo gratificari & præuaricari cogitè, sed quod verear, ne mihi statim ita occurratis, me vera quidem illa, sed peructera, & obsoleta, & ab omnibus audita & confessa dicere videri. Atquæ Ctesiphon, cuius maxima flagitia, ac dedecora ita certa & nota sunt ijs, qui audiunt, vt accusator non falsa, sed antiqua, & omnium sermone celebrata & confessa dicere videatur, vtrum eum corona donari, an vituperari cõuenit? te verò, qui falsa & legibus contraria scribere ausus sis, vtrum iudicia cõtemnere, an ciuitati dare pœnas oportet? De publicis autem criminibus planius dicere conabor. Audio enim Demosthenem, facta eis dicendi potestate, quattuor apud vos

tempora ciuitatis præterita, per quæ ipse temp. administravit, enumeratum: quorum illud, ut mihi quidem nuntiatur, primo loco ponit, quo tempore de Amphipoli cum Philippo bellum gerebamus. atque hoc tempus pace facta, & ea societate, quam Philocrates Agnufius, & iste ipse cum illo copulatus decreuit, ut ego ostendam, terminat ac definit. Secundum tempus ait fuisse, quo tempore pacem habebamus, vsque ad eum diem videlicet, quo die pace diremta, qua utebatur ciuitas, idem orator bellum persuasit ac decreuit. Tertium cum bellum gerebamus vsque ad cladem in Charonea accipiam. Quartum, hoc tempus, in quo nunc versamur. His igitur temporibus enumeratis, me, ut audio, appellaturus & rogaturus est, quòdnam ex his quattuor ipsius temporibus reprehendam: quando negem eum res populo Atheniensi utilissimas gessisse. ad quæ si nolim respondere, & si faciem pudore affectus obtegā ac tergierfer, ait sese ad me propius accessurum, & detractis mihi de capite integumentis ad contionem & suggestum pertracturum, respondere denique coacturum. Quare primùm ne fortè iste suis viribus tantopere cõfidat: deinde ut vos præmuniti ac præmoniti sitis: postremò ut tibi, Demosthenes, coram iudicibus, reliquisque ciuibus, qui foris circumstant, & Græcis, quibus curæ fuit huic iudicio interesse, respõdeam (video autè non paucos ad audiendum conuenisse, sed tantam multitudinem, quanta in actione publica post hominum memoriã non interfuit) respõdeo, me omnia ista quattuor, quæ tu partitione tua complecteris, tempora, reprehẽdere: magnaque me spes tenet, tum dijs immortalibus volentibus atque approbatibus, tum, si iudices pari nos æquitate ac beneuolentia audierint: postremò si ego ea, quæ te admisisse scio, memoria consequi potuero, fore, ut iudicibus planum facere possim, salutem ciuitati primùm deos, deinde homines eos, qui sese erga nostram temp. æquos atque humanos præbuerunt, attulisse: incommodorum verò &

calamitatum omnium acceptarum vnum Demosthenem causam atque auctorem extitisse. Statui autem eum ordinem seruare, quo ordine istum vsurum esse audio, dicamque primùm de primo tempore: deinde de secundo: tum verò de eo, quod superiori est proximū: postremò, de hoc rerū statu, in quo nunc versamur. Ad eam me igitur pacem refero, quā tu & Philocrates decreuistis. vobis enim licuisset, Athenienses, priorem illam pacem vnā cum vniuerso Græcorum confessu facere, si certi homines passi essent, vos legatos illo tempore in Græciā missos, quibus Græcos hortabamini, vt aduersus Philippū communi illi Græcorum consilio interessent, expectare: licuisset & vltro vobis delatum à Græcis imperium si non statim, at aliquanto post recipere. quibus rebus Demosthenis & Philocratis culpa, & propter istorum turpeis quæstus & nundinationes, quas fecerūt, coitione facta aduersus remp. vestrā, planè spoliati estis. Quod si aliquibus vestrū statim vt audierunt, hæc oratio incredibilis accidit, cetera sic attendite vt cum de pecunia expensa longo interuallo sedentes rationem repetere solemus: nonnunquam videlicet falsas domo opiniones de rationibus afferimus: verum posteaquā rationes subductæ & putatæ fuerint, nemo nostrū est tam acerbus natura, quin cum hac opinione discedat, vt, quicquid ipsa ratiocinatio, & calculi ratio coarguerit ac probarit, verum esse fateatur: ita vos quoque ad audiendum parati estote. si quis vestrū talem opinionem iandudum comprehensam domo detulit, nihil vnquam Demosthenem cum Philocrate coitione facta pro Philippo dixisse: qui eo animo est (inquam) is mihi neque absoluat, neque condemnet, priusquā audierit. non enim iustum est: sed si vobis paucis & tempora commemoraro, & decretū, quod Philocrate socio scripsit Demosthenes protulero: si vox ipsa & ratiocinatio veritatis implicatū atque irretitum Demosthenem tenuerit & conuicerit, cōplura cum Philocrate de prima illa pace decreta scrip-

se: per summum dedecus atque insignem turpitudinem Philippo assentatum esse, legatos, qui è Græcia reuertebantur, non expectasse: quo minus populus Atheniensis in communi Græcorum consilio pacem cum Philippo faceret, per eum stetit: postremò Cerfobleptem regem Thraciæ, socium nostræ ciuitatis atque amicū, Philippo dedidisse, atque in seruitutē tradidisse: Si hæc vobis plana fecero, rem peram à vobis æquissimam, quam, per deos immortales, finite me impetrare: date hoc mihi, vt fateamini Demosthenē totum illud tempus, quod è quartuor primum est, remp. non bene gessisse. Dicendi autem initium inde ducam, vnde me dicentem facillimè subsequi possitis. Decreuit Philocrates vt caduceatores & legatos de pace ac societate Philippo huc mittere liceret. Hoc decretum tanquàm contra leges scriptum, die Philocrati dicta, in iudicium vocatum est. veniūt iudicij dies. Accusabat Licinius is, qui diem dixerat. causam dicebat Philocrates. patronus erat Demosthenes. absolutus est Philocrates. His rebus gestis, deinceps secutus est annus, quo anno Themistocles, prætor factus est. tum in curiā senator venit Demosthenes, neq; sortitione, neque sub sortitione facta locum illum cōsecutus, sed ambitione, & miris allegationibus, & magno prægio mercatus, vt omnibus in rebus & dicendis & agendis Philocrati subseruiret, & secundas ab eo parteis ageret, quomodo res ipsa declarauit. Obtinet enim alterum decretū Philocrates, quo iubet decem legatos deligi, qui ad Philippum profecti postulent ab eo, vt legatos summam potestatem ab eo acceptam habentis huc mitteret. In his erat Demosthenes: qui illinc reuersus pacis laudator fuit, eadēque atque alij legati, renuntiauit: solus autem ex omnibus senatoribus decreuit, vt cum caduceatore, & legatis à Philippo missis fœdera feriremus: similia in eo decernens ac planè gemina ijs, quæ à Philocrate decernebantur. Ille enim auctor fuit, vt Philippo caduceatorem & legatos huc mittere

liceret: hic cum legatis fœdera percussit. Iam verò mihi ad ea, quæ sequuntur, quæso, diligenter attendite. Multa enim Philippus non iam cum ceteris legatis à Demosthene postea mutatione facta per improbissimam calumniam vexatis, sed cum Philocrate ac Demosthene transigebat: neque id mirum: ut pote qui vnà legationem obierant: qui vnà decreta illa tria fecerāt: quorum primum fuit, ut ne legatos, quos ad Græcos miseratis, eos, in Philippum cōcitantes, exspectaretis, neque communiter cum alijs Græcis, sed priuatim pacem cum eo faceretis: Alterum, ut nō pacem solū, sed etiam societatem cum Philippo scisceratis, ut, si qui fortè attentis ac propensis erga plebem vestram essent animis, fracti ac debilitati conciderent, ac desperarent, cū viderent, vos sibi quidem bellicum canere, bellique suscipiendi hortatores atque impulsores esse: domi verò non modò pacem cum Philippo, sed etiam societatem decretis vestris confirmasse: Tertium, ne Cersobleptes rex Thraciæ fœdere contineretur, neue societatis ac pacis esset particeps, cū ei iam bellum indictum esset, instructusque in eum exercitus duceretur. Et mediussidius is, qui hæc redimebat, culpa vacabat, neque cuiquam iniuriam faciebat. Non enim erat ei crimini dandum, si nondum dato vtrinque iureiurando, nec fœdere facto, suis rationibus consuleret. At qui firmamenta ac præsidia ciuitatis ei vendebant, & impertiebant, ij magno erant odio ac supplicio digni. Nam qui se nunc Alexandri, tūm Philippi inimicum fuisse dicitat, Demosthenes: is, qui mihi Alexandri hospitium maledicti loco obijcit, ciuitatis tempora suffurans, decernit ut ciuitatis moderatores contionem habeant sexto idus Februarias, quo tempore AEsculapio sacra fiebāt. Atque hac de re antequam cum populo ageretur, ad senatum relatum est die festo: quod nunquam post hominum memoriam factum erat. Sed quam causam afferebat? ut (inquit) simulatque aduenierint legati Philippi, quam primum consultet populus

ijs de rebus, quæ nobis cum Philippo intercedunt, legatis, qui nondum venissent, contionem præoccupans, & tempora vestra circumcidens atque amputans, cum interim rem vrgeret, ne cum ceteris Græcis, vestris legatis iam reuersis, sed soli pacem faceretur. Aliquanto post, Athenienses, venerunt legati Philippi, vestri verò aberant, Græcos (vt supra dixi) ad bellum contra Philippum cohortantes. Hic obtinet atque adeo expugnat alterum decretum Demosthenes: in quo cæset, vt vos non de pace solùm, verùm etiam de societate consilium capiatis, vestris legatis non expectatis, sed statim post Dionysia vrbanda, duodecimo, & vndecimo Kal. Martias. Atque vt hæc, quæ dico, vera esse intelligatis, diligenter dum recitantur decreta attendite. **DECRETA.** Exactis igitur Dionysijs contiones aduocatæ sunt duæ: quarum in priore recitatum est decretum duodecimo Kal. sociorum commune, cuius præcipua vobis capita breuiter exponam. Primùm enim decreuerunt, vt de pace consultaretis, societatis nomen præterierunt, non quòd obliti fuerint, sed quòd pacem illam, necessariam magis, quàm honestam esse existimarent: Deinde præclare Demostheni occurrerunt, quæstus eius fordidos, & flagitiosas nundinationes sanaturi, cum adscripserunt decreto, vt cuiuis Græcorum liceret, tribus post mensibus nomen suum vnà cum Atheniensibus in eadem columna incidere, eademque foederum & pactorum communione contineri: duas res maximas ea ratione anticipantes ac prouidentes: primùm enim trium mensium spatium, quod Græcorum legationibus satis esset, sumserunt: deinde Græcorum beneuolentiam huic ciuitati cum communi Græciæ consensu conciliarunt, vt si forte Philippus foedera negligeret ac violaret, nos neque soli, neque imparati bellum gerere cogemur. quæ nunc opera & culpa Demosthenis acciderunt. Atque hæc esse vera, quæ à me dicuntur, ex ipso decreto cognoscetis. **DECRETVM SOCIORVM.** Huic me decreto assensum esse fateor: assensi

sunt & omnes oratores, qui in priore illa contione verba fecerunt: populus autem cum hac opinione discessit, pacem quidem futuram, sed de societate deliberare, propterea quòd Græcos in Philippum concitabamus, reip. non expedire: pacem autem futuram communiter cum Græcis vniuersis. Vna nox intercessit. Postridiè in contionem venimus. Tum verò Demosthenes suggesto occupato atque obfesso, neminìque dicèdi loco relicto, negauit, quæ verba pridie facta essent, ea verba quicquã profutura, nisi ea Philippi legati comprobarent. Nã quæ pax (inquit) sine societate constare queat, non intelligo. Non oportet enim (nam verbû, quod tû vsurpauit, memoria teneo propter acerbicatem atque asperitatè tûm eius, qui dicebat, tûm nominis) non oportet (inquit) à societate pacem abrumpere, neque Græcorum tarditatem exspectare, sed vel ipsos bellum gerere, vel nos pacè priuatim facere. Deinde ad extremum Antipatro in suggestum vocato, quædam requirebat ex eo, multo antè certiore facto quid cum rogaturus esset, simulque præmonito atq; insituito, quænam ille aduersus ciuitatem respondere deberet. Postremò hæc valuerût, cum hinc Demosthenes dicendo vim attulisset: illinc Philocrates populi scitû scripsisset. Iam verò quod eis restabat, vt Cersobleptem, & agrum Thracium Philippo traderent, atq; in potestatem eius redigerèt, id quoque septimo Kal. Martias effecerût, priusquàm posteriorem legationem accipiendi à Philippo iuristurandi causa institutam ac decretam Demosthenes obiret. Etenim acerrimus iste Alexander ac Philippi inimicus, bis in Macedoniã legatus nobis profectus est, cum liceret ne semel quidem proficisci, is, qui nunc Macedones cõsputare & cõculcare iubet. Veruntamè in cõtione ea, quæ septimo Kal. Martias aduocata est, senator cum esset, senatorium ordinem ex cõparato, & dedita opera cõsecutus, Cersobleptè administro atque adiutore Philocrate tradidit ac dedit Philippo. Occultè enim atque insidiosè Philocrates adscripsit decreto

creto præter alia in eo scripta, quod item Demosthenes comprobauit & confirmauit, vt eo ipso die sociorū consiliarij & confessores, Philippi legatis iurandū darent. à Cerfoblepte porro in consilio qui sederet, aderat nemo. Itaque cum scripsit, vt ij, qui in consilio sedebāt, iurarent: Cerfobleptem, à quo consiliarius aderat nullus, à foedere exclusit. Sed ne quis hæc à me fingi putet, recita mihi quis hæc scripserit, quis publici consilij præses confirmarit. **DECRETVM. PVBLICI CONSILII PRAESES.** Præclara, Athenienses, præclara, inquam, res est, tabularum publicarū custodia. Immotam enim permanet, neque vnà cum reip. trāsflugis immutatur, sed facultatē dat populo, vbi commodum fuerit, hominū olim improborum ac sceleratorum, repente mutata volūtate, opinionē sibi probitatis quarentiū, cognoscendi. Restat autem vt eius assentationem vobis cōmemorem. Nam cum Demosthenes annū senatorio munere functus sit, nullos vnquā legatos ad principem locum inuitasse reperietur. sed illoduntaxat tempore, & tunc primū legatos Philippi primo loco collocauit: puluinos quoque adposuit, & conchyliatis peristromatis sedes instrauit, totūque illum quoquo versus locū aulais exornauit. cum iam dilucefceret, ducē se legatis in theatrū præbebat, ita vt omnīu sibi exciperetur, propter gestum hominis indecorum, blanditiāsq; deformeis atq; ineptas: deinde cum illi sese Thebas contulerunt, tria cōduxit eis mulorū iuga, legatosque Thebas deducēdos curauit, ciuitatem nostrā nationibus exteris deridendā propinans. Sed ne lōgius ab instituto degrediar, sume mihi decretū de principe loco legatis Philippi dato. **DECRETVM.** Iste igitur tantus assentator cum per Charidemi speculatores prim^o omnīu de interitū Philippi certior factus esset, somnio sibi conficto in deos immortales emētus est, proinde quasi nō à Charidemo, sed à Ioue & Minerua nuntium accepisset, quos interdū omni scelere ac periurio violans, noctū secum colloquia habere, futurāque sibi multo antè

prædicere gloriatur. At septimo die post filiæ mortem, prius quàm eius funeri iusta soluisset, coronatus, & albatu bouem immolabat, morem maiorum negligebat, leges & instituta perfringebat, vnica filia miser, quæ prima eum patrem appellauerat, amissa. Neque verò calamitatem ei suam maledicti aut criminis loco obijciendam puto, sed hominis mores perpendo & considero. Nunquam enim qui liberos odio habet, patérque improbus est, bonus erit populi moderator ac patronus: nunquam qui capita carissima, summáque necessitudine sibi coniuncta non complectitur amore illo paterno, vos pluris faciet alienos: nunquam qui priuatim nequam est, publicè frugi erit: nunquam qui domi ingenio leui ac vétoso, animoque molli & imbecillo fuit, in Macedonia fuit legationis tempore constans & fortis. Non enim ingenium, sed locum tantùm mutauit. Vnde igitur tanta extiterit in eo mutatio (hoc enim secúndum tempus est) & cur tandem Philocrates quidem rebus ijsdem cum Demosthene publicè gestis, perduellionis accusatus, exultóque multatus sit, Demosthenes autem aliorum accusator nobis sit exortus: denique quónam pacto homo impurissimus tot incommodis & calamitatibus nos affecerit, hæc nunc audire operæpretium est. Vt primùm Philippos Pylas introijt, vrbeisque Phocæsiū improviso aduentu cepit atque deleuit, Thebanos (quomodo quidem putabatis) potentiores, quàm tempora, commodáque vestra ferebant, effecit: cum vos perterriti, agris relictis vasa colligeretis, & supellectilem in urbem deportaretis, cumque maxima tum inuidia flagrarét, grauissiméque accusarentur legati, qui huius pacis auctores extiterant, atque in primis Philocrates & Demosthenes, propterea quòd non solùm legationem illam obierant, sed etiam decreta scripserant: accidit eodem tempore, vt Demosthenes & Philocrates inter se dissiderent ijs prope de rebus, de quibus etiam vos eos inter se dissentire suspicabamini. His igitur turbis excitatis, tantóque

tumultu coorto, accedentibus & ceteris malis ac vitij
 homini innatis, reliqua iam Demosthenes, quòd Philo-
 cratem nundinationum suarum, pecuniarumque captarum
 socium atque æmulum ferre non poterat, de se dif-
 fidenter, timidè, ac suspiciosè consulebat. Itaque existi-
 mauit si eorum, quibuscum vnà legatus fuerat, ac Phi-
 lippi accusator existeret, Philocratem haud dubiè peri-
 turum: reliquos legatos magnum in discrimen venturos:
 de se vno ciueis suos bene existimatuos, & cum amicos
 insigni improbitate, & singulari perfidia prodidisset, be-
 neuolentiæ erga populum Atheniensem, famam atque
 opinionem consecuturum. Cuius consilia cum perspe-
 xissent communis otij, & publicæ tranquillitatis oppu-
 gnatores, eum cupidè, vltroque in contionem inuita-
 bant, solum integrum, solum castum atque incorruptum
 in ciuitate nominantes. Ille verò cum primùm in con-
 tionem ascenderat, tumultus ac belli semina, principiâ-
 que ministrabat. Hic ille est, Atheniêses, qui primus Ser-
 rium murum, Doriscum, Ergiscam, Murgiscam, Ganos,
 Ganidem reperit: loca, quorum ne nomina quidem an-
 tea noueramus. Celeriter autè rem eò loci deduxit, vt, si
 quidem Philippus legatos non mitteret, contemni ab eo
 ciuitatem ac pro nihilo putari: sin mitteret, explorato-
 res, non legatos mitti diceret. Si vellet ille alicui ciuitati
 pari de controuersijs nostris arbitrandi iudicandique
 potestatem permittere: negabat vllam nobis, & Philip-
 po æquam iudicem reperiri posse. Dabat illè Halone-
 sum: vetabat hic accipere si daret ac nõ redderet, de syl-
 labis scilicet disidens ac litigans. Postremò corona do-
 natis ijs, qui cum Aristodemo contra pacis condiciones
 ac fœdera exercitum in Thessaliam & Magnesium du-
 xerant, pacem quidem diremit, calamitatem autem no-
 bis importauit, bellumque suscitauit. Esto. At enim mu-
 ris aheneis, atque adamantinis (vt ipse prædicat) sineis
 Atticos muniuit, Eubœorum, ac Thebanorum societa-
 te. Immò verò, Athenienses, tribus hac in re iniurijs gra-

uissimis affecti estis, summâque in rerum omnium igno-
 ratione versamini. Sed quoniam festinat animus de ma-
 xima Thebanorum societate disputare, vt suo quæque
 loco atque ordine persequar, de Eubœorum societate
 primùm dicam. Multis vos ac magnis, Athenienses, in-
 iurijs affecti, tum à Mnesarcho Chalcidense Calliæ &
 Taurosthenis patre, quos iste nunc mercede accepta ci-
 ueis Athenienseis sententia sua decernere non dubitat:
 tum à Themisone Eretrienfi, qui vobis pacis tempore
 Oropum ademit: vos has iniurias obliuiscetes, cum pri-
 mùm vobis renuntiatū est, Thebanos in Eubœam exer-
 citum traduxisse eo animo, vt vrbeis Eubœæ in seruitu-
 tem redigerent: quinque diebus Eubœæ classe & pede-
 stribus copijs opem tulistis: necdum triginta dies præte-
 rierant, cum Thebanos fœdere à vobis suppliciter peti-
 to cum pace dimisistis, Eubœaque potiti, vrbeis, & reip.
 statum ijs, qui fidei vestræ commiserant, atque apud vos
 deposuerant, optima fide, summâque cum iustitiæ laude
 reddidistis, neque iustum, neque fas esse ducentes, in eo,
 quod vobis creditum & commendatum esset, præteritas
 inimicitias meminisse. Atque his tot, tantisque benefi-
 cijs affecti Chalcidenses, nequaquam vobis parem gra-
 tiam retulerunt. Sed cum in Eubœam copias traiecistis,
 auxilium Plutarcho laturi, primis quidem certè tem-
 poribus amicitiam simulabant: verùm statim vt Tamynas
 transijmus, montemque Cotylæum, qui appellatur,
 transgressi sumus, tum Callias Chalcidensis, quem De-
 mosthenes pretio accepto summis laudibus in cælum
 efferebat, cum populi Atheniensis exercitum in qual-
 dam locorum angustias compulsus ac redactum videret,
 vnde neque se nisi parta victoria recipere poterat,
 neque auxilij spes vlla ostendebatur, non terra, non ma-
 ris: is igitur coacto ex omni Eubœa exercitu, simulque à
 Philippo copijs corrogatis, & vnà cum eo frater ipsius
 Taurosthenes, is, qui nunc vnicuique nostrum comiter
 & officiosè dextram porrigit, atque arridet, militibus
 externis

externis Phocensibus trauectis, eo animo, eaque spe in nos inuaserunt, impetumque fecerunt, tamquam nos funditus deleturi atque euersuri. Quod nisi primum deus aliquis exercitum nostrum seruasset, deinde nostri milites, pedites atque equites, se viros forteis praeuissent, & apud Hippodromum, qui est in Tamynis, acie instructa, signisque collatis vicissent, hostibus supplicibus cum pace dimissis: propius nihil esset factum, quam ut ciuitas nostra summam turpitudinem subiret, summoque dedecore afficeretur. Non enim plagam in bello, detrimentumque accipere, malum est maximum: sed ubi quis cum aduersarijs indignis congressus inferior discesserit, calamitatem altero tanto maiorem videri necesse est. Vos tamen talibus iniurijs acceptis, eos iterum in gratiam recepistis. Callias vero Chalcidensis cum ei scelerum suorum veniam, impunitatemque dedissetis, breui tempore interiecto rursus ad ingenium redijt. Nam cum Euboicum consilium verbo Chalcide cogeret, reuera Eubœam aduersus vos muniret atque ornaret, & præcipuum sibi dominatum compararet, huiusque fautorem atque adiutorem sibi futurum Philippum speraret, in Macedoniam se contulit. Ibi cum Philippo deambulabat, & in amicis ac familiaribus eius numerabatur. verum iniuste læso, atque offenso postea Philippo cum inde profugisset, Thebanis ultro sese in potestatem tradidit. mox illis quoque relictis cum identidem huc & illuc isset ac redisset, pluribusque quam Euripus, propter quem habitabat, circuitiones, & conuersiones reciprocas fecisset, in medias Philippi ac Thebanorum inimicitias præceps actus est. Ad extremum in ops consilij cum quid se faceret, nesciret, sibi que bellum denuntiatum videret, vnam spem salutis reliquam esse animaduertit, si populum Atheniensem sibi iureiurando deuinctum habere posset, cum socij nomine appellatum, auxilium sibi laturum, si quis forte ipsum bello lacefferet: quod sine dubio erat futurum, nisi vos prohiberetis. Cum igitur in hac cogitatione

versatus esset, mittit huc legatos Glaucetam, Empedonem, Diodorum, eum, qui cursum illum Doricum viginti stadia longū cucurrit, populo Atheniensi spes inancis, Demostheni, & eius alleclis pecuniam afferenteis. Tria autem vno tempore redimebat: primum ne societatis vestrae spe decideret. nam si populus Atheniensis superiorum eius iniuriarum memor societatem non probaret, nihil erat medium, sed ei relinquebatur è duobus alterum, vel vt ex Chalcide profugeret, vel vt vndique circumuentus, atque implicatus mortem oppeteret, tot & tantæ Philippi ac Thebanorum copiæ in eum armatæ irruebant. dabatur ei, qui societatem decreuisset, merces altera, ne Chalcidenses in conuentu confessuque communi, qui Athenis haberi solet, interesse cogentur: tertia ne tributa conferrent. Et Calliam quidem nullius eorū, quæ sibi proposuerat, quæque expetebat, nec spes, nec opinio fefellit. Iste autem tyrannorum inimicus, (vt quidem simulat) Demosthenes, quem prædicat Ctesiphon perpetuò res optimas dicere ac suadere, cum tempora ciuitatis vendidit, tum in societate decernenda, censuit, vt Chalcidensibus opem ferremus, loquendi genere duntaxat commutato. nam vt rei iniquitatē honesta oratione tegetet, asperitatemque leniret, pro his adscripsit, vt Chalcidenses nobis opitularentur, & suis Atheniēsis bellū inferre conaretur. Postremò cōuentus Græcorum communis Athenis agendi ius, & tributorum descriptorum, in quibus nerui belli erant positi, vtilitatem funditus sustulit, ac vēdidit: honestissima nomina turpissimis actionibus impuens, vobisque oratione persuadens, ac pene dicam, vim afferēs ad credendum, semper oportere ciuitatem nostram Græcis auxilio egentibus prius auxilium ferre: societates verò posteriore loco facere, beneficio demum accepto. Atque, vt me vera dicere intelligere possitis, sume mihi Calliæ accusationem, & societatem, simulque decretū recita. DECRETVM. Nondum igitur hoc graue aut indignum est,

tantas

tantas temporum, rerumque gerendarum opportunitates, ius conuentuum Graeciae Athenis agendorum, tributorum denique imperatorum utilitates esse venditas, sed multo id, quod dicturus sum, indignius videbitur. Nam Callias quidem eo contumeliae, iniuriaeque prorupit, Demosthenes vero is, quem tantopere laudat Ctesiphon, in eam nundinationis, & pecuniarum turpiter capiendarum cupiditatem processit, ut vectigalia tum ea, quae ex Oreo, tum ea, quae ab Eretria vobis pensitabatur, decem talenta, vobis videntibus, prudentibus, inspectantibus furtim ademerint: hos, qui a ciuitatibus mitti solebant, consiliarios, a vobis abduxerint, atque iterum in Chalcidem, & in Euboicum (quod appellatur) concilium transtulerint. Sed quibus hoc vijs ac rationibus, quam flagitiosis atque improbis effecerint, nunc operae pretium est audire. Venit tandem ad nos Callias non iam per nuntios aut legatos, sed ipse per se, & cum in cōtionem prodisset, orationem habuit sibi à Demosthene compositam, summoque studio elaboratam. Dixit se ex Peloponneso venire, noua tributi descriptione facta centum circiter talentorum ad bellum Philippo inferendum. rationemque inibat quantum quosque populos conferre oporteret: Achaos & Magarenseis omneis talenta sexaginta: Euboeae ciuitates vniuersas quadraginta. Ex hac pecunia classem, & peditatum comparari atque ali facillime posse esse & alios è Graecis complureis, qui huius tributi sic descripti partem ferre ac subire vellent: qua ex re spes esset neque pecuniam, neque milites defuturos. Atque haec quidem esse nota & aperta. Alias autem res esse reconditas, quas occultè moliri atque agere coepisset: quarum nonnullos ciuium nostrorum esse testes: deinde ad extremum nominatim Demosthenem citabat, hortabaturque ut eadem de re vnà secum diceret. Hic verò grauitè & magnifice se ferens procedebat: Calliam laudibus in caelum tollebat: occultum illud denique ac reconditum se scire simulabat. Legationem autem à se

obitam tum in Peloponneso, tum in Acarnania velle se vobis eo ipso tēpore renuntiare dicebat. cuius orationis hæc capita fuerūt: Peloponnesios, & Acarnanas omnes à se esse ad pecuniam conferendam aduersus Philippum distributos ac descriptos: descriptionem pecuniæ eam esse factam, quæ satis esset centum nauibus actuarijs instruendis atque armandis, & stipendio decem millibus peditum, & mille equitibus persoluendo: (his accessuras vrbanas & ciuileis copias) ex Peloponneso amplius militum grauioris armaturæ quinque millia: ex Acarnania totidem altera. atque huius belli gerēdi ab his omnibus vltro vobis esse delatum principatum. Neque verò longum forè cūm hæc perficerētur, sed a. d. decimum sextum Kal. decembreis. singulis enim ciuitatibus se prædixisse ac denuntiauisse, vt omnes Athenas plenilunio conuenirent, & in communi sociorum concilio interessent. Etenim, Athenienses, hæc est istius hominis cōsuetudo, non iam omnium communis, sed ipsius propria, & peculiaris. Ceteri enim gloriosi & arrogantes ostētatores cūm mentiuntur, dant operam nequid notatum ac definitum temporibus, nequid certum ac perspicuum eloquantur, verentes ne refelli & coargui possint. At Demosthenes cūm venit ei in mentem aliquid sibi impudēter arrogare, de seque gloriose prædicare, primūm periurio mendacium cumulat, pestem sibi exoptat, exitiūque precatur: deinde quæ certò scit nunquam futura, non dubitat asseuerare futura: temporibusq; notatis, ac rationibus eorum subtiliter subductis, definit quando quicque futurum sit. denique quos ne de facie quidem nouit, eorum quasi notissimorum nomina commemorat, vestris auribus hac arte fallaciter alle&is, atq; occupatis, corūmque, qui vera loquuntur, orationē imitans. Quocirca acerbissimo odio dignus est, qui cūm sit improbus ac sceleratus, virorum bonorum notas, signaque adulterat atque corrumpit. His dictis decretum dat scribæ recitandū, primūm longius Iliade: deinde verbis,

quæ

quæ loqui consuevit, & vita, quam vixit, inanius: postremo spei fallacis, & exercituum, qui nunquam conficendi essent, plenum. Cum autem lógifsime vos à cognitione furtorum suorum abduxisset, spé que inani suspendisset, atque inflauisset, tum sese subito conuertens, scitum facit, in quo censet, vt legatos eligeremus, qui Eretrienfis orarent, (erat enim valde necesse scilicet eos orare) vt tributum vísitatum quinque talétorum, ne iam vobis, sed Calliæ pensitarent. Rursus alteros ad Oritas, qui ab ijs peterent, vt eundem sibi atque Athenienses amicum, eundémque inimicum haberent. Deinde integumenta illa, quibus furtum suum obtexerat, remouentur. nam repéte indicat, ac declarat, se ea omnia, de quibus in illo populi scito scripserat, ad furtum retulisse, censet vt legati ab Oritis postulent, ne vobis, sed Calliæ quinque talenta penderét. quæ quidem esse vera ex decreti lectione cognoscetis. Recita igitur decretum, detrahis ampullis, inaniq; iactatione verborû, detractis triremibus, detractis deniq; arrogantibus & gloriosis promissis. recita, & sume in manus furtû, quod homo impurus ac nefarius commisit: quem prædicat Ctesiphon etiã in hoc decreto assidué & dicere & agere res populo Atheniensi valde vtileis & perquàm salutareis. **D E C R E T U M.** Auditis igitur, Athenienses, verbo triremeis, & pedestreis copias, & plenilunium, & confessores, sed retributa vnicuique ciuitati descripta, quæ vobis à socijs pendebantur, & decem talenta amisistis. Restat nunc vt ostendam, Demosthenem trium talentorum mercedé accepta, hoc decretum interposuisse: vno talento ex Chalcide à Callia, altero ex Eretria à Clitarcho tyrãno, tertio ex Oreo. Nam, quoniam Oritarum libera ciuitas est, quoniamque nihil agunt, quod non sciscat populus, eo facilius Demosthenis furta patefacta, atque illustrata sunt. illi enim eo bello, quod cum Philippo gesserant, exhausti, atque rei nummariaë penuria laborantes, mittunt ad eum Gnosidamum Charigenis filium, eius, qui

quondam in Oreo principatum obtinuit, qui ab isto supplex petat, ut talentum civitati remitteret, promittat autem Oritas ei statuas aeneas posituros. At iste Gnosidemo respondet, se paucillulum aëris non desiderare: talentum quidem per Calliam exacturum. Cum igitur solvere cogentur Oritæ, neque haberent unde sumerent; vestigalia publica talenti nomine ei opignerauerunt, huiusque pecuniæ turpiter conciliatæ usuram Demostheni soluerunt, singulis mensibus in minam, drachmam unam donec sortem reddiderunt. atque hæc acta sunt cum populi decreto. Sume hoc Oritarum decretum, ut ex eo omnes intelligant, ea, quæ dico, esse vera. **DECRE-
TUM.** Hoc decretum, Athenienses, probum ac dedecus est civitatis; argumentum rerum a Demosthene publice gestarum certissimum, perspicua Ctesiphontis accusatio. Nam qui tam turpiter habuerit pretio addictam fidem, seseque muneribus labefactandum & corrumpendum præbuerit, fieri non potest ut vir bonus sit: quæ tamen iste ausus est in populi scito perferbere. Hic tandem locus est tertij temporis, atque adeo omnium miserrimi atque acerbissimi temporis: in quo & Græcorum, & civitatis nostræ temp. funditus evertit ac perdidit Demosthenes: primum quod impius in templum Delphicum extitit, deinde quod iniustam, & prorsus imparem & que iniquam cum Thebanis societatem decrevit. sed à sceleribus, quæ in deos immortales suscepit, initium ducam.

Campus est, Athenienses, quem Cirrhæum nominant, portusque, qui hodiè sacer ac dirus appellatur. hunc locum olim Cirrhæi & Acragallidæ, barbaræ, & à legibus alienissimæ nationes incoluerunt, quæ templum Apollinis, donaque ei deo consecrata sceleratè atque impiè diripuerunt, atque expilarunt. simulque Amphictyonum concilium & conventum gravissimum ac sanctissimum nefariè violarunt. Cum igitur eorum facta, maxime (ut accepimus) maiores vestri: secundo loco ceteri Amphictyones iniquissimè, gravissimè que tulissent, oraculum
 consuluc-

cōfulerunt, quibus supplicijs in illos homines animad-
 uertere conueniret. quibus respondit Pythia, vt cū Cir-
 rhæis, & Acragallidis dies & nocteis bellū gererēt, agros
 eorum depopularentur, ipsos in seruitutem redigerent,
 Apollini Pythio, Dianæ, Latonæ, Mineruæ Providæ a-
 gros illos, vt in perpetuum inculti essent, consecrarent,
 eosq; neq; ipsi colerēt, neq; ab alio coli paterētur. Hoc
 oráculo accepto Amphictyones decreuerunt, cū in ea
 re Solō Athen. vir & legum sribendarū peritissimus, &
 in omni poetica ac sapientia studio multū diūque exer-
 citatus ac versatus, sententiā dixisset: vt populus Athe-
 niensis dei oraculum secutus, consceleratis illis homini-
 bus bellum inferret. Magno itaque ex Amphictyonibus
 exercitu comparato, bellōque illato, eos in seruitutem
 redegerunt, portus eorum aggeribus excitatis obrue-
 runt, urbem funditus euerterunt, agros oraculo obtem-
 perantes consecrarent: postremò præter illa omnia reli-
 gioso se iureiurando obstrinxerunt, neque se terram sa-
 cram culturos, neque ab alio coli passuros, opem deo
 pedibus ac manibus, & omnibus neruis ac viribus latur-
 ros: neque hoc iureiurâdo contenti fuerunt, sed sibi, ce-
 terisq; omnibus, si aliter facerent, omni execratione
 deuinctis pestem, exitiūque precati sunt. Sic enim in
 ea execratione scriptum est. SI QVIS HAEC MIGRA-
 VERIT, SIVE CIVITAS, SIVE QVIS PRIVATVS,
 SIVE NATIO, APOLLINI, DIANAË, LATONAE, MI-
 NERVAË PROVIDAE SACER ESTO. hoc præterea ijs
 imprecatur, vt neque ipsis terra fructū ferat, neque vxor-
 es eorum liberos parentibus simileis, sed monstra &
 portenta pariant: neque pecorum partus sint naturales:
 & vt è bello, è iudicijs, è foro victi discedant: denique
 vt funditus intereant ac delcantur & ipsi, & eorum do-
 mus, ac genus. NEQUE VNQVAM (inquit) APOLLINI,
 NEQUE DIANAË, NEQUE LATONAE, NEQUE MI-
 NERVAË PROVIDAE PVRE LITANTO, NEQUE AC-
 CEPTAE SVNT O DIIS IMMORTALIBVS EORVM

VICTIMAE. atque ut hæc esse vera luce ipsa clarius cernere possitis, recita mihi dei oraculum, audite execrationem, iurandi que, quod cū Amphictyonibus vestri maiores iurauerunt, memoriam repetite.

ORACVLVM. IVSIVRANDVM. EXSECratio.

Non prius hanc vrbis captam delebitis arcem,

Quam Phœbi templum fluctus grauis Amphivita

Aluat, horrendum ad sacra tollens littora murmur. Hac execratione facta, hoc iureiurando concepto, hoc oraculo edito, quæ omnia in tabulas publicas relata adhuc extant, Locri, Amphissenses, immò verò eorum principes ac magistratus, iuris & legum contemptores, campum illum coluerunt: portum sacrum, dirum ac sceleratum rursus munierunt, ac celebrarunt, cùm portoria ab ijs, qui præternavigabant, exigent. nonnullos præterea pylagoros (sic enim appellatur concilij Pylæi oratores) qui Delphos venissent, pecunia corruerunt: quorum in numero fuit Demosthenès. Nā suffragio creatus à vobis Pylagorus mille drachmas ab Amphissensibus accepit, ne quâ eorum apud Amphictyones mentionem faceret. Illi autè stipulatione interposita promiserunt se quotânis viginti minas ex pecunia illa nefaria ac scelerata refectas, Athenas missuros, ut in hac vrbe, summa cura, summoque studio Amphissensibus opitularetur: qua quæsiem ex re hoc ei contigit, ut quemcunque vel priuatum, vel potestate præditum, vel liberam ciuitatem attingeret, vnumquemque horum sua contagione incommodis & calamitatibus insanabilibus & pestiferis afficeret. Videte igitur quemadmodum deus & fortuna Amphissensium impietate fuerint superiores ac potentiores. Theophrasto prætore, Diogneto Anaphlystio hieromnemone (sic enim appellatur scribam Amphictyonicum) vos pylagoros legistis Midram illum Anagrasium, qui vtiq̃ multas ob causas viueret: & Thrasyclem Lesbium, & me vnâ cū his tertium. Accidit autem ut cùm salui Delphos peruenissemus, continuò Diognetus hieromnemon in febrim

brim incideret, itémque Midias. Alij Amphictyones in consilio aderant. Interea affertur ad nos ab ijs, qui suum in ciuitatem nostram studium ac beneuolentiam declarare cuperent, Amphissensis tum valde demissos atque humileis, Thebanisque mirum in modum subseruientis, decretum aduersus nostram ciuitatem attulisse, quo decreto populus Atheniensis quinquaginta talétis multaretur, propterea quòd nouo templo priusquam precibus sollennibus expiatum esset, nouos clypeos dicauissemus cum legitima illa & conuenienti inscriptione, ATHENIENSES DE MEDIS AC THEBANIS, QVO TEMPORE HI CONTRA GRAECOS COMMISSO PROELIO DECERTAVNT. Ego arcessitus ab hieromneme, & in consilium introire iussus, vt apud Amphictyones pro ciuitate nostra dicerem: venio non inuitus, quippe qui mea sponte hoc ipsum facere constitutum in animo haberem. cum paullo cupidius ac studiosius ingressus essem, verbáque facere coepissem, alijs Pythagoris seductis, quidam ex Amphissensibus hominibus petulantissimus, & (vt mihi quidem videtur) nullis artibus ingenuis eruditus, omnisque doctrinæ liberalis expertus: fortasse etiam à deo aliquo irato in hanc amentiam impulsus: At si saperetis (inquit) vos Græci, ne nomen quidem populi Atheniensis his diebus commemorari sine-retis, sed eos vt contaminatos atque execrabilis à templo arceretis. Et simul Phocensium societatem, quam Crobylas ille suaserat, commemorabat: multaque alia cõtumeliosa, acerba, atque odiosa in ciuitatem nostram expromebat, cum ea diceret, quæ neque tunc aures meae ferre poterant, neque nunc libenter oratione refrico. Itaque his auditis ita cõmotus ac perturbatus sum, vt nõquam mihi antea quicquam in vita mea grauius ac molestius acciderit. Atque alia quidem, quæ tum locutus sum, prætermittam: hæc pauca de multis vobis exponam. Venit tum mihi in mentem, Amphissensium in terram sacram impietatis facere mentionem: quam terram eo-

dem è vestigio, in quo insitebã (nam campus Cirrhæus templo Delphico subiacet, vnóque fere aspectu totus prospici potest) Amphictyonibus indicabã. Videris (inquam) Amphictyones, campum hunc ab Amphissensibus vomere subactum & excultum, domos, siglinas, & villas inædificatas. cernitis oculis sceleratum & execrabilem portum munitum. Scitis ipsi (neque enim alijs testibus egetis) istos ex sacro portu vectigalia exigere, pecuniãque cogere. Et simul dei oraculum, maiorum iusiurandum, execrationem factam recitari iubebam, liquidò confirmans ac testificans, me pro populo Atheniensi, pro me, liberis, & domo mea, pedibus, manibus, voce, omnibus denique viribus, iuriurando obtemperanté, deo & terræ sacræ opitulari, ciuitatémque nostrã religione liberare. At vos, Athenienses, vobis ipsi consulite. Canistrorũ dies festus agi iam cœptus est: admotæ sunt altaribus hostiæ, ea petituri estis à dijs immortalibus, quæ vobis priuatim, ac reip. sint profutura. Vobiscum igitur ipsi considerate, & cogitate, qua voce, qua mente, quibus oculis, qua spe freti & consilii vota, & supplicationes facietis, si vos consceleratos, atque omnibus execrationibus deuotos, inultos dimitteris. non enim obscure, sed apertissime in execratione scriptum est, cum in eos, qui impij in deum extiterint, tum in eos, qui non prohibuerint, quibus supplicijs vtrosque affici oporteat: **NE PVRE (inquit) LIBANTO, NEVE SACRIFICANTO, QVI APOLLINI, DIANAE, LATONAE, MINERVAE PROVIDENTIAE AVXILIVM NON TVLERINT, ET EORVM VICTIMAS DII IMMORTALES AVERSANTOR.** Cùm hæc & alia huiusmodi multa præterea dixissem, tandem dicendi finem feci, atque è consilio discessi. Tum clamor ab Amphictyonibus factus est, tum strepitus editus, & Amphictyonum vociferatio consecuta: neque iam de clypeis, quos dicaueramus, sed de Amphissensibus pœna afficiendis agebatur. Et cùm iam serum diei esset, prodit præco, ac prædicat,

dicat, ut quotquot è Delphis biennio pubertatem superassent, tum serui, tum liberi, hora diei prima cum falci-
 bus & ligonibus ad eum locum, quem indigenæ Thuté-
 um nominât, conuenirét. Iterum idem præco prædicat,
 ut hieromnemonēs, & pylagori eòdem venirent, deo, &
 terræ sacræ auxilium laturo: quæcunque ciuitas non ad-
 fuisset, templo Delphico arceretur, scelere atque exse-
 cratione obstringeretur. Postridie manè in eum locum,
 quem supra diximus, venimus, in campum Cirrhæum
 descendimus. deinde portu illo diruto ac delerto, ædifi-
 cijs incensis rediimus. Interea dum hæc agimus, Locri,
 Amphissenses, quorum domicilia, septem circiter mil-
 lia passuum Delphis aberant, vniuersi armati manu fa-
 cta in nos impetum fecerunt. quòd nisi properè nos in
 fugam coniecissemus, ac vix tandem Delphos peruenis-
 semus, nihil propius actum esset, quàm ut funditus peri-
 remus. Postridie Corthyphus, qui sentétias ratas faciebat,
 Amphictyonum contionem habuit. (contionem autem
 nominant, quâdo non solùm pylagori, & hieromnemo-
 nes, sed ij etiam, qui vnà sacra faciunt, & qui ad còsulen-
 dum oraculum venerunt, conuocantur.) Hic iam graui-
 ter atque acerbè accusati sunt Amphissenses: nostra ciui-
 tas còtrâ magnis laudibus ornata est. Totius autem ora-
 tionis hæc fuit clausula: decernitur ut hieromnemones
 ante proximum Pylæum còuentum pro dicta die ad Py-
 las venirent, decretumque vnà illud afferrét, quo decre-
 to Amphissenses essent suorum in deum, terram sacræ,
 Amphictyones scelerum pœnas daturi. Atque ut nihil
 à me confictum esse perspicere possitis, decretum ipsum
 vobis scriba recitabit. **DECRETVM.** Hoc igitur decre-
 to à nobis cùm in senatu recitato, tum in còtione ad po-
 pulū prolato, & actionibus nostris à populo comproba-
 tis, & vniuersa ciuitate ad studiū pietatis vehemèter ex-
 citata atq; inflàmata, cùm Demosthenes pro pecunia illa
 Amphissensi, pronūtiata iâ, atq; apud sequestrè deposita
 còtrâ diceret, egòq; cū vobis inspectâtibus atq; audien-

ribus in furto manifesto deprehensum tenerem, neque
 iam posset homo alioqui audacissimus apertè ciuitatem
 in fraudem inducere, ingressus in curiam, & summotis
 imperitis, auctoritatem senatus perscribendam curat,
 eamque mox in contionem defert, eius, qui scripserat,
 inscientia fretus. Et vt hæc ipsa senatus auctoritas in cō-
 tione confirmaretur, ratâque fieret, & vt à populo scisce-
 reretur, perfecit, cum surrexisset iam cōtio, egóque disces-
 sissim, (neque enim vnquam passus essem) multitudine
 denique dimissa. Cuius quidem sciti caput hoc fuit, vt
 hieromnemo Atheniensium, & pylagori, qui posthac
 hoc munere functuri essent, ad Thermopylas & Del-
 phos proficiscerentur ijs temporibus, quæ à maioribus
 nostris constituta sunt, verbo præclarè, & honestè: re tur-
 piter, & flagitiose. Prohibet enim quo minus ad confes-
 sium illum Pylæum ad tempus occurrant, qui necessa-
 riò ante tempus à maioribus nostris constitutum & vsi-
 tatum erat futurus. sed aliud ei scito adscriptum est mul-
 to & apertius & acerbius, vt Atheniensium hieromne-
 moni, & pylagoris, qui post illa futuri essent, neque ver-
 borum, neque factorum, neque decretorum, neque vl-
 lius rei cū ijs, qui illuc cōuenirent, esset vlla cōmunitas.
 At quid sibi verba illa volunt, NE SIT VLLA COM-
 MVNITAS? vtrum verum loquar, an id potius, quod vobis
 auditu iucundum futurum est? verum loquar. Nam
 quod ita semper ad voluptatem dicitur, hæc ciuitati no-
 stræ mala, quæ videmus, inuexit. Non sinunt iurisiurandi
 memores esse, quod maiores nostri iurauerunt, non ex-
 secrationis, non oraculi. Nos igitur, Athenienses, pro-
 pter hoc populū scitum in vrbe mansimus: alij Amphi-
 ctynes ad Thermopylas conuenerunt, præter vnam
 ciuitatem: cuius nomen reticere fatius esse duco, & dij
 immortales prohibeant, ne cuiquam Græcorum similis
 accidat calamitas: & simul vt conuenerunt, bellum in
 Amphissenseis, exercitumque decreuerūt, Cottyphum-
 que Pharfalium, eum, qui tunc decreta confirmabat, im-
 pera-

peratorem legerunt: quo tempore non erat in Macedonia Philippus, quin ne in Græcia quidem: sed lóginquis in locis in media Scythia versabatur: quem tamen mox audebit dicere Demosthenes, à me esse in Græcos incitatum atque immissum. Ac primo quidem illo exercitu victoriam consecuti, valde se clementeis ac moderatos in Amphissenseis præbuerunt. Nam pro maximis eorum in deos immortales sceleribus, pecunia eos multarunt, eamque pecuniam vt die dictà deo soluerent, multo antè edixerunt: & sceleratos, commissorumque facinorum auctores è ciuium numero segregarunt, atque exterminarunt: eos verò, quos sua pietas solum vertere coegerat, ab exsilio reuocarunt. Sed cum illi neque pecuniam deo persoluerent, & sceleratos restituerent, & pios de sententia Amphictyonum ab exsilio reuocatos, eijcerent, iam tum alterum contra Amphissenseis exercitum duxerunt, cum longo post interuallo, ex bello, quod cum Scythis gerebat, reuersus esset Philippus: cumque dii immortales nobis huius pietatis imperium principatumque detulissent, Demosthenis avaritia, prædæque obstitisset. At nonne vobis dii prædicebant, nonne præsignificabant, nonne præmonebant vt caueretis, propè humanam vocem mittentes? Nullam me Dius Fidius vnquã ciuitatem vidè apertius à dijs immortalibus conseruari, à quibusdam oratoribus perdi ac funditus eueri. Non satis valebat ad ostentum illud, quod mysteriorum diebus significatum fuerat, præcauendum, mystarum interitus? Non Amyniades prædixerat, vt & caueremus, & certos homines, qui ab Appolline requirerent, quid factò opus esset, Delphos mitteremus? non Demosthenes aduersabatur? cum Pythiam cum Philippo facere diceret, homo omnis doctrinæ atque humanitatis expers, & hac, quam ei datus, licentia immoderatè perfruens, eaque se ad satietatem explens atque ingurgitans. Postremò nonne milites sacris non litatis, non mactatis victimis ad perspicuum vitæ periculum misit? At nuper dicere ausus est,

Philippum iccirco in Atticam cum exercitu non inuasisse, quòd exta fuissent ei minus lata. Quo igitur supplicio dignus es? ò Græciæ labes & funus. Si enim ipse victor in eorum, qui victi erant, sineis non inuasit, propterea quòd exta victimarum ei non erát lata, tu autem incertus quid esset omnino futurum, priusquàm exta inspexisses, milites ex vrbe misisti: vtrum te corona donari propter cladeis & calamitates ciuitatis, an è ciuiù numero segregari, atq; in vltimas terras amádari oportet? Nã quid insperati, quid inexpectati nostra ætate non vidimus? non enim humanam vitam viximus, sed vt posteris sermonem de rebus inopinatis, & pãne dicam incredibilibus proderemus, in lucem editi sumus. Non rex Persarum, qui montem Athonem perfoderat, qui Hellepontum iunxerat, qui Græcos terram, aquámque pòtcebat, qui audebat in litteris scribere, se ab oriente sole ad occidentem, vnum esse omnium mortalium dominũ, nõnne ille ipse nunc non de principatu & imperio, sed de corporis salute dimicat? nõnne eosdem cernimus tum hac gloria, tum belli aduersus Persas suscepti principatu dignos esse habitos, qui templum Delphicum liberarunt? non Thebæ: Thebæ vrbs vicina & propinqua vno die ex media Græcia excissa & sublata est? cui tametsi iure hæc calamitas acciderit, quippe quæ non re~~ce~~ de summa re consuluerat, non tamen humanitus, sed diuinitus in eam amentiam ac temeritatem fuerat impulsa. Iam Lacedæmonij miserimi, qui initijs duntaxat interfuerant, rem que illam cum templum primùm occuparetur, leuiter attigerant, illi illi, qui sibi Græciæ principatum quondam arrogabãt, non propè adest cum, vt Macedonibus dent obsides, suámque calamitatẽ, insignem ad posteritatis memoriam sempiternam faciant, iterum ad eum legationem sint missuri, pœnas ipsi cum sua patria Alexãdri arbitrato daturi? denique, quod est miserimum, & victoris & iniuria lacefsiti iudicium æquitatẽque subituri? Vrbs verò nostra, cõmune olim Græcorum

corum perfugium, ad quam antea legationes ex singulis Græciæ ciuitatibus ventitabant, singuli salutem à vobis accepturi, nōne nunc non de Græcorum principatu, sed de patriæ solo decertat? Atquî hæc nobis acciderūt posteaquàm Demosthenes ad remp. accessit. qua de re præclare Hesiodus. vetat enim quodam loco, populos erudiens atque instituens, & ciuitatibus cōsulens, ne improbos oratores approbent, neue in eis acquiescant. dabitis autem mihi hanc veniam, Athenienses, vt ego versus vobis recitem. Arbitror enim nos ob eam causam dum pueri sumus, poëtarum sententias ediscere, vt ætæ iam corroborata ijs vtamur. Sic igitur canit Hesiodus.

At toti haud raro populi plectuntur ob vnum,

Qui scelera admittit, qui res molitur iniquas.

His autem exitium cælo demittit ab alto

Iupiter, & letale malum, pestemque, famemque.

Sic pereunt miseri ciues: sæpe ille cohorteis

Interimit totas, sæpe altas diruit vrbes,

Et rapidis nauis iactatas obruit vndis.

Si poëtæ sententias demto numero perpendatis, puto vobis non Hesiodi carmen, sed oraculum in administrationem reip. & actiones Demosthenis visum iri. nam istius in rep. gerenda rationibus & institutis classes, exercitus, vrbes deletæ, & funditus euersæ sunt. Quinetiam existimo neque Phry nondam, neque Eurybatum, neque alium quemquam eorum, qui olim improbitate excelluerunt, talem magum, aut planum, aut præstigiatores extitisse, qualis est Demosthenes: qui ausus est dicere, ò terra, & vos, ò dij immortales, dæmones, atque homines, ausus est, inquam, dicere, vos rectis oculis aspiciens, Thebanos societatem nobiscum fecisse, non quòd temporibus cohererentur, non metu perterritos, non vestra gloria famaque cōmotos, sed Demosthenis contionibus adductos. Atqui multas ante istum legationes Thebas obierunt homines illorum amantissimi: quorum primus fuit hic Thrasybulus Collyteus, imperator, vir apud Thebanos,

si quis alius, multum auctoritate valens, valdeque apud illos gratus. Deinde Thraso Archicus, cum quo Thebani hospitium publice fecerunt: Leodamas Acharneus, cui non minor est, quam Demostheni, dicendi facultas: meo quidem iudicio, maior orationis suauitas: hic Archidamus Pelex, ipse quoque eloquens, & qui multa in rep. gerenda propter Thebanos pericula adiit: Aristophon Azenicus, contionator & populi magister, qui diutissime Bœoticis partibus studuisse in simulatus est: Pyrander Anaphlytius, orator, qui etiam nunc viuit. Nullus horum tamen Thebanos vobis conciliare, & vt vobis amici essent, flectere potuit. cuius rei causam cum sciam, non necesse habeo propter eorum calamitates exponere: sed posteaquam (opinor) Philippus Nicæam ijs ademptam Theffalis tradidit, & quod bellum ex Bœotorum finibus depulerat, hoc idem bellum rursus per Phocidem in Thebas ipsas traduxit, atque ad extremum Elatéam occupatâ vallo muniuit, in eamque præsidium imposuit: hinc tum illi malorum propinquorum ac iam instantium metu excitati Atheniensium auxilium implorarunt. vos itaque exercitum eduxistis, Thebas introistis armati, pedites & equites, priusquam Demosthenes vnam de societate syllabam scripisset. Quæ res Thebas vos intromittebant? tempus, metus, societatis utilitas ac necessitas, non Demosthenes. Namque his in rebus tria in vos vel grauissima peccauit Demosthenes: vnum quod cum Philippus verbo vobiscum bellum gereret, re vera longe acerbior odio Thebanos persequeretur, quo modo res ipsæ declararunt: (quid enim pluribus opus est?) de his omnibus rebus tantis, tantique ponderis vos celauit: & societatem nobis cum Thebanis futuram simulans non quod ita rationes & tempora Thebanorum postularent, sed quasi ea res consilij & legationibus suis conficeretur: primùm persuasit populo ne spectaret, neue magnopere attenderet quibus conditionibus societatem facere conueniret, sed satis haberet,

si fieret

si fieret modo. Hoc autem occupatō , & pane dicam expugnato ; vniuersam Bœotiam Thebanis dedit , cū decreuit , vt si qua ciuitas à Thebanis descisceret , Athenienses Bœotis , qui Thebis essent , opitularentur , verbis (vt solet) insidiosis res ipsas suffurans , & occultans , alióque transferens , quasi verò Bœoti re detrimento , malóque accepto , verbis à Demosthene callidè & artificiosè compositis contenti essent futuri , & non incommoda , iniuriásque acceptas grauissimè laturi . Deinde sumtuū belli parteis duas vobis adscripsit , qui longius à periculo aberatis : tertiam Thebanis , quorum præcipuè res agebatur : in his singulis turpissimè nundinatus ac prædatus : imperium maritimum cum illis communicauit , impensam propriè nostram esse voluit : terrestre (si nugis omis- sis seriò loqui volumus) totū profus ad Thebanos transtulit , adeò , vt in eo bello , quod natum est , Stratocli , nostro imperatori de militum salute facta non sit statuendi potestas . Atque hæc non & ego in iudicium voco , & alij prætermittunt : sed & ego crebris sermonibus vsurpo , & omnes reprehendunt , & vos scitis , neque irascimini . Sic enim in Demosthenem animati estis : vestræ iam aures audiendis eius facinoribus & flagitijs occalluerunt . Itaque nihil noui quod miremini , vestris auribus accidit , cum de eius factis auditis . At longè aliter facere vos oportet . oportet vos iniquo animo ferre , oportet in eū animaduertere , siquidem reliquas reip . parteis incolumis retinere , & conseruare vultis . Alterum Demosthenis peccatum est longè superiore grauius , quòd senatum & consilium publicum ciuitatis , & populi dominationem ac libertatem nobis insidiosè ademtam , Thebas transtulit , atque in Thebanam curiam traduxit , rebus & actionibus nostris cum principibus Bœotorum pacto- ne facta communicatis . Tantam autem sibi iam potentiam comparauit , vt contione occupata , atque adeò obfessa , gloriatur se quoquò velit , etiam si non mittatis , legatum profecturum . Si quis verò imperatorum ei in di-

cendo aduerfetur, prætoribus oppreffis atque in feruitutem redactis, & affuefactis nihil contra ipfius voluntatem dicere, minetur fe fuggesti nomine prætorium in ius, iudiciũque vocaturum. Plura enim commoda, plureifque vtilitates fua opera è fuggesto, quàm per imperatores è prætorio ad vos perueniffe. Iam in externo exercitu cùm integer non effet militum numerus, quæftumque ex ea re faceret vberiffimum, pecuniam militarem furaretur, decem millia externorum militum Amphiffentibus mercede accepta locaffet, abductis atque fubreptis militibus, nõne me teftante deos & homines, & dolenter in contionibus infelicem statum ciuitatis, & imminentem reip. cafum deplorante, prope modum vrbem imparatam in extremum difcrimen adduxit? Quid enim putatis Philippum temporibus illis fuiffe optaturum? non vt fe paratim cum vrbanis copijs, paratim cum externis militib⁹ ad Amphiffam prælium committeret? Græcos tanta plaga accepta omni fpe falutis orbatos opprimeret? Et tamen Demofthenes poftquam tot malorum ciuitati caufa extitit, impunitate non eft contentus, fed nifi corona aurea donabitur, ferendũ non putat, neque ei fatis eft præconis vocem de eo in cõfpectu veftro prædicare, fed nifi Græcis præfentibus atque infpectantibus prædicatio fiet, indignabitur, ferendũ nõ putabit. Ita improba natura, vt appàret, magnã potestaté adepta, populis ac ciuitatibus liberis infigneis calamitates importare folet. Venio iam ad tertium tempus, omnium, quæ fuprà dicta funt, multo maximum. Cùm Philippus Græcos minime contemneret, fciretque (non enim ftolidus nec hebes erat) fe de bonis, fortunisque omnibus breui temporis momẽto decertaturum, atque iccirco pacem facere vellet, legatõfque miffurus effet: cùm altera ex parte magiftratus ac principes Thebanorum periculum propinquum ac ceruicibus ciuitatis impendens pertimefcerent, (neque iniuria: non enim eos orator, qui militiam fubterfugiffet, locumque ab imperatore

ratore datum reliquisset, monuerat, sed bellum Phocense, decennium in Phocide versatum, documētum ijs dederat, cuius etiam tunc hæreret in eorum animis memoria sempiterna) cū igitur hæc ita se haberent, cūque animaduerneret ac suspicaretur Demosthenes Bœotix principes priuatim pacem facturos, auro sine se à Philippo accepto: non esse cur viuere vellet arbitratus, si qua quæstus & nundinationis societate excluderetur, repente in contionem profiliit, neque dicente quoquam mortalium, pacem cum Philippo facere oportere, neque negate, sed quia existimabat se hoc veluti præconio, Bœotorum principibus multo ante prædicare ac denuntiare, vt sibi pecuniæ captæ, prædeque partem referrent, per Mineruā iurabat, quam scilicet eò fabricat^o est Phidias, vt in ea quæstus faciēdi rationem quæreret, periuurijque fraudem susciperet Demosthenes: si quis pacem esse cum Philippo faciendam diceret, se eum capillo arreptum, in carcerem abducturum, Cleophontis imitans in administrāda rep. rationem & institutum: qui bello Lacedæmonio (vt à maioribus nostris accepimus) ciuitatem fundit^o perdidit. Sed cū principes Thebanorū, quid ille vellet non magnopere neque laborarent, neque attenderent, militēsque vestros ex vrbe iam ad bellum egressos remisissent, vt vos de pace deliberaretis: tum iste de gradu ac potestate mentis deiectus, & impotētia animi præceps, contionem occupat: ibi Bœotix principes, Græcorum proditores nominabat, populi scitum se facturum dicebat is, qui hosteis nūquam rectis oculis ausus est intueri, quo vos Thebas legatos mitteretis, qui à Thebanis iter per eorum finis aduersus Philippum postularent. Thebani principes autem summo pudore affecti, ac veriti, ne reuera Græcorum proditores esse viderentur, à pacis consilio refugerunt, atque ad exercitum comparandum, instruendūque excitati sunt. Hoc loco, Athenienses, operæ pretium est fortium virorum meminisse, quos cū iste non immolatis hostijs, & inauspicatò ad

certum, perspicuumque vitæ discrimen compulisset, ausus est fugacibus, & loci desertoribus pedibus in mortuorum sepulcra ascendere, eorumque virtutem laudare. O ad res magnas ac serias omnium hominum ineptissime; ad orationis cōfidentiam, verborumque audaciam accommodatissime ac paratissime: incipiēs ne, audebīsne dicere in ora horū intuens, tibi propter ciuitatis calamitates coronā deberi? aut vos Atheniēses, si dixerit, patimini? feretis? vt vnā cum ijs, qui mortem obierunt, vestra quoque memoria (vt appāret) moriatur? Adeste mihi, quæso, Athenienses, animis, ad exiguum spatium temporis, non iam in iudicio, sed in theatro, & fingite vos præconem antecedentem, prædicationemque coronæ ex populi scito futuram recitantem intueri: & vobiscum ipsi considerate, vtrū putetis mortuorum propinquos ob tragœdiarū spectacula, heroūmq̃e grauissimos casus, & acerbissima incommoda, quæ postea exprimentur & referentur in scena, maiorem vim lacrymarum profusuros, an ob ciuitatis iniquitatem & demētiam? Quis enim non Græcus modò, sed homo liberaliter institutus non ingemiscat, si nihil aliud, illud saltem in theatro recordatus, hoc quondam die tragœdis, vt nunc, in scenam proditurus, quo tempore melius erat morata ciuitas, & à magistratibus melioribus gubernabatur resp. præconem, simulac prodijisset, productis orbis filijs, quorū patres in bello occiderant, adolescentulis totius corporis armatura decoratis, pulcherrimum, & ad virtutem expectandam acerrimum præconium pronuntiare solitum?

POPVLVM HOS ADOLESCENTVLOS, QVORVM PATRES IN BELLO FORTITER PVGNANTES CECIDERVNT, VSQVE AD PVBERTATEM ALVISSE, NVNC AVTEM HAC ARMATVRA TECTOS AVSPICATO, ET BONIS OMINIBVS, VT AD RES SVAS REVERTANTVR, DIMITTERE, ET AD SVVM QVEMQVE ORDINEM,

NEM, IVSQUE OBTINENDÆ IN REP. DIGNITATIS VOCARE. Hæc igitur tum prædicabat: nunc verò non item. producto enim eo, qui liberis orbitatis ac solitudinis causa fuit, quid prædicabit, aut quid loquetur? Nam & si ea ipsa, vt præscripta & composita sunt, decreti verba recitabit, non tamen erit muta ea, quæ ex veritate nascitur, turpitude: quin verba maximè repugnantia & contraria voci præconis loqui videbitur, *POPVLVM ATHENIENSEM, HVNC VIRVM*, si quidem iste vir est, *CORONA DONARE VIRTVTIS ERGO*, nequissimum: *FORTITVDINIS*, timidissimum, locique desertorem. Obsecro vos, Athenienses, per Iouem, reliquosque deos immortales, ne tropæum de vobis ipsis in orchestra Liberi patris figite, ne populum Atheniensem in conspectu Græcorum furoris & amentia condempnate, ne calamitosis atque infelicibus Thebanis insanabilium & desperatorum malorum memoriã refricite: quos propter hunc fugere coactos in urbem vestram recepistis, quorum fana, sepulcra, liberos Demosthenis turpissimæ nundinæ, mercatusque domesticus, & aurum regum perdiderunt. Sed quoniam corporibus tum adesse non potuistis, nunc adeste animis, & putate vos eorum calamitates intueri: fingite cogitatione imaginem urbis captæ, cuius mœmia diruuntur, ædes incendio deflagrant, mulieres & pueri in seruitutem rapiuntur, viri ac mulieres grandes natu, exacta iam ætate, serò libertatis dulcedinem dediscunt, plorantes, vobis supplicantes, irascentes denique non ijs, qui à se tam crudeleis pœnas expetiuerunt, sed ijs, qui tot ac tantorum sibi malorum auctores & causæ extiterunt, orantes atque obtestantes, ne vos vlllo modo in animum inducatis Græciæ procellam, pestemque corona donare, sed potius vt fatum ac fortunam, quæ hominem comitantur, summo studio vitetis. Nam neque vlla ciuitas, neque quisquam singularis & priuatus homo ex negotio

suscepto pulchrè vnquam discessit vsus Demosthenis
 consilio. Non pudet vos, Athenienses, in portitores, qui
 Salaminem transfuehunt, hãc legem tulisse, vt si quis eo-
 rum in transfuectione etiam inuitus & inconsultò nau-
 gium euerterit, ne ei postea liceat esse portitori, nequis
 in hominum Græcorum capitibus ac personis, subitis &
 ex tempore captis consilijs vsus inconsideratè negligenter-
 que versetur: ei vero, qui Græciam, nostrãque ciui-
 tatem funditus euerterit ac perdiderit, reip. iterum gu-
 bernandæ facere potestatem? Sed vt ad quartum tem-
 pus veniamus, & de hoc rerum statu, in quo nunc versa-
 mur, dicere incipiamus, illud vos admonitos velim, De-
 mosthenem non solùm in castris atque in acie locum
 non tenuisse, verùm etiam ciuitatis vestræ triremi vectũ
 à Græcis pecunias exegisse: quem cùm insperata salus ex
 proelio in urbem reduxisset, primis temporibus paullum
 cõtremiscebat, atq; ex sanguis & semimortuus in cõtio-
 nẽ prodibat, suadens vobis, vt se pacis custodẽ ac pacifi-
 catorem crearetis. Vos autem initiò Demosthenis no-
 men ne adscribi quidem populi scitis sinebatis, sed hoc
 negotium Nausicli dabatis. & tamen nunc iam etiam co-
 ronam sibi deberi contendit. Mortuo postea Philippo,
 atque ad regni successionem vocato Alexandro, idem
 rursus monstra & portenta nobis edens, in Pausaniam
 sollennia sacra instituit, senatũque scelere obstrinxit,
 quòd supplicationem & sacrificia dijs immortalibus ob-
 nuntium de Philippi interitu acceptum decreuisset: Ale-
 xandro Margitæ cognomen contumeliæ causa impone-
 bat, nec confirmare dubitabat, eum nunquam se ex Ma-
 cedonia commoturum: fatis ei esse si Pellæ deambula-
 ret, & viscera paterna custodiret. Atque hæc se dicere
 prædicabat non coniectura ductum, sed quòd certò sci-
 ret virtutem non nisi sanguine comparari, homo alioqui
 ex sanguis: qui Alexandrum non ex Alexandri ingenio
 ac natura, sed ex sua timiditate ignauiaque fingeret.
 Cùm igitur censuissent iam Thessali ciuitati nostræ bel-

lum inferendum, iuuenis tum primum offensus atque ir-
 riratus esset, neque iniuria, Thebæ iam ab Alexádro cir-
 cumsessæ essent, castráque ad mœnia posuisset: legatus
 à vobis suffragio creatus Demosthenes, è medio Cithæ-
 rone sese in fugam coniecit, ac reuërsus est, neque in pa-
 ce, neque in bello ciuem se recip. vtilem præbēs. Et quod
 est omnium grauissimum, cum eum vos neque prodide-
 ritis, neque in Græcorum concilio condemnari passi si-
 tis, iste vos planè prodidit, siquidem vera sunt, quæ di-
 cuntur. Narrant enim Paralij, & qui legati ad Philippum
 profecti sunt, (neque verò quisquam est, cui res credibi-
 lis non videatur) Aristionem quendam esse Plataicum
 Aristobuli pharmacopolæ filium: (sicui fortè vestrùm
 notus est) hic iuuenis olim cum suis æqualibus forma
 præstaret, diu apud Demosthenem cōmoratus est: quid
 ageret autem, quidue pateretur, cum dubium atque in-
 certum sit, tum res mihi nequaquam dictu honesta est:
 veruntamen cum (vt ego audio) & quis sit, & quomodo
 antea vixerit, notum sit nemini, Alexandri beneuolen-
 tiam blandimentis & assentatione collegit, in eius con-
 suetudinem penitus sese immerfit, in eius denique fami-
 liaribus & intimis numeratur. datis huic ad Alexádrum
 litteris Demosthenes metuendi finem fecit, securitatem-
 que & cum eo in gratiam redeundi potestatem nactus
 est, multisque & varijs assentandi rationibus de integro
 aditum sibi ad eius amicitiam comparauit. Ex hoc iam
 mihi cognoscite quàm valde res sit criminationi affinis
 & consentanea. Nam siquid horum sentiebat Demosthe-
 nes, si erat hostili in Alexandrum (vt nunc prædicat) ani-
 mo, tria ei huius voluntatis declarandæ opportunissima
 tempora oblata sunt, quorū nullo reperitur vsus: vnum
 cum Alexander non ita pridem regni possessionem a-
 deptus, rebus suis imparatis atque acerbis relictis, in A-
 siam penetrauit, quo tempore rex Persarum classe, pe-
 cunia, peditatu vigebat, ac florebat, idemque libenter
 vobiscum societatem belli fecisset, propter ea pericula,

quæ sibi impendere præuidebat. Num tu verbum tunc unum fecisti, Demosthenes, vllúmue decretum interposuisti? Visne te timuisse, tuoque ingenio obsecutum esse ponam & cōcedam? Atqui timiditatem oratoriam reip. tempora non exspectant. Verùm simulac Darius cū vniuerso exercitu descendit, cū Alexander omniū rerum difficultate atque inopia laborabat, in Cilicia interclusus hærebat (vt tu ipse dicebas) cum illum continuò (cuius tu quoque orationis auctor eras) Persicus equitatus conculcaturus erat, iam tunc ciuitas non odium, non insolentiã, nō epistolas tuas capere poterat, quas tu extremis digitis suspensas tenens in foro volitabas: nonnullis etiam os meum indicabas tãquam hominis metu perterriti, animoque debilitati & abiecti, me aurata fronte iuuenem appellabas, & siquid offenderet ac titubaret Alexander, iam iam infulatum & coronatum esse, ac quàm primùm immolandum esse dicebas. Ne hic quidem quicquam egisti, sed rem in aliud tempus nescio quod magis idoneum distulisti. His igitur omnibus prætermisissis, de præsentis rerum statu dicam. Lacedæmonij, & exercitus externus, secundum fecerant proelium, Corrhagique imperatoris milites conciderant, fuderant, occiderant: Elæi vnà cum eis à Macedonibus defecerant, Achæi præterea omnes præter Pelleneos: Arcadia tota præter Megalopolim. ea autem à Lacedæmonijs obsidebatur, cratque hominū opinio primo quoque tempore eam in Lacedæmoniorum potestatem venturam: Alexander extra septentrionalem plagam, & pænè dicam habitabilem terram discesserat: Antipater multum iam temporis in cōparando exercitu consumserat, sed qualis, & quantus esset futurus, erat obscurum. Hic nunc ostende, Demosthenes, quæ gesseris, quæ dixeris. ego tibi, si tibi commodum est, contritione cedam, quoad dicendi finem feceris. Taces. Et quidem tibi ignosco, si nihil tibi, quod dicas in mentem venit. verùm ego ipse nunc quæ tu tum dicebas, commemorabo, atque exponam.

Excide-

Exciderunt ne vobis è memoria, Athenienses, verba illa dura, odiosa, obscæna, intolerabilia, quæ miror vos, ò ferrei, patienter audire potuisse: cum ita diceret è loco superiore, Sarmenta ciuitatis certi homines amputant: Quidam populi palmites exciderunt: Rerum nervi succisi sunt: Storcæarum instar in angustum cogimur: Quidam podicem quasi acubus aut mugilibus transfodiunt. Virum sunt hæc verba ò bellua, an portenta? Quid cum te in omnem partem versans in contione dicebas tanquam Alexandri rebus aduersans: Fateor, me Lacedæmonios ad consentiendum & conspirandum contra Alexandrum concitasse: fateor me Thessalos ac Perrhæbos ad defectionem impulisse. Tunc vicum vllum ad defectionem impellas? Tunc non dico ad urbem, sed domum vllam, vbi sit aliquis periculi metus, accedere atque aspirare audeas? minime, minime verò. Sed sicubi pecunia expendatur, adsidebis, atque hærebis, nihil viro dignum geres: siquid optatum ac lætum casu euenerit, id tibi vendicabis, reipsum ad res iam confectas ac transactas auctorem adscribes: siquis metus alicunde oblatus sit, aufugies: si bene speremus, bonoque animo simus, præmium posces, & aureas coronas postulabis. Esto. Ac popularis est. Si vos compositum, cultum, & venustum dicendi genus, quo homo vitur, spectabitis, decipiemini, vt & iam antea sæpe decepti estis: sin eius naturam, reique veritatem intuebimini, nunquam id quidem vobis accidet. Hoc igitur modo potius rationem ab eo reposcite. Considerabo vobiscum quænam esse oporteat in ciuis popularis ac temperantis natura: & rursus altera ex parte constituam vobis ob oculos, qualem verisimile sit esse hominem paucorem dominationi studentem, ac fauentem, hominem nequam atque improbum: vos autem his duobus inter se comparatis, spectate iam mihi non vtro dicendi genere vtatur Demosthenes, sed vtrum viuendi institutum sit secutus. Vos igitur omnes arbitror mihi assensuros, hæc in homine populari in-

esse oportere: primum ut à paterno, maternoque genere liber sit, ne quis propter fortunam infiman atque infelicem infensus sit legibus, quæ populi potestatem continent, incolumemque conseruant: deinde ut ab eius maioribus profecta sint aliqua in populum beneficia: vel, quod est necessarium maximè, nullæ sint eis cum populo inimicitia susceptæ, ne, dum maiorum suorum casibus aduersis & calamitatibus opitulari, eorumque iniurias ulcisci & persequi studet, eadem opera ciuitatem oppugnare conetur: tertio loco, ut domi in quotidiani victus cultusque ratione frugi sit ac temperans, ne propter luxuriam, sumtusque immane in libidine & flagitio positos largitionibus se corrumpi sinat, turpemque sibi questum contra remp. instituat: deinde ut integritatem ac probitatem habeat cum eloquentia coniunctam: præclarum est enim oratorem consilio & ratione res optimas suscipientem ac sequentem, eisdem doctrina politum dicendique facultate instructum auditoribus explicare ac probare posse: sed si alterutro carendum sit, bona mens anteposenda eloquentiæ est: postremo cum forti animo esse oportet, ne in rebus aduersis, & difficultibus reip. temporibus, & in bellis populum deserat. At hominem paucorum dominationi studentem ac fauentem, alijs omnibus, planèque contrarijs studijs deditum esse conuenit. Quid enim ea vobis iterare opus est? Videte igitur quid illorum, quæ supra enumeravi, insit in Demosthene. Atque hæc consideratio adhibeatur ad illa omnia, quæ in homine populari diximus inesse debere. Fuit isti pater Demosthenes Præanicus, vir fortuna liber (non enim mentiendum est) genus autem eius maternum, auique materni quale sit dum vobis expono, quæso, diligenter, ut adhuc fecistis, attendite. Gylo quidam fuit Cerameicus. hic Nympharum templo, quod in Ponto est, hostibus prodito, quo tempore locum illum ciuitas in potestate, ditioneque sua tenebat, solum exsulij causa vertit, cum supplicium extremum, quo damna-

tus erat, subire nolisset. Hinc in Bosporum proficiscitur. ibi cum hortos, qui vulgò appellantur, à tyrannide dono accepisset, vxorem ducit sanè diuitem, ac benenummatam, magnamque vim auri secum afferentem: sed genere Scythidem: ex qua duas filias suscepit. Eas huc cum grandi pecunia missas in matrimonium collocauit, alteram vxorem duxit nescio quis, (neque enim attinet me nominare quemquam, ne mihi multorum inimicitias consem) alteram spretis ac neglectis legibus ciuitatis Demosthenes Pæanicus, ex qua vobis homo rebus superuacaneis atque inanibus deditus, & calumniator Demosthenes natus est. Negari igitur non potest, quin & ab auo materno populi Atheniensis hostis sit: (eius enim maiores capitis damnauistis) & à materno genere, Scythæ & barbarus, & voce duntaxat Græcus: quo fit, vt improbitate non sit ciuis Atticus, neque Atheniësis, sed aduena & peregrinus. Iam verò si eum ex quotidianæ vitæ ratione spectare velitis, qui homo est? ex trierarcho orationum scriptor & causidicus euasit, bonis paternis ridiculè dissipatis, atque absumtis. Deinde cum in hoc negotio perfidiosus compertus & cognitus esset, orationesque, quarum nomine pretium iam acceperat, aduersarijs impertiret: repente in suggestum prosiliit. cum ingentem à ciuitate pecuniam accepisset, perpussillam sibi reliquam fecit. Nunc verò aurum regium sumtus eius effusus irrigauit atque alluit. sed ne hoc quidem satis est. Nullæ enim vnquam diuitiæ prauis ingenij voraginem explere potuerunt. Denique, vt in summa dicam, victum sibi non ex suis vectigalibus, sed ex incommodis & periculis vestris quærit & comparat. De mentis verò bonitate, dicendique facultate, videamus qualem eum natura finxerit. verbo expediam. Oratione disertum, vita turpem. Sic enim corpore suo vsus est, sic liberis procreandis operam dedit, vt flagitia, quæ in se admisit, commemorare nolim. Vidi enim iam nonnumquam, qui alterius dedecus ac turpitudinem nimis apertè declaraf-

sent, ac palàm protulissent, eos nihil inde præter odium atque inuidiam esse consecutos. Quid tum postea? quid ex hac præclara eloquétia quæritur ciuitati? verba comata atque ornata, facta humilia atque abiecta. Iam de fortitudine per mihi breuis restat oratio. Nam si vel se ipse ignauum esse negaret, vel vos eum ignoraretis, diutius esset mihi in hoc loco commorandum. Nunc autè quando & ipse fateatur in contionibus, & vos ad vnum scitis: reliquum est, vt leges, quæ his de rebus latæ sunt, vobis in memoriam redigam. Solo scriptor legis antiquus iisdem pœnis oportere obstringi atque affici putabat, & eum, qui militiam subterfugisset, & eum, qui locum in acie non tenuisset, & eum, qui timidus miles fuisset. sunt enim etiam contra timidos atque ignauos iudicia constituta. At qui mirabitur fortasse quispiam vestrum, etiam propter ignauiam & naturam, quæstiones esse constitutas. Sunt, quid ita? vt vnusquisque nostrum pœnas legibus irrogatas magis quam hostem extimescens, tâto fortius pro patria deceret. Lator legis igitur eum, qui militiam subterfugit, & eum, qui locum non tenuit, & eum, qui hostem extimuit, & iustralibus vasis prohibet, & foro arcet, & vetat corona donari, nec ad sacrificia vniuersi populi nomine instituta admittit. Tu verò, quem per leges corona donare non licet, ei nos tuo decreto imponere coronam iubes: tuo decreto tragœdis in orchestram hominem indignissimum vocas: ad Liberi patris sacrum, eum, qui sacra & fana omnia ignauia & timiditate coactus prodidit, inuitas. Sed ne vos ab instituto sermone longius abducam: facite vobis in mentem veniat, cum se dicit esse popularem, non orationem eius, sed vitâ spectare: neque quem se esse prædicet, sed quis sit attédite. Verùm quoniam iam de coronis & præmijs, quæ dari solent à populo, mentionem feci, antequàm mihi è memoria excidat, prædico vobis, ac multo antè denuntio, nisi hæc multa & infinita dona ac præmia reprimetis, nisi has, quæ temerè & pessimè, nouoq; exem-

plò à vobis tribuuntur, coronas tolletis, neque eos, quos ornatis, præmiòque atque honore afficitis, gratiam vobis habituros, neque res ciuitatis fore meliores. improbos enim nunquam hac ratione sanabitis: bonorum animos frangetis ac debilitabitis. Quæ quidem verè à medici, hoc vobis erit magno argumento. Siquis vos roget, Athenienses, vtrum his temporibus rerum gestarum gloria nostrà ciuitas magis florere videatur, an maiorum nostrorum: neminem vestrum negaturum arbitror, quin hanc ciuitatem maiores nostri longè florentiorem, & gloriosorem viderint. Vtrum tunc, an nunc viri meliores? tunc quidem virtute præstantes, nunc verò multo deteriores. At præmia, & coronæ, & præconia, & quotidianus victus in Prytanéo vtrum tunc erant, an nunc, crebriora? tunc quidem ea, quæ sunt apud nos præclara atque honesta, rarò tribuebantur, & virtutis nomen erat in magno honore ac pretio: nunc res ipsa sordibus obsolescit, atque adeò ludibrio est: denique coronas donatis non consilio & iudicio adducti, sed mala consuetudine deprauati. Hoc igitur rem ipsam attentius cõsiderantibus meritò absurdum, minimèque consentaneum esse videatur, præmia nunc increbuisse, ciuitatis potentiã tum maiorem quàm nunc fuisse: nunc homines esse deteriores, tunc viros fuisse meliores. At ego vobis quãobrem hoc ita accidat, ostèdere conabor. Putatisne, Athenienses, futurum vnquam fuisse, vt quisquam vel ad quinquatrus, vel ad aliud quodpiam certamen coronarium, pancratium, aut aliud aliquod grauioris luctæ genus se exercere vellet, si non fortissimus quisque, sed is, qui victoriam vel pacto aliquo interposito, vel gratia consecutus esset, corona donaretur? Nunquam quisquã se exerceret. Nunc autem, opinor, propter certaminis raritatem, & propter rei, de qua cõtenditur, dignitatem, & pulchritudinem, propter nominis denique æternitatem atque immortalitatem, quæ ex victoria oritur, reperiuntur nonnulli, qui corporibus suis in discrimen obla-

tis, grauissimisque laboribus susceptis quoduis periculum adire non recusent. Fingite igitur, virtutis ciuiliſ præmia, à vobis ipsis esse constituta, vosque huius certaminis federe iudices, & simul illud considerate, si paucis ac dignis, & secundum leges præmia tribuatis, compluris vobis virtutis certatores existuros: sin cuius, & ei qui pactus fuerit, gratificemini, etiam bona ingenia corrupturos. Quæ quidem à me rectè ac verè dicta esse intelligetis, si vos propositis exemplis paullo apertius docuero. Vter vobis vir melior fuisse videtur, Themistocles, qui tum classi exercitusque præfuit, cum proelio nuali ad Salaminem commisso Persas deuicistis, an Demosthenes, qui locum in acie reliquit? Miltiades, qui Marathoniam pugnam barbaros fudit, ac superauit, an iste, qui hostem nunquam ausus est rectis oculis intueri? ij, qui populum exulantem à Phyla reduxerunt, an Demosthenis similis? postremò Aristides, cui iusto cognomen fuit, multum ei cognomini, quod Demosthenes habet, dissimile, an Demosthenes? Atqui nefas mediisfidius esse puto iisdem diebus de hac bellua, & de viris illis meminisse. Ostendat igitur Demosthenes in ea oratione, quam habiturus est, vbi decretum sit, vt quisquam illorum virorum corona donaretur. Ergo ingratus erat populus? minimè. iminò & populus magni & excelsi animi, & illi, qui hoc honore affecti non sunt, hac ciuitate dignissimi. Non enim se litteris, sed eorum, qui beneficium acciperant, memoria, quæ quidem ex illo tempore vsque ad hodiernum diem immortalis manet, ornari se putabant oportere. Sed operæ pretium est commemorare, quænam præmia, quæque munera consequerentur tum qui de rep. bene merebantur. Fuerunt temporibus illis, qui diuturno labore perfuncti, magnisque periculis aditis apud Strymonem fluuium Medos fortiter pugnando deuicerunt. hi cum victores & incolumes huc reuertissent, præmium à populo petiuerunt. dedit eis populus magna (vt tum quidem videbantur) præmia, nempe vt in portu

cu Mercuriali treis Mercurios lapideos statuerent, ea lege tamen, ne sua nomina inscriberent, vt non imperatorum, sed populi inscriptio videretur. Esse autem vera ea, quæ à me dicuntur, ex ipsis versibus cognoscetis. inscriptum est autem hoc modo in primo Mercurio.

*Ergo & erant illis fortissima pectora, quorum
Strymonis ad ripam gloria parta manet.
Primi etenim Medis ferroque, famèque peremptis
Inuenere suis hostibus exitium.*

Secundi hæc inscriptio est.

*At populus gratus meritis pro talibus, atque
Fori i animo ducibus præmia digna dedit.
Pro re vt communi hæc cernens perferre labores
Audeat olim hominum post genitorum aliquis.*

Tertius autem sic inscriptus est.

*Ex hac vrbe olim Mnestheus comitatus Atridas,
Examem duxit Pergama ad alta virum.
Quem tum Meonides Danaorum bellipotentum
Præstantem cecinit Marte fuisse ducem.
Sic sibi Cæcropidæ non ducunt esse in honestum
Virtutis dici, militiæque duces.*

Est ne hîc vsquam ducum nomen litteris expressum? nusquam. sed est populi Atheniensis. Adite igitur animis & cogitatione ad porticum Pœcilam. omnium enim rerum præclararum extant vobis in foro monumenta. Quid igitur illud est, Athenienses, quod ego dico? hîc Marathonica pugna depicta est. Quis erat imperator? Neminem sanè vestrùm esse puto, qui non hoc ita rogatus, Miltiadem respondeat. At illic nusquam eius nomen inscriptum est. quid ita? non petiuit hoc præmij? petiuit quidem, sed populus nõ dedit. verùm ei pro nominis inscriptione concessit, vt primus milites cohortans pingeretur. In æde igitur Matris deorum ad curiam quod præmium ijs, qui exsulem à Phyla populum reduxerunt, tribueritis, cernere potestis. populiscitum scripserat, & obtinuerat Archinus Cæleus, vnus ex ijs, qui populum reduxerunt. Decreuit au-

tem primùm vt eis in sacrificium, & donum, quod in tem-
 plis deorum immortalium suspenderetur, drachmæ mil-
 le attribuerentur. At ex ea summa si viritim distribu-
 tur, decem drachmæ ad vnumquenque non peruenient.
 Deinde iubet vnumquenque oleagina, non aurea co-
 rona donari. Erat enim tum oleagina corona, pretiosa:
 nūc autem etiam aurea pro nihilo putatur. Neque verò
 vt id senatus inconsideratè, temerèque faceret, decer-
 nit, sed vt diligenter, accuratèque videret, quàm multi
 ex ijs tum in Phyla fuissent obsessi, cum Lacedæmo-
 nij, & triginta tyranni in eos inuaserunt, qui Phylam
 occuparant, non quàm multi locum ad Cheroneam re-
 liquissent, quo tempore hostes exercitum aduersus nos
 eduxerunt. Quæ quidem verissimè à me dicta esse, reci-
 tato vobis decreto cognoscetis. Recita. **DECRETVM**
DE PRÆMIO IIS, QUI A PHYLA POPVLVM REDV-
XERVNT PERSOLVTO. Recita verò ex aduerso etiã
 id populiscitum, quod Ctesiphon scripsit Demostheni,
 grauisimorum malorum architecto atque auctori. **PO-**
PVLI SCITVM IN DEMOSTHENEM A CTESIPHON-
TE SCRIPTVM. Hoc populiscito, eorum, qui populum
 reducerunt, præmium deletur: si hoc honestum est, illud
 turpe: si illi meritò honore affecti sunt, hic immeritò co-
 rona donatur. Verùm ego audio, eum esse dicturum, me
 facere iniustè, qui res à maioribus gestas cum suis actio-
 nibus conferam. Non enim (inquit) Philemon pugil O-
 lympico certamine coronam eò adeptus est, quòd pug-
 ilem illum antiquissimum Glaucum, sed quòd suæ ætatis
 certatores & pugiles superarit. Quasi verò nesciamus
 pugilibus inter se propositum esse certamen: ijs autem,
 qui coronam poscunt, cum ipsà virtute, cuius causa co-
 rona donantur, certandum esse. Præconem enim, verum
 esse, atque à mendacio longissime abesse oportet, cum
 apud omnes Græcos in theatro de quopiam prædicat.
 Quare noli nobis pluribus verbis demonstrare, te reimp.
 melius, quàm Patæcionem administrasse, sed hoc ostende

de te ex administratione reip. probitatis atque integritatis laudem esse consecutum: ita demum beneficij tui gratiam à populo repete. Sed ne vos ab instituto sermone longius abducam, epigramma, quod in eos, qui populum à Phyla reduxerunt, scriptum est scrib, avobis recitabit.

EPIGRAMMA.

Virtutis causa hos populus vetus auxit honore,

Qui oppressis patriæ legibus imperium

Aggressos primi ex Vrbe eiecere, periclis

Offerre haud veriti corpora pro patria. Propterea

quòd eos, qui contra leges dominati fuerant, è ciuitate eiecerunt, omnique iure ciuitatis priuarunt, honore affectos esse dicit. Hærebat enim etiã tũ in auribus atque in animis omnium, neque dum è memoria effluerat, populum illo maximè tempore funditus euersum fuisse, postquam nonnulli iudicia de decretis contra leges factis sustulerunt. Nam, vt ego de patre meo audiebam, (qui anno ætatis suæ nonagesimo quinto excessit è vita, cum quidem omnium in ciuitate laborum ac periculorũ socius ac particeps fuisset) is igitur cum vacuus esset, mecum sæpe loquebatur: dicebat autem primis illis temporibus, quibus populus fuerat reuocatus, siqua accusatio de decretis cõtra leges factis in iudicium deducta esset, nomẽ & factum apud eos planè fuisse similia. Nam quid eo, qui cõtra leges aliquid vel agit, vel dicit, sceleratius excogitari queat? Itaque, quemadmodum ille mihi narrabat, longè alia, quàm nunc solent, ratione iudices audiebãt. Erant enim in eos, qui decreta contra leges scripserunt, acerbiores, atque infestiores, quàm accusatores ipsi. sæpe numero scribam recitantem reuocabant, iubebãntque legum, & decreti recitationem iterare: damnabantur denique ij, qui contra leges aliquid scripserunt, non si leges omneis transiijissent ac neglexissent, sed si vnã duntaxat syllabam immutassent, aut inuertissent. At perridiculum est, quod nunc fieri solet: scriba decre-

tum recitat contra leges factum: iudices proinde quasi carmen aliquod, & cantilenam, aut rem à iudicio alienam, nihilque ad id quod agitur, pertinentem, audiant, aliud agunt, eorumque aures peregrinantur. Iam verò Demosthenis artibus turpissimam cōsuetudinem in iudicia sensim irrepere passi estis: versa sunt & commutata in peiorem partem iura ciuitatis. Accusator enim defendit: reus accusat: iudices quarum rerum iudices ac disceptatores sedeant, interdum obliuiscuntur: quarum rerum iudices non sunt, de ijs ipsis rebus sententiam ferre coguntur. reus si quando de re ipsa, causaque dicere cōperit, dicit non se legitima scripsisse, sed alium iam antea cū talia scripsisset, absolutum esse. quo quidem exemplo magnopere confidere, magnosque spiritus sumere Ctesiphontem audio. Atqui ausus est aliquando Aristophon ille. Azenieus apud vos gloriari, se iudicia de decretis contra leges factis septuaginta quinque effugisse. Sed non ita priscus ille Cephalus, qui maxime popularis est habitus, non ita, inquam, sed planè contrarijs factis gloriabatur, cū diceret, se, cū plurima omnium decreta scripsisset, nunquam tamen de decretis contra leges factis reum factum esse: & præclare, mea quidem sententia, meritòque gloriabatur. Nam de decretis contra leges factis nomina deferebant inter se non ij modo, qui in rep. versabantur, verùm etiā sodales & amici, siquid aduersus remp. commisissent. Cui quidem rei illud vobis erit testimonio. Archinus Cœleus Thrasylulum Stirieum de decretis contra leges factis accusauit, cū hic quiddam contra leges decreuisset, videlicet vt vnus ex ijs, qui secum è Phyla in urbem reuertissent, corona donaretur: & reum peregit, recentibus etiā tunc eius erga populum beneficijs: quorum tamen rationem nequaquam iudices habuerunt. Existimabāt enim quo modo tum ipsos exfulanteis à Phyla Thrasylulus reuocasset, ita & nunc se in vrbe constitutos ab eo eijci, atque exturbari, cū aliquid cōtra leges decerneret. Sed nunc

non ita fit: quin planè aliter. Vestri enim prælati imperatores, & nonnulli ex ijs, qui victum quotidianū in Prytanéo meruerunt, iudicia de decretis contra leges factis pro alijs deprecatur: quos quidè vos meritò ingratos iudicare debeatis. Siquis enim in ea rep. in qua penes populum est dominatio & potestas, honores & præmia cōsecutus, in tali præsertim ciuitate, quam & dij, & leges incolumè seruant, audet ijs, qui decreta contra leges faciunt, opitulari, eum ipsum reip. statum, à quo ornatus est, funditus euertit. Quænam igitur defensionis ratio patrono iusto ac modesto præscripta est? Dicam. In parteis treis diuiditur is dies, quo die accusatio de decretis contra leges factis in iudicium deducitur. Infunditur enim aqua prima accusatori, legibus, populi dominationi, ac maiestati: secunda reo, & eius defensoribus ac patronis, vbi crimen, quod in iudicium allatum est, prima sentètia dissolutum non fuerit: tertia iam aqua litis æstimationi, vestræque iræ, ac seueritati infunditur. Quisquis igitur in æstimatione litis tabellam iudicalem petit, iram vestram deprecatur. At qui in priore actione à iudicibus tabellam petit, iuramentum petit, legem petit, populi dominationè petit: quorū neque quicquā quemquā petere, neq; eum, à quo petitur, alteri condonare fas est. Iubete igitur, vt sinant vos secundum leges primam sententiam ferre, atque ita demùm litis æstimationi occurrant: denique, vt vnò verbo absoluam, Athenienses, pænè dicam, in accusatione duntaxat de decretis contra leges factis, lex hæc feratur oportet, ne liceat neque accusatores dicèdi adiutores ac subscriptores, neque reo patronos adhibere. Non est enim ius incertum aut infinitū, sed vestris legibus terminatum ac definitum. Nam vt in arte fabricandi cùm quid rectum, quid non, scire volumus, regulā adhibemus, qua rectum à prauo discernitur: sic in accusationibus de decretis contra leges scriptis, regula iuris, nempe hæc tabula, quæ leges receptas & ratas cōtinet, ad decretum contra leges compositum,

& ad leges item contra legum veterum & probatarum auctoritatem scriptas adhibetur, atque adponitur. Hæc ubi inter se concinere & congruere ostenderis, tum descende. Quid te Demosthenem aduocare attinet? Nonne cum iusta ac legitima defensione prætermissa, callidum & versutum hominem, & artificem verborum aduocas, auribus insidias comparas? ciuitatem detrimento afficis? populi dominationem labefactas? Sed quæ tandem ratio huiusmodi verborum vitandorum ac propulsiuorum reperiri potest? Dicam. Simulat que huc prodierit Ctesiphon, & cum hoc sibi compositum à Demosthene proœmium pronuntiabit, tempusque dicendo consumet, nihil denique ad iustam defensionem afferet: vos eum admonete, ut sine clamore ac strepitu, tabulam, quæ leges continet, in manus sumat, legesque cum decreto recitatas conferat. & contendat. Quod si dissimulabit se audire quid dicatis, ne vos quidem eum audite. Non enim ad hoc iudicium delecti venistis, ut eos, qui iustam ac legitimam defensionis rationem fugiunt, audiatis, sed eos, qui se rectè atque ordine defendere parati sunt. Sin iusta defensione prætermissa, Demosthenem ut pro se dicat, hortabitur, atque implorabit: primum nolite ferre veteratorem & versutum hominem, sperantem se leges verbis euersurum. Neque sibi quisquam ex hac re virtutis laudem quærat, si rogante Ctesiphonte, liceat ne per vos Demosthenem aduocare, primus clara voce respondebit, *VOC A VOC A*. In teipsum vocas; contra leges vocas, contra populi dominationem ac maiestatem vocas. Sed si vobis Demosthenes audiendus esse videatur, postulate ut eo modo Ctesiphontem defendat, quo modo ego accusaui. Quoniam pacto accusaui? hoc ferè pacto, ut vobis in memoriam redigam: Ego non prius priuatam Demosthenis vitam explicauit, non vllius publici criminis mentionem feci, cum huius generis magna mihi copia suppeteret, alioqui omnium hominum infantissimus, summaque dicendi inopia affectus essem:

essem: sed primo loco ostendi, leges disertè vetare, ne corona donentur ijs, qui rationum referendarum iudicio teneantur: continuoque certissimis argumentis demonstravi, & peruici, oratorem Ctesiphontem decreuisse, vt Demosthenesis, qui iudicio referendarum rationum teneatur, corona donaretur, nulla præfatione vsus, non aliqua honesta oratione præposita, nulla speciosa causa prætexta, non adscriptis denique verbis illis, **POSTERAM QVAM RATIONES RETVLERIT**: sed vobis, ac legibus planè despectis & contemptis, præterea causas, & recusationes, quibus ad hæc vsurus est, exposui: quas vt memoriæ manderis, etiam atque etiam à vobis peto & contendo. Deinde leges de præconijs vobis recitandas curavi, quibus apertè cautum, & sancitum est, ne de eo, qui à populo corona donatur, extra contionem prædicetur. At orator, qui his legibus reus est, non solum leges neglexit, ac violauit, verum etiam tempus & locum prædicationi faciendæ constitutum perturbauit, vt pote qui decreuerit, vt non in contione, sed in theatro: non in contionem vocatis Atheniensibus, sed tragœdis iam iam in scenam prodituris prædicatio fieret. His expositis pauca de priuatis Demosthenis flagitijs & sceleribus attingi: magnam partem in publicis criminibus oratio mea versata est. Sic igitur & Demosthenem existimatote pro se & Ctesiphonte dicere debere: primùm ad legem de ijs, qui rationum referendarum iudicio tenentur: deinde ad eam, quæ de præconijs lata est, respondere: tertio loco ad illud longe omnium maximum & grauissimum, ipsam præmio ne dignum quidem esse. Quòd si vos oret, vt de ordine dicendi suo sibi arbitrato statuere liceat, promittens se in postrema defensionis parte, crimen de decreto contra leges facto dissolutorum, cauete hoc ei concedatis: neque vos fugiat, hanc esse veluti luctam adcludendum ac supplantandum iudicium callidè comparatam. Non vult enim postea ad crimen decretorum contra leges factorum respondere: sed cum habeat causam ab om-

ni iure & æquitate derelictam, alijs rebus interiectis in obliuionem totius accusationis vos adducere cogitat. Quemadmodum igitur in certaminibus gymnics videtis, pugiles inter se de corporis statu decertare: sic & vos cum eo totum diem pro ciuitate, & de dicēdi ordine depugnate: neque eum finite extra crimen decretorum cōtra leges factorum longè à re proposita euagando orationem producer e: sed toti in audiendo occupati, & huic veluti loco infidentes & inhærentes, eum ad orationem eum causa coniunctam, earumque rerum, de quibus agitur, propriam reuocate: verborum denique ambages & declinationes à re proposita, quibus vti solet, diligenter obseruate. Meo autem officio non alienum esse puto vobis exponere ac prædicere quæ sint vobis euentura nisi Demosthenem hoc modo audietis. Producet enim hominem præstigiatores, crumenarum sectorem, reip. vexatorem & carnificem. Hic enim facilius ad lacrymas & ploratum, quàm alij ad risum impellitur: omnium verò facillimè ad periurium perducitur, neque mihi mirū acciderit, si repente sese immutans, & à ploratu ad conuicia transferens, in eos, qui foris circumstant, maledicta congeret, dicetque, homines paucorum dominationi studētis, & hoc numero ab ipsa veritate habitos, ad accusatoris suggestum: populareis autem, & libertatis studiosos, ad rei subsellia venisse. Hæc igitur cum dicet, illud ei ad orationem seditiosam ac turbulentam contrā opponite: Si, qui è Phyla populum reducerunt, tui similes fuissent, Demosthenes, nunquàm populi dominatus esset constitutus. nunc autem illi difficillimis reip. temporibus, extremoque pæne discrimine ciuitatem cōseruarunt, pulcherrimo illo & ab humanitate, doctrinæque profecto verbo vsurpato, **NE QVIS PRISTINARVM INIURIARVM REMINISCERET VR.** At tu præterita vulnera refricas, atque exulceras, maiorque tibi orationum in diem elaboratarū cura est, quàm ciuitatis. Cum autem homo assiduè in periurio versatus, ad fidem iureiurando.

iurando faciendam confugiet, illud cum admonete, ei, qui peierare consuevit, semperque apud eosdem sibi fidem esse iurato postulat, duorum alterum suppetere oportere, quorum neutrum consecutus est Demosthenes, aut deos novos, aut non eosdem auditores. Iam quod ad magnitudinem vocis & lacrymas attinet, cum ita è vobis quæret, Quò confugiam, Athenienses? si me ex rep. circumscribetis, non est quò me recipiam. Hæc ei contrà referte: At populus Atheniensis, Demosthenes, quò confugiet? ad quas sociorum opes & copias? ad quem apparatus? ad quam pecuniam? quod præsidium, quod propugnaculum per tuas actiones, & res gestas populo comparasti? Nam quibus rebus tibi consulueris ac prospexeris, omnes videmus. Vrbe enim relicta, non (vt hominum opinio est) in Piræo habitas, sed cò loci ex vrbe demigrasti, vt siquid aduersi accidat, è portu fugam capeffas. Ad sumtum autem itineris, nequitia atque ignavia tuæ aurum regium, pecuniámque in perniciem reip. nefarie captam, & cõciliatam prouidisti ac præparasti. Denique quid sibi volunt tuæ lacrymæ? quid clamor? quid vocis magnitudo & cõtentio? Nónne reus est Ctesiphon? nónne causa certam litis æstimationem, certámque pœnam non continet? tu autem neque de fortunis, neque de capite, neque de fama & existimatione tua decernis. Qua tandem igitur de re laborat? de coronis aureis, & de præconijs contra leges in theatro pronuntiandis. Quem, si populus aut furore præceps, aut qualia sint tempora ciuitatis, qualisque reip. status, oblitus tam alieno tempore corona donare vellet, ipsum in contionem prodire, atque hanc orationem habere oportebat: Coronam, Athenienses, quam mihi decreuistis, non aspurnor, neque reijcio: tempus, quo prædicatio coronæ facienda est, improbo. Non enim cõuenit propter quas res in luctu & squallore fuit, comámque totondit ciuitas, propter eas res me corona donari. Sed hac quidem oratione vteretur verè vir bonus, & qui vitã cum vera atque expressa vir-

tute cōiunctam vixisset. quæ tu dices verò, scelerati sunt hominis, virtuti obtrectatis, eiusque inanem imaginem, umbramque cōsecrantis. Non enim me Dius Fidius metuendum est, ne Demosthenes magni scilicet vir animi, & rei militaris gloria excellens, præmiorum repulsa accepta, domum reuersus, mortem sibi ipse conciscat: qui vsque adeò laudis & gloriæ apud vos studia deridet, ac pro nihilo putat, vt hoc pusillum caput rationum referendarum iudicio obstrictum atque obligatum, quod iste contra leges omneis coronandum decreuit, decies milies dissecuerit: cuius quidem rei vberissimam mercedem tulit, accusationibus de vulnere consultò illato institutis: colaphis denique à Midia contusus, pugnisque concisus est: quorum etiam nunc, opinor, extant in eius capite manifesta vestigia. habet enim homo non caput, sed vestigal. Iam porrò de Ctesiphonte, qui scitum scripsit, pauca mihi nunc arbitror esse dicenda. Multa autem præteribo, vt periculū faciam de vobis vtrūm homines improbitatis notis insignis, etiam si vos nemo admoneat, ipsi per vos internoscere possitis. id tantum, quod istorū vtriusque cōmune est, quòdque de vtroque apud vos verè & meritò dici potest, vobis exponam. Isti igitur in foro inambulant, veram alter de altero opinionem habentes, vocésque minimè falsas iactantes. Negat se Ctesiphon de se quicquam timere: sperat enim, se idiotam, & imperitum visum iri: sed Demosthenis in administranda rep. quæstus flagitiosos, & pecunias turpissimè contra remp conciliatas, vesanum ac stupidum pauorem, timiditatem, atque ignauiam, ea verò se nō mediocriter pertimescere confirmat. Demosthenes contrà cū in se ipse intuetur, se bene sperare, bonòque animo esse prædicat: sed Ctesiphontis improbitate, & vita in lenocinio versata vehementer commoueri ac perturbari. Quamobrem quando alter alterius opinione ac sententia, iniuriarum & flagitiorum contra leges admissorum condemnatus est, eos vos cōmunes vtriusque iudices nullo modo ab-

soluere,

soluere, aut crimine liberare potestis. Nunc autem pauca mihi de maledictis, quæ in me congesturi sunt, videntur esse prædicenda. Audio enim, Demosthenem dicturum ex suis consilijs atque actionibus, maximas ad ciuitatem nostram vtilitates peruenisse: à me verò eandem permultis damnis affectam, grauissimisque incommodis afflictam esse: & simul Philippi & Alexandri potentiam, eorúmque malorum, quæ illi nobis inuexerūt, causas, & crimina mihi attributurum. Est enim (vt videtis) vsque adeò callidus verborum opifex, vt nō satis habeat vel ea, quæ ego in rep. gessi, vel orationes, quas apud vos habui, vituperare, sed etiam otium meum, & illud omne tempus, per quod negotia publica nō administraui, malitiosè criminetur, meúmque silentium vituperet ac iudicio persequatur, nequis ei locus scilicet à calumnia vacuus relinquatur. cœtus quoque ac sermones, quos in gymnasijs habui, reprehendit. Postremò ne hoc quidem iudicium ei culpa vacat, qui statim initio dicendi ait me hãc accusationem non studio ciuitatis adductum suscepisse, atque in iudicium deduxisse, sed vt me Alexandro ostentarem propter inimicitias, quæ illi cum isto intercedunt. Et verò, vt ad me defertur, ex me quæsiturus est, cur ego caput rerum à se gestarum reprehendam, atque in iudiciū vocem, singulis actionibus non obstiterim, neque eas accusarim: sed longo interuallo, & cùm in rep. administranda non assiduè versatus essem, hanc causam in iudicium deduxerim. Ego verò neque Demosthenis victus, vitæque consuetudinem, & cœtus ab eo haberi solitos, imitari vnquam studui, neque me meorum institutorum pudet, neque eorum, quæ apud vos locutus sum, pœnitet, neque ea, quæ à me dicta sunt, non dicta velim, neque si easdem atque iste habuit, contiones habuissem, manendum mihi in vita putarem. silentium autem meum, Demosthenes, ex vitæ meæ cōtinentia, frugalitate, & moderatione natum est. Paruo enim contentus maiora turpiter non concupisco. Iraque & si-

lento vtor, & ad dicendum venio consilio, iudicióque adductus, non sumtibus effusis, & luxuria in animo, ingenióque insita coactus. At tu pecunia accepta, opinor, elinguis ac mutus fuisti: consumpta autem ac profusa vociferatus es, clamoremque sustulisti. Dicis autem non cum tibi videatur, neque ea, quæ velis, sed cum tui largitores, tuarúmque operarum conductores tibi imperarint. Neque ea te pudet & tibi arrogare, & alijs attribuere, quibus in medium prolatis continuo mendacij conuinceris. Nanque hæc accusatio, qua decretum tuum perfequor, quam me non ut ciuitati consulere, sed ut me Alexandro ostentarem, suscepisse & instituisse dicis, deducta est in iudicium Philippo etiam tum viuente, prius quam Alexander regnum obtineret, quo tempore nondum tuum illud de Pausania somnium videras: nondum cum Minerua & Iunone nocturnos sermones habueras. Cur me igitur Alexandro ante tempus ostentarem? nisi fortè ego ac tu idem somniauimus. At reprehendis me quòd non assidue, sed spatio interposito, verser in rep. agámque cum populo: & nos ignorare existimas, te hanc vitæ rationem, quam in me desideras, non ex populari dominatione, & ciuitate libera, sed ex alia reip. administrandæ forma longè diuersa, ac dissimili huc transferre. Namque in ciuitatibus, quæ paucorum arbitratu, nutuque reguntur, non is, qui vult, sed qui dominatur, alterum accusat: in ciuitatibus verò liberis, & in quibus penes populum summa potestas est, is, cui commodum est, & quandocunque ei viderur. Et verò cum aliqua intermissione temporis dicere, virum ex reip. temporibus, & ex vtilitate communi, muneribus publicis fungentem indicat atque arguit: nullum verò tempus intermittere dicendi, operarij est, omnia quæstus ac mercedis causa facientis. Cum autem ad hanc orationem cõfugis, nondum te à me accusatum esse, nõdum tuorum facinorum poenas dedisse, vel auditores obliuiosos esse existimas, vel teipsum falsis rationibus in fraudem inducis ac decipis.

pis. Nam & corū, quæ impiè sceleratè que in rebus Amphissensum commisisti, & pecuniarum in rebus Euboicis turpiter captarum, nūdinationūque tuarum fortasse propter diurnitatem & longinquitatem temporis, quod intercessit postea quàm tu à me manifestò deprehensus & conuictus es, populum oblītum esse speras. Rapinas verò tuas in triremibus & trierarchorum præfecturis improbiſsimè atque impudentiſsimè versatas, quænam temporis diurnitas obliuione obruere aut obliterare queat? cū tu lege de trecentis nauibus lata, perpulſo que tua oratione populo, vt te rei nauali præficeret, deprehensus es à me sexaginta quinque nauibus actuaris trierarchis ademisse? quo factò maiorem ciuitati nostræ classem subripuisti, quàm quæ tum suppetebat cū Athenienses nauali prælio, quod in Naxo commissum est, Lacedæmonios, Pollimque eorum ducem superarūt. Sic autem criminibus in alijs inferendis pœnas tibi debitas obsepſisti, atque obuallasti, vt non tibi, qui omnia iura diuina atque humana violaſti, sed ijs, qui tuas iniurias, tuæque facinora iudicio persequuntur, periculum capitis & fortunarum impendat, dum tu Philippum & Alexandrum inter calumniandum crebris sermonibus vsurpas, assidue que in ore habes: dum certos homines tempora ciuitatis ad rem bene gerendam idonea impedire insimulas: ipse præsentem occasionem, atque in manibus positam perdis & profligas, futura, & in incerto euentu collocata promittis, & venditas. Ita que ad extremum paucis antè diebus, quàm ego tibi nomē deferrem, tuo consilio, tuæque opera Anaxinus Orita comprehensus est, is, qui Olympiadi rebus emundis operam dabat, eundemque virum tua manu discruciaſti ac distorſisti, composito prius decreto, per quod eum extremo supplicio afficiendum censeris, apud quem in Oreo deuersabare: quocum ex eadem mensa cibum ceperas, biberas, libaueras: cuius dexteræ dexteram iunxeras: cum quo amicitiam confirmaras, hospitiūque feceras: quem ami-

cum atque hospitem appellaras, cum, inquam, interfecisti: & cum tu huius sceleris ac perfidiæ audiente atque inspectante vniuerso populo Atheniensia me conuictus tenereris, atque hospitis interfecto nominatus esses, non factum impium negasti, sed ea respondisti, ad quæ & populus, & quicumque aduenæ contionem circumstebant, clamorem sustulerunt: dixisti quippe, te ciuitatis salem, hospitali mensæ prætulisse. Falsas epistolas taceo, speculatorum comprehensiones, tormenta adhibita ob crimina neque in quenquam conuenientia, neque vnquam in iudicium deducta, quasi ego in vrbe cum certis hominibus rebus nouis studerem. Audio præterea, cum ex me quæsiturum, qualis ille medicus habendus sit, qui ægro interea dum ægrotet, nullum consilium det, nihilque præscribat, aut præcipiat, illo demum mortuo, nonoque post mortem die, cum ad sacrificia nouendialia venerit, commemoret quædam mortui propinquis, quæ si diligenter æger obseruasset, conualuisset. Ex te ipso autem non quæris, Demosthenes, qualis sit ille contionator, populique magister, qui populum blanditijs & assentatiunculis delinire & corrumpere sciat: tempora, quibus ciuitas conseruari poterat, vèdiderit: ciueis optimè sentienteis, improbissimè calumniando à reip. administratione arceat, atque à consilio dando remoueat, ac deterreat: è maximis periculis elapsus atque seruatus, & detrimentis insanabilibus ciuitati importatis se virtutis ergò corona donandum esse contendat: nihil vnquam boni effecerit, omnium malorum atque incommodorum nostrorū architectus & auctor fuerit: quorū res gestas ijs temporibus, quibus ciuitatem seruari licebat, calumniatus sit, eos nunc interroget, cur se multa temerè in rep. molientem, & peccantem non compresserint, cur talia committere non prohibuerint. Illi verò nunc denique tibi ira responderint: Proelio iam commisso, Demosthenes, otium nobis non erat de tuo supplicio cogitandi, sed de salute ciuitatis legatis huc & illuc missis agebamus,

bamus, atque in hac re vna toti eramus occupati. Verū enim verò quando tibi non satis est pœnas non dedisse, quin etiam præmia poscis, quo factò assequeris, vt ludibrio sit Græcis omnibus nostra ciuitas, hîc tibi obuiam ire, hîc te in iudicium adducere institui. Et mehercule eorum omnium, quæ dicturum esse Demosthenem audio, hoc quod iam vobis dicam, indignissimè fero. Ingenium meum cum Sirenibus comparat, si dijs placet: ab illis enim auditores non permulcentur, aut delectantur, (inquit) sed perduntur ac necantur. ex quo fit vt de earum cantu male existiment homines: sic meam dicendi facultatem vsu & exercitatione comparatam, meamque naturam, ijs, qui audiūt, damnosam, ac perniciosam esse. Atqui cum hanc de me orationem, neminem omnino decere putem: (turpe est enim accusatorem ea crimina, quæ cupiam verbo obiecerit, re demonstrare non posse) tum, si quis hac oratione necessariò vti debeat, eam non Demostheni, sed imperatori alicui, & forti viro accommodatam esse existimo: qui res magnas, & ciuitati vehementer vtiles gesserit, à dicendi autem facultate deseratur: atque iccirco eloquentiam suis aduersarijs à natura tributam admiratione dignam & vehementer expetendam iudicet: cum intelligat, se nihil eorum, quæ fortiter & præclare gesserit, oratione explicare posse: accusatorè contrà videat, etiã ea, quæ ille non egerit, sic in eorū cōspectu ponere, oculis que subijcere, vt ab eo administrata & perfecta esse videantur. Nunc verò cum homo totus ex verbis cōflatus atque cōcretus, hîs que acerbis & molestis, odiosè accuratis ac putidis, ad orationis simplicitatem, & facta confugit, quis æquo animo ferat? cui si quis linguam, vt tibijs, demserit, nihil reliquum fecerit. Atque equidem vos demirror, Athenienses, cupiòque de vobis audire, quid nam sitis in hac accusatione vestris sententijs improbanda, & Ctesiphonte absoluedo secuturi, quid spectaturi. An quòd scitū legitimum est? at nullum fuit vnquam magis cōtra leges scriptū. an quòd

is, qui scitum fecit, est innocens, neque ullam poenam meretur? Ergo nullæ sunt apud vos rationum vitæ referendarum leges, nulla iudicia, si hunc absoluetis. Atquæ nonne illud grauer atque acerbe ferri debet, si olim quidē coronis aureis, quibus populus à Græcis donabatur, orchestra circumfluebat, quia hic dies coronis externis constitutus erat: nunc autem vos ex ijs consilijs atque institutis, quæ in administranda rep. secutus est Demosthenes, neque coronis donati, neque præconijs ornati estis: hunc vox præconis corona dignum prædicabit? Atquæ si quis ex poetis tragicis, qui paullo post histriones in scenam producturi sunt, faceret in tragœdia Therisitam à Græcis corona donari, nemo vestrum ferret, quoniam dicit eum Homerus ignauium & sycophantam fuisse. Vos autem cum tali homini coronam imponetis, non putatis vos tacita Græcorum opinione exhibitum iri? Patres enim vestri res gloriosas, amplas, & præclaras populo adscribebant, humileis autem & abiectas, & vobis inferiores atque indignas, in malos oratores conferebant. At Ctesiphon arbitratur, quam ignominiam maculam Demostheni detraxeritis, eam vos populo inurere oportere. Et tamen dicitis vos fortunatos esse, ut & estis, & esse debetis. Atquæ decernetis, vobis fortunam quidem defuisse, Demosthenem autem benignè fecisse. Iam, quod est omnium absurdissimum, in iisdem iudicijs eos, qui de donis ac muneribus turpiter & flagitiose capti damnati sunt, infamia notatis: ei, quem ipsi scitis mercede reip. administrasse, coronam imponetis? Et iudices Dionysiacos, qui iniustam atque iniquam de choris in orbem circumactis, & tralatitijs, & communibus sententiam tulerint, multare soletis: vos ipsi, qui non tralatitiorum & communium chororum, sed legum & virtutis ciuilibus iudices sedetis, præmia non ut leges præscribunt, neque paucis ac dignis, sed ei, qui pactis & condicionibus interpositis, & per factionem obtinuerit, tribuetis? Et ex iudicio discedet talis iudex, qui seipsum infirmum,

atque

atque imbecillum, rictorem robustum ac potentem effecerit? Nam priuatus homo in ciuitate libera, & in ea rep. in qua populus dominatur, lege & tabella iudiciali dominatur, & regnat: vbi verò hæc alteri condonarit, ac tradiderit, primùm suam ipse dominationem euertit: deinde iurisiurandi quidem religio, qua obstrictus iudicat, assiduè eum comitans, & affectans angit & sollicitum habet: (nam propterea, opinor, quòd iusiurandum violauit, culpa est commissa) beneficij verò gratia ei, à quo gratiam inire voluit, obscura est. Non enim sententia palàm fertur, sed in tabellæ latebra delitescit. Mihi porro videmini, Athenienses, & consiliorum incautorum prosperos euentus habere, & in rep. administranda omnia fortunæ temeritati permittere: nihil consideratè faciētes. Nam quòd vos multo maxima pars ciuitatis, præsertim his dubijs temporibus, neruos & firmamenta dominationis ac potestatis popularis paucis traditis ac projicitis, laudare non possum: quòd nostra ætate factus oratorum non extitit, qui improbitatem habeant cum audacia coniunctam, felicitati nostræ assigno. Talia enim ingenia tulit quondam resp. quæ hoc modo populū facile perdiderunt. blanditijs enim & assentatiunculis delectabatur. Ita illum non *ij*, quos metuebat, sed *ij*, quibus seipsum commiserat & crediderat, funditus euerterunt. Nonnulli verò ex *ijs* etiam ipsi in numero triginta tyrannorum fuerunt, atque amplius mille quingentos ciueis indemnatos, ne criminibus quidem auditis, propter quæ erāt vitam amissuri, necauerunt: non ad sepulturas mortuorum, non ad exsequias cohonestandas propinquos conuenire sinebant. Ergo eos, qui remp. administrant, in potestate vestra non habebitis? non hos, qui nunc rebus secundis elati & feroces insolescunt, percussos ac deiectos in alias terras amandabitis? Non venit vobis in mentem, nunquàm quemquam ad delendū populi principatum accessisse, prius quàm opes iudiciorum auctoritate maiores sibi cōparasset? Libenter equidem, Athe-

nientes, vobis præsentibus, atque audientibus, cum isto, qui decretum scripsit, perpendere & considerare velim, propter quæ Demosthenis in rep. merita, ei coronam deberi contendat. Nam si dicis (vnde tui decreti principium duxisti) propterea quòd fossas mœnibus obductas pulchrè descripsit, ac perfecit: demiror te. Maiore enim reprehensione dignum est, eum causam cur fossis egeremus, fuisse, quàm si opus minus rectè effectum esset. Nō enim oportet eum, qui rep. bene gessisse dicatur, eò præmium petere, quòd vr̄bis muros aggere & vallo munierit, quòd fossas obduxerit, quòd publica sepulcra excitarit, sed quòd magni alicuius boni auctor ciuitati fuerit. Quòd si venies ad secundam decreti partem, in qua scribere ausus es, Demosthenem esse virum bonum, & sine vlla intermissione eas res & dicere & agere, quæ populo Atheniensi sint vehementer vtilis, detracta arrogantia, ac iactatione verborum, facta ipsa in manus sume: declara nobis atque ostende quid dicas. Pecunias, quas cōtra rep. cepisti, quæstusque sordidissimos, quos in rebus Amphissenis, Euboicisque fecisti, præmitto. Cū autem societatis cum Thebanis factæ causas Demostheni attribuis, ignaros quidem totius rei homines fallis ac decipis: eos verò, qui sciunt & intelligunt, contumelia afficis. omisso enim tempore, sublatâque horum gloria & maiestate, propter quæ hæc societas facta est, obscurū nobis esse existimas, te ciuitatis dignitatem atque amplitudinem in Demosthenem transferre. Quanta autem & quàm impudens sit hæc arrogantia, signo luce clariore vobis planum facere conabor. Rex Persarum paullo antè, quàm Alexander in Asiam penetrasset, misit ad populum Atheniensem valde contumeliosam, & planè barbaram epistolam: in qua cū alia valde inhumane, & insolenter loquebatur, tum illud in extrema scripsit: EGO VOBIS AVRVM NON DABO: NOLITE AMR PETERE. NON ENIM ACCIPIETIS. Hic idem periculis, in quibus etiam nunc versatur, circumuentus atque

atque oppressus, populo Atheniensi non petenti trecenta ipse vltro talenta misit: quæ tamen non accepit, summa in eo moderatione, & abstinentia vsus. Tempus igitur, metus, sociorum egestas, aurum ad nos pertulerunt. Eadem planè res Thebanorum societatem effecerunt. Atquæ tu Thebanorum nomen in ore semper habes, & infelicissima illa societate commemoranda nos obtundis: sed septuaginta talenta ex auro regio, quæ tu præcepisti, atque auertisti, taces. Nonne ob difficultatem rei nummaria cum quinque talenta duntaxat externi milites in stipendium poscerent, Thebanis arcem tradere noluerunt? Nonne cum Arcades ab bellum excitati suas omnes copias eduxissent, ducésque eorû opem ferre parati essent, propter nouem talenta res confecta non est? At tu diues es, habésque vnde tuis voluptatibus sumtum suggeras & suppedites, & vt in summa dicam, aurum regium penes istum est, pericula vobis relicta sunt. Sed operæ pretium est eorum inscientiam, atque inhumanitatem considerare. Nam si Demosthenem aduocare audebit Ctesiphon, vt apud vos verba pro se faciat, & iste conscenso suggesto se ipsum laudabit, factis ipsis, quæ vobis acciderunt, quæque pertulistis, grauior vobis erit oratio. Nam cum eos, qui re vera sunt fortes & boni viri, quibusque multarum ac præclararum rerum gestarum testes & conscij sumus, laudes ipsi suas prædicent, ferre non possimus: vbi is homo, quem totius ciuitatis dedecus ac propudium esse constat, seipsum laudibus efferre cœperit, quis eum patièter audire poterit? Quapropter, Ctesiphon, si sapias, ab improbo atque impudenti negotio desistes, & causam tuam per te tueberis, ac defendes. Non enim hanc excusationem poteris afferre, te non esse instructum ad dicendum. Namque hoc tibi per absurdum acciderit, si nuper quidem te legatum ad Cleopatram Philippi filiam populi suffragijs creati passus es, vt eam de Alexandri Molossorum regis morte consolares, parique cum ea molestia afficereris, nunc autem te

vllam dicendi facultatē habere negabis. Et alienā mulierē lugētē orationē consolari potes, scripto autē abs te mercenario plebiscito te ipse non defendes? An ve id talis est is, quem corona aurea donandum censuisti, vt ab ijs, qui ab illo beneficium acceperūt, ignoretur, nisi quis se in dicendo tibi adiutorem præbeat? Quare ex iudicijs, nouerānt ne Chabriam, Iphicratem, Timotheum, & simul ab ijsdem cognosce, quamobrē illis præmia dederint, statuāsque posuerint. Respondebunt omnes se Chabriam præmio affecisse propter pugnam naualem ad Naxum commissam: Iphicratem, quia Lacedæmoniorum legionem occisione occidit: Timotheum, propter navigationem Corcyrę obsidione liberandæ causa susceptam: ceteros denique propter multas cuiusque res ac præclaras in bello gestas. At si quis vos ita roget, Demostheni præmium cur negabitis? respōdeatis, quia pretio habuit addictam fidem, quia sese muneribus corrupendum præbuit, quia timidus atque ignauus est, quia locum in acie non tenuit. Vtrū igitur hunc honore, an potius & vos ipsos, & eos, qui pro vobis in proelio occubuerūt, ignominia afficietis? quos, per deos immortales, putate vos videre, deorum atque hominum fidem imploranteis, suamque condicionem lamentabili voce deploranteis, si futurum est, vt à vobis homo iste corona donetur. Namque acerbè atque indignè, Athenienses, ferendum est, si cū ligna, lapides, ferrum, res mutas denique, atque inanimas, sensūque carenteis, si fortè in aliquem inciderint, eūque exanimarint, exterminare soleamus, eiusque, qui sibi necem cōciuerit, manum, quæ hoc cōmiserit, separatim à corpore sepeliamus: Demosthenem, eū, qui bellum hoc postremum sua sententia confluxit, qui exercitum ex vrbe educendum censuit, qui milites prodidit, honore afficietis. Ergo contumelia afficiuntur cineres, & ossa mortuorum: debilitantur, & frangūtur animi viuorum, cū vidēt virtuti quidem pro præmio mortem esse propositam, memoriam autem sui nominis interire.

terire . Iam quod est omnium maximum , si rogent vos
adolescentes , quódnam ipsi sibi vitæ exemplum ad imi-
tandum proponere debeant , quid respondeatis ? Scire
enim vos arbitror non in palæstris , non in ludis littera-
rum , nō musica tantum , sed multo maximè publicis præ-
conijs iuvenes institui atque erudiri . De aliquo prædica-
tur in theatro his verbis : *RVM VIRTVTIS AC FORTI-
TVDINIS ERGO , BENEVOLENTIAE QVE , QVAM ER-
GA POPVLVM ATHENIENSEM HABET , CORONA
DONARI* , hominem vitæ turpitudine , & omni flagitio-
rum genere contaminatum . Simulatque hæc vidit ado-
lescens aliquis , corruptus , ac deprauatus est . Poenas de-
dit aliquis improbus , in lenocinio , & dedecore versatus ,
vt Ctesiphon ceteri doctiores , meliorésque discedunt .
Aliquis factó contra bonos mores , contráque leges ,
atque honestates omneis decreto , domum reuersu filiiũ
docere conatur . at huic furdo fabula narratur . Monere
enim & præcipere , meritò híc obtundere nominatur .
Quapropter non solùm quasi iudicâtes , sed quasi in thea-
tro quodam constituti , atque omnium oculis observa-
ti , speciménque ingenij vestri præbentes , ita sententiam
ferre , vt habeatis quod ijs respondere possitis , qui huic
iudicio non interfunt , si fortè vos quid iudicaueritis , in-
terrogabunt . Nolite enim dubitare , Athenienses , quin
talis de ciuitate nostra opinio , atque existimatio futura
sit , qualem esse constat eum , de quo prædicatur . Atqui
turpissimum sit , vos non cum maioribus vestris , sed cum
Demosthenis ignauia , nequitiáque comparari . Quónam
igitur modo huiusmodi dedecus ac turpitudinem effu-
gere possitis ? dicam . si eos , qui liberalibus , & humanita-
tis plenis nominibus præoccupatis atque vsurpatis , inge-
nio , & moribus infidi sunt , caueatis . Benevolentia enim ,
& dominatio popularis in medio positæ sunt . verùm ad
eas plerunque properè confugiunt verbo , qui plurimum
ab ijs remoti sunt factó . Itaque cùm oratorem coronarum ,
& præconiorum externorum cupiditate affectum

nacti fueritis, iubete eum orationem, quemadmodum & præconiorum confirmationes lex fieri iubet, ad vitam probatam, omnique laude dignissimam, ad mores castos ac temperatos reuocare, atque exigere. Cui verò hæc testimonia defunt, ei suas laudes constabilire nolite: publicæque libertatis, ac popularis dominationis curam habete: quæ vobis iam paullatim de manibus elabitur. Quid enim non indignum vobis esse videtur, Athenienses, senatum quidem, populūque Atheniensem despici ac pro nihilo putari: litteras autem, & legationes non à contemtis, & fortè oblati hominibus, sed ab ijs, qui in Asia atque Europa principatū obtinent, missas ad ædeis priuatas peruenire? & quibus facinoribus extremum legibus supplicium constitutum est, ea facinora quosdam homines à se esse commissæ non negare, sed palàm apud populum cōfiteri, epistolāsque à longinquis regibus acceptas inter se recitare? alios vos cohortari, ut à se tanquam publicæ libertatis custodibus oculos nusquam demoueat? alios præmia poscere tanquam ciuitatis conseruatores, ac salutis communis auctores? populum autem tristem, ac demissum, eorumque incommodorum, quæ acciderunt, mærore tanquam senectute delirum, mente captum, ac dementiæ damnatum, nomen solum dominationis popularis vsurpare, ac retinere: rem quidem ipsam alijs concessisse? deinde ex contionibus discedere non consilio capto, sed veluti conuiuij, in quod singuli collectâ contulerint, reliquijs inter se distributis? Ac ne vobis desipere videar, id, quod dico ex his considerate. Fuit hîc quidem (magno equidem cum dolore miserias ciuitatis sæpius commemoro) veruntamen fuit quidam homo priuatus, qui solum Samum nauigare conatus, tâquam proditor patriæ: eo ipso die à senatu Ariopagitico capitis damnatus, & supplicio vltimo affectus est. alteri item priuato Rhodum naui profecto, eo quòd metum publicū molliter & imbecillè tulisset, nuper tandem nomen delatum est: ei autem pares numero tabellæ,

quæ damnarent, & quæ absoluerent, contigerunt. Quod si vna duntaxat salutaris defuisset, vel de ciuitate exterminatus, vel morte multatus esset. Cum illis igitur id, quod nunc fit, cōferamus. Orator omnium ciuitatis malorum causa, qui locum in acie non tenuit, qui ex vrbe profūgit, is se aurea corona donari, ac virum bonum, for tēque voce præconis pronuntiari debere contendit: vos non vel hominem, vt communem Græcorū pestem & calamitatem amandabitis: vel de eo iam comprehenso, tanquam rerum quidem prædone ac pirata, in nominibus autem & vocabulis administrandæ reip. nauigante, poenas sumetis? Præterea facite vobis huius temporis veniat in mentem, quo tempore sentētiās ferre debetis. Paucis pōst diebus Pythia futura sunt, Græcorūque conuentus: ciuitas nostra magna hoc ipso tempore inuidia, infamiāque laborat, ex ijs rebus, quæ à Demosthene publicè administratæ sunt, conflata. Itaque si istum corona aurea donabitis, cum ijs, qui communem pacem perfringunt, ac violāt, consentire videbimini: sin aliter, populum Atheniensem his criminibus leuabitis, omnique inuidia liberabitis. Quapropter nō vt de aliena, sed vt de vestra ciuitate deliberate: neque liberalitatē & magnificentiam in alios conferte, sed de aliorum liberalitate iudicate: & præmia beneficiāque vestra in personis melioribus, virisque magis probatis collocate: neque solū auribus exquirentes, sed etiam oculis obseruantes, atque alter alterum aspicientes, quānam vestrū Demostheni auxilio futuri sint, considerate: vtrūne qui cum eo vnā venabantur, an qui se cū eo, cū adolescens esset, gymnico certamine exercebant. At mediusfidius non in aprorum venatione, non in ceteris corroborādi corporis studijs versatus est, sed eas arteis assiduè coluit, atq; exercuit, quib⁹ aduersus locupletium fortunas vteretur. Sed vos iactantiam hominis, arrogantiamque spectantes, cū dicet se Byzantium sua legatione Philippo ademisse, Acarnanas ad defectionem perpulisse, Theba-

nos contionibus suis perterrefecisse (vos enim vsque ad deò stultos & credulos esse existimat, vt hæc crediturifitis, proinde quasi suadelâ in vrbe vestra, non syeophantam alatis) cùm denique in extrema iam orationis parte prædarum suarum ac pecuniarum captarum socios sibi aduocabit, fingite vos intueri in hoc eodem pulpito, quo in loco ego nũc stãs dico, ex altera parte instructos, atque istorum luxuriæ, libidinĩque oppositos viros optimè de rep. meritos, Solonem, eum, qui pulcherrimis legibus publicæ libertatis, popularis que dominationis statum exornauit, virum & sapientiæ studio in primis deditum, & legum scriptorem præstantem, pudenter & modestè (vt eum decebat) vos orantem, atque obsecrãtem, ne vlllo modo Demosthenis verba pluris, quàm iurifurãdi vestri religionẽ, legesque faciatis: Aristidẽ, qui vestigalia vobis pensitanda æquabili proportione Græcis descripsit, cuius mortui filias populus in matrimonium collocauit, de iustitia contumeliosissimè vexata, indignissimè que protrita & conculcata, lamentabili voce deplorantem, & conquerentem: à vobis denique quarantem, ecquid vos pudeat, cùm maiores vestri Arthmiũ Zelitã, quòd aurum à Medis acceptum in Græciam deportasset, in vrbe habitantem, cum quo populus Atheniensis hospitium publicè fecerat, pæne morte affecerint: eum quidem voce præconis prædicante ex vrbe, atque ex omni terrarum solo, quod populi Atheniensis imperio, ditio- nẽque tenetur, eiecerint: Demosthenem, eum, qui non aurum Medorum huc deportauit, sed qui sese auro corrumpi passus est: atque id etiam nunc domi cõditum habet, ac possidet, aurea corona donare? Iam verò Themistoclem, cõsque, qui in Marathonia pugna mortẽ optiuerunt, & Plataenses, ipsa denique maiorum sepul- era, non putatis graua suspiria, tristeis que gemitus editura, si is, qui sese Græcis vnã cum barbaris consociatum aduersatum esse cõfiteatur, aurea corona donabitur? Ego igitur ò Terra, Sol, Virtus, Intelligẽtia, Doctrina, qua res

honestas.

honestas ab inhonestis discernimus, vobis opem, auxiliūque tuli, sinēmque dicendi feci. Atque equidem si bene, & pro magnitudine & grauitate criminis accusaui, dixi quo modo volui: sin deterius, quàm res postulabat, vt potui. Vos autem, Athenienses, cùm ex ijs, quæ à me dicta sunt, tum ex ijs, quæ silentio prætermitto, videte vt pro ciuitate iustam, ac reip. vtilem sententiam feratis.

ARGUMENTVM ORATIONIS

DE CORONA, SEV PRO CTESIPHONTE,

Libanio auctore, eodem Dionys. Lambino

Monstrolienſi interprete.



MOENIA quidem orator opposuit Atheniensium hostibus, vſitatis iſtis, & manufactis firmiora, & meliora, Græcorum in ciuitatem Atheniensium beneuolentiam, & singularem dicendi facultatem pari prudentia coniunctam, vt ait ipse his verbis: Non lapidibus, & lateribus Athenas sepsi ac mu- niui, sed magnis copijs, & multorū Græciæ populorum societate, partim à terra, partim à mari. Veruntamen etiam ad vrbis murum manufactum non parum studij atque operæ contulit orator. Collapso enim multis partibus vrbis muro Atheniensibus, posteaquàm visum est populo eum deintegro excitare ac reficere, electi sunt ad huius operis procurationem decemviri ex vnaquaque tribu, qui huic operi faciundo præessent. Nam sumtus de publico fiebat. Cùm igitur Demosthenes ex his decemviris vnus esset à sua tribu factus, non, vt alij, solam curam ac diligentiam adhibuit, sed & opus omnibus suis numeris absoluendum curauit, ita vt nullus reprehensionis locus esset relictus, pecuniam autem domo depromptam in eo negotio administrando ad eam rem contulit. Laudauit hanc eius beneuolentiam senatus, eiſque in reimp. studium & animum aurea corona remuneratus est. Erant enim premiti ac parati Athenienses ad gratiam bene de rep. meritis referendam. Fuit

autem Ctesiphon huius sententiæ auctor & princeps, Demosthenem esse corona donandum, quod ad tempus attinet, ludis Liberi patris: quod ad locum, in theatro: quod ad spectatores, Græcis omnibus instructantibus, quos frequentissima Græciæ celebritas cœgerat: & his præsentibus ita à præcone prædicandum, Demosthenem Demosthenis filium Præameum ciuitas corona donat omnis virtutis ergò, singularisque in eum beneuolentiæ. Erat igitur hic honos omni ex parte admirabilis. Quapropter inuidiæ impetum effugere non potuit, & Ctesiphoni scitum tanquam contra leges scriptum in iudicium vocatum est. AEschines enim Demosthenis inimicus, Ctesiphonti de decretis contra leges scriptis diem dixit, periculumque creauit, cum diceret, Demosthenem, qui magistratum gessisset, neque rationem retulisset, iudicio rationum referendarum etiamnum teneri: legem autem vetare, eos, qui rationum referendarum iudicio teneantur, corona donari. Præterea legem profert, quæ iubet, si quem populus Atheniensis corona donet, eius coronæ prædicationem in contione fieri: sin senatus, in curia: alibi autem non licere. Postremò ait Demosthenis laudes esse falsas. Non enim oratorem remp. bene administrasse, sed & nummariam esse populi moderatorem, & multorum malorum atque incommo-
dorum ciuitati causam fuisse. Hoc autem ordine in accusatione sua AEschines usus est. Primum de lege, quæ ad eos pertinet, qui referendarum rationum iudicio tenentur, disputauit: secundo loco, de præconijs: postremo, de rebus gestis Demosthenis. Postulauit autem à iudicibus, ut cogant Demosthenem eundem ordinem seruare. At Demosthenes & à suis rebus gestis initium duxit, & in eas desit, summa in eo arte usus. Nam faciendum initium est à firmioribus, & potentioribus, in eademque desinendum. Inculcauit autem ea, quæ posita sunt in legibus. Atque ei quidem legi, quæ de ijs, qui referendarum rationum iudicio tenentur, lata est, sententiam & voluntatem opponit: ei, quæ ad præconia pertinet, aliam legem, seu potius legis partem, ut ait ipse, per quam licet etiam in theatro prædicationem coronæ facere, si populus iusserit, & senatus decreuerit.

PRO CTESIPHONTE.
ALIVD ARGVMENTVM IN,
certo auctore, eod. Lambino interprete.

83



ATHENIENSES & Thebani bellum cum Philippo gerentes ad Charonéam urbem Bœotia victi sunt. Victoria igitur potitus Macedo, præsidium quidem Thebis imposuit: & ita eam urbem in sua potestate habebat iugo seruitutis oppressam. Cùm igitur timerent Athenienses ne idem sibi accideret, Philippumque cum infesto exercitu primo quocque tempore aduenturum putaret, constituerunt muri partibus vetustate corruptas & labefactatas excitare & reficere. Atque ita ab vnaquaque tribu curatores muris reficiendis nominatim declarati sunt. Pandionis autem tribus suum ad eum usum curatorem è suo corpore Demosthenem sumisit. Cùm igitur in manibus esset huius operis procuratio, & præter eam pecuniam, quam Demosthenes à ciuitate acceperat, alia præterea desideraretur, neque illa satis esset, ipse de suo sumtum fecit, neque ciuitati expensum tulit, sed gratificatus, ac largitus est. Hac occasione Ctesiphon vnus ex ijs, qui temp. administrabant, arrepta, scitum de eo fecit in senatutale: Quoniam Demosthenes Demosthenis F. cùm antea acta vitæ singularem & perpetuam in ciuitatem benevolentiam declarasset, tum hoc tempore curator muris reficiendis à sua tribu lectus, cùm pecunia ei de publico data exhausta esset, aliâque præterea egeret, domo quarum opus erat, depromisit, & ciuitati largitus est: senatui, populoque Atheniensi placere, eum aurea corona donari in theatro, dum tragœdia nouæ recitarentur: fortasse quo tempore multitudo vndique conuenire solet, nouarum fabularum spectandarum cupiditate affecta. Cùm igitur hoc S. C. ad populum perferretur, ut eius auctoritate confirmaretur, exoritur Ctesiphontis accusator Aeschines, inimicitias cum Demosthene gerens ex dissimilitudine studiorum & institutorum in rep. administranda susceptas, cùm diceret, hoc scitum esse contra tres leges factum: vnam eam, quæ de rat. iudicio rationum referendarum obligatum corona donari, priusquam rationes retulerit. Nondum autem Demosthenem rationes retulisse, cùm pecuniam publicam & theatralem tractaret, & cu-


rator muris reficiendis praefectus esset. Expectandum igitur esse, praemiumque ad id tempus sustentandum, donec legibus solutus, atque integer re cognita reperiat. Secundam legem recitat, quae iubet coronae donationem ac praedicationem in Pnyce, hoc est, in con-
 tione fieri, non in theatro, reprehendens eos, qui praedicationem co-
 ronae Demostheni decreta, in theatro fieri aequo animo ferunt, & ap-
 probant. Tertia lex ad totam vitam Demosthenis, & rerum publice
 gestarum acquisitionem spectat. Vetat enim falsas litteras in aedem
 Bonae deae deferri, qua in aede omnes litterae publicae, conditae serua-
 bantur. Falsum autem complexus est plebiscito, inquit, quia Demo-
 stheni benevolentiae ac studij in remp. testimonium dedit. Nam ma-
 levolus potius, & hostili in patriam animo reperitur. Hanc legem
 tertiam sibi utilem arripiens & retinens tanquam ancoram ora-
 tor, aduersarium perculit, ratione sollertissima, artificijque plenis-
 sima in accusatorem usus. Hinc enim ansam & facultatem na-
 ctus est aduersarij capiendi ac superandi. Alias enim duas leges, &
 eam, quae pertinet ad obligatos iudicio rationum referendarum, &
 eam, quae est de praconijs, in medium coniecit, imperatorium in mo-
 rem, signa uos medios collocans: firmissima autem & validissima in
 extremis posuit, aliorum infirmitatem ac debilitatem utroque extre-
 mo stabiliens & confirmans. Videtur autem etiam orationem ex
 utilitate potissimum tractare, neque admodum aperte artem osten-
 tare. Nam cum videatur principio legitimum praeterire, alia que-
 dam ratione etiam legitimo usus est. Cum enim Aeschines legem
 recitasset de falsis tabulis, ad eam respondens orator, occasionem na-
 ctus est proferendarum in medium, atque explicandarum suarum pu-
 blicarum actionum, rerumque gestarum, tanquam legitimo pugnas.
 Tractatio igitur orationis talis est. Firmamentum autem causae,
 Aeschini est legitimum, Demostheni iustum: utriusque aequè co-
 mune, utile: quod tamen non admodum aperte enucleatur. Status
 est negotialis in scripto positus. De scripto enim quaestio est. Cum
 autem accusatio uiuo etiam tum Philippo in iudicium deducta es-
 set, Alexandro iam ad regni successionem vocato & oratio habita
 est, & iudicium commissum est. Nam simul atque interijt Philip-
 pus, & Thebani ex eius interitu suis viribus confisi, & fiducia ple-
 ni, praesidium, quod in urbem Thebas imposuerat Philippus, eiece-
 runt:

erunt: primum Alexander iratus, tanquam ab ijs contemptus, Thebas funditus evertit: deinde cum eum facti pœnituisset, à Græcia demigravit pudore affectus, & Barbaris bellum intulit. Athenienses autem occasionem sibi idoneam oblatam esse putauerunt, causa proditorum, qui Græciam iniuste leserant, grauiſſimisque iniurijs & incommodis affecerant, iudicio permittendæ. Atque ita iudicium commissum est. Primum igitur præcætionem & voto constat per distributionem inductum, & beneuolentiam parat, qua hæc maximè Ctesiphonti & Demostheni opus est. Ex Homero autem sumtum atque imitatione quadam expressum est,

Diſque, deæque omnes mea, quæſo, attendite dicta. Elucet etiam in eo significatio & declaratio fiducie in auditorum beneuolentia collocata. Non enim omne genus deorum appellaret atque imploraret, nisi hoc animo esset. Illud, quantam semper beneuolentiam erga ciuitatem habui, &c. è Ctesiphontis decreto sumtum est. Declarat autem, se in omni uita antea acta beneuolentiam in populum Atheniensem præstitisse, eiusque curam semper habuisse, prius denique animam, quam talem in Atheniensis mentem ac uoluntatem, profusurum, ac proiecturum.

DEMOSTHENIS ORATIO

DE CORONA, SEU PROCTESIPHONTE, Dionys. Lambino interprete.



P R I M U M à dijs, deabúsque omnibus immortalibus precor, Athenienses, ut, quãtam ego semper erga ciuitatem nostram, uosque uniuersos beneuolentiam habui, tantam uos in me in hoc iudicio conferatis: deinde ut, quæ res uobis, uestræque religioni, & bonæ existimationi uehementer utilis est, eius rei dijs ipsis ducibus mentem, uoluntatémque suscipiatis, ut ne aduersarium consulatis, quónam modo me audire debeatis: (esset enim hoc sanè miserabile atque

ingemiscendum) sed leges, & iurandum in consilium adhibeatis: quo in iureiurando præter alia multa, quæ æquissimè descripta sunt, hoc etiam inest iustissimum, ut æqualiter utrunque audiatis: quod non hanc solùm vim habet, ne iudicia iam facta dõmo deferatis, atque ut parem utriusque benevolentiam præsteris, sed ut suo utrunque litigatorum arbitrato dicere, eoque, quo instituit ordine, eaque, qua vult defensione uti sinatis.

Cùm multis igitur rebus AEschines in hoc iudicio meliore quàm ego condicione est, Athenienses, tũ duabus vel maximis: primùm quòd non pari de re cum isto decerto. multum enim interest utrum ego vestræ benevolentiae fructu spolièr, an iste causam non obtineat: quin mihi quidem (sed nolo initio dicendi quicquam tristius dicere) isti verò superuacaneum est me accusare. Deinde quòd omnibus hominibus natura attributum est, ut maledictis & vituperationibus libenter aureis patrefaciant: eorum autem, qui se ipsi laudent, oratione grauius offendantur. Horum igitur duorum id, quod afferre voluptatem solet, isti datum est: quod omnibus (pæne dicam) graue & molestum accidit, id mihi relictum est. Ac si dum hæc vito & fugio, res à me gestas non commemoro: neque ea, quæ mihi ab isto illata crimina fuerunt, refellere ac dissoluere, neque res eas, pro quibus præmia mihi deberi dico, posse ostendere videbor: sin me ad ea, quæ feci, quæque gessi in rep. conferam, sæpenumero cogar ipse de me dicere. Quapropter ut id quàm modestissimè & moderatissimè faciã, dabitur à me opera diligenter. quicquid verò res ipsa, necessitãtisque flagitauerit, huius iste, qui mihi tale periculum creauit, meritò culpam sustinebit. Arbitror autem, iudices, vos omnibus confessuros, mihi cum Ctesiphonte hanc litem esse communem, atque eiusmodi, ut me in ea non minus studij atque operæ consumere, quàm Ctesiphontem, oporteat. Nam cùm rebus omnibus priuari graue, & acerbum sit, præsertim ab inimico, tum verò benevolentia
at que

atq; humanitate vestra spoliari tâto est miserius, quanto est eam colligere & cõsequi maius atque optabilius. Cùm sit igitur hũsce de rebus hoc iudicium constitutum, peto à vobis omnibus, vehementerque contendo, vt me pro me dicentem, criminibúsque aduersarij respondentem, iustè & æqualiter, quo modo leges iubent, audiat: quas is, qui ab initio tulit Solo, vir vestri amatissimus, & maxime popularis, non perscriptione solum & litteris ratas ac sanctas esse putauit oportere: sed vestro etiam omnium, qui res iudicaretis, iureiurando cõfirmavit, nequaquam vobis ille (mea quidem sententia) diffidens, sed cernens iam animo, quibus criminibus & maledictis accusator quòd priore loco dicat, superior est, ea crimina reum præuertere aut declinare non posse, nisi vnusquisque vestrũm, qui rebus iudicandis præestis, pietatem erga deos immortales colens ac retinès, tum eius, qui posteriore loco dicat, defensionem beneuolè accipiet, tum posteaquam se parem, communemque vtrique præbuerit auditorè, quid sibi de rebus omnibus statuendum sit, accuratè cogitabit. Verũm quando mihi hodierno die (vt video) & vitę priuatim actæ, & rerum publicè gestarum reddenda ratio est, placet rursus (vt initio dicendi feci) deos immortales appellare atque implorare. Precor igitur palàm, vobis que inspectantibus atque audientibus, iudices, primũ vt quantum ego erga remp. & erga vos omne beneuolentiam semper habui, tãtam mihi in hoc iudicio tribuatis: deinde vt dent vobis eam mentem dij immortales, vt, quod & ad communem omnium existimationem, & ad singulorum religionem conseruandam magnopere pertinet, id in hac causa iudicetis. Atque accusationem suam si iisdem finibus AEschines, quibus lis cõtinebatur, terminasset, ego quoque de ipso senatus consulto statim respondiſsem: sed quãdo in alijs rebus, quæ nihil ad causam pertinerent, exponendis, non minus multam orationem consumsit: & simul de me plurima impudenter

clementius est, necessarium esse existimo atque adeò iustum, pauca prius iisdem de rebus dicere, ut nequis vestrum verbis illis, quæ à causa remota sunt, adductus, alieniore, atque infestiore animo quàm iura causæ postulant, me pro Ctesiphonte dicentem audiat. Atque ad eas quidem contumelias, quibus me propriè & priuatim petulantissimè vexauit, quàm simplicem, quémque iustam orationem referam, videte. Si me eum cognouistis, quem iste esse me criminatus est: (nusquam enim alibi quàm vobiscum vixi) ne vocem quidem mittere me conantem patimini, quamuis res omnino præclaras, maximèque laudabileis publicè gesserim: quin surgite, meque iam iam condemnate: sin isto multo & meliorem, & à melioribus ortum, nullo denique eorum, qui mediocri sunt loco, (ne quid grauius dicam) deteriorem me, meosque & existimatis, & nouistis, nec alijs de rebus isti creditote: (Perspicuum est enim omnia ab eo similiter esse conficta) mihi verò quam benevolentiam omni superiore tempore multis in iudicijs ostendistis, nunc quoque præstate. Sed cum sis vsque eo callidus atque improbus AEschinea, hoc tibi omnino stultè venit in mentem, putare me prætermissa illa de meis actionibus & rebus gestis oratione, maledictis tuis responsurum. Non faciam: non ita insanio: sed ijs de rebus primùm, quas tu vel in me falsò, ut à me gestas, contulisti, vel à me prudenter ac sapièter cogitatas atque administratas reprehendisti & calumniatus es, considerabo. Post ad impudentem istam & furiosam maledicendi, ac debacchandi licentiam, (si modo hi non grauabuntur audire) me conferam. Crimina igitur mihi illata sunt multorum atque atrocium facinorum, quibusque poenæ sunt acerbissimæ legibus cõstitutæ. Sed tota hæc accusatio nihil aliud habet propositi, quàm improbam inimici calumniam, petulantiam, conuicium, probrum, & contumeliam, ceteraque generis eiusdem. De ijs autem, quæ mihi crimini data sunt, etiam si vera essent, nostræ ciuitati poenas me-

meritas sumere, per AEschinem non liceret: quod medi-
 usfidius, Athenienses, neque rectum, neque ciuile, ne-
 que iustum est, ne vlla quidem ex parte. Non enim ius
 adeundi ad populum, causæque dicendæ potestatem
 cuiquã eripere, nõ in ea re dolori suo seruire, neq; male-
 dicendi & petulanter alterum insectandi occasionem
 ex ea quærere oportet. Sed quæ me facinora commit-
 tere in reimp. videbat, cum præsertim essent tanta, quan-
 ta modò voce pæne tragica clamabat, eorum pœnas à
 legibus constitutas, recentibus etiam tum maleficijs, ex-
 petere, iudicióque persequi debebat: si res delatione no-
 minis dignas admittere viderer, nomen meum deferre:
 & hac via me in iudicium vocare: siquid cõtra leges scri-
 bere ac decernere, accusationem mihi de decretis con-
 tra leges factis intentare. Non enim Ctesiphontem pro-
 pter me iudicio persequi potest: mihi, si me coargui pos-
 se consideret, periculum non creasset. At qui siquid eo-
 rum, quæ falsò in me conferebat, & quæ commemora-
 bat, aut aliquid aliud sceleratè me aduersus vos commit-
 tere animaduertebat, sunt leges de omnibus constitu-
 tæ, sunt multæ, sunt supplicia, sunt accusationes, sunt iu-
 dicia, quæ magnas atque acerbis pœnas continent: his
 omnibus ei vti licebat. Atque hæc cum fecisse, seseque
 hoc modo aduersus me gessisse videretur, cum eius fa-
 cto consentiret accusatio. Nunc autem posteaquàm de
 iusta, rectaque accusandi via deflexit, mēque re recenti
 coarguere vitauit, criminibus & cauillationibus, & ma-
 ledictis tanto pòst interuallo in vnum collectis & con-
 gestis, histrionem se quendã nobis præbet. Deinde cum
 me verbo accuset, hunc re in iudicium vocat, atque huic
 tori accusationi & causæ inimicitias mecum susceptas
 prætexit: cumque mihi nusquam iudicium denuntiaue-
 rit, nusquam mecum conflixerit, nunquam mecum in cer-
 tamen descenderit, alteri suam existimationem & inco-
 lumitatem eripere conari reperitur. Atquã præter alia
 omnia, quæ quiuis dicere pro Ctesiphonte possit, hoc

etiam mihi quidem commodissimè atque aptissime dicere posse videatur, æquum esse, ut inimicitias nostras ipsi inter nos geramus, non prætermittis nostris inter nos contentionibus, alterum quæramus, cui calamitatè afferamus. hoc enim iniuriæ genus extra modum prodit. Omnium igitur criminum, quæ mihi oblata sunt, vnàm, eandemque planè esse rationem, nihilque in ijs peræquè inesse neque veri, neque iusti, ex ijs, quæ diximus, quiuis intelligere possit. Verumtamen cum vnumquodque singillatim suis ponderibus examinare volo, tum ea maximè, quæ mihi de pace, & legatione falsò attribuit: res ab ipso vnà cum Philocrate administratas ac transactas, impudenter in me conferens. Est autem fortasse necessariū, & ad ea, quæ dicturus sum, vehementer pertinet, quo tunc temporis res essent loco, vobis in memoriam redigere, ut cum illo tempore, in quo ciuitas versabatur, singula comparantes, facilius ea perspicere possitis. Bello igitur Phocensi nato nulla mea culpa (non dum enim ad remp. accesseram) primùm sic vos animis affecti eratis, ut Phocenseis saluos esse velletis, quamuis eos res nefarias atque iniustas fecisse videretis: Thebanorum verò casu quātumuis graui atque acerbo, siquid forte incommodi eis accideret, lætaturi essetis. neque verò immeritò illis succensebatis. Victoria enim Leuctrica eorum animos effecerat insolenteis, eamque felicitatè immoderatè tulerant atque intemperanter. Deinde vero vniuersa Peloponnesus disidijs intestinis laborabat, nec qui Lacedæmonios oderant, tantum poterāt, ut eos euertere ac delere possent: neque qui antea illorum opera ac beneficio imperabant, ciuitates in sua potestate habebant: sed erat quædam tum apud hos, tum apud illos contentio ac perturbatio, quæ non facile diiudicari sedarique posse videbatur. Hæc cum videret Philippus (neque enim erant obscura) primùm grādi pecunia singularum ciuitatū proditoribus effusa, eas omnēs offensionum ac simultatum seminibus sparsis inter se

se concitabat, mutuisque discordijs exasperabat atque irritabat. Deinde, quibus in rebus alij grauitè peccabāt, malèque sentiebāt, in ijs se ipse ad bellum comparabat, in omnium perniciem, opes ac potentiam acquirebat, in omnium denique fortunas imminebat. Posteaquàm verò perspicuum omnibus esse cœpit, necesse futurum, Thebanos diuturno iam bello defessos ac fractos, tum feroceis quidem illos & odiose insolentis, nunc graui fortunæ casu perculsos atque afflictos, ad vos confugere: id vt ne fieret, neque ciuitates consentirent & conspirarent, Philippus vobis pacem, illis auxilium pollicitus est. Quæ res igitur ei fuit maximo adiuuamento, vt vos, pæne dicam, vestra voluntate inductos, ac decptos opprimeret? Reliquorum Græcorum siue improbitas, siue ignorantia, siue vtrunque: qui, cum assiduum ac diuturnum bellum gereretis, idque pro communi Græcorum omnium vtilitate, quemadmodum res ipsa declarauit, neque pecunia, neque viris, neque re vlla omnino alia vos iuuerunt. Quapropter vos eis meritò, iustisque de causis irascentes, pacem petenti Philippo non inuiti auscultauistis. Ea igitur pax, quæ tum illi cōcessa fuit, propter has, quas dixi causas, non quo modo iste insimulauit, mea opera conciliata & constituta est. Istorum verò peccata atque iniurias, simulque turpissimos quæstus in ea pace institutos, pecuniásque nefariè captas, si quis rectè verèque perpendat, horum malorum, in quibus nūc versamur, causas esse reperiet. Atque ego hæc omnia studio veritatis adductus, accuratius persequor, ac subtilius disputo. Nam si qua in his rebus peccata maximè inesse videantur, omni tamen culpa vaco, nihilque illa ad me omnino pertinēt. Quin is, qui primò de pace sententiam dixit, qui pacis mentionem fecit, Aristodamus histrio fuit: qui secundas partes egit, qui populi scitum fecit, denique qui se ipse cum isto ad hæc conficienda Philippo mercede accepta locauit, Philocrates Agnoscus fuit, tuus, AEschinas, sodalis, omniumque tuorum

confiliorum particeps ac socius, non meus, mentiendo
 disrumpare licet. Eius autem sententiæ approbatores &
 suasores fuerunt (causam in præsentia omitto dicere)
 Eubulus, & Cephisophon. Ego verò nusquã quicquam.
 Et tamen cùm hæc ita se habeant, panèque ipsius veri-
 tatis voce ita esse demonstrantur, vsque eò fuit impu-
 dens, vt ausus sit hoc in loco dicere, me non modò pacis
 auctorem fuisse, sed etiam ne ea ipsa pax in communi
 Græcorum concilio à nostra ciuitate fieret, prohibuisse.
 Et ô, quo te quis nomine rectè appellet, nescio: tûne vs-
 quam, cùm me tantam rem, tantamque societatem, quã-
 tam nunc commemorabas, vocèque panè tragica con-
 tendebas, ciuitati detrahare videres, tûne mihi vnquam
 præstò fuisti? tûne grauitè atque indignè tulisti? aut, vt
 hæc, quæ nunc arguis, doceres, ac proferres, in hunc lo-
 cum processisti? Atqui si decretum illud, quo reliqui
 Græci pacis communionè excluderentur, Philippo ven-
 dideram, reliquum erat tibi non vt taceres, sed vt clama-
 res, testificarere, rem his aperires ac demonstrares. At tu
 nusquam hoc fecisti, nusquam hæc tua vox audita est.
 Neque verò ad quẽquam omnino Græcorum tum mis-
 sa erat legatio: sed erant omnium voluntates iandudum
 patefactæ, certisq̃ue argumentis perspectæ: neque iste
 quicquam his de rebus verè, sincerèque locut⁹ est. Præ-
 terea huius ciuitatis splendorem & gloriam insignibus
 infamiæ notis inquinat. Nam si vos vno tempore & re-
 liquos Græcos ad bellum vocabatis, & ad Philippum le-
 gatos de pace mittebatis, rem neque ciuitati vestræ, ne-
 que viris bonis consentaneam ac decoram, sed planè
 Eurybata dignam faciebatis. Verùm non ita est, Athe-
 nienses, non ita est, inquam. Quorsum enim eos tali tem-
 pore vocaretis? Ad pacem? At habebant omnes. Ad bel-
 lum? At ipsi de pace deliberabatis. Perspicuum igitur est,
 me pacis eius, quæ ab initio constituta est, neque ducem,
 neque auctorem aut suasorem fuisse, neque quicquam
 eorum omnium, quæ in me falsò contulit AEschines,

verum

verum esse. Iam igitur postquam nostra ciuitas pacem cum Philippo fecit, quid vterq; nostrum agere instituerit, quodque in rep. gerenda consilium ceperit, rursus ipsi cum animis vestris considerate. Ex his enim cognoscetis quis ille sit, qui omnibus in rebus operam Philippo nauabat, qui Philippi causa laborabat: quis altera ex parte, qui omneis suas actiones ad vestram vtilitatem referebat, qui summo studio reip. commodis inseruiebat. Ego igitur cum senator essem, decreui vt quam primum legati eò nauigarent, vbi Philippum esse audirét, vt fidem ac iusiurandum ab eo acciperent. Isti autem ne hoc quidem à me decreto hæc facere voluerunt. Quam vim porro, Athenienses, hæc res haberet, ego vobis ostendam. Intererat Philippi, inter nostrum & ipsius iusiurandum, longissimum tempus intercedere: vestra, breuissimum. Quid ita? quia non ab eo tantum die, quo iurauistis, sed à quo pacem vos habituros sperauistis, omnem belli curam atque apparatus remisistis. ille autem ex omni tempore hoc maxime moliebat & agebat, in eoque totus erat occupatus, existimans (id quod erat) quascunque res ciuitati nostræ præripuisset antequam iuraret, stabileis & fixas sibi haud dubie mansuras, neminemque earum rerum causa pacem diremturum. Quæ cum ego, Athenienses, animo prouiderem, mecumque reputarem, hoc decretum feci, vt in ea loca, quibus in locis esset Philippus, legati nauigarent, & iusiurandum fidemque ab eo confestim acciperent, vt Thracibus socijs vestris ea oppida, quæ nunc iste insectabatur atque irridebat, Serrium, Myrtion, Ergiscam etiam tunc tenentibus, pacis fœdera ferirentur: neque ille locis opportunis occupatis, Thracia potiretur: neque ex his, cum pecunia abundaret, magnamque militum numerum coactum haberet, magnam ad reliquas res aggrediendi facultatem haberet. Et tamen hoc decretum non commemorat, neque recitat AEschines: sed quòd, cum senator essem, Philippi legatos introducendos putauerim, id mi-

hi loco criminis ponit, mecumque factum malitiose calumniatur & reprehēdit. At quid me facere oportebat? an, ne illis aditus esset in contionem, decernere, qui idcirco venerant, ut vobiscum loquerētur? an ne locus eis ab architecto spectandi gratia daretur, vetare? At duobus obolis, nisi hoc decretū fuisset, spectare potuissent. An me parua ciuitatis commoda seruare ac tueri, summam rem, quod isti fecerunt, Philippo vendere oportebat? minimè verò. Sume igitur hoc decretum & recita; quod iste prudens & sciens præteriuuit. DECRETVM.

Mnesiphilo prætore pridie Kal. Quintileis, tribu Pandionide summam rerum potestatem obtinente, Demosthenes Demosthenis filius Pæanieus hanc sententiam dixit: Quòd Philippus, qui legatos de pace misit; cum Atheniensibus rata fœdera percussit, senatui, populòque Atheniensi placere, quo pax suffragijs populi prima contione comprobata confirmetur ac tràsfigatur: legatos ex omni Atheniensium numero quinque legi: qui vbi populi suffragijs fuerint approbati, sine vlla dilatione temporis, quoquo loco Philippum esse cognouerint, eò proficiantur, & iusurandū ab eo primo quoque tempore accipiāt, vicij. imque dent super fœderibus, quæ inter illum & populum Atheniensem conuenerunt: eòque fœdere ac iureiurando vtrorumque socios complectantur. Electi sunt legati Eubulus Anaphlystius, Aeschines Cothocides, Ctesiphon Rhamnusius, Democrates Phlyeus, Cleon Cothocides. Hæc ego temporib⁹ illis cum scripssissem, cumque id vnum spectarem, non ut Philippo, sed ut ciuitati nostræ commodarem ac prodessem, boni isti & præclari legati, abiecta omni pæne reip. cura, treis menseis continuos in Macedonia confederunt, vsque eò dum veniret è Thracia Philippus, omnibus illius regni oppidis in suam potestatem redactis, cum decem diebus, immò tribus, aut quattuor quidem certè, in Hellsponium peruenire, & oppida iureiurando accepto priusquam ea ab illo expugnarentur atque euerterētur, seruare liceret. Vobis enim præsentibus nunquam ea attigisset, aut iusurandum profectò ab eo non accepissemus: ita pace decidisset, neque vtraque, & pacem, & Thra-

Thraciæ oppida teneret. Primus igitur Philippi dolus, hominúmque istorum iniustorú, ac dijs ipsis immortalibus iniquorú quæstus improbissim°, & mercatus turpissim° legatione talis fuit, propter quæ & illo tempore, & nunc, & semper posthac me cum ijs bellum, atque inimicitias implacabileis gesturum profiteor. Iam mihi alterú deinceps longè illo grauius flagitium attendite. Postea quàm promisit Philippus se nobiscum pacem obseruaturum, Thracia iam istorum culpa (vt dixi) qui decreto meo nõ paruissent, occupata: hoc rursus ab istis redimit, ne ex Macedonia decederent, quo ad eam exercitum, quem contra Phocenseis comparabat, instructum atque ornatum haberet: veritus ne si vobis renuntiaissent, cum breui tempore exercitum in expeditionem educiturum, exiretis ipsi, & cum triremibus ad Thermopylas, quemadmodum antea, nauigaretis, locique illius angustias clauderetis: sed vno tempore & renuntiantibus istis hæc audiretis, & ille iam intra Thermopylas ingressus esset, neque huic rei mederi possietis. Tanto autem Philippus in metu versabatur, adeoque anxius & sollicitus erat, ne vos etiam si loca illa præoccupasset, ea de re antequàm Phocenses perijissent, certiores facti, mittendum ijs auxilium decerneretis, atque ita res sibi de manibus elaberentur, vt impurissimum istum iterum non iam communiter cum ceteris legatis, sed ipsum separatim conduceret, quo ea vobis diceret ac renuntiaret, per quæ omnia funditus perierunt. A vobis autem, Athenienses, etiam atque etiam peto, vehementerque contendo, vt in hoc toto iudicio memineritis, si AEschines Ctesiphontem solum accusasset, nihilque extra causam dixisset, me quoque hoc tempore nihil aliud acturum fuisse, nisi vt eum, qui accusatus esset, defenderem: sed cum iste tota sua oratione intemperanter in me fuerit inuectus, meque falsis criminibus, probris, ac maledictis vexarit, ac lacerarit: mihi de memetipso tam multa dicendi, atque ad ea, quæ mihi obiecit, pauca respondendi necessitatem

ab eo impositam esse. Quæ sunt igitur verba illa, tum ab isto usurpata, quæ summam rem perdidērunt? Quod Philippus, inquit, Thermopylas introiuit, tumultuari neminē vestrum oportet. Omnia enim vobis ex animi sententia procedent, si quiescatis. Et biduo, aut summum triduo illum ijs, quibus inimicus vērit, amicum: contra ijs, quibus amicus, inimicum esse factum audietis. Non enim verbis, inquit, sed vtilitatum similitudine & communitate amicitias conglutinari & confirmari solere, grauiter & magnificè pronuntians. Expedi autem Philippo, Phocensibus, & vobis peræquē, Thebanorum immansi stupore, intolerabilique arrogantiā defungi. Quæ quidem iucunda nonnullorum auribus accidebant propter odium illud in Thebanos illo tempore penitus in omniū animis insitum atque infixum. Sed quid est postea consecutum? vt non longo pōst tempore infelices ac miseri Phocenses interirent, vrbes eorum funditus delerentur: vos dum quiescitis, isti que obtemperatis, paullo pōst vasa, & omnem supellectilem ex agris in urbem comportaretis, iste aurum acciperet: denique præter illa omnia, illud in Thebanos ac Thessalos acerbissimum odium in ciuitatem vestrā redundaret: rerum gestarum gratia, Philippo quæreretur. Atque hæc ita esse, cognoscite & ex Callisthenis decreto, & ex epistola Philippi. ex vtriusque enim lectione, vobis hæc omnia plana fiant. Recita decretū. DECRETUM.

Prætor Mnesiphilo, contione subito atque ex tempore ab imperatoribus aduocata, de moderatorum ciuitatis ac senatus sententia, vndecimo Kalendas Octobris, Callisthenes Eteonici filius Phalereus hanc sententiam dixit, placere. Ne quis Atheniensium, quacunque excusationem afferat, in agro pernoctet: sed in vrbe, & Piræeo, præter eos, qui sunt in præsijs collocati, ac distributi: quem autem quisque horum locum atque ordinem nactus est, eum ad extremum seruato, ita vt neque diem, neque noctē extra præsidium suum traducat. Qui huic decreto non paruerit, eum contra remp. fecisse iudicatum iri, & proditionis pœnas daturum, nisi se vi aliqua maiore, ac necessitate, cui obsisti non potuit, impeditum esse docuerit. De ijs autem, quæ vim ac necessitatem attulisse dicentur, & imperator,

qui

qui exercitui, rei que militari præst, & is, cui ciuitatis procuratio com missa & commendata est, & scriba senatus cognoscunto. Ex agris autem primo quoque tempore omnia, quæ sunt intra quindecim millia passuum, in urbem, & Piræum deportant: quæ his finibus non continebuntur, in Eleusinem, Phylam, Aphydnam, Rhamnuntem, Suniam conuehuntor. Dixit Callisthenes Phalereus. Nunquid vos hac spe ducti pacem faciebatis? aut hunc vobis exitum mercenarius iste pollicitus est? Recita nunc epistolam Philippi, subactis Phocensibus missam. **EPISTOLA PHILIPPI.** Rex Macedonum Philippus, senatui, populoque Atheniensi S. D. Scitis, nos Thermopylas ingressos esse, Phocidem sub imperium, ditionemque nostram subiunxisse: & in eas quidem vrbes, quæ sese nobis adiunxerunt ac dediderunt, præsidia imposuisse: quæ verò cedere no:uerunt, eas vi & virtute captas, atque in seruitutem redactas, deleuisse. Cum igitur audirem vos exercitum comparare, quem Phocensibus auxilio mitteretis, visum est mihi ad vos scribere, ne diutius laboretis, neue trepidetis. Nam omnino cum arma capitis, nihil mihi moderatè facere videmini, qui cum pacem mecum feceritis, exercitum tamen contra me ducere pareretis, id que Phocensibus nobiscum foederum communionem non coniunctis. Quare si pacis cõditionibus stare nolueritis, nulla re alia nobis eritis superiores, nihilque aliud assequemini, nisi quòd priores iniuriam feceritis. Auditis quàm aperte ostendat ac declaret socijs suis in hac, quam ad nos misit, epistola, & pænita loquatur Philippus, Ego hæc inuitis, & iniquo animo ferentibus Atheniensibus feci. Quapropter si vos Thebani, & Thessali sapitis, hos quidem in hostium numero ducetis, mihi autem fidem habebitis. quibus verbis litteratè quidem non est vsus, verum tamen hæc significare atque ostendere voluit. Itaque illos his captos eo pellexit ac perpulit, vt nihil futuri prouiderent, nihil præsentirent, sed eum res omneis in potestatem suam redigere parerentur: vnde infelices Thebani in has calamitates inciderunt. Atque huius fidei apud illos comparandæ ad minister Philippo atque adiutor iste est AEschines, is, qui falsa vobis renuntiavit, qui vos in fraudem atque in errorem induxit: is, qui

modò Thebanorum casus & calamitates miserabiliter deplorabat: quàm graues, quàm luctuosi essent, multis verbis perfequebatur atque exponebat: in cuius persona, & horum, & eorum, quæ Phocensibus acciderunt, & illorum omnium malorum, quæ Græci pertulerunt, causa consistit. Scilicet enim, AEschinea, tu ijs, quæ Thebanis acciderunt, grauius angeris, & Thebanorum misericordia commoueris, qui tot bona in Bœotia possideas, tot illorum agros colas: ego verò lætor, is, qui statim ab eo, qui hæc effecerat, ad supplicium deposcebar. Sed in eam orationem incidi, qua me posterius uti fortasse magis conueniet. Ad illa igitur reuertor, quibus ostendere cœperam, istorum quæstus nefarios, & nundinationes flagitiosas, & iniuste facta, & scelera, horum malorū esse causas. Nam posteaquàm à Philippo & vos decepti estis istorum culpa, qui suas operas in legationibus obeundis ei locauerant, quique nihil verè vobis renuntiauerant, & miseri Phocenses, eorūque vrbes deletæ sunt, quid accidit? Contemptissimi omnium hominū Thessali, insolētissimi atque omnis sensus expertes Thebani, amicum, optimè de se meritum, seruatorem suum denique Philippum ducebāt. Erat his ille omnia. Quòd si quis aliud quippiam dicere conaretur, ne vocem quidè eum mittere sinebant. Vos autem, qui omnia, quæ à Philippo gesta erāt, suspecta habebatis, atque ad eò iniquissimo animo ferebatis: pacem tamen vobis studiosè retinendam putabatis. nihil enim soli efficere poteratis. Græci item reliqui consimili vobiscum ratione in fraudem atque in errorem impulsis, & sua spe deturbatis, libentissimè otio, pacèque fruebantur, tametsi essent ipsi quodammodo iandudum bello lacesciti. Nam cum quoquo versus grassans, & circumiēs Philippus, Illyrios, Triballos, nonnullos etiam Græciæ populos in seruitutem redigebat, cum multos ac magnos exercitus suo imperio subijciebat, ac subigebat: cum quidam homines è Græciæ vrbibus profecti, pacis auctoritate & licètia freti, eò

se conferebant, ibique à Philippo corrumpebantur, in quibus iste numerabatur, cum hæc, inquam, fiebant, tum ij omnes, in quos hæc comparabantur, bello laceſſebantur. quod ſi non ſentiebant, alia iſta oratio eſt, nihilque ad me pertinet. Ego enim prædicebã, & teſtificabar tum apud vos, tum ad quoscuque miſſus eſſem. Ciuitates autem graui & periculoſo morbo erãt affectæ, dum partim magiſtratus, ijque, qui rebus gerendis præerant, pecuniarum turpiter capiendarum ſtudio ducerentur, ſeſeque pretio corrumpti paterentur: partim plebs & multitudo neque futura prouideret, & vitæ tranquillitate, & quotidiano otio inſcicaretur: denique ſic omnes animis eſſent affecti, vt quanuis hæc in Græcia mala verſarentur, ſinguli tamen ſe incommodorum experteis fore, ac periculis alienis res ſuas, quodocunq; vellent, in tuto futuras, arbitrarentur. Itaque multitudini, opinor, hoc uſu venit, vt pro infinita illa, & intempetiua deſidia atque ignauia, libertatem amitteret: magiſtratibus verò ac principibus, qui ſe cetera, præter ſeipſos, vendere putabant, vt ipſi ſeſe primos omnium venditos eſſe ſentirët. Nam qui amici atque hoſpites tum cum donis ac muneribus corrumpebantur, nominari ſolebant, nunc aſſentatores, & dijs immortalibus iniqui atque iniuſti, & alijs id genus nominibus, quibus digni ſunt, appellantur. Nemo enim, Athenienſes, eo animo pecuniam conſumit, vt proditorum commodis conſulat: neque quiſquam poſteaquam ea, quæ redemit, obtinuerit, atque in poteſtate ſua habuerit, proditorem reliquis de rebus in conſilium adhibet: (nihil enim proditore beatius eſſet:) quam ob cauſam tanti fieret proditor? longe aliter eſt. Sed ſimulatque is, qui principatum & dominationem cõcupiſcit, fuerit rerum potitus, etiam eorum, qui vendiderũt, dominus efficitur. Itaque illorum improbitate perſpecta & cognita, tum eos proſecũdò, tum odio habet, tum ijs diffidit, tum eos vexat & conculcat, nullũmque in eos, contumeliæ genus prætermittit. Quod vt ita eſſe per-

spicere possitis, attendite, quæso, quæ dicturus sum, & vobiscum ipsi considerate. Nam tamen rerum occasionem amiseritis, cognoscendi tamen opportunitas sapientibus ac prudentibus eadem manet. Tatisperdum prodebat Olynthum Lathenes, amic^o Philippi nominabatur: Timolaus quoad Thebas perdidit, vsque eò Philippo carus habitus est: vsque eo Eudicus, & Simus Larissæi, quoad Thessaliam Philippo emanciparunt ac tradiderunt. Deinde cum eijcerentur, cõtumelijs omnibus afficerentur, quoduis turpitudinis, atq; indignitatis genus subirent, orbis terrarũ proditoribus completus est. Quid? Aristratus Sicyone: quid? Perilaus Megaris non contemti atq; abiecti? Ex quib^o intelligere quivis facillimè possit, qui patriã suã tuetur ac defendit maximè, quiq; plurimis in rebus, istis dicendo resistit, eũ vobis, AEschinea proditoribus, & nummarijs, mercenarijsque ciuitatũ gubernatoribus, vnde pretiũ accipiatis, & quæstum faciatis, supeditare maximè, vósque beneficio populi, & eorum, qui contra voluntates vestras dicunt, saluos esse, mercedemq; accipere. Nã me Dius Fidius, quantũ in vobis fuit, iandudũ perijssetis. Ac de ijs quidem, quæ tum gesta sunt, tamen multo plura habeam dicere, hæc tamè nimis multa dicta esse puto. Cuius rei iste culpam sustinet, qui in me suorum flagitiorũ ac scelerũ veluti crapulam hesternam euomuit: quam quidem mihi necessarium fuit apud eos, quorum memoria res illæ sunt antiquiores, diluere. Fortasse verò etiã vobis hæc oratio grauis ac molesta fuit, qui etiã antequàm verbũ facerẽ, atq; adeo hiscerẽ, omnes istius actiones mercenarias, operasque venaleis noueratis. Quas tamè speciosis atque honestis amicitie, hospitijque nominibus appellabat. hæc enim verba quodam loco orationis suæ posuit: *Qui mihi Alexandri hospitium maledicti loco obiecit, atq; exprobrauit.* Ego tibi Alexandri hospitium? vnde cõsecuto, aut quĩnam merito? Nec Philippi hospitem te, nec Alexandri amicum ego vnquã appellarim. non ita insanio: nisi fortè messoris, & ceteros, qui

suas

suas operas mercede locare cōsueuerunt, eorū, à quibus
 conducti sunt, amicos, atq; hospites appellare debemus.
 Non ita est. At ego te cū antea Philippi, tū hoc tempo
 re Alexandri mercenarium dico, item hi omnes, quos ad
 hoc iudiciū conuenisse vides. Quòd si non credis, eos in
 terrogato, sodes. Quin egomet pro te hoc faciā. Vtrūm
 vobis, Atheniēses, videtur AEschines Alexātri merce
 narius esse, an hospes? Audis quid dicāt? Nunc igitur tā
 dem isti de accusatione respondere, & pro Ctesiphonte
 dicere: simūlq; res meas gestas exponere volo, vt, tametsi
 præclarè intelligat AEschines, audiat tamé quas ob cau
 sas ego non ijs solūm, quæ à senatu decreta sunt, verūm
 etiā longè maioribus præmijs dignū me esse contendam.
 Sume igitur accusationis ipsius libellum & recita. AC
 CUSATIONIS LIBELLVS. Charondapratore VIII. idus
 Februarias, AEschines Atrometi filius Cothocides iudicium de de
 cretis contra leges factis in Ctesiphontem Leosthenis filiū ad præto
 rē detulit, quia scitum contra leges fecit: quo censuit Demosthenem
 Demosthenis filiū Pæanieum aurea corona donandum à populo vir
 tutis & benevolentia, quā perpetuò habuit in Græcos vniuersos, tum
 in populū Atheniensem, & fortitudinis ergò, & quòd res dicit agit
 que populo vtilissimas, omni que studio, cura, opera, labore reip. prodes
 se conatur. Quæ omnia falsa sunt, & cōtra leges scripta, cum leges
 vetent, primūm falsa decreta in tabulas publicas referri: deinde eū,
 qui iudicio referendarum rationum teneatur, priusquam rationes re
 tulerit, corona donari. (Est autem Demosthenes curator muris refi
 ciendis, & theatrali pecuniæ præfectus.) postremò eam donationem
 ac prædicationem Dionysijs, tragædis nouis fieri: sed siquem senatus
 corona donet, iubeant in curia: sin ciuitas, in Pnyce populo cōuocato,
 de eo, qui coronatur, prædicari. Multa, talenta quinquaginta. Via
 tores, Cephisophō Cephisophōtis filius Rhamnusius, Cleon Cleonis fi
 lius Cothocida. Hæc sunt, Atheniēses, quæ ex toto decre
 to in iudicium vocat AEschines. Ego verò primūm his
 ipsis planū me facturū confido, iustissimā eam esse defen
 sionē, qua vsur° sum. Seruato enim eodē ordine, quē iste
 in scribēdo & cōponēdo accusationis libello secut° est;

fingillatim de omnibus dicam, nihilque sciens præteri-
 bo. Quòd igitur scripsit Ctesiphon, me perpetuò eas res
 & dicere, & agere, quæ populo sunt utilissimæ, omni-
 que opera ac studio, quantum in me situm sit, ei consu-
 lere atque prodesse: quodque his nominibus me lauda-
 vit, eius rei iudicium in meis reb⁹ gestis positum esse pu-
 to. Ex his enim, cum erunt diligenter considerata, & per-
 pensa, verane sint ea, quæ de me scripsit Ctesiphon, an
 falsa, perspicuum erit. Quòd autem censuit me corona
 donandum, his verbis non adscriptis, *Posteaquam rationes
 retulerit*, coronæque donationem & prædicationem in
 teatro faciendam: cum hoc ad ea quoque, quæ in rep.
 gesti, pertinere puto, videre vtrum sim corona dignus,
 necne: & vtrum prædicatio fieri in teatro debeat, nec-
 ne: tum præterea leges mihi proferendas esse existimo,
 per quas hæc Ctesiphonti scribere licuerit. Atque equi-
 dem hanc in defendendo Ctesiphonte orationis æqui-
 tatem ac simplicitatem adhibere constitui. Aggrediar
 autem primùm ad ea, quæ gesti: neque est quòd quisquã
 putet, me longè ab accusatione rationem defensionis
 auocare atque abducere, si in hunc de Græcanicis meis
 actionibus sermonem incidero. Nam qui eam decreti
 partem reprehendit, atque in iudicium vocat, in qua
 ego res populo Atheniensi utilissimas & dicere & agere
 dicor, quique hæc tanquam minime vera iudicio perse-
 quitur, hic est, qui hanc de meis in rep. institutis, reb⁹
 que gestis orationem cum hac causa ita coniunxit, ut
 non solum propria, sed etiam profus necessaria videat-
 ur. Deinde cum multa sint administrandæ reip. consilia,
 multæque voluntates & sectæ, eam potissimum sectam,
 quæ ad Græcanicas actiones pertinebat, secutus sum.
 Quapropter non immeritò ex his totius meæ vitæ supe-
 rioris ducenda sunt argumenta. Ea igitur, quæ Philip-
 pus antequàm remp. attigissem, atque ad populum ver-
 ba facere, & contionari cœpisssem, anteuertit, atque
 occupat, præteribo. (nam nihil horum ad me arbitror
 pertinere.)

pertinere.) Quæ verò, posteaquàm ad remp. administrãdam me contuli, prohibitus est à me facere Philippus, eorum vobis memoriam refricabo, neque de his rationem reddere recusabo, si hoc vnum prius vobis exposuero. Philippus tunc, Athenienses, vna re nobis longè superior erat, quòd non apud nos, aut illos tantùm, sed apud omnes peræquè Græcos tanta proditorum, & nummariorum magistratuum, & impiorum hominum vbertas atque annona versabatur, quanta post hominũ memoriam non fuit: quos ille suorum consiliorum administratos & adiutores nactus, Græcos antea grauibus, & acerbis odijs inter se disidenteis, maioribus etiã discordijs ac seditionibus concitauit, cùm alios falleret, alij effusè largiretur, alios quavis ratione corrumpere: postremò multas in partes eos discersit ac distraxit, cùm hæc vna res omnibus pariter conduceret, ne ille cresceret, prohibere. Cùm esset igitur hic omnium Græcorum status, cùmque in summa mali nascētis, & in dies latius manantis ignoratione versarentur, vobiscum ipsi considerate, Athenienses, quid sequi, quid agere, quid efficere decuerit ciuitatem: horũque à me rationem reposecite. Ego enim is sum, qui me in hoc reip. gubernandæ munere ac loco, & in hac quasi custodia & vigilia collocaui. Vtrũ igitur eam conueniebat, AEschinas, suos illos spiritus deponentem, suæque amplitudinis ac dignitatis oblitam, in eodem atque Thessalos & Dolopes ordine ac numero, Philippo Græcorum dominatum appetenti studere ac fauere, maiorũque suorum ornamenta & iura euertere? an hoc quidem non facere (grauè enim hoc mehercule fuisset, graue) sed quæ futura, nisi quis prohiberet, videbat, & iampridem (vt verisimile est) præsentiebat, ea negligere, nihilque, ne acciderent, laborare? At qui libenter ex eo, qui res meas gestas tantopere reprehendit, quæsierim: quarum partium ciuitatem nostram fuisse velit: utrũ earum, quæ malorum ac dedecorum, quæ Græci subierunt, adiutrices Philippo

fuerunt: in quibus Thessalos, eorúmque socios possis
 dicere fuisse versatos: an earum, quæ spe amplificandarum
 opum suarum priuatarum, hæc fieri passæ sunt ac negle-
 xerunt: in quibus Arcadas, & Messenios, & Argiuos nu-
 merare possumus. At multi horum, immò verò omnes
 maiore detrimento accepto, quàm nos, ex hoc negotio
 discesserunt. Nam si Philippus statim vt vicit, sese in Ma-
 cedoniam recepisset, & postea quicuisset, nemine neque
 ex socijs suis, neque ex ceteris Græcis læso, aut offenso,
 eos tamen, qui conatibus eius non restitissent, aliqua ex
 parte reprehendere & accusare possemus. Sed si peræ-
 què omnibus dignitatem, principatum, libertatem, im-
 mò verò reip. statum quibuscunque potuit, ademit, nón-
 ne vos, qui mihi credidistis ac paruistis, gloriosissimo &
 præclarissimo consilio vsi estis? sed illuc reuertor. Quid
 ciuitatem nostrâ, A Eschina, tû facere cõueniebat, cum
 Philippum videret imperium sibi in Græcos, ac regnum
 comparare? aut quid me suaforem & consiliarium dice-
 re, quid scribere oportebat: præsertim Athenis? (Nam
 hoc plurimum refert) qui sciebam, patriam meam à pri-
 mis temporibus vsque ad illum diem, quo die in contio-
 nem ascēdi, semper de principatu, ac principe loco, sem-
 per de honore, ac de gloria decertasse? pluresque viros,
 & maiorem pecuniæ vim pro studio laudis & honoris,
 omniúmque Græcorum commodis consumsisse, quàm
 ceteri Græciæ populi pro sese impenderunt? Philippum
 autem, cum quo vobis omne certamen institutum erat,
 videbã pro imperio ac dominatione oculo sibi effosso,
 iugulo confraçto, manu debilitata, crure comminuto à
 suis inceptis non desistere: denique quamcunque cor-
 poris partem fortuna voluerit ei adimere, eam libenter
 & cupidè amittere, vt reliquo corpore mutilato, cum
 honore & gloria vitam traduceret? Atquæ ne hoc qui-
 dem quisquam dicere audeat, homini Pellæ educato, in
 vrbe humili tunc atque obscura, tantam animi magni-
 tudinem meritò ingeneratam esse, vt imperium Græco-
 rum.

rum concupisceret, atque hoc in animum induceret: in vobis autem, qui Athenienses estis, quique quotidie in omnibus litteris ac disciplinis maiorum vestrorum monumenta cernitis, tãtam ignauiam atque inertiam inesse debuisse, vt libertatẽ Græcorum vltro, & vestra sponte Philippo cederetis. Nemo (inquam) hæc dixit. Vnũ igitur erat reliquum simul & necessarium: ijs omnibus, quæ ille moliebatur, cum iniustè vos læderet, iustè obfistere, atque obuiam ire. Ergo vos quidem ab initio hoc faciebatis, vt æquum erat, vt decebat: ego autem decernebam, & suadebam quibus temporibus in rep. versabar: fateor. At quid me facere oportebat? Iam enim ex te quæro, reliquaque omnia prætermitto, Amphipolim, Pydnam, Potidæam, Halonesum: hæc omnia obliuiscor, nihil horum memini: Serrion, Doriscus, Peparethi expugnatio, & cetera id genus, in quibus & iniuriam, & detrimentum accepit ciuitas, fuerintne vnquam, nescio. Et tamen dixisti me horum locorum commemoratione ciuitatem nostram in odium Philippi adduxisse, cum ea decreta, quæ ad has res pertinent, sint Eubuli, Aristophontis, Diopithis, non mea. O ad dicendum quicquid tibi libeat, omnium hominum promississime, atque expeditissime. nihil igitur ego de his nunc quicquam dicam. Verùm ille, qui Eubœam sibi vendicabat: qui aggerem Atticæ oppugnandæ excitabat: qui Megaris inferre bellum cogitabat: Oréum occupabat, Porthmum subruebat, Philistidem Oréo, Clitarchum Eretriæ tyrannos imponebat, qui Hellepontum sub imperium ditionemque suam subiungebat, qui Byzantium obsidebat, qui vrbeis Græciæ alias funditus euertebat, in alias exsules ab exsilio reducebat: vtrùm cum hæc faceret, iniuriam faciebat, & fœdera rumpebat, & pacem violabat, necne? Deinde vtrùm è Græcis aliquem existere oportebat, qui hæc eum facere prohiberet, necne? Nam si nõ oportebat, sed illum, quæ Græcia est, Mysorum prædã, vt appellatur, viuëtibus & stantibus Atheniensibus, videri

conueniebat: frustra sunt mei tot suscepti labores cum de talibus rebus dixi: inanem quoque & superuacaneam operam sumsit ciuitas, quæ consilio meo paruit: fuerint denique peccata & scelestæ omnia contra ius admissa, mea. Sin autem opus erat aliquem existere, qui hæc prohiberet: quem alium, quàm populum Athen. fuisse conueniebat? Has igitur res ego tum gerebam, & cum illum omnium mortalium ceruicibus iugum seruitutis imponere videbam, aduersabar ego, & resistebam, tum prædicendo, tum monendo, ne hæc Philippo condonaretis ac proderetis. Atqui pacem ille profectò captis nauibus, non nostra ciuitas, AEschima, violauit atque infirmauit. Profer igitur ipsa decreta, & epistolam Philippi, & ex ordine recita. Nam cui quisque culpæ sit affinis, ex his planum fiet, si diligenter attendentur, & cum re, de qua quaeritur, comparabuntur. Recita. **DECRETA.** Neocle præ-tore, mense sextili, contione ab imperatoribus extra ordinem aduocata, Eubulus Mnestrhei filius Cyprius verba fecit. Quòd imperatores in cõtione nũtiarunt Leodamantem nauarchum cum viginti, quæ vnà missæ fuerant, exportandi ex Hellesponto in Lemnum frumenti causa, nauibus, ab Amynta Philippi imperatore in Macedoniam deductum, atque in custodiam datum retineri: placere vt ciuitatis moderatores, & imperatores dent operam, vt cogatur senatus, legati que ad Philippum deligantur, qui cum primum ad eum peruenerint, agant cum eo de dimittendo nauarcho, & nauibus, & militibus. Et si imprudens fecit Amyntas, dicant nihil de eo queri populam Atheniensem: si Leodamantem in aliquo maleficio deprehendit, cum aliquid præter ea, quæ fuerant ei à populo Atheniensi mandata, moliretur, Athenienses re cognita, pro eius negligentia & contumacia, in eum animaduersuros. Quòd si neutrum horum est, sed priuatim fidem & equitatẽ violat aut is, qui nauis misit, aut is, qui cum nauibus missus est, placere, vt petant legati à Philippo, vt hac de re faciat nos per litteras certiores, vt populus Atheniensis cum hæc comperta habuerit, quid factò opus sit, deliberet. Hoc igitur populi scitum fecit Eubulus, non ego. Alterum, quod deinceps sequitur, Aristophon: deinde tertium

Hegesippus: deinde aliud Aristophon: deinde aliud Philocrates: postremò Cephisophon, & ceteri omnes. Ego quidem nullū vnquā hisce de rebus verbum feci. Recitata decretum. **DECRETVM.** *Nicole pratore, pridie Kal. septembris, de sententia totius senatus, ciuitatis moderatores, & imperatores, cū de ijs, quæ in contione acta essent, ad senatum retulissent, decreuerunt populo placere, ut legati ad Philippum de nauibus recuperandis deligantur, usque ad illum mandata dentur: etiā populi scita in contionibus facta tradantur. Leeli sunt hi, Cephisophon Cleonis filius, Anaphlystius: Democritus Demophontis filius, Anagrasius: Polycritus Apemanti filius, Cothocides. tribu Hipporhoontide si mmam veram potestatem obtinente. Aristophon Colhteus præses, & consilij publici princeps sententiam dixit.*

Quo modo igitur ego hæc populi scita profero atque ostendo, ita & tu AEschina ostende, quali ego decreto scripto, belli suscipiendi auctor fuerim. At non potes, si enim posses, nihil tibi nunc prius proferendum duxisses. Atquē ne Philippus quidem in me belli culpam confert, cū alios insimulet, & criminetur. Recita verò ipsam Philippi epistolam. **EPISTOLA PHILIPPI.** *Rex Macedonum Philippus, senatui populoque Atheniensi S. D. Venerunt ad me legati vestri Cephisophon, Democritus, Polycritus: egerunt que mecum de nauibus, quibus præerat Leodamas, dimittendis. Ut igitur vno verbo dicam quod sentio, stultissimi mihi esse videmini, si me ignorare putatus, hæc nauigia per simulationem frumenti ex Hellesponto in Lemnum exportandi, eo consilio esse missa, ut Selymbrianis, qui à me obsidentur, nec communibus amicitia & foederibus continentur, auxilium ferrent: atque hæc nauarcho mandata esse non à populo, sed à quibusdam magistratibus, & ab alijs, qui nūc priuati cū sint, vehementer cupiunt, populum, spreta & violata amicitia, quæ mihi cum eo intercedit, bellum redintegrare: id que ut fiat, maiore studio contendunt, quam ut Selymbrianis opitulentur, existimantes sibi hoc facinus veltigalis instar futurum. Verumtamen non arbitror nec mihi, nec vobis hoc quicquam profuturum. Quapropter primū hæc nauigia, quæ ad nos delata sunt, vobis remitto, & condono: deinde peto à vobis, ne magistratibus vestris per-*

mittatis, rēp. malitiosē, & improbē administrare: sed coërceatis, & castigetis. quod quidem si facietis, ego quoque omni studio pacem tueri & conseruare conabor. Valete. Nusquam hīc Demosthenis nomen posuit, nullius me culpæ affinem esse scripsit. Cur igitur cūm alios criminetur, nullam de meis rebus gestis mentionem facit? quia de suis in nos iniurijs mentionem fecisset, siquid de me scripsisset. His enim affixus hærebam: ab his nusquam oculos demouebam: his denique aduersabar. Ac primūm legatio in Peloponnesum me auctore decreta est, quo tempore ille in Peloponnesum occultis itineribus irrepebat: deinde in Eubœam, cūm Eubœam appetebat: deinde exercitus in Oréum à me decretus est, non iam legatio: alter item exercitus in Eretriam, posteaquàm tyrannos in his vrbibus constituerat: postremò classeis eas omneis misit, quibus & Cheronesus, & Byzātium, & focij omnes seruati sunt: ex quibus vobis pulcherrima illa nata sunt, laudes, gloria, coronæ, gratiæ ab ijs, qui beneficium à vobis acceperant. Ita factum est, vt eorum, quibus iniuriam faciebat Philippus, lōgè dissimilis esset fortuna. Nam qui vobis tum fidem habuerunt, ac paruerunt, salutem adepti sunt: qui neglexerunt, hoc sunt assecuti, vt & ea, quæ prædixeratis, sæpe recordarentur: & vos non solum optima erga se voluntate, sed etiam singulari prudentia præditos, & vates fuisse iudicarent. Omnia enim quæcunque eis prædixistis, acciderūt. At quī cūm fugiat omnino neminem, tū tu omniū hominū minimè ignoras, AEschīna, magno emturū fuisse Philistidem, vt Oréū haberet: magno Clitarchum, vt Eretriam teneret: magno Philippum ipsum, vt hæ sibi aduersum vos facultates suppeterent, nec de ceteris rebus coargueretur: denique ne quis iniurias, quibus Græciam vbiq̃ afficiebat, magnopere attenderet, aut acrioribus oculis obseruaret. Legati enim, qui tum à Clitarcho & Philistide huc veniebant, apud te aduersabantur, AEschīna, tūque eis hospitium publicum comparabas: quos ciuitas tanquam hosteis, & res neque

iustas, neque reip. vtilis persuadere dicendo conanteis, exire ex vrbe iussit, atque eiecit: Tibi autem erant amici. Nihilne igitur horum actum est? ô, te appello, qui me maledictis insectaris: qui dicis me pretio accepto tacere, cōsumto vociferari. Tu verò non item: quin tum maxime vociferaris cùm habes, neque vnquam vociferari defines, nisi hi tibi clamorem istum compresserint, iusta infamiæ nota sempiterna. Cùm igitur vos tum propter has causas me corona donassetis, iisdemque, quibus hic Cresiphon, syllabis Aristonicus decretum conscripisset, corona in theatro voce præconis pronuntiata esset: hoc secundum denique mihi iam præconium obtigerit: neque tum contrà dixit AEschines cùm præstò esset, neque eum, qui sententiam dixerat, in iudicium vocauit. Ac mihi hoc quoque decretum recita. **DECRETVM.** *Charonida Hegemonis filio prætore, septimo Kal. Februariæ, tribu Leontide summum imperium obtinente, Aristonicus Phrearrus ita censuit. Quoniam Demosithenes Demosithenis filius Paanius, cùm multas & magnas populo Atheniensi vtilitates attulit, tum multis populi Atheniensis socijs & antea, & item hoc tempore suis decretis præsidio atque auxilio fuit: quòdque nonnullas vrbes Eubœæ liberauit: postremò quòd perpetuam erga populum Atheniensem benevolentiam præstat, & tum agendo, tum dicendo, quantum potest, cùm ipsis Atheniensibus, tum alijs Græcis consulit: Placere senatui, populoque Atheniensi, vt Demosithenes Demosithenis filius, meritis ac veris laudibus ornatur, aureæque corona donetur. Atque hæc donatio in theatro Dionysijs, tragœdis nouis pronuntietur. Huius autem pronuntiationis procurationem habeat & tribus eas penes quam summa sit rerum potestas, & certaminum scenicarum curator ac præfectus. Dixit Aristonicus Phrearrus.* Est ne igitur quisquam, qui dedecore aliquo affectam, aut ludibrio habitam, aut derisam, propter hoc decretum, nostram ciuitatem esse sciat, quæ omnia nunc iste, si ego corona donatus fuero, futura confirmat? Atquæ cùm res sunt recentes, & omnibus notæ, si quidem honestæ & præclaræ sint, earum auctioribus habetur gratia: sin ali-

ter, pœna in eos constituitur . At enim tum mihi gratia relata, non pœna irrogata est. Quare vsque ad illa tempora, in quibus hæc gesta sunt, nemo est, qui non me res & optimas, & ciuitati vtilissimas gessisse fateatur: hocque ita esse id erit maximo documento, quod cum aliqua de re deliberabatis, siue dicerem, siue decernerem, omnes sententiam meam probabatis, omnes auctoritatem meam sequebamin: quod ea, quæ à me decreta essent, fieri iubebatis, quod ex eis coronæ ciuitati, mihi, vobis omnibus comparabantur: quod sacrificia, & supplicationes dijs immortalibus, propter actiones illas tanquam vtilis & salutareis, constituebatis . Posteaquam igitur ex Eubœa Philippus depulsus ac deiectus est, armis quidem à vobis, ratione autem & scientia reip. bene gerendæ, & decretis (disrumpantur quidam istorum licet,) à me: alteram ciuitatis nostræ oppugnandæ viam quærebat. Cum videret autem, nos magnam partem frumento importato, aliundéque aduecto vti, totius rei frumentariæ exportandæ potestatem concupiuit: & cum in Thraciam venisset, à Byzantijs socijs suis primùm petere cœpit, vt communibus opibus, copiisque coniunctis, vnâ secum bellum nobis inferrent . quod cum recusaret Byzantij, negarentque se his condicionibus cum eo societatem iniuisse (neque in eo sane mentiebantur) aggeribus excitatis, vallo circumiecto, machinis admotis urbem oppugnabat. Hæc cum fierent, quid nos facere conueniret, non iam amplius quenquam rogabo: (omnibus enim perspicuum est) sed quis ille fuit, qui Byzantijs opem tulit? qui saluti fuit? qui prohibuit, ne Hellepontus temporibus illis à nobis alienaretur? Vos, Athenienses. vos autem cum dico, ciuitatem nostram dico. sed quis erat ille, qui ciuitati hoc suadebat? qui decernebat? qui agebat, qui denique seipsum nullius periculi metu deteritus, non pecuniæ, non vitæ suæ parcens, rebus omnibus offerebat? Ego . Neque verò vos oportet oratione doceri quantū hæc omnibus profuerint, cum re sitis experti.

perti. Bellū enim, quod tum susceptum est, præter quàm quòd magnā ex eo gloriā cōsecuti estis, fecit vt omnium rerū, quæ ad vitam degēdā necessariæ sunt, maior vobis cum incredibili annonæ vilitate suppeteret vbertas & copia, quàm in hac pace, quam isti viri boni contra patriam tuentur ac retinent, rerum quarundam futurarū spe ducti: qua vt decidant, neque earum rerum, quæ vos optimarum partium ac rectissimarum voluntatum ciues à dijs expetitis, sint participes, neque ipsi vobis ea, quæ secuti sunt, quæque sibi proposuerunt, impertiant, faxint dij immortales. Recita verò Byzantium & Perinthiorum coronas, quibus harum actionū nomine ciuitas nostra donabatur. DECRETA BYZANTIORVM.

Hieromnemone Bosphoricho, Damaget^o Entealia filius, facta sibi à senatu dicendi potestate, verba fecit. Quòd populus Atheniensis cum superioribus temporibus perpetuam erga Byzantios, & socios, cognatosque Perinthios beneuolentiam habuit, tum hoc tempore cum Philippus Macedo bellū huic agro, & huic vrbi calamitosum inferret, eo consilio atque animo vt Byzantios, & Perinthios funditus deleret, atque euerteret: cumque omnia partim incendio flammisque vastaret, partim cæsis arboribus ferro popularetur, magno nobis vsui, vtilitati que fuit, auxilioque lato centum & viginti nauibus, re frumentaria, armis, viris, magnis periculis nos liberauit, & antiquum nobis reip. statum, leges, sepulcra maiorum restituit: Populo Byzantio, & Perinthio placere, ius matrimonij nobiscum contrahendi, & ciuitatis, ac reip. nostræ communionem, rigor. m & fundorum emendorum ac possidendorum potestatem Atheniensibus concedi: in ludis ac certaminibus principem locum, ac proprium, in Prytanéo, in curia, apud populum, apud eos, qui sacris præpositi sunt, tribui: tum si qui volent in vrbe nostra domicilium suarum fortunarum collocare, omnium rerum immunitatem dari: statuas autem treis sexdecim cubitorum in Bosphoro poni, quæ significant, populum Atheniensem à populo Byzantio, & Perinthio corona donari: mitti autem munera ac præmia ad celeberrimos totius Græciæ cōuentus, Isihmia, Némæa, Olympia, Pythia: illique prædicationum coronæ, qua corona populus Atheniensis à nobis donatus sit, fieri, vt

Atheniensium Virtus, & Byzantium, Perinthiorumque gratus animus Græcis omnibus perspectus sit & cognitus. Recita & coronas à Cherrhonestis ciuitati nostræ decretas ac donatas. DECRETVM CHERRHONESITARVM.

Qui ex Cherrhonestis Sesium, Eleuentem, Madytum, Halopeconnesum incolunt, ij senatum, populumque Atheniensem coronâ aurea donant ducentorum & viginti sex pondo: aram Gratia, & populi Atheniensis excitant & corsecrant, quoniam sibi maximi & singularis boni, incredibilisque felicitatis causa fuit, vt pote qui se exercitu Philippi liberarit, qui sibi sedes suas patrias, suas leges, libertatem, sacra restituerit, neque vlla sæculorum æternitate ei gratias agere, & quantum consequi poterunt, de eo bene mereri, & quicquid poterunt in eum beneficij conferre, desinent. Hac de communi consilio in curia decreuerunt. Verum non solum vt Cherrhonestus, & Byzantium seruantur, Philippus Hellepontum in potestatem suam redigere prohiberetur, nostra ciuitas his de causis, maximis honoribus afficeretur, mea instituta, meaque in administranda rep. rationes perfecerunt: sed etiam omnibus mortalibus nostræ ciuitatis bonitatem, fidem atque animi magnitudinem, Philippi improbitatem, malitiam, ac perfidiâ, perspicuam, clarâque reddiderunt. Hic enim Byzantium amicus, & socius eos ipsos, quos tueri debebat, circum federe atque oppugnare ab omnibus conspiciebatur: (quo quid turpius aut sceleratius esse possit?) vos qui multa, & quidem meritò de illis queri poteratis, propterea quòd se in vos antea iniquos atque ingratos præbuerant, non modò præteritas iniurias non recordari, neque homines miseros, quibus à Philippo fiebat iniuria prodere ac deserere, sed etiam tueri ac seruare cernebamini. Quibus ex rebus gloriam, omniumque erga vos beneuolentiam comparabatis. At quâ nemo est, qui nesciat, multos iam ex ijs, qui in rep. versati sunt, à vobis esse corona donatos. sed cuius alius opera ciuitas nostra honorem coronæ consecuta sit, consiliarij, inquam, & oratoris, præterquâ mea, nemo est, qui proferre queat.

Vt igitur ea maledicta, quæ iste in Eubœos, Byzantiosque congelsit, cum siquid forte asperius ab illis atque acerbius contra nos actum sit, commemorabat, meras calumnias esse ostendam, non eò solùm quòd falsa sunt, (scire enim vos arbitror ita esse) sed quòd, vt maximè vera essent, res illas tamè ita tractaui, ac moderat^o sum, vt ciuitati nostræ essent vtiles: vnum atque alterum è præclaris facinoribus, ac ciuitati nostræ gloriosis, quæ apud vos facta sunt, exponere volo, atque ea paucis. Nam & vnumquenque priuatim, & ciuitatè publicè ad omniũ, quæ extant, pulcherrima, & præclarissima exempla reliquas actiones oportet dirigere conari. Vos igitur, Athenienses, cum Lacedæmonij terræ, marisque imperium obtinerent, & totam Atticam quoquo versus, præfectis, ac præsidijs deuinctam, obsessamque tenerèt, Eubœam, Tanagram, omnem Bœotiam, Megaram, Aeginam, Cleonas, ceteras insulas haberent: cum ciuitati nostræ non mœnia, non naues essent: ad Haliartum exercitum eduxistis, iterùmque paucis post diebus Corinthum, quo tempore multas à Corinthijs ac Thebanis acceptas iniurias, ob ea, quæ bello Decelico, ab illis acta fuerât, memoria repetere poterant ij, qui tum viuebant Athenienses maiores vestri: quod tamè non fecerūt: nihil minus. Atquæ hoc vtrumque, AEschiana, Athenienses neque pro bonè meritis faciebant, neque à periculò vacuum cernebant: sed non idcirco tamen eos, qui ad se confugiebant, deserere in animum inducebant, immò verò pro honore & gloria, terrores omneis subire, omneisque dolores & cruciatus corporis excipere ac perferre cupiebant: qua in re nihil fallebantur, quin prudētissime rectissimèque sentiebāt. Namque omnibus hominibus vitæ terminus mors est, etiam si quis se domi inclusum contineat & custodiat. Sed viros forteis semper oportet res laudabileis atque honestas suscipere & conari, bona spe in posterum fretos, & quasi armis quibusdam tectos: quicquid autem deorum immortalium

voluntate euenerit, fortiter ac moderatè ferre. Hæc faciebant nostri maiores, hæc qui è vobis sunt ætate grandiores: qui simulatque Thebani victoriam in Leuctris consecuti, Lacedæmonios neque vobis amicos, neque de vobis bene meritos, immo verò propter multas & graueis in nostram ciuitatem iniurias odio acerbissimo dignos, de medio tollere, ac funditus delere conati sunt, prohibuistis, non eorum potentia, non viribus, non opibus, non gloria bello parta deterriti: postremò non agitantés animis, neque reputantes cuiusmodi vos illi in rebus iniuste læsissent, neque pro quibus hominibus essetis vitæ periculum adituri. Ita his factis, Græcis omnibus declarastis, vos si quis eorum in vos quantumuis grauius deliquerit, iras atque inimicitias aduersus eum susceptas, ad alias res, aliâque tempora reseruare. quòd si aliquod in discrimen salutis aut libertatis venerint, iniuriæ acceptæ neque memores futuros, neque rationem habituros. Neque verò in his rebus solum ita animati fuistis: sed cum sibi iterum Thebani Eubœam vendicarent, neq; vos neglexistis, neque iniurias, quibus à Themisone, & Theodoro ad Oropum affecti fueratis, memoria tenuistis, sed his quoque succurristis: quo quidem tempore primùm trierarchi voluntarij ciuitati extiterunt, in quibus ego fui. Sed nondum ad eum locum veni, vbi mihi his de rebus dicendum sit. Atqui cum clara in hoc vestra virtus enituerit, quòd insulam illam seruauiistis: tum verò multo præclarissimum vestrum illud factum extitit, quòd cum & virorum, & vrbium Euboïcarum compotes essetis, ijs, qui vos læserant, vtraque reddidistis, nulla iniuriarum vobis factarum in ijs, quæ vestræ fidei commendata, & credita fuissent, ratione ducta. Alia sexcetera, quæ commemorare possum, præmitto: naualeis pugnas, exercitus in expeditionem eductos, pedestreis copias tum antea, tum vestra memoria comparatas: quæ quidem omnia pro ceterorum Græcorum salute ac libertate ciuitas nostra suscepit. Cum igitur

animaduēr-

animaduertissem, & cognouissem, ciuitatem nostram in tot ac talibus rebus pro commodis alienis nullam dimissionem recusasse, cum res ipsius ageretur, consiliūque & certamen quodammodo de ea iniretur, quid ego ei suadere, quid consilij dare debui? Vtrum vt præteritas iniurias recordaretur in eos, qui præsidium nostrum implorabant, qui seruari cupiebant? an vt excusationum latebras quæreret, quibus utilitatem Græcorum communem proderemus? Et quis me non merirò necaret, si quod ornamentum, decusque ciuitatis verbis duntaxat contaminare conarer? Nam rem quidem vos non fuisse facturos ego certo scio. si enim voluissetis, quid vobis obstitisset? nō licebat? non vobis præstò aderant isti homines, qui hæc dicturi ac suasuri essent? Iam igitur ad ea, quæ deinceps publicè gessi, reuertor. atque in his mihi rursus spectate, & considerate, quid esset optimum factu ciuitati. Cùm enim viderem, Athenienses, classem vestram dilabi atque euanescere, diuites impensa modica facta immunitatem esse consecutos, mediocrium aut tenuium facultatum homines ad egestatem esse redactos, ciuitatem ob has causas nihil suo tempore facere, sed amissa iam occasione ad res agendas aggredi: legem tyli, qua diuites officium facere coëgi, pauperes ab iniuria vindicaui: deniq; perfeci, vt omnis comæatus, omnis belli apparatus (quod erat utilissimum) suo tempore ciuitati suppeteret: atque ob hanc actionem, de legibus contra leges rogatis in iudicium vocatus, vestræ me potestati, sententiæque permisi, in conspectum vestrum veni, & absolutus sum: accusator autem ne quintam quidem tabellarum partem pro se obtinuit. Atqui quanti classium magistrōs aut primos, aut secundos, aut tertios à me fuisse putatis emtuos, primùm ne hæc lex à me ferretur: secundo loco vt ego tota re inchoata relicta atque abiecta eis iurandi in litem, & iureiurando interposito, recusandi, aut prorogandi iudicij potestatem facerem, atq; ita eos elabi sinerem? tanti profectò, Athe-

nienſes. quanti apud vos dicere non auſim. Atque hæc non immeritò facerēt. Licebat enim illis per leges priores ſenis denis inter ſe copulatis, muneribꝰ publicis fungi, cum ipſi paruam, ac propè nullam impenſam ſinguli facerent, tenuium atque inopum rem familiarem conterrerent atque exhaurirēt: mea autem lege pro ſuis quemque facultatibus pecuniam conferre oportebat: ita duabus triremibus præfectus mea lege exortus eſt iſ, qui vnius ſumtum decimus ſextus antea ſuſtinebat. Non enim ſe tunc trierarchos, ſed tributi conferendi ſocios nominabant. Quare vt hæc tollerentur, atque vt ne officium facere cogerentur, nihil eſt, quod mihi daturi non fuerint. Ac mihi primùm plebiſciturum illud, propter quod in iudicium adductus ſum de legibus contra leges ſuperiores rogatis: deinde cenſuum deſcriptiones, & eam, quæ priore lege obſeruabatur, & eam, quam ego mea lege induxi, recita. **PLEBISSCITVM A DEMOSTHENE FACTVM.** Prætor Polycle, decimo ſexto Kal. ſeptembris, tribu Hippothoontide ſummam rem obtinente, ciuitatemque moderante, Demotheſes Demotheſis filius Pæanieus legem tulit ad nauium præfecturas pertinentem, ſuperiore abrogata, qua trierarchis tributorum conferendorum partitio concedebatur. Atque hanc Demotheſis legem ſenatus ſententia ſua, populꝰſque Athenienſis ſuffragio ſuo comprobauit. Itaque hoc nomine, Demotheſenem Patrocles Phlyeus iudicio de legibus non legitime rogatis reum fecit. Qui, Demotheſene omnibus ſententijs abſoluto, cum quintam tabellarum iudicialium partem nõ obtinuiffet, quingētis drachmis multatus eſt.

Profer verò & egregiam illam cenſus deſcriptionem lege ſuperiore inſtitutam. **DESCRIPTIO TRIBVTI CONFERENDI EX LEGE ANTIQVA.** Trierarchi ad vnius triremis ſumtus vocantor ſeni deni, ad rationem earum tributi collationum, quæ in centurijs, aut manipulis militum obſeruari ſolent, ab ætatis anno viceſimo quinto uſque ad quadrageſimum: atque hi parem & æquabilem inter ſe ſumtum in triremis faciunt.

Age iam mihi deſcriptionem quoque ex mea lege inductam profer ac recita. **DESCRIPTIO EX LEGE DE-**

MOSTHENIS. *Singuli trierarchi delecti singulis triremibus attribuntur pro suis quisque facultatibus, quorum census sit decem talentorum. quòd si sit pluri: pro proportione vsque ad tria nauigia, cum nauicula actiuaria, conserendi munere funguntor. eadem proportione, si bona sint minoris, quàm decem talentorum, consociantor, & cœunt inter se ad muneri persurctionem, vsque ad decem talenta. Vtrùm vobis videor tenuibus mediocriter subuenisse? Vtrùm diuites paruo fuisse videntur emturi, vt ne officium facere cogentur? Non solùm igitur his nominibus gloriator ac triumpho, quòd hæc diuitibus nõ remissi, neque condonauit: & quòd in iudicium vocatus, absolutus sum: sed quòd legem vtilem reip. tulit, idque re, atque euentu probauit. Cùm enim toto belli tempore, mea lege classes nauigarent, nullus vnquam trierarchus ad vos supplex confûgit, tâquam mea legis iniuria oppressus atque afflictus: nullus in Munychia ad aram Dianæ sedens, onus sibi lege impositum deprecatus est: nullus à magistratibus classis in vincula coniectus est, quòd legi meæ parère nolisset: nulla triremis neque foris comprehensa perijt nostræ ciuitati, neque hic remansit cùm in altum deduci non posset. Atquã prioribus legibus hæc omnia accidebant. Causa autem in pauperibus consistebat, quippe qui munere publico fungi propter egestatem non possent. Ex hoc igitur multarum rerum gerendarum impedimenta, multaque difficultates inexplicabiles nascabantur. Ego verò ab ijs, quibus angusta res familiaris, tenuesque facultates erant, ad locupleteis & copiosos nauium præfecturas transtuli. Ita quæ ratio postulabat, quæque tempora reip. desiderabant, rectè atque ordine agi cœpta sunt. Atquã etiam hoc nomine laus mihi debetur, quòd hanc reip. administrandæ viam, rationemque secutus sum, ex qua vno tempore gloria, honores, opes, & copiæ ciuitati quærebantur. Nulla autem mea reip. gerendæ ratio neque inuida, neque maligna, neque acerba, neque malitiosa, neque humilis aut abiecta, neque ciuitate nostra indigna reperietur. Atque can-*

dem planè mentem, ingenijque indolcm in ciuitate nostra gubernanda præstitisse videbor, quam in toti^o Græciæ rebus procurandis atque administrandis adhibui. Nam neque in ciuitate nostra gratiam diuitem pluris, quàm multitudinis iura feci, neque in rebus Græcorum, Philippi hospitium ac munera, communibus totius Græciæ commodis ac rationibus antiquiora mihi fuerunt. Iam igitur mihi reliquum esse arbitror de præconio, ac de iudicio rationum referendarum dicere. Nam me res optimas, & populo vehementer vtileis egisse, beneuolentiámque erga vos perpetuò habuisse, omni que opera ac studio reip. profuisse, satis ex ijs, quæ dicta sunt, constare existimo. Atquæ partem maximam rerum à me publicè institutarum & actarum prætermitto, quòd arbitrer primùm mihi de crimine ipso decretorum contra leges factorum esse differendum, rationemque reddendam: deinde etiam si nihil de reliquis actionibus, & rebus meis gestis dicam, nihilo minus tamen vestram mihi cōscientiam testem esse earum locupletem. Iam quæ iste sursum ac deorsum omnia permiscens ac perturbans, & oratione longo anfractu verborum circumacta, de legibus disputauit, contra quas hoc decretum scriptum esse arguit: neque mehercule quenquam vestrùm esse puto, qui, quid diceret, intellexerit, neque ego intelligere potui. Mihi autem deliberatum est, rectam ac simplicem defensionis viam sequi. Tantum abest enim, vt dicam, me iudicio referendarum rationum non teneri (quod iste mihi crebrò obijciebat, falsò, & ita esse asseuerabat) vt eorū, quæ per omnem vitã publicè vel tractaui, vel ad ministraui, rationem me apud vos referre debere cōfitear: sed quæ de meis bonis populo vltro largitus sum, eorum rationem neque à me referri vlllo tempore oportere dico: (audis AEschina?) neque ab vlllo alio, ne si ex nouè quidẽ sit prætoribus. Nam quæ tam iniusta, quæ hominum generi tam inimica atque infesta lex, vt, qui de suo sit largitus, quique humanitate adductus benignum se, & munificum,

ficum, & liberalem re præbuerit, eum gratiæ quidem fructu priuet, calumniatoribus autem & sycophantis confictum tradat? hos ad reposcendas eorum, quæ illæ dedit, rationes, iudices constituat? Nulla profectò est: aut siquam iste esse contendat, ostendat, atque ego æquo animo ferã, & tacebo. Verùm, Athenienses, omnino nulla reperietur. Itaque calumniatur iste me, & quòd, cum ego theatri pecuniæ præfectus essem, pecuniam de meo largitus sum, senatus (inquit) eum laudauit, quo tempore referendarum rationum iudicio tenebatur. Non ob vllam rem, cuius rationem reddere debebam, perditissime sycophanta, sed propter meam largitionem ac liberalitatem. At muris reficiendis curator eras (inquit). Etiam ob id ipsum meritò laudabar, propterea quòd quæ in eorum refectioem insumsi, donauit, neque in tabulas reuli, expensum ue tuli. Nam expensi ratio sanè, iudicium referendarum rationum, & iudices, qui rationes diligenter expendat, desiderat: donatio verò ac liberalitas, laudem, gratiamque promeretur. Hanc igitur ob causam Ctesiphon hoc de me scitum fecit. Atque hæc ita esse, & nõ solum legibus esse definita, verùm etiam institutis ac moribus nostris esse comparata, multis argumentis & testimonijs vobis demonstrabo. Nam primùm Nausicles cum esset imperator, sæpe ob ea, quæ de suo largitus est, à vobis corona donatus est. Deinde Diotimus, quòd clypeos dederat: & rursus Charidemus, coronis donati sunt. Tum Neoptolemus iste multis operibus præfectus, propter ea, quæ de suo largitus est, honorem coronæ est consecutus. Esset enim hoc miserabile sanè atque ingemiscendum, si magistratum aliquem gerenti, vel sua largiri propter magistratum non liceret, vel eorum, quæ largitus sit, non gratiam vllam consequeretur, sed iudicium referendarum rationum subire cogeretur. Atque hæc ita esse, Athenienses, ex ijs ipsis, quæ his decreta sunt, cognoscite. Recita mihi decreta. DECRETVM. Pratore
Demonico Phlyeo, sexto Kal. septembris, Verba fecit Callias.

Phrearrius de sententia senatus, populique Atheniensis, Placere senatus, populoque Atheniensis, Nausiclem armis præfectum corona donari, quod cum duo millia peditum Atheniensium grauioris armatura essent in Imlro, ut Atheniensibus eam insulam incolentibus auxilium ferrent, neque posset Phialo, cui suffragio populi huius muneris administratio delata fuerat, propter hiemem ac tempestatem aduersam nauigare, neque stipendium militibus persolvere, de suo Vitro erogauit, nec tamen à populo repetijt: placere præterea corona donationem Dionysijs, tragædis nouis, præconis voce pronuntuari. ALTERVM DECRETVM. Callias Phrearrius, moderatoribus ciuitatis de sententia senatus cõuocatis, verba fecit: Quod Charidemus militibus grauioris armaturæ præfectus, cum classe Salaminiem missus, & Diotimus magister equitum, nonnullos milites in eo prælio, quod ad fluuium Elissum commissum est, spoliatos ab hostibus, suis surtibus, chypeis octigentis armauerunt: placere senatus, populoque Atheniensis, Charidemum & Diotimum aurea corona donari, eamque coronam Quinquatribus magnis, in gymnico certamine, & Dionysijs, tragædis nouis, præconis voce pronuntuari: Atque huius præconij curam habere thesmorhetas, & ciuitatis moderatores, penes quos est summa rerum potestas, & certaminum scenicorum curatores ac magistratos. Vterque horum, AEschina, eius quidem muneris, quod administrabat, rationes referre debebat: sed eorum, propter quæ corona donabatur, minimè. Ne ego quidem igitur. Eodem enim iure scilicet, quo alij, fretus sum. Largitus sum de meo: propterea laude afficior, cum eorum, quæ de meis bonis dedi, rationes referre non debeam. Magistratus gessi, eorumque rationes retuli, non eorum, quæ liberalitate adductus dedi. Esto. At magistratus perperam gessi. Si ita est verò, cur cum apud rationum præfectos, quorum de ea re notio erat, rationem referebam, præsertim cum adesses, non me accusabas? Ut igitur sciatis, istum ipsum mihi testem esse, me ob ea, de quibus rationes referre non debebam, corona esse donatum: sume mihi totum scitum de me factum, & recita. Ex ijs enim, quæ de senatus consulto in iudicium non vocauit, se ipse aperiet &

indicabit, atq; in ijs, quæ iudicio persequitur, improbissimus calumniator reperietur. Recita. DECRETVM.

Prætor Euthyle, Undecimo Kal. Nouembreis, tribu Oeneïde summam rem obtinente, & ciuitatem moderante, Cresiphon Leosthenis filius Anaphlystius verba fecit. Quoniam Demosthenes Demosthenis filius Pæanicus muris reficiendis curator, præter id, quod ei de publico fuerat attributum, tria talenta de suo in opus publicum à se infumta populo condonauit, ac remisit, neque exigere curauit: quoniãq; pecuniæ theatri præfectus, omnium tribuum pecuniam theatralem centum minis auxit in sacrificia: placere senatui, populoque Atheniensi, Demosthenem Demosthenis filium Pæanicum, virtutis ergò, beneuolentiæ que perpetuæ, quam erga populum Atheniensem habet, laudari, coronâque aurea donari, eius que coronæ donationem, ac prædicationem in theatro, Dionysijs, tragœdis nouis fieri. Prædicationis autem curam ad ludorum curatorem deferri.

Hæc sunt igitur quæ largitus sum, quorum nihil est, quod in iudicium vocaris: sed quæ iubet senatus mihi pro his persolui, ac tribui, hæc sunt, quæ tu reprehendis, atque insectaris. Tunc igitur cum ea, quæ dantur, accipere legitimum esse concedas, pro eisdem gratiam referre, de decretis contra leges factis persequeris? Si hominem insigniter improbum, & dijs inuisum, & germanum sycophantam ac maleuolum natura describere velimus, qualis per deos immortalis fuerit? non huiusmodi? At qui quod attinet ad prædicationem in theatro faciendam, non dico de sexcentis sexcentis hominibus illic esse prædicatum: prætermitto me ipsum ibidem sæpenumero esse corona donatum: sed per deos immortalis, ita ne stolidus, hebes, ac stupidus es, AEschinea, ut nunquã cogitare & considerare tecum ipse potueris, coronâ, vbicumq; ei prædicatio fiat, semper eandem laudem, eandemque gloriã ei, qui donetur, afferre: sed eorum, qui coronam donant, utilitatis gratia, prædicationem in theatro fieri? Omnes enim, qui vocem præconis audierunt, cum ad bene merendum de ciuitate excitantur, tunc verò eos, qui gratiam referunt, maioribus laudibus, quàm

eum, qui corona donatur, efferunt. Idcirco hanc legem tulit ciuitas, quam recita. *LEX. Quoscumque aliqua municipia, aut oppida Attica donat coronam, coronarum predicationes apud suos quaeque populos faciunt: nisi quos populus aut senatus Atheniensis corona donabit. De his autem liceat in theatro Dionysii predicare.*

Audis AEschinea legem dilucidè loquentem? *Nisi quos populus, aut senatus corona donabit. De his autem predicationem in theatro fieri fas est.* Quid igitur, infelix, calumniaris?

quid verba fingis? cur te ipsum tandem veratro non purgas? Non te pudet alterum capitis arcessere, non quòd ei crimen alicuius iniusti facinoris inferre possis, sed quòd eius laudi ac virtuti inuideas, atque obtrectes? non pudet alias leges commutare, alijs parteis detrahere, quas æquum erat totas recitari, præsertim ijs, qui se secundum leges sententiam laturos iurauerunt? Et tamen cum talia facias, quibus virtutibus virum popularem præditum esse oporteat, exponis, non aliter atque si statuam præscriptis verbis, & ex syngrapha faciendam locauisses: deinde cum tibi traderetur, esset aliter facta, quam syngrapha cautum esset: aut proinde quasi homines populares verbis, non factis, ac rebus gestis spectentur, & cognoscantur. Atque interea vociferaris, & dicenda tacenda tanquam è plastro loqueris, quæ in te, genusque tuum conueniunt, non in me: quibus iniusta vita tua est, non mea. Atqui, Athenienses, hoc ego inter accusationem, & maledictionem interesse putò, quod in accusatione crimina insint oportet, ea, quib⁹ poenæ sint legibus constitutæ: maledictio autem nihil habeat propositi, præter conuicia, & contumeliam, quæ ab inimicis inter ipsos confingi, & iaci solent. Verùm hæc iudicia maiores nostros eo consilio ædificasse arbitror, non vt vobis à refamiliari vestra abductis, atque in hunc locum coactis, maledicta inter nos dictu atque auditu foeda, ac nefaria iaceremus: sed vt si quis fortè in ciuitatem peccauerit, iniuriamque reip. fecerit, eum coarguamus, & conuincamus. Hæc cum sciret AEschines æquè atque ego, nihilominus

Iominus me maledictis insectari, quàm accusare maluit. Verumtamen ne hac quidem re æquum est eum posteriores ferre, atq; inferiorem discedere. Sed iam me ad hæc conferam, si hoc tantum ab eo quæsiuero. Vtrum te vis AEschinea, ciuitatis, an meum inimicum appellari? Meum scilicet: hoc enim gestu significas. Et tu vbi tibi licebat, siquid iniuste in Athenienses commiseram, pœnas à me legibus pro his expetere, neglexisti: in iudicijs referendarum rationum, in accusationibus de ijs, quæ contra leges scripta sunt, in alijs iudicijs: vbi verò integer & innocens eram, omni que culpa vacabam, omni ex parte, rebusque omnibus, legibus, tempore, diei præscriptione, multis iudicijs antea his de rebus factis, eò denique quòd nunquam vllius in vos peccati conuictus sum: cum ciuitas ex ijs reb⁹, quæ publicè benè gestæ sunt, necessariò aliàs plus, aliàs minus gloriæ consequatur: hinc mihi occurristi? hinc tu te mihi aduersarium obtulisti? Vide ne germanus ac verus horum sis inimicus, meus verò fictus ac simulatus. Posteaquàm igitur vobis omnibus, religiosæ ac iustæ sententiæ ferendæ via monstrata est, oportet me (vt video) tamen si me natura finxerit à maledicendi studio remotissimum, tamen propter eius in me maledicta, pro multis, & falsis criminibus, quæ in me congestis, ea quæ verissima, & maximè necessaria sunt, in istum regerere: & simul ostendere, quis, & à quibus ortus AEschines, tam fit ad alterum maledictis laceffendum procliuus ac paratus: & verba quædam mea exagitet, cum ea ipse locutus sit, quæ nemo pudens ac modestus vsurpare non magnopere vereatur, ac reformidet. Nam si AEacus, aut Rhadamanthus, aut Minos esset is, qui accusat, non clamator odiosus, ac molestus, rabula de foro, cantor formularum, perditus scriba, non arbitrator cum talia fuisse dicturum, nō tam grauiæ, & insolentia verba conquisituum & congestuum: qui tanquam in tragœdia, clamabat, O Terra, Sol, Virtus, & cetera huiusmodi: & rursus Intelligentiam, & Doctrinam, qua

res honestæ ab inhonestis internoscuntur, tragica voce implorabat. Audistis enim cùm hæc diceret, scilicet. Tibi verò, aut tuis, ô cœnum, ecqua virtutis communitas est? ecqua rerum honestarum, aut contrariarum internoscendarum nota? unde nactus, aut quomodo consecuto? Vbi tibi doctrinæ mentionem facere fas est? quam qui verè consecuti sunt, nemo tamen eorum est, qui quicquam tale audeat de se prædicare: quin etiam si quis alter de ipso prædicet, erubescat. ij verò, qui cùm ea careant, qualis es tu, præ stupore cordis tamen, & duritia animi, habere se simulant, hunc fructum ex orationis sue vanitate capiunt, quòd auditores obtundunt atque enecant, non autem talem de se apud eos opinionem consequuntur. Sed cùm mihi non desit quod de te, & de tuis dici possit ac debeat, unde potissimum dicendi initium faciam, deest. vtrum ab eo, quòd pater tu⁹ Tromes apud Elpiam, eum, qui propter ædem Thesei docebat litteras, seruiebat, crassis pedicis, & ligneis compedibus vinctus an quòd mater tua cùm diurnis nuptiis in caula, que est ad heroëm Calamitã operã daret, te pulcherrimam statuam, & summum ac præstantem tertiarum partium histrionem educabat? an quòd eam contemptus & classicus tibicen Phormio Dionis Phrearrij seruus ab hoc honestissimo quæstu excitatam abduxit? At mehercule vereor, ne, dum de te ea dico, quæ in te conueniant, quæque te deceat audire, ea mihi dicenda suscepisse videar, quæ à meis moribus abhorreant, quæque me dedecet dicere. Quamobrem hæc quidem missa faciam: ab eius autem factis & vita antea facta incipiam. Non enim vnus de multis, non fortè fortuna oblati homo, sed ex eorū numero est, quos populus execrari solet. serò enim tandem, serò, inquam, immò verò heri & nuper Atheniensis simul & orator factus est, & duabus syllabis additis, patrem, qui Tromes nominabatur, Atrometum fecit: matrem graui sanè, & honorifico nomine Glaucotheam appellauit, quam sciunt omnes Empusam antea fuisse

nominatam: tracto videlicet ex contumelia cognomine, ob id, quòd omnia & faceret & pateretur. Vnde enim potius? Ita tamen ingratus es, improbusque natura, vt, cùm liber ex seruo, diues ex paupere atque egente horum beneficio factus sis, non modò gratiam eis non habeas, sed tuis operis mercede locatis, contra hos remp. geras. Atque ea quidem, quæ in dubium & contentionem venire possunt, vtrùm sint ab isto pro ciuitatis utilitate dicta, necne, præteribo. Quæ autem sine controuersia pro reip. hostibus agere compertus est, hæc commemorabo atque exponam. Quis vestrum nescit, Antiphontem è tribu motum, atque è numero ciuium segregatum, quòd se vestra naualia incensurum promississet, in urbem venisse? quem cùm ego in Piræo delitescentem comprehendissem, & in aspectum vestrum, contionemque produxissem, improbissimus iste sycophanta clamans & vociferans me in ciuitate libera res non ferendas atque indignas facere, qui ciueis calamitosos atque afflictos contumelijs insequerer, atque vexarem, eorumque domos introirem, sine populi scito dimittendum curauit. Quòd nisi senatus Ariopagiticus re intellecta, cùm videret, vos alienissimo tempore, imprudentia, ignorantiaque labi, hominem perquisiuisset, comprehensumque ad vos reduxisset, vobis ereptus esset homo nocentissimus, & pœnis iustis ac debitis elusis, ab isto grandiloquo ostetatore dimissus. Nunc autem quaestione de eo habita cruciatum necauistis, vt item istum morte affici oportebat. Itaque cùm hæc sciret senatus Ariopagiticus, ea dico, quæ tū ab isto nefariè conmissa sunt, cùmque eum vos eodem errore, eademque ignoratione decepti, qua multa iam in rep. de manibus amisistis, auctorem & patronum templi Apollinis, quod in Delo est, suffragijs vestris creauissetis: simulatq; grauissimum illum senatum adhibuistis, ei que totius rei potestatem permisistis, istum quidem cōtinuò vt proditorem exegit atque expulit: Hyperidem autem huic causæ agendæ

præesse voluit. Atque hæc gesta sunt, cum tabellæ ex ara ferrentur: neque vlla omnino tabella isti impuro suffragata est. Quæ ut esse vera perspicere possitis, testis vobis in hanc rem locupleteis producam. Euoca testis.

TESTES. *Dicunt hi omnibus de rebus testimonium Demostheni, Callias Sunicus, Zeno Phlyeus, Cleo Phalereus, Demonicus Marathonius. Cum populus olim actore ac patronum causa pro templo Deliaeo apud Amphictyones dicenda AEschinem suffragio suo creasset, nos in consilium missi iudicauimus, Hyperidem digniorem esse, qui personam ciuitatis sustineret: atque ita missus est Hyperides.*

Cum igitur istum spe iam certa, atque opinione sua illius causam actorem senatus repudiauit, & alteri negotium dedit: tunc & proditorem, & maleuolo in vos esse animo pronuntiauit. Vnam rem habetis ab isto fortissimo viro gestam, ijs rebus, quas in me reprehendit, valde similem, nonne? Accipite nunc alteram: & memoriam vestram ad ea, quæ dicturus sum excitate. Quo tempore Philippus Pythonem Byzantium misit, atque ab omnibus socijs suis legatos vnâ cum eo mittendos curauit, tanquam ciuitatem nostram dedecore atque ignominia affecturus, & ius gentium ab ea lædi planum facturus: ego tum Pythoni insolentius se iactanti, & multitudine verborum nos perfundere atque obruere torrentis instar cogitanti, non cessi, neque pedem retuli, aut terga verti, sed surrexi, ac restiti: neque iura ciuitatis tacui, aut prodidi, sed Philippum nobis iniuriam facere vsque adeo firmis ac certis argumentis ostendi, & peruici, ut ipsi illius socij subito exurgerent, ac palam faterentur. At iste Philippi patrocinium susceperat, testimoniûmque contra patriam dicebat, idque adeo falsum: neque his fuit contentus, sed iterum postea, non longo post tempore vnâ cum Anaxino exploratore in Thrasonis adis ingrediens, & sermones conferens deprehensus est. Atqui qui cum eo, qui ab hoste missus erat, solus cum solo verfabatur, & consilia, sermonesque conferebat, iste ipse explorator erat, & hostis patriæ natura. Atque hæc ve-

ra esse ex testibus cognoscetis. Citentur testes. TESTES.

Menedemus Cleonis filius, Hyperides Callaschri, Nicomachus Diophanti, denuntiatio à Demosthene testimonio, testificantur, idque apud imperatores iuraverunt, se scire AEschinam Artometri filium Cothocidem noctu in ædis Thraſonis introiſſe, & cum Anaxino cõmunicasse, eo, qui explorator à Philippo miſſus indicatus est. Hæc testimonia dicta sunt prætorè Nicias, tertio nonis Iunius. Cùm sexcenta alia habeam, quæ de isto dicam, prætermitto. Namque ita quodammodo se res habet. Multa huius generis præterea poſſum vobis ostendere, in quibus iste per illa tempora & hostibus inferuisse, & mihi per improbiſſimam calumniã, malitiãque obstitiſſe perſpectus est. Sed neque hæc vobis digna videntur, quæ memoriæ mandetis, neque cùm auditis, pro magnitudine & gravitate facinorum satis acrem vobis iram commouët. Quin peſſimo quodam iam more cuilibet è populo poteſtatè, licentiãque permittitis eum ſupplantandi, & calumniandi, qui dicat aliquid è re veſtra, ciuitatis commoda cum ea voluptate, quæ ex maledicentiã percipitur, commutantes. Quapropter facilius ſemper & tutius est hostibus inferuentem, mercedem accipere, quàm eas parteis, quæ vobiſcum faciant, ſequètem, reimp. adminiſtrare. Atque antequàm apertè cum Philippo bellum gererem, ei ſtudiſſe, operamque dediſſe: ſceleratum ac nefarium est, ô terra, ô cælum, dijque immortales. quis neget? contra patriam? ſed tamen hoc ei date, ſi vultis, date. Verùm cùm ſpoliatæ iam & captæ naues erant, cùm Cherrhoneſus euertebatur, cùm in Atticam inuadebat Philippus, neque iam res erat dubia, ſed bellum exarſerat: nihil quicquam oſtendere poteſt maledicentiæ iſte ſycophanta, iambeorum ſcriptor, quod pro veſtris commodis geſſerit: non vllum ab AEschinea ſciturum factum eſt, neque magnum, neque paruum, quod ad reip. vtilitatem pertineat. Quòd ſi vſque eò impudens eſt, vt aliquod extare dicat, iam nunc oſtendat ſanè, meiſque horis vtatur. Sed nullum eſt. Atqui neceſſe eſt alterum è duobus

esse verum, vt aut quòd ea, quæ à me agebantur, reprehendere non posset, idcirco alia, quæ à meis discrepant, non decreuerit, ac scripserit: aut quòd hostium rationibus consulere cogitaret, ea, quæ meis cogitatis sciret esse meliora, in medium proferre noluerit. At cùm aliqua in re vobis noceri posse sperabat, tum nihilne dicebat? nihilne decernebat? Immo verò non relinquebatur alteri quicquam dicendi locus. Ac cetera quidem, quæ iste occultè fecit, poterat sanè ferre ciuitas, vt opinor. Sed vnum superioribus suis facinoribus addidit, Athenienses, cuiusmodi, quo admissio ceteris fastigium imposuit, quodque aliorum tãquam extremus actus esse videri queat: de quo longam sanè orationem consumpsit, cùm Amphissenis decreta presequeretur: quasi verò hac ratione rei veritatè inuertere, ac deprauare posset. Sed non ita est. Cur enim inuertetur à mēdacio veritas? Longe aliter est. Neque vnquam tam multa dices, vt eorum scelerum, quæ in ea re commisisti, maculas eluere possis. Sed vobis præsentibus atque audientibus, Athenienses, deos, deasque omneis appello, qui huic terræ Atticæ præsident, & Apollinem Pythium, huius ciuitatis patrium, atque auitum custodem, precórque ab ijs omnibus, vt si quidem apud vos vera dixerò, & dixi apud populum tum, cùm primùm istum impurissimùm hanc rem attingere animaduerti: (cognoui enim statim, cognoui) dent mihi salutem cum optato vitæ cursu, perpetuæque felicitate coniunctam. Sin odio priuato adductus, & contentionis studio elatus, falsum isti crimen inferam, omnium me rerum bonarum ac secundarum fructu priuent. Cur igitur hæc mihi precat? sum, aut cur tam vehemēter contendit? Quia quamuis & tabulas habeam in tabulario publico cōditas, quibus confido me hæc vobis plana facturum, & sciam vos eius actiones memoria tenere, illud tamen vereor, ne istius persona humilior ac leuior existimetur, quàm vt tanta scelera ab eo admissa esse videantur: quod antea contigit, cùm infeli-

cissimis Phocensibus causa fuit cur funditus interirent, rebus falsis huc ex legatione renuntiatis. Iste est enim, qui bellum Amphiffense excitauit, propter quod Elatream inuasit, & Amphictyonum dux ac princeps lectus est Philippus, is, qui res vniuersas Græcorum euertit, atque afflixit: iste deniq; vnus est ex omnibus, qui Græciæ calamitatum, acerbissimorumque malorum causa fuit. Et cum illo ipso temporis puncto testarer, & clamarem in contione: *Bellum in Atticam inuehis, Æschina, bellum Amphictyonicum concitas, Æschina*: alij multo antè dedita opera comparati, atque ad eam rem compositi, ac subornati, mihi dicendi potestatem non faciebant: alij mirabantur, & me ei falsum crimen propter inimicitias priuatas imponere arbitrabantur. Quæ autem harum rerum conditio, Athenienses, fuerit, quam ob causam hæ res comparatæ atq; instructæ, quomodo gestæ fuerint, nunc denique, quoniam tunc prohibiti estis, attendite. Nam hinc & rem callidè compositâ fuisse intelligetis, & simul magno vobis ea, quæ dicturus sum, ad cognitionem rerum communium erunt vsui atque adiumento: & quanta Philippi sollertia, quantum ingenij acumen fuerit, cognoscetis. Philippus quomodo se bello, quod nobiscum gerebat, explicaret, quoue pacto eius belli molestia defungeretur, nõ reperiebat, nisi Thebanos, ac Thessalos, iniquos atque infensos nostræ ciuitati redderet: quin etiam, vt cum eo infeliciter, & minus strenuè nostri pugnarent imperatores, ab ipsius belli vi tamen, & à prædonibus, maximis & innumeris detrimentis afficiebatur. Nam neque quicquam eorum, quæ terra gignebat, foras exportabatur, neque ea, quibus egebat, importabantur. Iam verò neque in mari superior vobis erat, neque in Atticam venire poterat, si neque Thessali eum sequerentur, neque Thebani per suos fines ei aditum patefacerent. In eum autem locum rationes eius erant deductæ, vt quamuis proelium secundum faceret, superiorq; è bello discederet, qualescunque imperatores mittere-

tis (hoc enim nihil ad ea, quæ nunc agimus, pertinet) ipsa
 tamen loci, rerumque, quæ vtrisque suppetebant, natura,
 maximis incommodis conflictaretur. Quod si vel
 Theſſalis, vel Thebanis perſuadere conaretur, vt priuatarum
 ipſius inimicitiarum cauſa vobis bellum inferret, eorum
 neminem auditurum putabat: ſin communibus illorum cauſis
 ſuſceptis efficeret, vt ad ſe belli principatus deferretur,
 facilius ſe partim fallendo, partim perſuadendo, id, quod
 optaret, conſecuturum ſperabat. Quid igitur molitur? videte
 quàm callidè atque aſtutè. Bellum aduerſus Amphictyones
 conſtare, tumultumque apud conſeſſum illum Pylæum concitare.
 Exiſtimabat enim, eos ſtatim ad has res auxiliũ ſuum deſideraturos.
 Siquis autem vel ex conſilii Amphictyonici ſcribis, (hieronymonas
 appellam⁹) quos ipſe mitteret, vel ex eius ſocijs, hoc bellum
 ſuaſiſſet, Thebanis ac Theſſalis rem ſuſpectam futuram,
 omneſque ſibi diligenter cauturos arbitrabatur: ſin huius
 belli auctor ac ſuaſor, Athenienſis atque à vobis aduerſarijs
 profectus eſſet, ſe ſe nullo negotio conſilia ſua teſta
 habiturum: quod ita euēnit. Quoniam igitur modo hæc
 aſſecutus eſt? nimirum iſtum conſucit. Deinde cum hac
 de re nemo, opinor, vel tenuiſſimam antea auditionem
 accepiffet, nemo proſpiceret, nemo cauere: iſte, quemadmodum
 talia apud vos fieri conſueuerunt, pylagoras nominatus,
 tribus aut quattuor ſuffragium ferentibus, renuntiatus
 ac declaratus eſt. Ac cum primùm ciuitatis dignitate atque
 auctoritate fret⁹, ad Amphictyonas peruēnit, rebus alijs
 omnibus ſpreatis ac prætermiſiſis, ad ea conſcienda omni
 cura & ſtudio incumberebat, propter quæ conſuectus
 erat. Ita verbis in ſpeciem honeſtis, ſermonibusque
 fabuloſis adornatis, comparatis atque expoſitis,
 homines rerum ac verborum imperitos, incautos, &
 quid eſſet futurum minimè prouidentis, ad
 decernendum adducit, vt totam illam regionem
 obiret ac perluſtrarent, quam Amphiffenſes, vt
 ſuam, à ſe arari atque obſeri fatebantur: iſte ad terram

ram sacram pertinere arguebat, cum Locri neque ullam nobis multam irrogarent, neque ea, quæ iste suo sceleri prætexit, multum à veritate diffuncta, cogitarent. Quòd ita esse, hinc cognoscere potestis. Non licebat Locris, nisi iudicio nobis denūtiato, vllā nostræ ciuitati multam irrogare. Quis vos igitur reos citauit? cuius imperij aut magistratus auctoritate? cedò hominem qui sciat: ostende. At non potes, sed tota illa causa abs te temere & falso conficta est. Cùm igitur Amphictyones istius hortatu, agros illos obijissent, Locri impetu facto, omncis pæne iaculis confixerunt: nonnullos etiam hieromnemes comprehēderunt, & discerpserunt. Atque vt semel ex his simultates, atque offensiones ortæ, bellumque aduersus Amphissenseis natum est: primùm Cottyphus Amphictyonum exercitui præfectus est: deinde cùm alij non venirent, alij venissent quidem, sed nullam operam nauarent, Pylæo consilio, eo, quod proximè cōsecutum est, nonnulli partim ex Thessalis ad eam rem compositi, & iam pridem improbi, partim ex alijs ciuitatibus causas probabileis, & speciosas nacti, totam rem ad Philippum detulerunt. dicebant enim aut ipsos pecuniam conferre oportere, externosque milites alere, & qui hæc recusarent, multare: aut illum belli ducem esse deligendum. Quid multa? factum est, vt huius belli principatus ad Philippum deferretur. Ille autem postea breui tempore exercitu comparato, cùm per simulationem belli Cirrhæo campo inferendi aduenisset, Cirrhæis & Locris longum valere iussis, Elatéam occupat. Quòd si non statim consilium mutassent Thebani, sese que nobiscū maturè coniunxissent, totius huius belli impetus veluti torrens quidam in ciuitatem nostram irruisset. Nunc autem illi confestim eius conatum represserūt: maximè quidem, Athenienses, dei alicuius benignitate erga vos & bencuolentia: secundo loco, quantum vnus hominis virtus præstare potest, mea opera. Cedò mihi hæc decreta, & tempora, quibus vnum quicque gestum est, vt sciatis quot &

quantis turbis impurissimum caput excitatis, pœnas tamen nondum perfoluerit. Recita decreta. **DECRETVM AMPHICTYONVM.** Sacerdote Clinagora, Pylæo concilio verno, pylagora, Amphictyonumque cōsiliarij decreuerunt: Quoniam Amphissenses in agrum sacrum ingrediuntur, eū colunt, cōserunt, pecore immisso depascūt, vt pylagora, & cōsiliarij eō se conferāt, terminos cippis & columnis distinguant, & Amphissensibus in posterum tempus eius agri aditu interdicanť. **ALTERVM DECRETVM.** Sacerdote Clinagora, concilio Pylæo verno, pylagora, & Amphictyonum cōsiliarij, & commune Amphictyonum, ita censuerūt: Quoniam Amphissenses agrum sacrum à se occupatum, viriūque possessum ac diuisum arant, & pecore immisso depascunt: & cū hoc facere vetarentur; manufacta, & armatis hominibus, commune Græcorum cōsiliū vi propulsarūt, nonnullos etiam vulnerarunt: placere vt Cottyphus Arcas Amphictyonum delectus imperator ad Philippum Macedonem legatus proficiscatur, ab eoque petat, vt Apollini, & Amphictyonibus opem, auxiliūque ferat, nec sinat ab impijs Amphissensibus deum nefariē violari, iniuriāque affici: postremò doceat, idcirco eum imperatorem summa potestate præditum à Græcis constitui omnibus, qui cōsiliū Amphictyonici sunt participes. Recita verò & tempora, quibus hæc gesta sunt, ea enim ipsa sunt. quibus iste fuit pylagoras. **TEMPORA.** Mnesithida prætorē, decimo sexto Kal. decembris: Cedò mihi etiam epistolam Philippi, quam cū ei iam non obtemperarent Thebani, ad focios, qui sunt in Peloponneso misit, vt ex hac quoque intelligatis & illum veram rerum susceptarum causam, nempe se hæc contra Græciam, contra Thebanos, contra vos ipsos agere ac moliri, occultasse, & res ad communem Græcorū vtilitatem pertinentē, atque ab Amphictyonibus decretas facere se simulasse, & istum has ei rerum gerendarum opportunitates, & facultates, & causas subministrasse. Recita. **EPISTOLA PHILIPPI.**

Rex Macedonum Philippus Peloponnesiorum, eorum, qui communi societatis vinculo & fœdere continentur, magistratibus, & cōsiliarijs, reliquisque socijs omnibus S. D. Quoniam Locri Ozole,

la, qui nominantur, Amphiffæ habitantes, in templum Apollinis Delphicum nefaria scelera committunt, sacram terram vi & armis populantur, diripiunt, ac spoliant, habeo in animo vobiscum deo subuenire, atque opitulari: eosque, qui aliquid religione apud homines consecratum violare audent, armis persequi, atque vlcisci. Quapropter facite, ut mihi cum armis ad Phocidem occurratis, ibique præsto mihi sitis cōmeatus, & re frumentaria in dies quadraginta instructi, mense proximo sextili, aut, ut nos utimur, Loo: ut Athenienses, Boëdromione: ut Corinthij, Pánemo. Eorum igitur, qui non manufacta, & multitudine armata, se tamen nobis adiunxerint, consilio utemur: qui verò ab hac societate refugerint, eos malè multabimus. Valet. Videte ut veras huius incepti causas dissimulet atque occultet, & ad Amphictyonicas confugiat, in eisque delitescat. Quis igitur ei fuit harum rerum administer atque adiutor? quis has ei causas & latebras præbuit? quis malorū, quæ acciderunt, maximè architectus? quis auctor? quis caput? non iste est? Nolite igitur, Athenienses, inter deambulandum dicere, Græciam ab vno homine his calamitatibus affectam esse. non ab vno, sed à multis & improbis, quos habent singulæ Græciæ ciuitates: ò terra, ò dii immortales: in quorum iste numero est: quem, si me nulla re deterritum verum dicere oportet, non dubitem communem omnium, quæ postea perierunt, labem, perniciem, ac procellam nominare; hominum, locorum, ciuitatum. Nam ut in feminibus causa inest arborū & stirpium, sic tu, qui horum omnium malorum, quæ orta sunt, semen præbuidisti, eorum causa meritò dici debes: quem statim ut aspexistis, quo tandem pacto, ò ferrei, non auersati, atque aspernati fueritis, equidem demiror. Sed immensæ quædam scilicet, densæque tenebræ vobis veritatis lucem obscurant. Factum igitur est nunc denique, ut, dum eas res tracto, quas iste contra patriam gessit, ad meas tandem in rep. administranda actiones peruenerim, in quibus ego istorum consilijs restiti: quas cum multis de causis meritò ex me audietis, tū ob eam causam maximè, quod turpe est, Athe-

nienſes, quarum ego actiõnum, rerũque geſtarum laborem pro vobis ſubierim ac pertulerim, earum vos ne verba quidem æquis auribus, atque attentis animis audire. Cũ igitur viderem, Thebanos, ac p̄ne dicã, vos ipſos, Athenienſes, eorum conſilijs, atque inſidijs, qui Philippi rationibus conſulebant, quiq̄ apud vtroſque pretio corrupti erant: quod erat & vobis & illis pertimeſcendum, ac magnopere providendum & cauendum, ne Philippum creſcere ſineretis, id negligere, nullãque in re vobis præcauere: ad mutuas autem inimicitias, ad offenſiones ac diſcordias procliueis promptos ac paratos eſſe: ego aſiduè in ſpeculis eram, & id ne accideret, providebam, non quòd meo ſolũ ingenio, & conſilio fretus hæc nobis conducere putarem, ſed quia ſciebam Ariſtophontem, & item Eubulum, ſemper hanc inter vos concordiam, atque amicitiam conciliare & conſtituere ſtudiſſe: & cũ alijs in rebus inter ſe ſæpenumero diſſentirent, & concertarent, in hac vnum & idem ſemper ſenſiſſe: quos tu viuos, ô bellua, officij cauſa deducebas & affectabaris, quos ſumma obſeruãtia colebas, quibus aſſentabaris: mortuos non te pudet accuſare. Nam quæ mihi de Thebanis crimini das, in ijs multo magis illos, qui hanc ſocietatem ante me approbarunt, quàm me, reprehendis & accuſas. Verũ ad illa reuertor, de quibus dicere cœperam. Cũ igitur iſte quidem bellum Amphiſſenſe excitafſet, alij autem eius adiutores Thebanos à vobis alienaſſent, accidit, vt Philippus bellum nobis inferret: cuius rei gratia iſti ciuitates inter ſe mutuis offenſionibus exaſperabant. quod niſi paullo priores experrecti eſſemus, ne colligendi quidem noſtri, aut respirandi data nobis facultas eſſet: ad cò longè iſtorum ſtudio atque opera res proceſſerat. Quo animo autem tum inter vos affecti eſſetis, ex his decretis, Philippique reſponſis cognofcetis: quæ mihi recita.

DECRETA. *Heropytho pratore, ſeptimo Kal. Martias, tribu Erechthẽde ſummam rerum poteſtatem obtinente, de ſenatus, imperatorũque ſententia:*

sententia: Quoniam Philippus finitimas vrbeis alias occupauit, alias delet atque euerit: denique omnino in Atticam inuadere parat, fœdera inter nos percussa pro nihilo putans: iusurandumque vtrunque interpositum, & pacem factam infirmare instituit, fidem datam, acceptamque negligens: placuit senatui, populôque Atheniensi, vt ad eum legati mittantur, qui cum eo agant, orent que, maximè, vt concordiam mutuam, pactionesque nobiscum factas tueatur, atque obseruet: secundo loco si hoc nobis minus cœcedendum esse existimet, deliberandi tempus & spatium det ciuitati, indutiâsque nobiscum vsque ad mensem Aprilem faciat. Lecti sunt è senatu Simus Anagyraeus, Euthydemus Phlysius, Bulagoras Alopecensis. AL-
 TERVM DECRETVM. Prætor Heropytho, pridie Kal. Aprilis, de eius, qui rei militari præest, sententia: Quoniam Philippus Thebanos à nobis alienare conatur, & cum vniuerso exercitu in loca Attica maximè vicina irrumperere parat, fœdera inter nos icta negligens, decreuit senatus, populûsque Atheniensis iussit, vt ad eum caduceator & legati mittantur, qui ab eo postulent, eumque hortentur, vt nobiscum indutias faciat, quo populus, quo ad eius fieri poterit, pro re nata, deliberet, & statuatur, quid sibi agendum sit. Nam nunc quidem non censuit, ne mediocre quidem auxilium esse mittendû. Lecti sunt è senatu, Nearchus Sofinomi fil. Polycrates Epiphronis fil. fetialis Eunomus Anaphlystius priuatus & de plebe. Recitata verò & Philippi responsa. RESPONSVM PHILIPPI ATHENIENSIBVS DATVM. Rex Macedonum Philippus senatui, populôque Atheniensi S. D. Qua ab initio fueritis erga me voluntate, quantôque studio elaboraueritis, vt Thessalos, Thebanos, atque etiam Bœotos alliceretis, non ignoro. Verùm cùm cepissent illi consilia cautiora, & saniora, neque iudicium ac voluntatem suam vestræ potestati iradere, aut summittere voluissent: sed sese ad partis vtiliores applicuissent, vos nunc sententia mutata, missis ad me legatis ac fetialibus, facitis mihi de fœderibus mentionem, à mēque, vt ego indutias vobiscum pacificas, petitis, nulla prorsus in re à nobis iniuste læsi. Ego igitur, vestris legatis auditis, assentior vestris postulatis, indutiâsque vobiscum facere paratus sum, ea lege si eos, qui vobis minus recta consilia dederunt, è ciuium numero eiciendos atque ignominia afficiendos curaueritis. Valete.

EIVSDEM RESPONSVM THEBANIS DATVM. *Rex Macedonũ Philippus, senatui, populoque Thebano S. D. Epistolã vestrã accepi, qua mihi concordiam nostram, pacẽmque inter nos constitutã renouatus, Audio porrò Athenienses omnia erga vos studia vobis deferre, ac polliceri, eo consilio, vt ea, quæ à vobis postularunt, approbetis. Atque equidem antea existimabam fore, vt spem vobis ab illis ostentatam, eorũque institutum ac voluntatem sequeremini. Nunc verò posteaquã cognoui, vos pacem mecum colere ac tueri, quã aliorum consilijs & sententijs morem gerere maluisse, magnopere lætatus sum: immò verò cùm multis nominibus vobis gratulor, iũ ob id maximè vos laudo, quòd & melius vobis consulistis, & vestram erga me benevolentia declarastis. Quam quidem rem spero vobis magno adiumento ad omnia futuram, si modò in hac sententia maneatis. Valete. Cùm ciuitates his artibus ac rationibus inter se sic affecisset Philippus, his decretis & responsis elatus, venit cum exercitu, Elateãque occupauit, proinde quasi siquid rerum nouarum moliretur, ne tum quidem vos & Thebani consensuri essetis. Quamuis autem qui tum in vrbe motus ac tumultus fuerit excitatus, meministis: vos tamen, dum ea, quæ huic causæ coniuncta ac necessaria sunt, expono, quæso diligenter attendite. Cùm iam vesper esset, venit quidam ad ciuitatis moderatores, qui nuntiaret Elateã esse occupatam. Ibi continuò alij, his inter cenandum auditis, surrexerunt, opifices ex tabernis, quæ in foro sunt, exturbauerunt, pelleis & tabernacula viminibus obducta incendunt: alij, imperatores arcessiebant, & tubicinem euocabant: vrbs denique plena turbarum, plena clamoris ac strepitus, plena tumultus erat. Postridie hora diei prima, ciuitatis moderatores, senatum in curiam vocabãt. Vos in contionem concurrebatis, & prius quã quicquam in senatu actum, vllũque senatusconsultum factum esset, populus vniuersus in locis superioribus confederat. Deinde statim vt senatus in contionem venit, exposuerũt ciuitatis moderatores ea, quæ ad se delata essent, eũmque, qui venerat, produxerunt: qui cùm ea, quæ audistis,*

distis, locutus esset: interrogabat præco, quis verba facere vellet. nemo prodibat. Cùm iterum ac sæpius illud idem interrogaret præco, nihilo magis quisquam ad dicendum surgebat, cùm adessent omnes imperatores, omnésque oratores: cùm denique communis patriæ vox audiretur, quæ aliquem, qui pro communi salute diceret, euocabat, atque inuitabat. Nam, quam vocem præco ex legum præscripto mittit, hæc communis patriæ vox haberi debet. Atqui si eos, qui ciuitatē saluam esse volebant, in medium prodire, atque in suggestum ascendere oportebat, vos omnes, & ceteri Athenienses surrexissetis, atque in contionem ascendissetis: omnes enim, sat scio, cōseruari volebatis: si locupletissimos, trecenti viri, qui censu reliquis ciuibus antecellunt: si eos, quibus vtrunque suppetit, & optimus in remp. animus, & res familiaris ampla & lauta, eos, qui postea eximiam liberalitatem & munificentiam in populum cōtulerunt. Nam & beneuolentia adducti, & diuitijs freti, munifici fuerunt & liberales. Verùm, vt appâret, tempus illud, atque ille dies non virum in ciuitatem beneuolum & diuitem tantùm requirebat, sed eum, qui ab initio ita se comparasset, vt rerum ordinem ac progressum vsu doctus, animo penitus comprehensum haberet, & apud se rationibus omnib⁹ subductis cogitatione explicasset, quid sibi vellet, quid spectaret, quam ob rem hæc ageret Philippus. Nam qui hæc nesciret, neque ea diligenter expendisset, quantumuis esset reip. beneuolus atque amicus, quantumuis locuples & pecuniosus, nihilo magis tamen quid faciendum esset, sciret, aut, vt sciret, consilij vobis dandi facultatem haberet. Ego igitur illo die is exortus sum, quem patrie salus requirebat: ego surrexi, & in contionem ascendi, eaque apud vos locutus sum, quæ nunc peto à vobis, duabus de causis vt diligenter, & erectis animis ex me audiatis: primùm vt intelligatis, me vnum ex ijs, qui contionari solent, quiq̃ue in rep. versantur, beneuolentiæ erga patriam præsidium & lo-

cum, in asperis ac formidolosis reip. temporibus non reliquisset, sed in ipso discrimine, atque in ipsis rebus aduersis ea perspectum esse tum dicere, tum decernere, quæ tempora reip. postulabāt. deinde quia breui tempore in his audiendis cōsumto maiorē totius reip. status cognitionem cōsecuturi estis. Dixi igitur tū, eos, qui sic trepidarent ac tumultuarentur, quasi Thebani essent amici Philippo, totius rerum præsentium status ignaros mihi videri. Nam si ita esset, inquam, non iam eum Elatææ, sed in nostris finibus esse audirem: venisse autem illū certò scio, ut ea, quæ iam pridem molitur in Thebanos, composita, parata, atque expedita habeat. Atque, ut intelligatis quomodo hæc se habeant, diligenter attendite. Quotquot illic ex Thebanis vel pecunia inducere, vel dolis capere potuit, omneis habet sibi pulchrè instructos ac paratos. Eos autem, qui & ab initio sibi restiterunt, & nunc etiam aduersantur, nulla ratione ut sibi obtemperent, flectere potest. Quid igitur sibi vult? aut cur Elatæam occupauit? copijs suis proximè illorum urbem ostentatis, armisq̄ue in eorum conspectu positis & constitutis, cogitat amicis quidem animos augere, eosq̄ue erigere, & spe optima cōfirmare: aduersarios autem perterrere, ut vel metu perculsi, vel vi ac necessitate coacti, ea concedant quæ nunc renuunt ac pernegant. Si nos igitur hoc tempore statutum in animis habebimus, siquid forte à Thebanis grauius ac durius in nos antea commissum est, id meminisse, illisq̄ue diffidere, illos deniq; in hostium numero ac loco ducere: primùm ea ipsa, quæ Philippus audissimè expetit, ac vehementer exoptat, faciemus: deinde vereor, ne cū eum in amicitiam receperint ij, qui nunc ei aduersantur, atq; ita vno animo omnes cum Philippo fecerint, ac steterint, utriq̄ue iunctis copijs in Atticam inuadant. Quare si consilium meum atque auctoritatem secuti fueritis, siq̄ue ad prudenter ac sapienter cogitandum, non ad contendendum his de rebus, de quibus nunc differo, omni studio, curaque

que incubueritis, spero me & opinionem fidelis ac prudentis monitoris apud vos consecuturum, & periculum, quod impendet ciuitati, depulsurum. Quid igitur dico? Primùm vos à metu, in quo nunc versamur, liberos ac solutos esse oportere: deinde illum ipsum metum aliò deriuare, & omneis Thebanis timere: (multo enim propius absunt à malis: periculòque, quod Græcis imminet, maximè sunt omnium propinqui.) deinde & vos, qui per artem arma ferre potestis, & vos equites Eleusinem instructa acie profectos, Græcis omnibus ostendere, vos in armis esse, vt ij, qui Thebis vobiscum & sentiunt, & faciunt, æquè vt vobis, liceat de communi Græcorum iure liberè sentire, & liberè loqui, cùm exploratum habuerint, quemadmodum ij, qui patriam Philippo vendiderunt, habent copias Elatææ instructas ac paratas, auxilio sibi, vbi opus erit, futuras: ita ijs, qui pro libertate decertare volunt, vos præstò esse, alacris, promptos, ac paratos, præsidioque eis futuros, si quis eos bello lacessat. Deinde decem legatos suffragijs creandos esse censeo, atque his pariter cum imperatoribus summam potestatem permittendam & statuendi, quo tempore milites illuc proficisci debeant, & exercitus sub signis educendi. Posteaquàm verò legati Thebas peruenerint, quònam modo hanc rem tractandam & administrandam censeam, quæso diligenter attendite. Nihil quicquam à Thebanis supplices petite, nihil eos rogate. turpe enim tempus est. sed vos auxiliù eis laturos, si vti velint, promittite, tanquàm illi quidem summo in discrimine versentur: nos autem acrioribus oculis, quàm illi, rerum euentum prospiciamus, vt, si quidem hæc approbent, nobis que assentiantur, primùm lætemur nos ea, quæ volumus, esse consecutos, & ex sententia res esse administratas: deinde in his rebus agendis, antiquam nostræ ciuitatis dignitatem & amplitudinem retineamus: sin nihil profecerimus, illi quidem seipsi accusent, & de se querantur, siquid nunc titubarint, atque offenderint: à no-

bis autem nihil turpe, nihilque humile admissum esse gaudeamus. Hæc & quædam alia his similia cum dixissem, descendi. quæ cum essent ab omnibus comprobata, nemoque quicquam contrà dixisset, non & ea dixi, & non decreui: neque verò decreui, & non legatione obij: neque legatione obita, Thebanis non persuasi: sed à principio progressus rem totam gradatim ac singillatim ad exitum perduxì, meque planè totum in periculis & difficillimus reip. temporib⁹ vobis patefeci, obtuli, ac permisi. Cedò mihi decretum, quod tum factum est. At quì quem te vis AEschina, quem meipsum fuisse illo die faciam? An me quidem, quem tu maledicti & contumeliæ causâ appellaueris, Batalum fuisse vis: te autem non fortè fortuna oblatum heroa, sed aliquem ex his de scena Cresphontem, aut Creontem, aut, quem tu olim in Colytto cum eum malus malè ageres, obtriuisti Oenomaum? Tunc igitur, illo, inquam, tempore, ego ille Batalus Pæanieus, te Oenomaio Cothocida melior, & laudabilior patriæ ciuis extiti. Nam tu quidem nulla ex parte vsquã utilis eras ciuitati: ego autem omnia optimo atque vtilissimo ciue digna & præstabam, & gerebam. Recita decretum.

DECRETVM DEMOSTHENIS. *Nausicle prætor, tribu A Eantide summam rerum potestatem obtinente, decimo sexto Kal. Iunias, Demosthenes Demosthenis filius Pæanieus verba fecit: Quoniam Philippus Rex Macedorum cum superioribus temporibus pacis fœdera, quæ cum eo populus Atheniensis percussit, apertè neglexisse, iusurandum, iuræque omnia, quæ apud omnes per æquè Græcos sancta sunt, despexisse, ac pro nihilo putasse: Vrbeis, in quibus nihil omnino iuris habet, interceptisse, ac sibi vendicasse: nonnullas, quæ sunt Atheniensium, vi & armis cepisse reperitur, nullas acceptas à populo Atheniensi iniuria: tum hoc tempore vi & crudelitate longius in dies progreditur: nam ex Græciæ Urbibus alias præsidijs deuincit, & liberorum populorum statum reip. labefacit, alias in seruitutem redigit, & diruit: in alijs colonos barbaros, Græcis eiectis, collocat, sacrorum ac sepulcrorum vsu sum eis impertiens, nihil alienum neque patria, neque ingenio suo faciès,*

rebus secundis intemperanter & immoderatè perfruens atque ex-
 sultans: denique oblītus se ex humili & contempto Macedone ma-
 gnum imperatō factum esse: quādiu enim populus Atheniensis vi-
 debat eum Vrbeis barbaras, quasi peculiareis ac propriis intercipe-
 re, leuius id esse & tolerabilius arbitratur, cum ipse in se pecca-
 ret: nūc autem cum cernat oculos, Vrbeis Græciæ partim ignominia
 affici, partim deleri, ac funditus euerri: & graue, & maiorum suorū
 gloria indignum esse putat, se conuēte ac patiente Græcos opprimi
 atque in seruitutē abduci: Propter huc igitur causas, decreuit senatus,
 populūque Atheniensis, vt ciues deos immortaleis, atque herōas,
 huius Vrbeis, solique Attici custodes ac præsidēs comprecati, sacrifici-
 cūque sollennib⁹ ritē factis, & maiorum nostrorum virtutem ani-
 mis agitantēs, memoriāque repetentes, quibus multo optabilius erat,
 Græcorum libertatem, quā patriam suam, conseruare, ducentas
 nauēis in mare deducant, nauarchus ad Thermopylas nauiget, im-
 perator & magister equitum pedestreis & equestris copias Eleusi-
 nem educat: ad ceteros Græcos præterea legati mittantur, sed om-
 nium primū ad Thebanos, quia Philippus in eorum finēis maximè
 imminet: qui legati eos hortentur, & orent, vt nullo Philippi metu
 territi, tueantur, ac retineant suam, aliorūque Græcorum liberta-
 tem: polliceantur, & confirment, populū Atheniensem, præterit a-
 rum iniuriarum memoria deposita, & siquid fortè antea hæc duæ ci-
 uitates durius inter se fecerunt, oblītum opem, auxiliūque eis la-
 turum copijs, pecuniā, telis, armis, præclarè intelligentem, ipsos inter
 se Græcos de imperio ac principatu decertare honestum esse: sed ex-
 teri hominis & alienigenæ dominatum subire ac perpeti, principa-
 tūque ab eo stoliari, hoc verò & Græcorum gloria, & maiorum
 suorum virtute esse indignum. Præterea populū Atheniensem
 non arbitrari Thebanos neque cognatione generis, neque gentis con-
 iunctione à se alienos esse. Recordari verò & maiorū suorum ma-
 gna in Thebanorum maiores & proauos merita ac beneficia. Her-
 culis enim liberos, qui à Peloponnesus imperio paterno spoliaban-
 tur, is, qui cum illis acie instructa prælium committere ausi fuerant,
 bello superatis, in possessionem imperij restituisse: nos etiā Oedi-
 pum, eiūque socios è patria eiectos excepisse, aliāque multa nostræ
 erga Thebanos humanitatis & benignitatis gloriosa monumenta

extare: Itaque ne nunc quidem populum Atheniensem à suo pristino more, Thebanis, reliquisque Græcis consulendi & commodandi destitutum. Postremo pacem cum ijs faciant, societatem ineant, ius eis connubij tribuant, dent insurandum, vicissimque accipiant. Legati Demosthenes Demosthenis filius Paanius, Hyperides Cleandri fil. Sphettius, Mnesithides Anthiphanis fil. Phrearrus, Democrates Sophili fil. Phlyeus, Callæschrus Diotimi fil. Cothocida.

Hoc rerum Thebanarum principium, hic primus status fuit. Antea enim ciuitates omnes istorum opera nobis erant infensæ atque inimicæ, antea dissidebant. Hoc decretum, illud, quod tum ciuitati periculum impendebat, tanquam nimbum aut procellam depulit, atque auertit. Erat igitur boni ciuis ac iusti, siquid his melius haberet, tunc omnibus ostendere ac declarare, non nunc maledictis insequi ac reprehendere. Sua for enim, siue consiliarius, & sycophanta cum omnibus in rebus valde sint inter se dissimiles, tum in hac plurimum discrepât, quod ille qua de re agitur, ea de re quid sentiat, ante rerum euentum exponit ac pronuntiat, simulque se ipse reum de rationibus referendis offert ijs, qui eius consilium secuti sint, fortunæ, temporibus, cuius denique, qui ab eo rationem repetere voluerit. hic verò cum eo tempore tacuerit, quo tempore eum maximè verba facere oportebat, siquid durius ac tristius acciderit, hoc per improbissimam calumniam insectatur, carpit, ac lacerat. Quare, quod dicere cœperam, tempus illud virum de patria magnopere laborantem, sollicitum, atque animo excubantem requirebat: tempus illud iustas ac veras pro rep. voces desiderabat. At ego quò descendâ, quòue progrediar, videte. si quis docere potest, melius aliquod tum consilium, ac rectius potuisse ciuitati dari, atque adeò siquid omnino aliud suaderi potuit, præterquàm quod ego suadendum esse iudicavi, me grauius peccasse fateor. Nam siquid est, quod nunc quisquam profuturum fuisse, si tunc à vobis actum esset, dispexit: id me ignorare non debuissè concedo: sin neque est, neque fuit quicquam, neque quis-

quisquam ne hodie quidem melius afferre potest, quid eum, qui consilium dabat, facere oportebat? nō eorum, quæ in promptu erant, quæque facultatem habere videbantur, optima sumere ac deligere? Hoc igitur feci, interrogate præcone, AEschinas, *Quis verba facere vult?* non, *Quis de præteritis accusare,* neque, *Quis de rebus futuris sponsor esse vellet?* At cum tu temporibus illis mutus & elinguis in contionibus sederes, ego in medium procedebam, & ea de re, quæ proponebatur, orationem habebam. Verum quando quidem tunc siluisti, at nunc certè loquere: ostende, quæ oratio, quam me excogitare atque explicare conuenerit: quæ temporis opportunità reip. utilis: quæ societas, quæ actio, ad quam potius hos cohortari, atque impellere debuerim, à me fuerit prætermissa. At qui præterita semper apud omnes homines negliguntur, neque ea quisquam vsquam ad deliberandum proponit. Præsentia autem & futura, suaforis parteis, munusque postulant. Tum igitur rerum incommodarum, atque aduersarum, aliæ imminebant, atque instabant, (vt erat opinio) aliæ iam iam aderant & vrgebant: in quibus meam administrandæ reip. rationem, meaque consilia specta, non euenta calumniare. Omnium enim rerum exitus talis esse solet, qualem esse fortuna voluerit. Consilium autem ipsum, suaforis & consiliarij mentem indicat ac declarat. *Quare* ne sit hoc meum crimen, ne mihi hanc culpam attribue, si Philippus in acie victor potius est. nam prælij euentus atque exitus in deo, non in me positus erat. sed me aut nō omnia, quæ humano consilio prouideri potuerunt, prouidisse ac secutum esse, neque recte, neque diligenter, neque vigilanter, & laboriose, ac pæne dicam, supra quàm meæ vires possent, egisse: aut res minus honestas, ac ciuitate indignas, minimèque necessarias instituisse: hæc mihi ostendito, & iam tunc sanè me accusato, ac reprehendito. Nunc verò si fulminis cuiusdam, aut procellæ, aut tempestatis illius, quæ tum coorta est, tanta vis fuit, vt non vos solum, verum etiam

reliquos omnes Græcos perculerit atq; afflixerit, quid facto opus est? egone accusandus sum? ut si quis nauicularium, qui ea omnia, quæ ad vectorum salutem pertinerent, adhibuisset, nauemq; rebus omnibus, quibus eam feruari posse confideret, instruxisset, graui postea tempestate iactatum, armamentis nauis comminutis & collisis, aut etiam prorsus contritis ac perfractis, naufragij crimine in iudicium vocet. At ego nauem non gubernabam, dixerit ille, quemadmodum, neque ego exercitum ducebam, neq; fortunam in mea potestate habebam: sed illa contra rerum omnium erat domina. Verum illud mihi vide & considera. Si nobis, etiam Thebanis nobiscum in acie stantibus, iunctisque amborum copijs, ita rem gerere, quomodo gessimus, erat fatale, quid expectare, aut quid sperare deberemus, si hos socios non haberemus, sed ij sese cum Philippo cõiunxissent: quod ut assequeretur, omnia faciebat, omnia loquebatur, omneisque voces mittebat? Et si nunc proelio tridui itinere ab Attica cõmisso, tãto in periculo fuit ciuitas, tãtoq; timore perculsa est, quid si qua in parte soli Attici eadem calamitas accidisset, euenturum nobis esse sperandum esset? putatis nos nunc standi, congregandi, respirandi denique facultatem habituros fuisse? Multas nobis dies vnus, & alter, & tres expediendæ salutis vias ac rationes dederunt. Neque verò ea me commemorare attinet, quæ tunc nostra ciuitas, dei alicuius erga nos benevolentia ac benignitate vsa, huiusque societatis, quam tu maledictis infestaris, præsidio munita, & veluti propugnaculo defensa, ne experta quidem est. Sed vos admonitos velim, iudices, tam longam hac de re disputationem ad vos haberi, & ad ceteros, qui audiunt, qui que hoc iudicium foris circumstant. Nam ad istum ipsum contemptissimum & contaminatissimum hominem breuis & aperta oratio satis erat longa. Si enim tibi vni ex alijs omnibus, AEschines, futura, explorata erant & cognita, cum de his consultabat ciuitas, tum ea te prædicere oportebat. Sin erant tibi

tibi quoque incerta & incognita : eiusdem tu, atque alij ignoratiæ iudicium subire, rationemque referre debes. Cur igitur de his tu me potius reprehendis atque accusas, quàm ego te? ego enim ciuis tanto melior, quàm tu, fui, in his ipsis, quæ dico, (de ceteris enim nondum disputo) quòd ego in ijs, quæ omnium sententia ac iudicio è rep. esse videbantur, vtrò ciuitati mei copiam feci, vtrò me ad omnia obtuli, nullum periculù priuatum perhorui, nullius aduersi casus rationem habui. Tu verò, neque alia dixisti his meliora (non enim hi meam auctoritatem secuti, neque meis consilijs vsi essent) neque reipsum ad hæc vlla ex parte vtilè præbuiti: sed, quod nequissimus & malevolentissimus quisque in ciuitatem fecisset, hoc tu post rerum euentum facere reperiris. Et vno tempore Aristratus in Naxo, Aristolaus in Thaso, homines, vt semel dicam, infestissimi atque inimicissimi huic ciuitati, Athenensium amicos in iudicium vocant, & Athenis AEschines Demosthenem accusat. At qui is, qui apud se Græcorum calamitates ad laudem & gloriam reconditas seruabat, perire potius & morte affici, quàm alterum accusare debet. & cui eadem, quæ reip. hostibus, tempora profuerunt, fieri non potest, vt ei patria sit cara. Denique quo sis in ciuitatem animo, tu ex ea vita, quam viuis: ex ijs, quæ facis: ex ijs rebus, quas geris, & quas non geris, ostendis ac declaras. Bene rem vestram geritis, & aliquid vobis ex sententia procedit? mutus est AEschines. refluuit vobis atque aduersata est vsquam fortuna, & aliquid, quod opus non erat, vobis accidit? præstò est AEschines, vt rupta & conuulsa vbi corpus morbo aliquo fuerit affectum, commouentur, & acrem dolorem præbent. Et quoniam euenta crebrò exagitat & insectatur, libet mihi quiddam dicere, quod à cõmuni omnium opinione fortassis abhorrere videatur. Nequis autem miretur, obsecro vos per deos immortales, me ita rem amplificare verbis, & orationem propemodum supra fidem augere, sed beneuolo animo ea, quæ dico, audiat,

& audita cōsideret. Si futura antè quàm euenissent, explorata omnibus fuissent: si ea omnes præsciuisent: si tu, AEschîna, prædixisses, & sublato clamore testificatus esses, qui ne locutus quidem es: ne sic quidem nostræ ciuitati ab his consilijs desistendum, aut refugiendum fuit: si quidem aut gloriæ, aut maiorum, aut posteritatis aliquam rationem duceret. Nunc enim nihil aliud dici potest, quàm eius consilijs fortunam non respondisse, eamque spe sua decidisse, quod omnibus mortalibus commune est, vbi ita deo visum fuerit. Tunc verò ea, quæ se imperiò ac principatu dignam putaret, deinde ab hoc descisceret: culpam totius Græciæ Philippo proditæ meritò sustineret. Nam si hæc sine dimicatione essent à nobis deserta ac prodita, pro quibus nullum periculum nostri maiores recusassent, quis te non conspuitaret? quis te non acerbissimo odio dignum existimaret? (nō enim me dicam, neq; ciuitatem) quibus verò oculis, per deos immortalis, eos intueremur, qui in hâc urbem venirēt, si, cum res in eum locū, quo in loco hodie sunt, deuenissent: dux, princepsque Græcorum sumtus esset Philippus cum summa omnium rerum potestate, alij autem sine nobis ne hæc fierent, omni contentione pugnassent? idque cum ciuitas nostra numquam antea tranquillitatem securam gloriæ expertem, pluris quàm periculum pro rebus honestis susceptum fecerit? Nam quem Græcorum, quem verò barbarorum fugit, & Thebanos, & eos, qui ante hos potentissimi fuerunt, Lacedæmonios, & regem Persarum, quietam illam & otiosam vitam nostræ ciuitati libenter fuisse concessuros, magnamque ei gratiam habituros cum eo, vt & quicquid aliud vellet, acciperet, & sua obrineret, si imperio parère vellet, alterumque Græciæ principatu potiri sineret: sed non erant hæc, vt apparet, Atheniensibus patria, neque auita, neque ferenda, neq; in eorum animis insita: neq; vnquam quisquam ab omni æternitate ciuitati persuadere potuit, vt cum potētioribus, ipsdémque ad iniuriam faciendam

instructis atque exercitatis conspirans, & confociata, tranquille, otiose, tutoque seruiret: quin de principatu, de honore, de gloria sese periculis omnibus non dubitanter offerens, perpetuo, & per omnem ætatem decertauit. Atque hæc tam ampla, tam magnifica, tam nostris moribus consentanea esse ducitis, vt maiores nostros, eos, qui hæc gesserunt, maximis laudibus efferre soleatis: neque iniuria. Quis enim virtutem illorum virorum non admiretur, qui & patriæ solum, & urbem relinquere non dubitarunt, nauis que conscenderunt, ne imperio parerent, imperatumque facerent? Themistoclem, huius consilij auctorem, huiusque sententię principem atque auctorem, imperatorem delegerunt? eum verò, qui barbarorum legibus, imperioque parendum censuerat, Cyrillum lapidibus obruerunt? neque cum solum sic vlti sunt viri, sed etiam illorum vxores de eius vxore easdem poenas sumserunt? Non enim quærebant ij, qui tum vivebant, Athenienses, maiores vestri, neque rhetorem, neque imperatorem, propter quem feliciter seruirent: immo verò, ne causam quidem esse, cur viuere vellent, iudicabant, nisi sibi cum libertate viuere liceret. Existimabat enim quisque eorum se non solum patri & matri, sed etiam patriæ natum esse. Quæret aliquis quid intersit. Quòd is, qui arbitratur se parentibus solum natum esse, mortem, quam vel fatum, vel casus afferat, expectat: qui verò etiam patriæ se natum putat, ne eam seruire videat, æquo animo excedit è vita: & contumelias, atque ignominias, quas in vrbe subacta, superbissimòque dominatu oppressa, ac seruiente perferre necesse est, morte horribiliores esse ducit. Itaque si hoc conarer, aut inciperem dicere, me vobis auctorem fuisse, vt spiritus vestris maioribus dignos sumeretis, nemo profectò est, qui me iure reprehendat. Nunc verò, & semper antea talia vestra consilia atque instituta fuisse asseuero, & antequam natus essem, hos fuisse spiritus ac sensus ciuitatis ostendo: me autem pro mea virili parte singularum

rerum gerendarum administrum atque adiutorem fuisse dico. At iste dum summam rem insectatur ac reprehendit, vosque cohortatur, ut mihi inimici infestique sitis, proinde acsi timoris & periculorum causa fuerim ciuitati, cum in praesens laudis & honoris fructu me priuare cupit, tum in omne reliquum tempus uestrarum virtutum laudationes & praeconia vobis eripere conatur. Si enim Ctesiphontem damnabitis, quasi rep. a me non optimè gesta: non fortunæ culpa & iniquitate calamitatem, quæ vobis accidit, accepisse, sed deliquisse videbimini. At nihil deliquistis, Athenienses, nihil peccastis, cum pro omnium Græcorum libertate ac salute periculum adiistis: non, inquam, peccastis, per maiores nostros iuro & eos, qui in Marathone sese in discrimen obtulerunt, & eos, qui ad Platæas acie instructa conflixerunt, & eos, qui ad Salaminam, & ad Artemisium proelio nauali decertarunt, multosque alios, qui in monumentis publicis conditi sunt, viros forteis: quos omneis peræque ciuitas singularibus affectos honoribus, sepeliuit, non eos solos, AEschinea, qui rem bene gesserant: neque eos solos, qui vicerat: & merito. Nam quod fuit fortium virorum, id omnes re praestiterunt: fortuna autem vsi sunt ea, quam cuique dii immortales tribuerunt. Et hoc loco, o cœnum, o scribarum omnium postreme, dum studes efficere, ne me hi merito honore afficiat, neue se humanos ac liberales erga me præbeant, tropæa, & pugnas, & antiqua maiorum nostrorum facinora commemorabas. quorum omnium, quæso, quidnam hæc causa desiderabat? me verò, o histriionum omnium deterrime, qui in publicum prodibam ciuitati suafurus, auctorque futurus, ut de principatu contenderet, cuius hominis mente suscepta, cuius spiritu sumto, cuius induta persona, in contionem ascendere oportebat? an eius, qui his indigna diceret? Tum verò iure optimo interfectus essem. Præterea non eodem animo, eademue mente, priuata iudicia, atque publicas quæstiones exercere debetis. Sed cum de

hominum contractibus, qui in vita quotidiana versantur, disceptatis, vos priuatas leges, hominumque actiones, & facta spectare conuenit: cum de communibus ac publicis populi Atheniensis consilijs atque institutis iudicatis, maiorum nostrorum gloriam ac dignitatem vos oportet intueri, & cogitare: vnà cum virga & insigni iudiciali vnumquemque vestrum fumere speciem ac spiritum ciuitatis, vbi de rebus ad reip. statum pertinentibus conueneritis iudicaturi, siquidem res illis dignas vos agere oportere existimatis. Sed ad eas res, quæ a maioribus vestris gestæ sunt, studio prouectus, nonnulla decreta, actaque præterij. Ad ea igitur, vnde degressus sum, reuertor. Vt Thebas peruenimus, ibi Philippi, & Thesalorum, & aliorum sociorum legatos offendimus: nostros amicos metu perterritos, tristes ac demissos: illius alacris, lætos ac feroceis. Atque vt intelligatis, me hæc neque mei temporis, neque commodi causa dicere: eam mihi epistolam recita, quam tum nos legati statim misimus. Atquæ vsque eò iste calumniando progressus est, vt siquid bene, & è rep. gestum sit, non mihi, sed temporibus ascribendum atque assignandum dicat: aliarum autem rerum omnium, quæ secus acciderunt, in me, atque in fortunam meam, culpam conferat. Atque, vt apparet, suator & orator ego, nullius earum rerum, quæ oratione, & consilio actæ sunt, adiutor ei fuisse videor: earum, quæ in acie, & castris, & imperio minus feliciter gestæ sunt, solus auctor, & causa fuisse reperiatur. Ecquis immanior, ecquis omni execratione dignior sycophanta fingi potest? Recita epistolam. EPISTOLA. Contione igitur aduocata, Thebani legatos Philippi priores introduxerunt, propterea quòd illi sociorum locum apud eos obtinebant. Producti itaque contionabantur, ac Philip-pum quidem multis laudibus in cælum ferebant: vos autem multis nominibus vituperabant, & accusabant, omnium, quæcunque vos vniquam aduersus Thebanos fecistis, memoriam refricantes: quorum hæc summa fuit:

AEquum esse illos pro maximis Philippi in eos beneficijs sibi gratiam referre: earum verò iniuriarum, quas à vobis accepissent, pœnas utroque modo vellent, expetere aut per eorū sineis aditū sibi patefacto & transitu concessio, aut bello communiter, & coniunctis copijs in Atticam inferendo. Ad extremum ostendebant (vt sibi quidem videbantur) ex ijs, quæ suaderent, pecora, mancipia, aliâque, quibus abundat Attica, in Bœotiam peruentura: contrâ ex ijs, quæ essemus dicturi, Bœotiæ fructus omnes & copias à bello directum iri: multâque alia præterea dicebant: sed huc tamen omnis eorum spectabat oratio. Quæ autem contrâ dixerimus, æquidem tota re mea familiari, meisque facultatibus omnibus estimarim, singillatim vobis exponere atque explicare licere. Sed vereor, ne vos, præteritis iam temporibus, existimantes eluisionem tum quandam rerum in Græcia accidisse, inanem & molestum verborum strepitum esse putetis, omnē eam, quæ his de rebus habeatur, orationem. Quæ igitur persuaserimus nos, & quæ nobis illi respoderint, attendite. RECITA. RESPONSIO THEBANORVM. His igitur actis & transactis, illi vos arcessiebant: vos educebatis exercitum, opemque ferebatis. Et, vt media prætermittam, illi vos ita familiariter & comiter acceperunt, vt absentibus suis grauis armaturæ militibus, & equitibus, exercitum vestrum in urbem, & in suas domos reciperent, vbi erant liberi, vbi vxores, vbi ceteræ res carissimæ. Atqui treis illo die vestrum laudationes Thebani pulcherrimas omnibus mortalibus ostenderunt: vnam fortitudinis, alteram iustitiæ, tertiam temperatiæ. Nam cum vos pugnandi socios habere, quàm vobiscum pugnare maluerunt: duo de vobis præclara iudicia fecerunt. Nam & vos meliores esse Philippo, & vestra postulata Philippi postulatis æquiora iudicarunt: cum autem ea, quæ cum apud ipsos, tum apud omnēs homines diligentissimè custodiri solent, liberos, & coniuges potestati vestræ permiserunt, fideique commiserunt, certissimam

mam se de vobis temperantiæ opinionem habere declararunt. In quibus omnibus, Athenienses, quod ad vos attinet, eos rectè sensisse, res ipsæ comprobarunt. Nam neque ingresso in oppidum exercitu quisquam Thebanorum de vobis ne iniuria quidem questus est, ita vos ipsos temperanteis præbuitis: & cum bis coniunctis viribus, & copijs in prima acie stantes pugnaueritis, semel in eo prælio, quod ad fluuium * commissum est: iterum in hiberno, quod nominatur: non modò reprehensione iusta, criminè que caruistis, verùm etiam hominum summam admirationem excitastis, ornatu, apparatu, alacritate animi, & studio: propter quæ laudes vobis ab alijs tributæ comparabantur: à nobis verò sacrificia, & supplicationes ad omnia deorum puluinaria constituebantur. Atque hoc loco libenter ab AEschinea quaesierim, cum hæc agerentur, cum gloriæ, cum lætitiæ, cum laudum plena esset ciuitas, vtrùm vnà cum populo sacrificaret, & in communi omnium lætitia ipse quoque lætaretur: an tristis, & mæstus, & ingemiscens, & ægritudine confectus ob communem ciuitatis felicitatem domi sederet, aut etiam iaceret. Nam si aderat, si cū alijs comparebat, nõnne importunus atque improbus, immò verò nõnne impurus atque impius est; qui, quarum rerum tanquam optimarum ipse deos immortalibus testibus adhibuerit, eas à vobis, sanctissimo iureiurando obstrictis, postulet vt sententijs vestris non optimas iudicetis? si non aderat, nõ dignus est, qui millicies pereat; si ea; ex quibus alij maximam lætitiã capiebãt, sine summo animi dolore aspicere non poterat? Recita igitur hæc quoque populi scita. POPULI SCITA SACRIFICIORVM.

Ergo nos quidem in sacrificijs cramus occupati: Thebani verò inibi erant, vt sese per nos salutem consecutos esse existimarent. res denique huc reciderant, vt, qui auxilium alienum ex istorum actionibus imploraturi ac desideraturi videbantur, ij ipsi alijs auxilium ferrent, ex ijs reb; quas me auctore suscepistis. Qualeis porrò tunc

propter hæc ipsa voces mitteret Philippus, quibus in turbis versaretur, quàm trepidaret, ex illius ad Peloponnesum missis epistolis cognoscetis: quas mihi recita, vt intelligatis, quid ego mea afsiduitate, meis itineribus, meis cursibus, meis laboribus, multisque decretis, quæ nunc iste maledictis insectabatur, profecerim. At qui multi apud vos, Athenienses, magni & clari ante me oratores extiterunt, Callistratus ille, Aristophon, Cephalus, Thrasylbulus, sexcenti alij: nemo ex his tamen vnquam vlla in re, à principio vsque ad extremum sese vtilem præbuit ciuitati. Sed si quis fortè scitum faceret, legationem non obibat: qui legationem obiret, populi scitum non faciebat. Sibi enim vnusquisque eorum quietis aliquid & laxamenti relinquebat, simulque siquid fortè accideret, transferendi in alium criminis locum ac facultatem referuabat. Quid ergo? dicet aliquis, tunc tanto audacior, aut fortior es, quàm ceteri, vt solus omnia conficias ac transigas? Non equidem tantum mihi arrogo, vt hæc de me prædicem: verum ita mihi persuaferam magno in discrimine versari ciuitatem, vt mihi neque locum, neque spatium de priuatarum rerum mearum stabilitate cogitandi dare videretur: sed præclare nobiscum actum iri existimarem, si quis nulla re necessaria prætermissa, negotia, quæ erant in manibus, ex sententia explicare posset. Mihi autem in animum induxeram, stultè fortasse, sed tamen induxeram, neminem neque qui decerneret, melius quàm me fuisse decreturum, neque qui ageret, commodius acturum, neque qui legationem obiret, studio acriore, aut fide maiore legationem obiturum. Propter has causas mihi ipse omneis reip. administrandæ partis, omniaque munera deposcebam. Recita epistolas Philippi. EPISTOLAE PHILIPPI. Huc redigit Philippum mea reip. gerendæ ratio, AEschyna: hanc illum vocem mittere coëgi, eum, qui antea voces feroces, voces audaciæ & confidentiæ pferas in ciuitatem iaciebat. Pro quibus ego ab his merito corona donabar:

neque

neque tu cùm adesses, contrà dicebas. Et qui me accusavit Diondas, quintam tabellarum partem non obtinuit. Ac mihi hæc populi scita recita, quæ tum sententijs iudicium absoluta, ab hoc ne in iudiciũ quidem vocata sunt.

POPULI SCITA. Hæc populi scita, Athenienses, iisdem syllabis, iisdemque verbis perscripta sunt, quibus ea, quæ antè Aristonicus, nunc iste Ctesiphon scripsit. Atque hæc AEschines neque ipse iudicio persecutus est, neque ei, qui in iudicium adduxisset, subscriptor ullus extitit. Atqui Demomelem, & Hyperidem, qui hæc decernebāt, siquidem me nunc iste veris criminibus accesserit, iustius ac probabilius accusaret, quàm Ctesiphontem. Quid ita? quia huic licet recusare, seseque rebus iudicatis tegere ac tueri, & his exceptionibus vti, istum ipsum illos reos non fecisse, qui eadem, quæ hic nunc scripsit, scripserunt, & leges non amplius sinere de rebus ita transactis in iudicium quenquã vocare: multaq; alia dicere potest. Ac tunc quidem res ipsa per se perpèderetur, & disceptaretur, priusquam quicquam horum antecessisset, priusquam vllum præiudicium factũ esset. Verum tunc non poterat, opinor, quod nunc facit, ab ultimis temporibus, & ex multis decretis ea ad calumnian- dum excerpere, quæ neq; quisquam antea nouerat, neq; hodie recitatum iri suspicatus esset: non poterat inuerso ac perturbato temporum ordine, falsis rerum antea actarum causis prolatis, veris que dissimulatis ac celatis aliquid dicere videri: tunc, inquam, hæc non poterat: sed ipsa veritate propter adstante, & præsentem: recenti etiam apud vos omnium rerum memoria, vobis denique pæne manu vnam quamque rem tractantibus ac tenentibus omnis haberetur oratio. Itaque his argumentationibus ac probationibus declinatis ac vitatis, quæ è rebus ipsis duci poterant, nunc denique venit, existimans vos certamen aliquod oratorum proposituros (vt mihi quidem videtur) non rerum publicè gestarum disceptationem facturos: & iudicium de verbis, non de utilitate reip. futu-

rum. Deinde grauis auctor sapiētium orationem imitatur & sententias loquitur : aitque oportere vos eam de nobis opinionem, quam huc domo detulistis, negligere, ac pro nihilo putare. Nam quemadmodum (inquit) cū rationes cum aliquo subducitis, aliqua esse apud eum reliqua existimantes, si accepta expensis quadrarint, si calculi sint puri & puti, nihilque sit reliqui, manus datis & conceditis: sic & vos nunc ijs, quæ vtriusque oratione demonstrata & plana facta fuerunt, cōuenit assentire. Videte, obsecro, quā imbecillum, & fragile sit natura, ut par est, quicquid iniuste sit actum, atque ab iniuria profectum. Namque hac ipsa similitudine, tam acuta, tamque erudita, vos iam nunc statuisse confitetur, me meis orationibus consulere patriæ, se suis Philippo. Non enim vos de hac sentētia demouere conaretur, nisi talis esset, eaque inueterata, vestra de vtroque nostrum existimatio. At ego vos iam facile docebo, eius orationem, qua ex animis vestris hanc de nobis opinionem euellere conatur, vehementer esse iniustam, non adhibitis calculis (non enim ita rerum subducuntur rationes) sed primū singularū actionum memoria breuiter à vobis repetita: deinde vobis, qui auditis, rationum iudicibus sumtis, simul & testibus productis. Mea enim reip. administratio, ne, quam iste reprehendit, effectum est, ut pro eo ut Thebani vnā cum Philippo in fineis nostros inuaderēt, quod omnes futurum existimabant, illi coniunctis nobiscum copijs, vnāque in acie stantes illum prohiberent: pro eo ut bellum in Attica versaretur, octoginta circiter millia passuum longè ab vrbe in Bœotorum finibus gereretur: pro eo ut prædones ex Eubœa profecti vestros agros popularētur, diriperent ac vastarent: pace maritima per omne belli tempus frueremini: pro eo ut Philippus Helle spōntum teneret Byzantio occupato, societate coniuncti vobiscum Byzantij, bellum ei inferrent. Ecquid tibi videretur, AEschinea, ea, quæ de rebus gestis initur, ratio, calculorum similis esse? aut tu has contrario iudicio de-

lere, ac de medio tollere putas oportere, & non quomodo earum memoria posteris prodatur sempiterna, videre? Mitto quòd crudelitatem, quam ijs in rebus animaduertere potuistis, in quibus potestatem in aliquos nact^o est Philippus, alij experti sunt, ac pertulerunt: humanitatis autem ac mansuetudinis, quam ille cùm cetera concupisceret, atq; amplecteretur, vobis simulatè ostentabat, fructus vos merito vestro percepistis: hæc, inquam, missa facio. verumtamen audebo hoc dicere, eum, qui in oratorem & contionatorem verè ac iuste velit anquirere, neque illum calumniari: ea, quæ tu modò commemorabas, non esse crimini daturum, atque obiecturum, exempla fingentem, verba irridentem, habitum, gestumque loquentis imitantem: (in hoc enim positæ sunt fortunæ Græciæ, scilicet, utrùm hoc, an illud verbū in oratione posuerim: huc an illuc manum porrexerim) sed ab rebus ipsis longius non discedentem, spectaturum quas facultates, quas copias tum haberet ciuitas, cùm ad remp. accessi: quas ego ei postea, cùm rebus gerendis præfessem, compararim: quo loco essent res aduersariorum, & quomodo sese haberent: deinde siquidem copias reip. imminuisssem, deteriorésque fecisssem: meum crimen esse ostenderes: sin auxisssem, non calumniareris. Quoniã igitur tu hoc tibi faciendum esse nõ putasti: ego faciam: vos, utrùm vera ac iusta fuerit mea oratio, necne, iudicabitis. Erant igitur hæ vires & copix ciuitatis: insulareis non omneis habebamus (nam neque Chius, neq; Rhodus, neque Corcyra nobiscum faciebant) veçtigal erat in singulas ciuitates descriptum circiter quater millies centies: atque hæ pecunia iam erat redacta: grauis armaturæ militem, aut equitem, præterquam nostrum, & vrbanum habebamus neminem. Et quod erat & nobis omnium formidolosissimum, & hostibus vtilissimum, perfecerant isti, vt omnes finitimi, Megarenses, Thebani, Eubœi in odium, quàm in amicitiam nostram proniores ac propensiores essent. Res igitur nostræ ciuitatis hoc

erant loco, neq; quicquam aliud est præterea, quod dicere quisquã possit. Philippi verò, cum quo nobis erat certamen, rationes quales essent, & quomodo sese haberent, videte. Primum in eos, qui eum sequebantur, imperium habebat, & quod omnium est maximum, earum rerum, quæ ad bellum pertinent, penes eum summa potestas erat: deinde hi numquam ponebant arma de manibus: deinde pecunia abundabat: tum quæ ipsi visa essent, agebat: neque verò decretis propositis quid vellet, denunciabat, aut prædicebat, neq; palàm deliberabat, neque à calumniatoribus in iudicium vocabatur, neq; de decretis contra leges factis accusabatur, neq; cuiquam mortalium iudicio de rationibus referendis tenebatur: sed planè (vt semel dicam) solus erat ipse dominus, solus dux, solus imperator: denique omnia in vnus potestate vertebantur. Ego autem cum hoc ad certandum compositus (nam hoc perpendendum & considerandum est) cuiusnam rei potestatem habebam? nullius. Nam primum hoc ipsum contionari, cuius solius eram compos, seu potius particeps, in medio erat positum, & mihi commune cum ijs, qui ab illo mercedem accipiebant: & quibuscumque in rebus ego ab istis victus essem (nulta autem accidebant huiusmodi, aliud alijs de causis, quas cumq; fors tulisset) his ex vsu hostium deliberatis & consultis discere debatis. Verumtamen ego tot rebus inferior, tot incommodis ac difficultatibus affectus, socios vobis Eubæos, Achæos, Corinthios, Thebanos, Megarenseis, Leucadios, Corcyrenseis ascuii & comparavi. ex quibus externorum militum quindecim millia, equitum duo millia extra urbanas copias coëgisti. pecuniam autem tantam à socijs conferendam descripsi, quantam potui maximam. Quod si iura nostra cum Thebanorum iuribus comparas AEschinea, aut cū Byzantiorū, aut cum Eubæorum, aut si de rata & equabili parte nunc disputas: primum videris ignorare, cum & antea trecentæ triremes essent illæ, quæ pro Græcis decertarunt, earum ducentas ciuitatem

tem nostram præbuisse: neque tunc eam quisquam sic affectam vidit, ut aut se idcirco deteriore condicione esse, damnóque affici putaret: aut eos, qui hoc consilij dedissent, in iudicium vocaret, aut hæc grauitèr, molestèque ferret: (turpe enim, mehercule, turpe) sed dijs immortalibus gratiam haberet, si Græcis in commune discrimen adductis, ipsa duplo plus quàm, alij ad omnium salutem contulisset. deinde inanem ac falsam horum gratiam aucuparis, cùm me calumniaris. quid enim nunc ea commemoras, quæ facere oportebat, ac non tum cùm in vrbe esses, & cùm rebus omnibus interesses, hæc decernebas, si licebat per illa tempora: in quibus non quod vellemus, sed quod res ipsæ darent ac ferrent, æquo animo accipere oportebat? Nam paratus erat, qui cōtrà liceretur & emeret: qui eos, quos expulissimus, exciperet: qui pecuniam adderet. Sed si nunc propter illa, quæ sic à me gesta sunt, accusor, quid futurum fuisse censetis, si, cùm ego hæc subtiliter & exiguè ad calculos reuocarem, ciuitates illæ à vobis desciuisent, & sese cum Philippo cōiunxissent, & vno tempore Eubœæ, Thebarum, Byzantij compos factus esset Philippus? quid, inquam, impios istos homines fuisse facturos, aut dicturos putatis? Non, illos esse traditos? non, spretos ac reiectos, cùm societate nobiscū cōiungi cuperet? nō Philippū Helleponto per Byzantios esse potitum? cōmeatus, & frumenti, quod ad Græcos supportabatur, dominū esse factum? bellū finitimum, & graue per Thebanos in Atticam inuectum? inare latrocinij infestum esse factū, & propter prædonum ex Eubœa eruptiones, mercatoribus esse clausum? nōne hæc, & alia multa præterea dicerent? Improbæ, Athenienses, improba res est omni tempore calumniator, & vndique inuido dente petens, vndiq; criminandi ansam arripies. Talis autem est homunculus iste, seu potius bellua natura: qui nihil vnquam à prima ætate sinceri, nihil recti, nihil libero aut ingenuo dignum fecit: simia planè tragica, rusticus Oenomaus, adulterinus orator. Quid

enim tua dicendi facultas patriam iuuat? quid ex tua eloquentia ad ciuitatem vtilitatis peruenit? nunc denique nobis de præteritis verba facis: vt si quis medicus ægris, interea dum ægrotent, domum ingressus, non exponat, neque afferat rationes, quibus morbū depellere, & conualescere queant: postea quàm aliquis ex eis excesserit è vita, quo tempore ei parentetur, iustaque funeris soluantur, sequatur ipse, & ad sepulcrum veniat: & tum denique pluribus verbis disputet, hominem istum si hoc, & illud fecisset, moriturū non fuisse. Et o fanatice, nunc demum dicis? Iam verò ne cladem quidem illam, quam nostra ciuitas accepit, quando tibi hæc animos attollit, propter quam te dolore affici atque ingemiscere, o scelus, oportebat, in ijs, quæ in mea potestate sita fuerūt, fuisse reperietis: quod facite, vt sic mecum consideretis. Quocunque ego legatus à vobis missus sum, nusquam à Philippi legatis victus discessi: non ex Thessalia, non ex Ambracia, non ex Illyrico, non à Thraciæ regibus, non Byzantio, non vlllo alio ex loco, non postremò nuper Thebis: sed quibus in rebus eius legati à me victi fuerant verbo, hasille armis, & impetu factò subigebat. Hæc igitur à me repetis, & flagitas? neque te pudet ab eo, in quem ob molliem dicta dixeris, postulare, vt vnus omneis Philippi copias superaret, idque verbis? quid enim aliud in meâ potestate positū erat? non enim anima, non fortuna cuiusquam eorum, qui in acie steterant, non imperatoris partes, cuius tu rationes à me repetis: ita stolidus es & vecors. At quorum rationem lege referre debet orator, de ijs quo minus in me acerrime anquiras, non recuso. Quæ nam sunt hæc? principia rerum cernere, futura multo antè videre ac præsentire, eaque alijs prædicere. Hæc mea sunt: hæc ego gessi. Quid tum prætereat? populorum tarditatē, moram, cunctationē, desidiam, ignorantiam, inscientiam, contentiones, quæ ciuitatibus omnibus vitia & peccata sunt vsitata, insita, ac necessaria, hæc coercere & comprimere: & contrà, discordiam sedare, cōcordiamque

diámque constituere, amicitiam confirmare, ad studium agendi, quæ reip. tempora postulant, cohortari & excitare: hæc omnia à me facta sunt: neque mortalium quifquam est, qui, quantum in me fuit, aliquid à me prætermissum reperire possit. Siquis igitur quemuis roget, quibus rebus magnam partem eorum, quæ gessit Philippus, administrauerit, respondebunt omnes castris, exercitu, largitione, corrupendis ijs, qui in singulis Græciæ urbibus rebus gerendis erant præfecti. Atqui neque exercitum in mea potestate habebam, neque dux exercitus eram. Quare neq; eæ res, quæ castris, & ferro gestæ sunt, ad me pertinent, neq; earum rerum rationes referre debeo. At hoc certe Philippo superior fui, quòd me ab eo pecunia corrumpi non sum passus. Nam ut is, qui licetur, si emerit, vicit eum, qui pretium accepit: sic qui nec accepit, nec corruptus est, licitatore vicit. Ita quod ad me attinet, ciuitas manet inuicta. Hæc igitur sunt, & his similia, ut alia multa præteream, quæ ego præstiti, quamobrem hic talia de me scribere merito ac iure posset. Verùm quæ vobis omnibus nota sunt, hæc iam commemorare mihi non videtur alienum. Statim post pugnam populus, qui sciret, ac vidisset quot ego res, quantasq; gessissem, dum per terrores ipsos, ac per discrimina omnia medius incedo, quo tempore mirum nemini esse deberet, si offensa multitudo, se mihi iniquiorem atque infestiores præbuisset: eo ipso tempore primùm meas de salute ciuitatis sententias suo suffragio comprobabat, & omnia quæcunque communis custodiæ causa agebantur, dilectus militum, præsidij distributio, fossæ, pecuniæ ad murorum refectionem, & munitionem urbis erogatio, hæc me auctore fiebant. deinde cum rei frumentariæ curatorem, publicumque frumētum emtorem crearet, mihi vni hanc procurationem ac potestatem suffragio suo detulit: postremò cum coissent, & cōspirassent inter se ij, qui in hanc curam incumbabant, ut mihi negotium, facefferent, ac nocerent, cum me de decretis cōtra leges

factis reum faciebant, cùm mihi iudicia rationum referendarum, & perduellionis, & maiestatis denuntiabant: cùm hæc omnia mihi intentabāt, non per se illi quidem initio, sed per quos maximè suas in me insidias occultas fore putabant: (scitis enim & meministis scilicet me primis illis temporibus in iudicium quotidie vocari, neque audaciam atque amentiam Sosisclis, neque Polycratis calumniam, neque Diondæ, & Melani insaniam, neque aliud quicquam ab istis esse contra me inexpertum relictum) ex his igitur omnibus periculis maximè deorū immortalium benignitate, secundo loco, vestro & aliorum omnium Atheniensium beneficio integer & incolumis seruatus sum: neque iniuria. hoc enim & verum est, & cùm iuratis iudicibus, tum ijs, qui religiosè iudicant, honestum & gloriosum. Cùm igitur, me perduellionis accusatum omnibus sententijs absoluebatis, ita vt ne quintam quidem tabellarum partem accusatores mei obtinerēt, tum statuebatis, me res optimas, & reip. perutileis agere: cùm de decretis contra leges factis reum factum, absoluisistis, declarastis omnia me legitimè & dicere, & decernere solere. cùm rationes meas comprobabatis atque obsignabatis, omnia me sine pretio ac mercede, integrè & incorruptè gessisse fatebamini. Cùm hæc igitur ita se habeant, quod nomen rebus meis gessis Ctesiphontem imponere æquum & verum erat, aut conueniebat? non id ipsum, quod à populo impositum esse videbat? non quod à iuratis iudicibus tributum, non quod ab ipsa veritate apud omnes homines comprobatum? Certe (inquit) sed illud Cephali præclarum, nullo vnquam cum iudicio causam dixisse. Et mehercule fortunatum. Sed num idcirco is, qui sæpe in iudicium vocatus, nunquam vllius criminis conuictus sit, meritò in culpa ponatur? Atqui quod ad istum quidem attinet, Athenienses, illud Cephali præclarum verè mihi de memetipso prædicare licet. Nunquam enim me A Eschines vlla lege accusauit, nunquam vllò iudicio reū fecit. Itaque tua quidem confessione

fessione nihilo Cephalo deterior ciuis sum ego. Cùm
 multis igitur ex rebus quis iniquitatem istius, & singula-
 rem inuidiæ coniunctam calumniam perspexerit, tum
 ex ijs maximè, quæ de fortuna disputauit. Omnino quis-
 quis homini cùm ipse homo sit, fortunã exprobrat, ego
 eum stolidum prorsus & mente captum esse puto. Nam
 cùm is, qui sibi ipse videtur esse fortunatissimus, qui que
 se fortuna maximè propitia, & perbenigna vti arbitra-
 tur, exploratum non habeat, eam, talem vsque ad vespe-
 rum esse permansuram, aut de hac dicere, & gloriari, aut
 eam alteri maledicti loco obijcere, summæ dementiæ
 est. Verùm quoniam præter alia multa, quæ sibi iste arro-
 gavit, etiam his de rebus orationem habuit insolentiæ
 atque intolerantiæ plenam, videte, quæso, Athenienses,
 & vobiscû ipsi considerate, quanto ego verius isto, quan-
 tóque modestius atque humanius de fortuna disputem.
 Ego fortunam ciuitatis bonam, secundam, ac propitiam
 esse arbitror atque hoc video & Iouem Dodonæum, &
 Apollinem Pythium vobis vaticinatum esse: omnium
 verò hominum, eam quidem, quæ nunc vrget, aduersam,
 iniquam, atque acerbam. Nam quis Græcorum, aut quis
 barbarorum hoc tempore non multa incommoda, gra-
 uis que casus expertus est? Quòd igitur honestissima &
 præclarissima voluerimus, eaq; ipsa nobis ad agendum
 proposuerimus, & quòd, cùm Græci sperauissent, se, si
 nos deseruissent, ac prodidissent, beatè victuros, melius,
 quàm cum eis, nobiscum agatur, hoc bonæ fortunæ no-
 stræ ciuitatis acceptum fero: quòd nos titubauerimus at-
 que offenderimus, neque omnia nobis ex animi nostri
 sententia processerint, in eo aliorum hominum fortu-
 nam pro rata parte suo iure in ciuitatem nostram vsam
 esse existimo. Fortunã autem meam, & cuiusque vestrũ
 propriam in priuatis rebus expendendam & consideran-
 dam esse duco. Ego igitur sic de fortuna quærendum es-
 se censeo, rectè sanè & iustè, mea quidem sententia: quod
 idem vobis videri puto. Iste autem fortunam meam pri-

uatam, maiorem dominatum habere, quàm publicam & communem ciuitatis ait: humilem, aduersam, atque afflictam plus posse, quàm magnam, secundam, ac florentem. quomodo hoc fieri potest? Atquì si meam fortunã, AEschîna, perpendere, & omnibus spectandam proponere, constitutum in animo habes, confer eam cum tua: & si meam compereris esse tua meliorem, eam definito maledictis infectari. Iam mihi igitur vsque à principio eam cõtemplare. Sed ne me quisquam, per deos immortales, ineptum esse iudicet. Nam neq; si quis vllius paupertatem contumeliosè vexat atque exagitat, neque si quis in multa copia, rerúmque omniũ affluentia natus atque educatus hoc nomine gloriatur, eum sanæ mentis esse puto. Verùm ego istius sæui atque importuni hominis maledictia & calumnijs compulsus, in hanc orationem incidere cogor: cui tamen ita moderabor, vt natura rerum, de quibus agitur, feret, & quoad eius maximè fieri poterit. Contigit igitur mihi cùm puer essem, vt ad ludos discendi illi ætati accommodatos, atque vsitatos frequens irem, eaque mihi suppeterent, quibus instructum eum esse oportet, qui nihil sit inopia coactus turpiter facturus: postea quàm verò è pueris excessi, vt his cõsentanea agerem, meis sumtibus ludos facerem, trierarchus essem, pecuniam in ciuitatem conferrem, nullam neque priuatam, neque publicam liberalitatem ac munificentiam prætermitterem: sed me & ciuitati publicè, & amicis priuatim vtilem præberem. Põstquàm autem ad remp. accessi, visum est mihi talem reip. administrandæ rationem sequi, vt sæpenumero & à patria mea, & à reliquis Græcis corona donatus sim, vt ne vos quidem inimici mei sitis vnquam dicere conati, consilia, & instituta mea non fuisse honesta atque præclara. Talis igitur mihi perpetua meæ vitæ comes fortuna contigit. Nam cùm alia multa de hac possim dicere, sciens prætermitto: veritus ne cuiusquam animum his rebus offendam, quibus glorior. Tu verò vir amplus & grauis, qui ceteros despi-

cis, vide quali tandem ad hanc meam fortuna sis vsus: propter quam puer magna in egestate educatus es: cum vnà cum patre ludò litterarum affixus esses, illique assideres, atramentum tereres, scamna spongijs purgares, gymnasium puerile verreres, vernæ, non pueri ingenui parteis ageres. sumta autem virili toga, matri iniantanti libros recitabas, vocéque præibas: & reliqua, quæ ad munus illud pertinent, concinnabas, & comparabas: noctu eos, qui initiabantur, ceruina pelle succingebas, vasa vinaria circumferebas, vinumque ministrabas, ac defundebas: illos expiabas, centonibus & furfure defricabas ac detergebas. Expiatione autem facta surgebas, eosque dicere iubebas. EFFUGI MALA, NACTVS SVM MELIORA: gloriabare denique quòd nunquam quisquam tam clara voce vlulasset. Quod quidem ita esse arbitror. Nolite enim existimare, eum, qui tam clarè loquatur, vlulatus non clarissimos edere. Interdiu verò præclaros illos bacchantim choros per vias agitabas: angueis, quos Parias nominant, fœniculo, & populeis frondibus coronatos comprimebas, & supra caput attollebas: & cum clamares, Euoë Saboë, & carmen illud saltares, Hyas Attas, Attas Hyas, ab aniculis præfultor & princeps chori, thyrsiger, ederifer, vannifer, & huiusmodi nominibus appellaberis. Atque huius quidem operæ ac ministerij egregiam sanè mercedem ferebas, lagana, frustula, scriblitas, liba, placentas. Quibus rebus quis non eum verè beatum iudicet? quis non eius fortunam omnium regum copijs & voluptatibus anteponat? Posteaquàm autem in popularium, ciuiumque numerum adscriptus es: quoquo id modo affecurus sis: (nam hoc omitto dicere) verum postquàm adscriptus es, statim munus pulcherrimum suscepisti, vt infimis magistratibus subscriueres, & secundarum partium scriba esses. Deinde vt hoc tandem munere defunctus es, ea omnia, quæ alijs maledicti loco obijcis, facere instituisti. Itaque nihil eorum, mehercule, quæ tibi tua virtute parta suppetebant, po-

steriore vita dedecorasti. Sed cùm teipsum histrionibus illis, qui cognomen ex grauitate vocis, & gemitus consecuti, barystoni nominantur, Simmyca, & Socrati mercede locauisses, tertiariũ partium actor eras: ficus, vuas, oliuas, tanquam pomorum redemptor, ex alienis fundis decerpebas & colligebas: cùm quidem tu plura in his vulnera, quàm in eis certaminibus, in quibus vos de vita decernebatis, acciperes. Erat enim vobis cum spectatoribus bellum implacabile, & sine vlla denuntiatione susceptum, à quibus cùm multa vulnera acceperis, meritò in eos, qui in talibus periculis non sunt exercitati, ac versati, tanquam timidos dicta dicis. Sed prætermisissijs, quorum culpam quiuis in paupertatem cõferre possit, ad ea crimina veniã, quæ propriè in mores tuos quadrant. Talem enim reip. administrandæ rationem secutus es, posteaquàm tibi tandem remp. administrare venit in mentem, vt in rebus secundis ciuitatis, léporis vitam viueres, omnia circumspectares, quicquid increpuiisset, pertimesceres, horreres, tremeres, plágas & verbera ob ea, quorum tibi conscius eras, flagitia & scelera, semper exspectares: in aliorum ciuium casibus aduersis, audax, ferox, & alacer ab omnibus cernereris. Atquĩ per deos immortaleis, qui mille ciueis interfectos lætè atq; insolèter tulit, quibus pœnis ab ijs, qui viuunt, affici debet? Cùm multa igitur alia habeam, quæ de isto dicere possim, præteribo. Non enim quæcunque probra ac dedecora in isto inesse possum ostendere, puto me facile proferre debere: sed ea demum, quæ mihi turpia dictu non sunt. Quare, AEschinea, primùm vtriusque nostrũ vitam, & quæ ab vtroque in ea instituta & acta sunt, inter se contendito leniter & clementer, non asperè neque acerbè: deinde ex his quærito, vtrius sibi quisque fortunam dari malit. Tu litteras docebas: ego in ludum frequens veniebam: tu initiabas, ego initiabar: tu cum choro saltabas, ego chori, & ludorum sumtum suppeditabam: tu scribæ munere fungebaris, ego contionabar: tu

tertia-

tertiarum partium histrio in scenam prodibas, ego ludos spectabam: te vox deficiebat, ego exhibebam: tu in rep. administranda hostibus consuluisti, ego patriæ. mitto cetera. nunc quidem hodie, propterea quòd corona donatus sum, vita mea in iudicio spectatur, & explicatur: omnium autem voce & confessione nulla in re iniuste rép. lesisse declaror: tu autem cum hoc affectus es, ut calumniator habearis, tum in discrimē venisti, utrum te amplius calumniari homines innocentes oporteat, an desinere, & coerceri, ne quintam quidem tabellarum partem à iudicibus consecutum. Iamne vides, A Eschiana, quàm propitia & secunda per omnem vitam fortuna usus, meam tanquam iratam atque aduersam crimineris? Age verò liceat mihi publicorum munerū, quæ ego cumulatè & prolixè obij, quibusque amplissimè & magnificentissimè functus sum, testimonia recitare. tu verò contrà versus nobis recita, quos tu malè agendo inuerebas ac deprauabas.

Orci relicta ianua, & latebra inferum. &

Mala scito non volentem nuntiare me. At te omnium

hominum profligatissime ac perditissime, primùm dii immortales, deinde hi omnes male perdant, malum ciuem, patriæque proditorem, malumque tertiarum partium histriorem. Recita testimonia. TESTIMONIA.

In ijs igitur, quæ ad ciuitatem pertinent, talis extiti. In priuatis autem, si nescitis me commodum, liberalem, & humanum, atque in egeñtis munificum fuisse, non est quòd quicquam ipse de me dicam, neque vnquam adducar, ut vllum vobis hac de re testimonium afferam: non si quos ab hostibus redemi, non si aliquorum filias in matrimonium collocaui, non quicquam horum tale. Namque hæc mea sententia est: eum qui beneficium acceperit, omni tempore beneficiū memoria tenere oportere existimo: eum uerò, qui dederit, de memoria statim deponere, si modo vult ille viri boni, hic non illiberalis, neque ieiuni hominis officio fungi: sua certè beneficia

commemorare & prædicare, propemodum exprobrare
 est. Quare nihil sum tale facturus, neque vllius vnquam
 oratione, aut maledicto ad hoc faciendum adducar. sed
 qualiscunque hominum in his rebus de me opinio est, ea
 mihi fatis est. Volo autem sine mihi facto de rebus do-
 mesticis ac priuatis dicendi, de forēsibus ac publicis pau-
 ca etiam quædam apud vos explicare. Si quem igitur
 mortalium, quos hic sol videt, AEschinea, proferre po-
 tes, siue Græcorum, siue barbarorum, qui integer, inta-
 ctus, atque incolumis antea à Philippi, nunc ab Alexan-
 dri dominatu discesserit: sit ita sanè, do tibi & concedo,
 meam siue fortunam, siue infelicitatem nominare voles,
 omnium malorum publicorum causam fuisse: sin & eo-
 rum multi, qui neque me vnquam viderunt, neque vn-
 quam vocem meam audierunt, multis & grauibus incō-
 modis affecti sunt, non solùm singulares homines, sed &
 totæ ciuitates, & nationes: quanto verius & æquius est,
 communem omnium hominum (vt credibile est) fortu-
 nam, & sæuam quandam rerum tempestatem ac procel-
 lam reip. infestam ac perniciosam, horum causam fuisse
 existimare? At tu his omisis me, qui apud hos remp. ge-
 ro, criminaris, idque cùm scias si non totam, at certè ra-
 tam partē tui criminis ac maledicti cùm ad omneis, tum
 ad te maximè redundare. Nam si cùm penes me summa
 rerum potestas esset, ego per me de rebus consulere
 ac statuerem: possētis vos alij oratores ea, quæ accide-
 runt, mihi crimini dare: sin vos semper in omnibus con-
 cionibus aderatis, si ciuitas communiter omnibus ad de-
 liberandū quid expediret, proponebat: & hæc cùm om-
 nibus optima videbantur, tum maximè tibi: (non enim
 beneuolentia adductus, spem præmiorum, laudem, ho-
 norem, quæ omnia inerant in ijs, quæ tunc à me gereban-
 tur, mihi concedebas, sed partim scilicet veritate victus,
 partim quia nihil melius, quod diceres, haberes) non tu
 iniustè facis? non tu importunus & improbus es, qui ea
 nunc reprehendas, quibus tum asserre meliora non po-
 teras?

teras? Equidem apud omnes alios homines hæc quodammodo video iura esse definita, atque aptè descripta. Facit aliquis iniuriam prudens? iratæ leges, infesti iudices, poenæ in eum constitutæ. Peccauit aliquis imprudens & inuitus? huic venia datur, non supplicium quaeritur. Neque iniuriam fecit alius, neque peccauit: sed cum in ijs, quæ omnium opinione reip. vtilia esse videbantur, egregiam operam nauasset, minus feliciter rem gessit, minusque optabilem suorum consiliorum exitum habuit. huic tali non euentum crimini dare atque exprobrare, & propter eam causam ei maledicere, sed pari potius cum eo molestia affici conuenit. Atque hæc omnia non solum in legibus ita se habere reperientur, verum etiam ipsa natura legibus non scriptis, & communibus hominum sensibus sanxit ac definiuit. Itaque AEschines vsque adeo omnes mortales acerbitate, & calumniandi studio superauit, vt etiam ea, de quibus ipse, tanquam de casibus aduersis, ludibrijsque fortunæ differbat, mihi criminis loco ponat. Et præter alias eius in me iniurias, proinde quasi sincerè, simpliciter, & optimo erga vos animo omnia dixerit, vos hortabatur & monebat, vt, me diligenter obseruetis, & caueatis, ne ego vobis fucum faciam, ne vos verbis insidiosis inducam, & circumueniam, cum me callidum ac versutum, planum, magum, sophistam, & alijs nominibus per contumeliam nominaret: quasi verò si quis ea prior alteri obiecerit, quibus ipse sit affinis, ita re vera sit futurum, quasi que auditores iam, quis sit is, qui dicat, attédere sint desituri. Ego verò cum sciam, istum vobis omnibus esse notum, tum mihi nequamquam dubium est, quin hæc multo magis in istum, quam in me conuenire existimetis. Neque illud me fugit, quæcumque in me est dicendi facultas: (demus enim esse aliquam: quanquam video equidem magna ex parte, eorum, qui dicunt, dicendi facultatis & eloquentiæ, auditores esse dominos, & moderatores: nam vt cuiusque orationem libenter auditis, & quali quenque bencuolen-

tia complectimini, talis de eius, qui dicit, prudentia, & eloquentia existimatio est.) si qua igitur & mihi huiusmodi dicendi exercitatio, facultasque suppetit, hanc vos profecto reperietis omnes in rebus communibus procurandis semper esse versatam: semper omnium iudicio expositam vobis publice profuisse, nunquam ne priuatum quidem cuiquam obfuisse: istius autem eloquentiam contra semper vobis perniciosam fuisse, non eò solum, quòd causam hostium agere consuevit: sed quòd si quis aliqua in reuoluntate, aut animum eius aliquo loco offendit, hos omni dicendi ratione oppugnare conatur. ita neque iuste, neque ex usu ciuitatis eloquentia vitur. Non enim virum fortem, & bonum ciuem conuenit à iudicibus, qui de re publica disceptaturi conuenerunt, postulare, ut odium, aut inimicitias cum aliquo susceptas, aut alium quempiam animi affectum sua sibi sententia expleant, atque confirmet: neque ira, ac dolore animi impulsus, quenquam in iudicium vocare, sed primum operam dare, ut ingenio sit præditus his affectibus libero ac soluto: deinde, si necessitate talis esse cogatur, eniti, & contendere, ut naturæ acerbitate consilio & ratione mitigasse, atque ad mediocritatem quamdam reuocasse videatur. Quibus igitur in rebus oratorem, & reipublice moderatorem, vehementem atque asperum esse oportet? in iis, in quibus aliquid, quod ad summam rempublice pertinet, in discrimen venit: in iis, in quibus aliquid rei populo cum aduersariis intercedit: in iis, in quibus hæc enim sunt viri fortis, & generosi, bonique ciuis. Eum autem, qui nullius unquam publici criminis, addam ne priuati quidem, neque nomine ciuitatis, neque suo, sibi putauerit à me poenas esse repetendas, nunc venire paratum atque instructum, ut coronam & laudem criminibus falsis inferendis, mihi adimat, & idcirco tot iam verba consumsisse: priuatarum inimiciarum, & inuidiæ, & angusti parique animi, nullius quidem certe probitatis signum est. ommissa verò mecum contentione, in hunc incurrere, hoc vno genere profecto, cetera omnia vitia inclu-

clusa continentur. Ac mihi vidéris, AEschina, istorum verborum multitudine cum laterum tuorum firmitatem ostentare, vocisq; tuæ specimen edere velles, idcirco hanc accusationem suscepisse, non quod vilius criminis pœnas expetere in animo haberes. verum non oratoris oratio, AEschina, neque vocis magnitudo & contentio magni aestimanda est, sed iudicio ac voluntate cum populo consentire, & conspirare, eosdemque odisse atque amare, quos patria: hæc magna sunt, hæc quantivis faciendæ sunt, hæc quantivis pretio atque honore digna sunt. Nam qui hoc animo est, is omnem dicendi rationem ad benevolentiam & caritatem civium conferet. At qui eos, à quibus sibi periculum aliquod civitas prospicit impendere, colit, & omni officiorum, obsequiorumque genere devincire conatur, non eadem naui, atq; populus, vehitur: non eundem portum, quem populus petit: neq; igitur eandem spem salutis, & incolumitatis, quam populus, habet. Vides quàm longè alia mea sit ratio? Ego enim easdem utilitates, atq; hi, mihi proposui: nihil mihi eximium, nihil præcipuum asciui, aut quæsiui. Tunc idem de te prædicare potes? quomodo? qui statim post pugnam legatus ad Philippum proficiscebaris: cuius in persona calamitatum, quæ temporibus illis patriæ nostræ acciderunt, causa consistebat: idque cum superiore omni tempore, hoc, ut omnes sciunt, munus recusasses, ac subterfugisses. Atqui, quis fucum facit? nõ qui aliud sentit, aliud loquitur? Cui verò præco malè precatur merito, iurèque optimo? non tali homini? quod porro crimen grauius oratori obijcere quisquam potest, quàm quod non eadem loquatur, atque sentiat? Tu igitur talis repretus es. Et tu cum istis factis audes vocem mittere? Audes horum ora intueri? Vtrum existimas hos nescire qui sis? an vsque adeò somnolentos atque obliuiosos esse censes, ut non meminerint, quæ tu inter contionandum, apud populum olim loquebare, cum tibi exitium precabaris, cum omni execratione caput tuum deuocbas,

cum dicerabas nihil tibi rei esse cum Philippo : sed me hoc tibi falsum crimen inferre, priuatis inimicitijs impulsam, odioque incitatum? Allato autem de pugna nuntio, jis, quæ antè dixeras, neglectis, subito amicitiam & hospitium tibi cum Philippo intercedere profitebaris ac præ te ferebas, mercede accepta hæc nomina transferens & commutans. Nam quænam potest afferri æqua, aut iusta causa, propter quam AEschinæ Glaucothæ tympanistriæ filio, vel hospes, vel amicus, vel omnino notus esset Philippus? Equidè non video: sed ei tuas operas ideo locauisti, ut horum comoda labefactares. Et tamè cum ita manifestò ab his proditor deprehensus teneris, cum in te ipsum post euenta rerum index extiteris, mihi maledicis, eaque obijcis, quorum culpam in quemuis potius, quam in me conferendam esse reperies. Multas sanè res, & magnas, & præclaras, me duce atque auctore, & gerèdas suscepit, & feliciter gessit nostra ciuitas: quarum eam non esse oblitam, hoc argumento est, quòd cum populus aliquè suffragijs creare vellet, qui orationem de laudibus mortuorùm haberet: ijs ipsis diebus, quibus recens erat cladis acceptæ memoria: non te creauit, quamuis delatus, ac nominatus esses, quamuis vocis magnitudine præstares: non Demadem, qui modò pacem fecerat, non Hegemonem, non quenquã denique alium vestrùm, sed me. Et cum tu in medium prodijsses, & vnà Pythocles, quo ore, dij immortales, quo aspectu, quo spiritu, qua immanitate? & cum his ipsis criminibus, quibus nunc tu solus, vos tum communi studio me insimulareretis, cum eadem maledicta in me congereretis: tanto etiam cupidius me illi muneri suis suffragijs præfecit. cuius rei causam tametsi tibi minimè obscuram, ego tamen breuiter explicabo. Nouerat ille meam in se beneuolentiam, meumque, quod in rebus agendis adhibebam, studium: nouerat idem scelus, improbitatem, atque iniustitiam vestram. Nam quæ bonis & optatis reip. temporibus iurati negabatis, hæc eadem ubi quid offenderat ciuitas

uitas, profitebamini. Eos igitur, qui in communibus omnium incommodis, & rebus aduersis arbitrabantur se suarum nefariarum cogitationum ac sententiarum licentiam, impunitatémque esse consecutos, re iandudum hosteis fuisse, tunc quidem denique seipsos aperuisse atque indicasse existimauit: simulque conuenire putauit, eum, qui de mortuorum laudibus dicturus, eorúmque virtutem verbis ornaturus esset, neque contubernalem, neque foederatum ijs, qui aduersus illos instructa acie depugnasset, fuisse: neque cum illic vnà cum ijs, quorum manibus Græciæ propugnatores essent interfecti, ob Græcorum calamitatem intemperanter epulatus & commissatus esset, laudesque deorum cecinisset, huc reuersum honore affici: neque inflexa voce, & fictis lacrymis, simulatòque dolore illorum fortunam deplorare, sed ex animo cum populo vniuerso verè dolere: quod quidem cum in se, tum in me esse videbat, in te verò minime. Neque porrò ita fecit populus: mortuorum autem parentes & fratres ad funus procurandum, exsequiasque cohonestandas à populo electi, secus: sed cum eos epulum dare oporteret, hoc ipsum tanquam apud eum, qui mortuos summa necessitudine attingeret, quemadmodum alia fieri solent, apud me fecerunt. Neque iniuria. Genere enim singuli singulis erant me propinquiores: communiter autem vniuersis nemo certè fuit coniunctior. Nam, cuius intererat maximè illos benè rem gerere, & saluos esse: is posteaquam tristem illum casum subierunt, (quem utinam effugissent,) doloris omnium interitu suscepti partem maximam tulit. Recita verò isti hoc epigramma, quod eis ciuitas inscribi voluit, vt ex hoc etiam intelligas, AEschinea, te calumniatorem importunum, & fascinatorem sceleratum esse. RECITA.

Pro patria hi tellure sua quondam arma tulere,

Protinus hostileis & repulere manus.

Dum inter se certant de virtute, atque timore,

Proiecere animas, iudice morte, suas:

Ne Græci seruire iugum ceruice ferentes,

Regum se gemerent sceptrâ superba pati.

Patria sed gremio cæсорum amplectitur ossa:

Nam legem humanis hanc deus imposuit.

Nil peccare deûm est, neque falli in rebus agendis,

Sed fati legem nõn licet effugere. Audis, AEschîna,

etiam in hoc ipso epigrammate, nihil peccare, neque falli in rebus agendis, deorum esse potestatem rei bene gerendæ ab ijs, qui dimicant, ac decertant, non suasori, sed dijs immortalibus ascripsit. Quid igitur mihi, ò scelus, his de causis maledicis, eaque loqueris, quæ dij immortales in tuum caput conuertant? Ex multis igitur alijs, quæ mihi crimini dedit, & quæ in me mentitus est AEschines, vnũ summopere demiratus sum, quòd, cum ea, quæ tum ciuitati nostræ acciderunt, memoria repeteret, non ea mente fuit, quam vir bonus, ac iustus, amansque patriæ ciuis præstitisset: non illa crymauit, non ingemuit, non vllò tali dolore commotum animum habuit, sed cum lætitia exsultans vocem contenderet, inflatòque & quàm maximè laxato guttore clamorem tolleret, putabat se videlicet, magnam mihi oratione sua inuidiam constare: verùm suo ipsius indicio declarabat, se non similem, atque alij, ex rebus aduersis molestiam capere. Atquæ is, qui sibi leges, & reip. curæ esse dicit, quemadmodum iste nunc, si nihil aliud, hoc certè habere debet, vt ijsdem rebus doleat, ac lætetur, quibus populus: neq; id reip. administrandæ consilium capiat, institutumque sequatur, propter quod se in aduersariorum præsidijs ac partibus collocasse videatur: quod tu nunc apertè fecisse videris, qui me omnium, quæ acciderunt, causam esse: qui ciuitatem, me suasore & impulsore, in has molestias incidisse criminaris, cum vos Athenienses, neq; mea administrandæ reip. ratione adducti, neq; meum cõsilium, aut institutum secuti, sed vestra sponte Græcis auxilium ferre cœperitis. Nam si mihi hoc à vobis daretur, vos me suasore atque auctore toties ei dominationi restitisse,

quæ

quæ in Græcos comparabatur, maius mihi à vobis præmium, quàm quæ vniuersa ceteris olim dedistis, tribueretur. sed neque ego hæc vnquam de me prædicarim (vobis enim iniuriam facerem) neque vos, fat scio, si dicerem, concederetis: & si iste iustum se erga vos præbere vellet, nunquam inimicitijs, quas mecum gerit, impulsus, laudes omnium laudum vestrarum maximas, & ornamenta vestra omnium prima, eximia, ac præcipua, inminueret, detereret, maledictis calumnijsque vexaret. Sed quid ego hæc in eo de isto queror, cum alia multo atrociora, & propter quæ iustius meam vicem deplorare debeam, crimina, eaque falsa mihi intulerit? Nam qui mihi studium Philippi, ò terra, ò dij immortales, obijcit, quid hic dicere non audeat? At qui per Herculem, reliquosque omnes deos immortalibus iuro, si falsis, confictisque criminationibus, & contumeliosis vocibus, quæ ab inimicitijs proficiuntur, de medio sublatis, spectare verè oporteat, qui sint ij re vera, quibus ea, quæ acciderunt, meritò, atque optimo iure omnes attribuere debeant: homines istius similes, non mei, in vnaquaque ciuitate huic culpæ affines fuisse reperientur: qui quo tempore res Philippi erant adhuc infirmæ, & admodum humiles, ac pusillæ, vobis sæpe prædicentibus, hortantibus, denique docentibus quid esset optimum factu, turpis sui questus gratia, vtilitatem Græcorum communem prodiderunt, cum suos ciueis singuli dolo circumuenirent, deciperent, corrumperet, eò usque quoad eos in seruitutem redegerunt, Theffalos Daochus, Cineas, Thrasylodorus: Arcadas Cercidas, Hieronymus, Eucalpidas: Argiuos Myrtis, Teladamas, Mnaseas: Elæos Euxitheus, Cleotimus, Aristechmus: Messenios Neo, & Thrasylodorus, Philiadæ dijs iniqui, & impij hominis filij: Sicyonios Aristarchus, Epichares: Corinthios Dinarchus, Demaratus: Megarensis Præodorus, Elixus, Perilaus: Thebanos Timolaus, Theogiton, Anemœta: Eubæos Hipparchus, Clitarchus, Sosistratus: dies me deficiat, si velim omnia

proditorum nomina perfequi. Hi omnes, quos dixi, Athenienses, iisdem sensibus ac voluntatibus præditi, iisdemque consilij in suis patrijs vsi, quibus apud vos isti, scelerati homines, atque impuri adulescentes, Græciæ pestes ac furia, qui suas singuli patrias mutilarunt, libertatem suam antea Philippo, nunc Alexandro, auro accepto propinarunt, ventre, & abdomine, & obscenis voluptatibus vitam beatam metientes. Libertatem verò, & nulli domino parère, qui prioribus illis Græcis erant fines honorum, & regulæ, quibus suas actiones dirigebat, funditus euerterunt. Huius igitur tam turpis, & flagitiosæ, omniumque sermone celebratæ conspirationis, & improbitatis, immodè verò, Athenienses, (si nugis omisissis seriò loqui volumus) proditæ Græcorum libertatis, cùm ciuitas nostra apud omnes homines culpa vacat, quod quidem ad meam reip. administrandæ rationem attinet: tum ego apud vos omni iusta reprehensione careo. Et tu à me quaris, cuius virtutis ergò præmium postulem. Ego igitur tibi respondeo, quia cùm omnes omnium Græcorum magistratus, & reip. gubernatores, quos quidem à te numerare potes, corrupti fuerint antea à Philippo, nunc ab Alexandro, me neque inclinatio temporum, neque verborum blanditiæ, neque promissorum magnitudo, neque spes, neque metus, neque gratia, neque aliud quippiam excitauit, neque impulit, neque induxit, vt quicquam eorum, quæ statuissem vel ad ius, vel ad vtilitatem patriæ pertinere, proderem: neque quæ vnquam his suasi, quemadmodum vos, ad lucrum, quasi in trutina, vergens ac propendens suasi: sed quæcûque à me gesta sunt, à recto, iusto, integro, incorrupto iudicio, animoque profecta sunt. & cùm omnium mortalium, qui mea ætate vixerunt, maximis rebus præfuerim, has omnes salutariter, & iustè administraui: propter has causas præmium mihi deberi dico. Hos autem muros, has fossas, quibus vrbe cinxi ac muniui, quæ tu maledico dente appetebas, ac raderabas, gratia quidem ac laude digna esse iudico. quid

ni? sed tamen hæc ipsa in meis rebus gestis non numero. Non enim lapidibus, neque lateribus urbem muniui, neque ob has res maximos mihi spiritus sumo: sed si munitiones meas iustè & attentè considerare velis, arma, castella, portus, vrbeis, nauis, cõplureis equos, & qui pro his propugnarent, milites, reperies à me esse ciuitati comparatos. His ego propugnaculis Atticam sepssi, atq; armaui, quãta maxima, humana ratio excogitare & consequi potuit: his totius Atticæ sineis vltimos, non Piræci, aut vrbis ambitum tantùm communiui. Neque verò cõsilijs aut cogitatis Philippi victus sum (longè aliter est) neque copijs, neque apparatu, sed sociorum nostrorum duces, & copiæ fortuna fuerunt inferiores. Quibus argumentis hæc demonstrare possum? illustribus, & luculentis: quæ, obsecro, sic vobiscum ipsi considerate. Quid beneuolum & amantem patriæ ciuem facere oportebat? quid eum, qui omni prouidentia, cura, studio, ac iustitia in administranda rep. patriæ consulcret? non à mari Atticam Eubœa tegere ac munire? à mediterraneis regionibus, Bœotia? ab ijs locis, quæ ad Peloponnesum spectant, nationibus huic finitimis? non quemadmodum res frumentaria vsque ad Piræum, mari vndique pacato, subueheretur, prouidere? & alia quidem iam antea quaesita & parta tueri & conseruare, auxilijs mittendis, dicendo, decernèdo, Proconnesum, Cherronesum, Tenedû? alia vt nobiscum pacem & amicitiam confirmarent, nobiscumque societate coniungerentur, efficere, Byzantium, Abydus, Eubœa? & maximas hostium opes, ac vireis, maximaque robora ijs demere ac detrahere? quæ deessent nostræ ciuitati, ea acquirere, atque adiungere? Hæc igitur omnia meis decretis, atque institutis, quæ in rep. gubernanda tenui, perfecta sunt: quæ si quis, Athenienses, sincere, ac sine inuidia ponderare, & considerare volet, recte ac sapienter à me esse cogitata, & summa cum fide ac iustitia administrata reperiet: nulli rei tempus à me neque prætermissum, neque ignoratum, neque

proditum, & quæcunque in vnus hominis potestatem, mentemque venire potuerunt, omnia à me esse summa diligentia, curaque præstita. Quòd si aut dei alicuius potentia, aut fortunæ vis, aut imperatorum vitium, aut eorum, qui vestras vrbeis prodiderunt, nequitia & improbitas, aut hæc simul omnia sumnam rem profligarunt ac labefactarunt, vsque eò donec funditus euerterunt, quòdnam Demosthenis crimen est? At si qualis ego erã apud vos, pro eo gradu ac loco, in quo fueram à vobis collocatus, talis vir vnus in vnaquaque Græcarum vrbiũ extitisset, immò verò si vnum solum Thessalia, vnum Arcadia habuisset, qui idem, quod ego, sentiret: nullus neque eorum Græcorum, qui sunt extra Thermopylas, neque eorum, qui sunt intra, his calamitatibus, in quibus nunc versatur, affectus esset, sed omnes essent liberi, suisque legibus vterentur, ab omni denique metu vacui, securi, otiosi, ac beati tutò suas ipsorum patrias incolerent, tantorumque ac talium bonorum gratiam, propter me, vobis & ceteris Atheniensibus haberent. Atque vt intelligatis facta verbis, quibus vtior, multo esse grandiora atque ampliora, ideò quòd inuidiam pertimescam: tolle hos libellos, & recita numerum auxiliorum, quæ me auctore, ac suasore, meis decretis ciuitati quæ sita sunt. Recita. NUMERVS AUXILIORVM EX DEMOSTHENIS DECRETIS. Hæc & talia, AEschinea, virum fortem & bonum ciuem agere oportet: quæ si benè ac feliciter cessissent, ô dii immortales: nobis haud dubie esse maximis ac potentissimis licuisset, idque sine cuiusquam iniuria: sed quando secus accidit, at certè hoc nobis reliquum est, quòd bene de nobis omnes homines existimant, quòd nemo neque ciuitatem nostram, neque eius institutum, consiliũque reprehendere potest, sed fortunam duntaxat vituperare, quæ talem rerum exitum esse voluerit. Hæc igitur bonus ciuis agere debet, non, cum à commodis & rationibus ciuitatis descuerit, seseque aduersarijs mercede locauerit, pretiòque fidem suam addixerit,

hostium potius, quàm patriæ temporibus operam nauare atque inferuire: neque cum, qui res ciuitate dignas tum dicere, tum decernere instituerit, atque ausus sit, & quod caput est, in his cõstanter permanferit, in inuidiam vocare, & calumnijs onerare: si priuam ab aliquo læsus sit, hoc meminisse, animóque penitus infixum tenere, neque otio ac silentio iniusto, infido, atque insidioso delectari: quod tu sæpe numero facis. est enim, si nescitis, Athenienses, est aliquod otium iustum, & vtile ciuitati, quod vos plerique ciues sincere & simpliciter amplectimini. Sed non hoc iste otium adamauit: nihil minus. verum remouens se, vbi ei commodum fuerit, (sæpe autem commodum est) ab administratione reip. speculatur & obseruat, quo tempore aut vos alicuius oratoris assidue dicentis ceperit fatietas, aut aliquid aduersi, fortuna reflante atque aduersante, acciderit, aut aliunde denique quippiam durius ac tristius euenerit: (multa autem huiusmodi fert vita) deinde hoc ipso tempore ex otio repente, tanquam ventus ac turbo cõortus, orator existit, & voce exercitata, magnóque nominum ac verborum accruo congesto & collecto, hæc ipsa connectit & contextit, & articulatè, ac distinctè, vnoque spiritu pronuntiat: que neque vnquam prodesse, neque cuiusquam rei bonæ fructum cuiquam ferre, sed contrà calamitatem cuiuslibet ciui importare, turpitudinèque ac dedecus inurere consueuerunt. At qui commentationum ac studiorum tuorum, AEschinea, si quidè ab animo casto, integro, ac pio, & eo, qui vtilitatem patriæ sibi propositam habeat, nascerentur, fructus latos atque vberes, & generosos, & omnibus vtilibus extare oportebat: ciuitatum societates, pecuniæ facultates, & vestigalia, mercatum structuras, legum salutarium rogationes, cum certis atque apertis patriæ hostibus susceptas inimicitias, & contentiones. hæc enim superioribus illis temporibus exquiri, spectarique solebant: & præteritum tempus viro forti, & bono, ciui suæ virtutis declarandæ ac probandæ sæpe facult

tatem dedit: quo in numero nusquam tu reperieris esse versatus: non primus, non secundus, non tertius, non quartus. quid tempus frustra contero? nō quintum, non sextum, non millesimum locum in eis obtines. non, inquam. Nam si ita esset, tuis rebus gestis, tuaque opera opibus, copijs, honore, dignitate, ciuitas aucta esset: quod de te prædicare non potes. Quæ enim societas te auctore ciuitati comparata est? quod auxilium? quæ beneuolentiæ, gloriæ, ue possessio quæsitæ? quæ tua legatio, quæ procuratio, aut administratio abs te commemorari potest, propter quam ciuitatis gloria sit propagata? quæ res vrbana, & domestica: quæ forensis, & externa, cui tu præfueris, tua opera correctæ, aut sanata est? quæ triremes, quæ tela, quæ naualia, quæ vrbis munitio, qui muri, quis equitatus abs te quæsitus est? quam ad rem denique vsui es? quando vel locupleteis, vel tenuis, atque egenteis communi in ciueis studio & amore prouectus, pecunia iuuisti? nunquam. Verùm, dicet aliquis, si nihil eorum ab AEschine re præstitum est, at non deest ei studium, & beneuolentia, & animus in patriam munificus ac liberalis. Vbi? quando? qui, ô omnium mortalium iniustissime; nentum quidem cum ij omnes, qui aliquando è loco superiore verba fecerunt, ad salutem publicam pecunias erogabant: & postremò Aristonicus pecuniam incolumitatis amissæ recuperandæ gratia coactam effundebat: nentum quidem prodiisti, neque quicquam rogasti. non quòd egeres: quid minus credibile? cui hereditas testamento Philonis soceri amplius quinque talentorum venit: qui duo talenta habebas tibi à decuriarum magistris dono data, eò quòd legē de triremium præfecturis abrogaras ac sustuleras. Verùm ne, dum mihi noua ex superiore semper nascitur oratio, ab instituto sermone longius degrediar, hæc missa faciam. sed ex his certè perspicuum est, non tibi rei nummariaæ difficultatem, aut rei familiaris inopiam, quominus liberalitatem in rep. cōferres, impedimento fuisse: sed quòd tuum illud institutum

tū tenere ac seruare fuderes, ne quid abs te fieret, quod ijs obesset, quorum arbitratu reip. administras. Quibus igitur in rebus acer & fortis es? quando magnificus ac splendidus es? vbi in hos aliquid dicere oportet, hinc tu clarissimè vociferaris, hinc magnopere vocem contendis, hinc acerrima memoria præditus es, hinc actor es optimus tragicus, & germanus Theocritus. Et verò etiam hoc loco de præstantibus in rep. viris, qui olim fuerunt, mentionem facis: & rectè facis, neque reprehendo. Verum tamen iniquum est, Athenienses, AEschinem sibi assumpta, atque in se deriuata ea, quam in mortuos habetis, beneuolentia, me, qui vobiscum vivo, cum illis componere & comparare. Quis enim omnium mortaliū nescit, viuos omneis inuidia fere aliqua laborare, alios maiore, alios minore? in mortuos autem, ne eorum quidem, qui inimici fuerunt, vllum odium remanere? Cùm hæc igitur ita sint comparata natura, cum ijs, qui ante me vixerunt, spectabor & comparabor? Minime. Nam neque iustum, neque æquum est, AEschine, sed tecum & cum alio, quem volcs, eorum, qui eadem, atq; tu, reip. administrandæ consilia ceperunt, idemque vitæ genus secuti sunt. Iam mihi illud quoque vide & considera, vtrum honestius ac melius sit ciuitati, propter antiquorum beneficia, quæ sunt ingentia atq; immensa: (nemo enim consequi dicendo possit, quanta sint) eorum, quæ hac ætate in patriam conferuntur, nullam gratiam referre, eaque cõtumeliosè vexare, ac vituperare, an ijs omnibus, quorum beneuolentia in rebus agendis claruerit, honorem, & humanitatis fructum populum Atheniensem imperitare. Atqui, Athenienses, si mihi hoc quoque dicendum est, mea reip. administrandæ ratio, meum consilium, atq; institutum (si quis diligenter & rectè attenderit) illorum, qui tum laudabantur, rationibus, ac voluntatibus simillimum esse, idemque spectare reperietur: tuū autem, eorum, qui tunc taleis viros calumniabantur, amentia maximè geminum. Perspicuum est enim nonnullos fuisse

etiã temporibus illis, qui cùm suæ ætatis homines male-
 dictis insequeretur, & vituperarent, veteres laudabant:
 rem maluolentię, & liuoris, & calumnię plenam, & ean-
 dem, quam tu facis, facientes. Et tamen audes dicere, me
 nulla ex parte illorum esse similem. At tu similis es, A E-
 schina? at frater tuus? at aliquis ex ijs, qui nunc sunt, ora-
 toribus? Ego enim prorsus nego esse quenquam. verùm
 cum ijs, qui viuunt, & meis æqualib⁹, ô vir bone, vt nihil
 aliud grauius dicam, me viuentem compara, quemad-
 modum & alia omnia, poëtæ, chori, palæstritæ conferri
 inter se consueuerunt. Philammo non quia Glauco Ca-
 rystio, & nonnullis alijs athleticis, qui antea fuerunt, erat
 inferior, atque infirmior, idcirco ex Olympico certami-
 ne sine præmio, coronâq; discessit: sed quia eorum, qui
 certamen cum ipso inierant, optimè pugnauerat, & coro-
 na donabatur, & voce præconis victor pronuntiabatur.
 Tu quoque me cum his, qui nunc sunt, oratoribus com-
 pone, & specta, tecum, & cum quo alio voles ex omni-
 bus. Nulli cedo: quorum omnium cùm quod ciuitati ma-
 ximè expediret, deligere ac sumere licebat, cùmque om-
 nibus in medio positum certamen erat, quis beneuolen-
 tia erga patriam ceteris præstare videretur: ego opinio-
 ne ac iudicio totius populi res optimas dicebam, ac de-
 cernebam: meis decretis, meis legibus, meis legationi-
 bus omnia agebantur, & transigebantur: nemo vestrùm
 vsquam comparebat, nisi si fortè his insultare, atque ob-
 trectare oporteret. sed posteaquàm ea euenerunt, quæ
 vtinam prohibuissent atque auertissent dii immortales,
 & cùm iam non suafores, sed homines, qui imperata fa-
 cerent, ac feruirent, homines contra patriam mercedem
 accipere parati, homines assentâdi studio dediti, quære-
 bantur: tum tu, & istorum tui similibus vnusquisque suo
 loco atque ordine magni, & splendidi, & magnifici diui-
 tiarum ostentatores volitabatis. Ego verò tenuis, atque
 infirmus eram, fateor. At certè beneuolentia erga popu-
 lum vobis superior. Hæc autem duo ciuem moderatum

ac temperatum natura habere oportet: (sic enim maximè mihi de memetipso dicere posse sine inuidia videor) in potestate & imperio, voluntatem & consilium animi magnitudinis, & primi gradus in Græcia ciuitati tueri & conseruare: in omni tempore, omnique actione beneuolentiam erga ciueis retinere. In hac enim, natura: in potentia autem, opibus, & viribus fortuna dominatur. Hâc igitur, quam dico, beneuolentiam apud me perpetuò mansisse reperiētis. Cui rei hoc erit testimonio, quòd neque cùm ad supplicium deposcebar, neque cùm in iudicia Amphictyonica vocabar, neque cùm hostes minis me terrebant, neque cùm promissis inuitabant, neque cùm sceleratos istos in me tanquam feras immaneis immittebāt, meam erga vos beneuolentiam vlllo modo deserui. Nam statim ab initio hanc iustam ac rectam reip. gerendæ rationem, ac viam secutus sum, vt honoribus, potentiæ, gloriæ ciuitatis seruirem, hæc auferem, cum his starem, pro his propugnarem. Neque verò aliorum rebus secūdis elatus, hilarus, atque alacer in foro inambulo, dexteram tendens, & istis læta nuntians, quos illuc perluros sperem: secundis aliquibus rebus ciuitatis auditis cohorresco, ingemisco, tristis capite demisso terram intueor, quemadmodum impij isti, qui ciuitati nostræ obtrectant, quasi verò non sibi ipsi, cùm hoc faciunt, obtrectent: deinde foras spectant, aliòque respectum habent: & vbi Græcis fortuna duriore conflictatis, aliquis alter fortunæ benignitatem expertus, rem suam bene gessit, hæc collaudāt, bene factum exclamant, & vt propria ac perpetua sit hæc felicitas, aiunt operā dare oportere. Nolite vos, obsecro, ò dij omnes immortales, nolite hæc numine, nutūque vestro comprobare: sed potius maximè quidem istis meliorem mentem date: sin autem eorum insanibilis amentia est, istos quidem ipsos separatim terra, marique funditus, & immatura morte delete ac perditē: nobis verò reliquis ciuibus, & in presens tempus impendentium ceruicibus nostris terrorum, ac pe.

colorum celerrimam liberationem: & in posterum, secundum vitæ sine vlla offensione cursum, stabilémque salutem date.



DION. LAMBINI IN IMAGVNCVLAM ARISTOTELIS ARGENTEAM, quæ eadem Michaelis Hospitalis Gallix cancellarij effigies videtur.



*Hæcine Aristotelis magni, clarique figura
Illius est, cui ser rerum natura creatrix
Nuda it totam, talos à vertice ad imos?
Principia, & causas rerum qui præ omnibus vnus
Perspexi, que, & perspectas miro ordine princeps
Tradidit, & delecta ratione, & iramite prono?
Qui ingenia, & mores hominum, affectusque animorum
Cognovit varios, formam, & naturam animantium
Cunctarum penitus vidit, viciūque, genū:que?
Qui quibus agrestes, & opuli, gentēque feroces
Legibus, & iussis, quo iure, & more regantur,
Et quibus ætatem tranquillam degere possint:
Rursus quæ tristem importent mala ciuibus agris.
Interitum potuit Graijs exponere chartis?
Est'ne ergo illius hæc argento impressa figura?
Atquæ cum frontem, atque oculos, narisque, caputque
Temporūque, & mentum aspicio, collostrūque totam
Luminibus formam, liquisse Acherunta videtur.
Magnus Aristoteles, tenebrisque in luminis oras.*

Emersisse.

Emerſiſſe, iterum exortus, nobiſque renatus.
 Namque ego in hac parua effigie te agnoſco, Michaël,
 Te venerande ſenex, cognomen ab hoſpite ducis
 Qui gentile tuum: cerno, inquam, in imagine piſca
 Te nouum Ariſtoſelem: tu illum omniparentis alumnum
 Natura eximum non ſolum fronte, geniſque,
 Et naſo: ſed, quod magis eſt mirabile habendum,
 Mente, animoque reſers, & moribus, ingenioque:
 Hoc mihi tu tantum differre videris ab illo:
 Ille quibus populi iuſſis, & legibus æuum
 Degere tranquillum, ac tutum, optatæque potiri
 Pace queant: quibus ediſtis ſua regna, quibusſue
 Conſilijs reges regere, aurigaræque poſſint,
 Preſcripſit: tu docte ſenex, tu regna ruine
 Proxima conſilio fulcis. Cum Gallia nuper
 Sanguinearum irarum æſtu conchiſſa labaret:
 Sanguine ciuili cum vrbes, campique natarent:
 Paſſim cum Germanus atrox, ſeuuſque Britannus:
 Et, qui plus æſtu, quam robore, pollet Iberus,
 Prædabundus, ouans, per pinguia Gallica rura,
 Per lætas ſegetes ſpolijs volitaret onyſtus:
 Cum ruerent vrbes lætæ, cum mœnia, & arces
 Tormentis validis magno labefacta fragore
 Conciderent: cum rex genus alto à ſanguine regum
 Peſtifera (impavidus licet, & formidinis expertus)
 Sed tamen horreret magnus puer arma ſuorum:
 Cum regis vocem ciuili imbuta cruore
 Spicula iactantes manibus ſe au dire negarent
 Præcipites rabie ciues, trepidique ſurore:
 Tu venerande ſenex ſajicni: i peſtore, & alta
 Mente, & conſilijs rectis, linguæque diſerta,
 Et ſuada, & docilis diſtis reſperſa cruore
 Arma extorſiſti populo irato, atque furenti:
 Tu tantos hominum motus, tamque horrida bella
 Ciuibus armatis alijs componere inermis
 Sciuiſti tandem, & tantos ſedare tumultus.







